



*sc. sup. 23. pl. 3.*









D. LUDOVICI HABERT,  
*Sacrae Facultatis Parisiensis Doctoris, Theologi,  
& Socii Sorbonici,*

# THEOLOGIA

## DOGMATICA ET MORALIS,

Ad usum

SEMINARII CATALAUNENSIS,  
Planissima, Critica, & solidissima Methodo  
conscripta,

Nunc verò

*Ad usum totius Orbis litterarii*

Post Editiones Parisiensem & Venetam  
in Germania denuò recusa,

in VIII. TOMOS divisa

plurimis Mendis sollicitè purgata.

# TOMUS VI

Continens Tractatus

## DE POENITENTIA, ET DE EXTREMA UNCTIONE.


*Editio prima in Germania.*


*Superiorum Permissu*

---

AUGUSTÆ VINDELICORUM,  
Sumptibus MATTHÆI RIEGER, Bibliopola,  
M DCC LI.







# I N D E X

## C A P I T U M

---

Tractatus

DE

P O E N I T E N T I A.

PRÆFATIO,

pag. 1.

Caput I. De nomine & definitione Pœnitentiae,

10

§. I. De nomine & definitione virtutis Pœnitentiae,

ibid.

(a) 2

§. II.

# INDEX CAPITUM.

§. II. <i>De necessitate virtutis Pœnitentiæ,</i>	Pag. 26
§. III. <i>De nomine Sacramenti Pœnitentiæ,</i>	38
§. IV. <i>De differentia virtutum Pœnitentiæ inter &amp; ipsum Sacramentum,</i>	41
Cap. II. <i>Utrum Pœnitentia sit Sacramentum proprie dictum, à Baptismo distinctum?</i>	57
Cap. III. <i>In quo consistat ligandi &amp; solvendi potestas Ecclesiæ concessa?</i>	74
Cap. IV. <i>Ad quæ peccata se extendat solvendi potestas Ecclesiæ concessa?</i>	85
<i>Solvuntur objectiones,</i>	91
Cap. V. <i>Quis sit Minister Sacramenti Pœnitentiæ,</i>	104
Cap. VI. <i>Satisfit variis difficultatibus circa potestatem jurisdictionis,</i>	114
Cap. VII. <i>De Casibus reservatis,</i>	129
Cap. VIII. <i>De Contritione.</i>	146
§. I. <i>De Contritione perfecta,</i>	148
§. II. <i>De Attritionis notione, ac differentia à Contritione perfecta,</i>	168
§. III.	

# INDEX CAPITUM.

§. III. <i>Utrum Concilium Tridentinum quidquam statuerit circa recens natam de Attritione controversiam?</i>	Pag. 172
§. IV. <i>Utrum Attritio ex metu poenarum concepta, sit sufficiens dispositio ad Sacramentum Poenitentiae?</i>	182
Cap. IX. <i>De Confessione,</i>	206
§. I. <i>De nomine seu definitione Confessionis,</i>	207
§. II. <i>De utilitate Confessionis,</i>	209
§. III. <i>De necessitate Confessionis,</i>	214
§. IV. <i>De Confessionis proprietatibus, siue conditionibus in genere,</i>	253
§. V. <i>De integritate Confessionis,</i>	256
§. VI. <i>Utrum Confessio sacramentalis fieri possit internuncio?</i>	265
§. VII. <i>De Secreto Confessionis,</i>	270
§. VIII. <i>De praecepto Ecclesiastico Confessionis,</i>	285
Cap. X. <i>De Satisfactione,</i>	301
§. I. <i>De nomine &amp; definitione Satisfactionis,</i>	302
(a) 3	§. II.

# INDEX CAPITUM.

§. II. <i>Quot modis satisfacit Deo?</i>	Pag. 311
§. III. <i>De utilitate Satisfactionis,</i>	318
§. IV. <i>De necessitate Satisfactionis,</i>	324
§. V. <i>De tempore, quo imponenda &amp; imple- nda est Satisfactio,</i>	339
§. VI. <i>De conditionibus Satisfactionis,</i>	345
§. VII. <i>De quantitate Satisfactionis,</i>	350
§. VIII. <i>Referuntur Canones Pœnitentiales juxta ordinem Decalogi,</i>	356
§. IX. <i>Quid observandum est Sacerdoti, ut sa- lutares &amp; convenientes satisfactiones injun- gat, juxta præceptum Concilii Tridentini?</i>	362
§. X. <i>Utrum Pœnitentia debeat esse secreta, an publica?</i>	383
§. XI. <i>De veteri Ecclesiæ disciplina circa Pœ- nitentiam publicam,</i>	385
APPENDIX <i>de Indulgentiis,</i>	403
§. I. <i>De Indulgentiarum definitione,</i>	ibid.
§. II. <i>De Indulgentiarum existentia,</i>	409
§. III. <i>De Indulgentiarum utilitate,</i>	416
§. IV.	

## INDEX CAPITUM.

§. IV. <i>De Indulgentiarum causis,</i>	Pag. 424
§. V. <i>De subjeſto Indulgentiarum,</i>	436
§. VI. <i>De Indulgentiis, quæ pro mortuis conceduntur,</i>	446
§. VII. <i>De diſiſione Indulgentiarum,</i>	457
Cap. XI. <i>De Forma Sacramenti Pœnitentiæ,</i>	462
§. I. <i>Quibus verbis conſtat Abſolutio,</i>	ibid.
§. II. <i>De iis, quibus concedenda, vel deneganda eſt abſolutio,</i>	471
§. III. <i>Satiſfit reliquis difficultatibus circa abſolutionem,</i>	498
Cap. XII. <i>De effectibus Sacramenti Pœnitentiæ,</i>	510

---

## Tractatus

De

## SACRAMENTO EXTREMÆ U N C T I O N I S.

Cap. I. <i>De exiſtentia Sacramenti Extremæ unioniſ.</i>	529
	Cap.

## INDEX CAPITUM.

Cap. II. *De Materia Sacramenti Extremæ un-*  
*ctionis,* Pag. 544

Cap. III. *De Forma Sacramenti Extremæ unctio-*  
*nis,* 551

Cap. IV. *De Ministerio Sacramenti Extremæ un-*  
*ctionis,* 554

Cap. V. *De subjecto Sacramenti Extremæ unctio-*  
*nis,* 558

Cap. VI. *De effectibus Sacramenti Extremæ un-*  
*ctionis,* 566

Cap. VII. *De necessitate Sacramenti Extremæ*  
*unctionis,* 583



Tra-





# Tractatus

DE

# SACRAMENTO POENITENTIÆ.

---

## PRÆFATIO.

**P**iget cum Tertulliano lib. de Pœnit. cap. 7. secundæ spei post violatum Baptismum subtexere mentionem, ne retractantes de residuo auxilio pœnitendi, spatium adhuc delinquendi demonstrare videamus. *Absit, inquit, ut aliquis ita interpretetur, quasi eo sibi etiam nunc pateat ad delinquendum; quia patet ad pœnitendum; & redundantia clementiæ cœlestis libidinem faciat humanæ temeritatis. Nemo idcirco deterior sit, quia Deus melior est, toties delinquendo,*

D. Habert Theolog. Tom. VI. A do,

*do, quoties ignoscitur. Evafimus femel per Baptifimum, rurius periculo nosmetipfos non inferamus, etfi iterum evafuros confidamus.*

*Sed enim, pergit idem Tertullianus, pervicaciffimus hofis ille nunquam malitiæ fuæ otium facit. Atqui tunc maximè sævit, cum hominem plenè sentit liberatum: tunc plurimum accenditur, dum extinguitur . . . . . non scandalis, non temptationibus deficit. Hæc igitur venena ejus providens Deus, claufa licet ignofcentiæ janua, & intinctionis fera obftructa, aliquid adhuc permifit patere. Collocavit in vestibulo pœnitentiam secundam, quæ pulfantibus patefaciat . . . . . Pigeat sanè peccare rursus, fed rursus pœnitere non pigeat. Offendifti, fed reconciliari adhuc potes; habes cui fatisfacias, & quidem volentem . . . . . Ille eft: fcilicet ille eft, qui mifericordiam mavult quàm sacrificium. Lætantur cæli, &, qui illic, Angeli pœnitentia hominis. Heus tu peccator bono animo fis, vides ubi de tuo reditu gaudeatur.*

Verùm ifta funt adverfario noftro majoris invidiæ incentiva. Scilicet tam copiofam tamque inopinatam gratiam homini, nullam verò fibi concessam non fufstinens, qua vi, qua arte efficaciffimum illud Pœnitentiæ remedium, hinc per armatos Hæreticos de medio tollere, inde per adulterinam & umbratilem Catholicorum pœnitentiam in venenum convertere ab initio ufque adhuc aggreffus eft. Quot hærefes

ses Sacramentum Pœnitentiæ impugnarunt ? An non quotidie circumlatrant qui foris sunt Novatores, Ecclesiæ Catholicæ doctrinam de Pœnitentia esse satanicam ? Sed aliud bellum eo periculosius, quo intestinum ac domesticum à primis sæculis fuscitatum contra Pœnitentiæ Sacramentum in dies instaurare non desinit salutis humanæ infensissimus hostis, hanc nempe in multorum animis opinionem inserit, Pœnitentiam sola confessione peccatorum constare, totiesque veniam concedendam, quoties peccator sine emendatione peccatum suum profitetur potius quàm accuset. *Tum opinor, inquit Tertullianus cap. 6. emendatos liquebit, cum absolvimur ? Nullo pacto. Sed cum pendente venia pœna prospicitur : cum adhuc liberari non meremur : ut possimus mereri, cum Deus comminatur non cum ignoscit . . . . Quis enim tam infidæ pœnitentiæ viro asperginem unam cujuslibet aquæ commodabit ? Et infra, non ideò ablui-mur, ut delinquere desinamus sed quia desimus. Et c. 9. bujus igitur pœnitentiæ secundæ & unius, quanto in arcto negotium est, tantò operosior probatio est, ut non sola conscientia præferatur, sed aliquo etiam actu administretur.* Cùm autem ejusmodi persecutio in Sacramentum Pœnitentiæ acriùs desæviret, nedum quiesceret, ætate S. Cypriani, & lapsi ante offensam placatam indignantis Domini, ut ipse loquitur ferm. de lapsis,

Sacerdotibus opera pœnitentiæ exigentibus erecta cervice nascerentur, minarenturque, beatus Martyr vehementiori stylo eorum audaciam infectatus est; *emersit, inquit, novum genus cladis, & quasi parum persecutionis procella sævierit, accessit ad cumulum sub misericordiæ titulo malum fallens, & blanda pernities . . . . . Pœnitentia de pectoribus exclusa est, gravissimi extremique delicti memoria sublata est. Operiuntur morientium vulnera, & plaga lethalis altis & profundis visceribus infixæ, dissimulato dolore contegitur . . . . . Non est pax illa, sed bellum: nec Ecclesiæ jungitur, qui ab Evangelio separatur. Quid injuriam beneficium vocant? Quid impietatem vocabulo pietatis appellant? Quid eis, qui flere jugiter, & vocare Dominum suum debent, intercepta pœnitentia lamentatione communicare se simulant? Hoc sunt bujusmodi lapsis, quod grando frugibus, quod turbidum sydus arboribus, quod armentis pestilens vastitas, quod navigiis sæva tempestas. Solatium æternæ vitæ adimunt.*

Igitur ad plenam & integram Sacramenti Pœnitentiæ notitiam duo nobis præstanda sunt. Primum, vindicanda est Sacramenti veritas, & stabilienda plura fidei dogmata contra totidem Hæreticorum commenta. Secundum, afferenda necessaria Ecclesiæ disciplina circa usum hujusce Sacramenti contra fucatam plurium Catholicorum Pœnitentiam, & laxiorem quorundam

rundam Confessariorum morem, qui, ut verbis S. Cypriani utar, dum peccatores blandimentis adulantibus palpant, delicta non comprimunt, sed nutriunt. Primum theoriam spectat: secundum praxim.

Circa praxim autem quam plurima dicenda occurrunt, quæ si sigillatim discutiantur, opus erit integro volumine; namque 1. exponendum est, quæ sint partes Ministri hujusce Sacramenti, qua sanctitate debeat esse instructus & munitus contra peccandi occasiones, quibus se committit: quo zelo fervere: qua scientia & prudentia pollere, ut ministerium suum longè difficillimum ac periculosissimum fideliter impleat, neve sit unus ex illis, quibus Deus exprobrat, Jerem. 6. v. 14. *Curabant contritionem filiae populi mei cum ignominia.* Est quippe Judex simul & Medicus. Judex quidem, qui, ut justè pronuntiet, non ad allegata tantum, ut nonnulli falso autumant, sed ad probata proximè attendat necesse est; num scilicet verus sit dolor, ut asseritur, & pœnitentia sufficiens; *hoc enim pretio*, inquit Tertullianus cit. lib. de Pœnitentia cap. 6. *Dominus veniam addicere instituit, hac pœnitentiæ compensatione redimendam proponit impunitatem.* Si ergo qui vindicant, prius nummum, quo paciscuntur, examinant, ne sculptus, neve rarus, ne adulter; etiam Dominum credimus pœnitentiæ probationem prius

*inire, tantam nobis mercedem, perennis scilicet vitæ concessurum.* Jam vero Sacerdotes à Deo constituti sunt, qui ejus nomine & tanquam Ministri ab eo deputati pœnitentiæ nummum examinent. Quapropter Patres generalis Concilii Lateranensis II. gravissimis hisce verbis illos compellant canone 22. *Confratres nostros Episcopos & Presbyteros admonemus, ne falsis pœnitentiis laicorum animas decipi, & in infernum pertrahi patiantur.* Denique Clerus Gallicanus anno 1700. post Innocentium XI. anno 1679. & Academiam Lovaniensem anno 1653. hancce quorundam Modernorum propositionem erroneam, & ducentem ad impœnitentiam finalem declaravit, *pœnitenti habenti consuetudinem peccandi contra legem Dei, naturæ, aut Ecclesiæ, etsi emendationis spes nulla appareat, nec est deneganda, nec differenda absolutio; dummodo ore proferat se dolere & proponere emendationem.* Confessarius ergo spem concipere debet non vanam, sed prudentem futuræ emendationis eorum, quos absolvit. Quomodo autem id prudenter conjiciet, quæstio est ad praxim perti- nens, quæ nonnisi ex certis regulis solvi potest.

Est etiam spiritualis Medicus eorum, qui ad se confugiunt, ut colligitur ex illo Ezech. 34. *quod infirmum fuit non consolidastis, & quod agrotum non sanastis;* quibus verbis nixus S. Cyprianus ferm. de lapsis scribit: *Si oportet Dei Sa-*  
cerdo-

*cerdotem non obsequiis decipientibus fallere : sed remediis salutaribus providere. Imperitus est Medicus, qui tumentes vulnerum sinus manu parcente contrectat ! & in aliis recessibus viscerum virus inclusum, dum servat, exaggerat. Aperendum vulnus est & secandum, & putredinibus amputatis medela fortiore curandum. Vociferetur & clamet licet, & conqueratur æger impatiens per dolorem, gratias aget postmodum, cum senserit sanitatem. Quibus verbis metaphoricis Sanctus Doctor & Martyr commonet ægritudines animæ plerumque ægros latere, idemque contingere pœnitentibus quod corpore ægrotantibus. Hi quippe gravem morbum aliquando levem existimant, quandoque etiam, cum sensu doloris careant, non agnoscunt. Sed illud frequentius accidit, nempe frustra remedia adhibent, ver. gr. capiti, ob dolorem quo ibi premuntur, quia causam mali ignorant, scilicet intemperiem viscerum, quibus proinde mederi oportebat, non capiti. Similiter & pœnitentes : aut ipsis Religio non est, quominus multa illicita faciant ; aut si eorum conscii fuerint, levia putant, quamvis gravia : aut quæ revera sunt ex suo genere levia, quàm tamen periculosa sint propriæ salutis & humanæ societati non intelligunt.*

Enimverò ad morem vivunt homines, non ad legem, aut ad rationem, inquit olim Seneca : attendunt, non quid debeant, sed

quid faciant artifices, mercatores, præfecti rebus Ecclesiasticis ac politicis, & ita crimen evadit licitum, cum incipit esse publicum, ut observat S. Cyprianus epist. 1. ad Donatum, & Sanctus Augustinus Enchir. cap. 80. *Peccata, inquit, quamvis magna & horrenda, cum in consuetudinem venerint, aut parva, aut nulla esse creduntur: usque adeo ut non solum non occultanda, verum etiam prædicanda ac diffamanda videantur . . . . .*

*Væ peccatis hominum, quia sola inusitata exhorrescimus, usitata verò . . . . . quamvis tam magna sint, ut omnino claudi contra sese faciant regnum Dei, sæpe videndo omnia tolerare, sæpe tolerando nonnulla etiam facere cogimur. Atque utinam, o Domine, non omnia, quæ non poterimus prohibere, faciamus.* Facit autem, & socium criminis se adjungit spiritalis Medicus, si tamen Medicus sit appellandus, qui, ut supra dicebat Sanctus Cyprianus, vulnera in altis recessibus viscerum per ignorantiam vincibilem inclusa aperire detrectat, ne scilicet vociferetur & conqueratur æger impatiens.

Sed quid prodest aperuisse vulnus, nisi congruis remediis sanetur? Annon cura & sollicitudo Medici supervacanea fuerit & ægrotantibus onerosa, nisi sanitatem perficiat? Quæ verò animæ sanitas, nisi justitia & emendati mores? Ergo *ubi emendatio nulla, inquit Tertullianus citato libro cap. 2. poenitentia necessaria vana; quia caret fructu suo, cui eam Deus inserit, idest*



*id est hominis saluti.* Atqui Sacramentum Pœnitentiæ per se est efficacissimum, nullus animi morbus vincit divinum illud medicamentum, gravissima quæque peccata expungere potest. Qui fit igitur, ut post adhibitum universis fidelibus tam potens remedium, sicut contingit in Festis Paschalibus, non mutetur rerum facies, eadem cernantur scandala, eadem agendi ratio? nimirum leges & præcepta spiritualis hujusce medicinæ accuratè non servantur: satis videtur pluribus Ministris, si fidei dogmata, veluti prima principia, noverint: ipsam verò disciplinam & praxim, in qua ars medendi potissimum consistit, aut ignorant, aut negligunt. Quamobrem praxim pœnitentiarum ad usum Dioceseos Virdunensis jampridem vulgavimus, quæ cum intra angustos limites hujusce Tractatus includi nequeat, ad eam lectores eò fidentius remittimus, quòd & ex pluribus editionibus, quæ prodierunt ex officina hujus nostri Typographi, & ex usu Seminariorum, è quibus Sacerdotes recens inaugurati ad munia Sacerdotalia non prius emittuntur, quàm praxim illam perfectè didicerint; hanc qualemunque operam nostram viris piis, & Ecclesiasticæ disciplinæ amantibus probatam esse intelligamus. Eas tamen disciplinæ partes hîc attingemus, quæ cum fidei dogmatibus ita connexæ sunt; ut vix ab eis separari queant.



## CAPUT PRIMUM.

De nomine &amp; definitione Pœnitentiæ.

**P**œnitentia dupliciter accipitur. 1. Pro virtute. 2. Pro Sacramento novæ legis à Christo instituto. De nomine & definitione Pœnitentiæ in utraque acceptione separatim dicendum videtur.

## §. I.

*De nomine & definitione virtutis Pœnitentiæ.*Q. 1. *Unde dicitur Pœnitentiæ nomen?*

R. Alii illud repetunt à punitione, ita ut pœnitentia dicatur quasi punientia: *Quia*, inquit S. Isidorus in exhort. ad pœnit. *homo punit in se ulciscendo, quòd malè admisit.* Alii communiter illud nomen derivant à pœna, quasi pœnitere idem sit ac pœnam tenere. Ita Auctor libri de vera & falsa pœnitentia apud S. Augustinum cap. 29. in quo sic habet: *Pœnitere, est pœnam tenere, ut semper puniat in se ulciscendo, quòd admisit peccando.* Huc accedit S. Isidorus, lib. 2. de Officiis cap. 16. Magister Sententiar. lib. 4. & cæteri deinceps Theologi.

Pseudo-Reformati in hoc ipso Tractatus limine nos lite iniqua morantur; contenduntque Auctorem vulgatæ editionis peccasse, dum resipiscentiam peccatoris è Græco textu expressit nomine Pœnitentiæ; in Græco quippe habetur,

μετάνοια,

μετάνοια, quæ vox apud Scriptores tum profanos, tum Ecclesiasticos significat mutationem consilii, nullatenus verò dolorem & afflictionem spiritus, ut Tertullianus observat libro 2. contra Marcionem cap. 24. *Nam & in græco sono, inquit, pœnitentiæ nomen, non ex delicti confessione, sed ex animi demutatione compositum est.* Novatores autem hancce controversiam de nomine, consentaneè movent ad suum palmarem errorem, quo definiunt hominem justificari per fidem sine bonis operibus, ex quo deducunt 1. optimam pœnitentiam esse tantum novam vitam. 2. Satisfactionem pœnitentium non esse aliam quam fidem, qua apprehendunt Christum pro eis satisfecisse: quem utrumque errorem Concilium Tridentinum sess. 14. can. 12. & 13. anathemate percussit, simulque statuit resipiscentiam peccatoris non solum cessationem à peccato; & vitæ novæ propositum & inchoationem, sed veteris etiam odium cum tristitia continere. Cum igitur nomen Pœnitentiæ illa duo feliciter exprimat, merito vindicatur, quidquid significet græca vox μετάνοια, secundum vim nominis spectata; minus quippe attendendum est ad vocum etymon & originem, quam ad earum usum & acceptionem: vox, homo, v. g. secundum etymon, humum, aut terrenum duntaxat significat; juxta usum tamen accipitur pro composito, quod constat ex corpore & anima rationali, nec alio sensu, usurpari potest.

Q. 2. *Vox μετάνοια juxta usum significatne consilii mutationem cum animi dolore & tristitia?*

R. Ita usurpatur tum à profanis Scriptoribus, tum à Scriptura sacra: tum à sanctis Patribus.

Ac

Ac 1. quidem à profanis Scriptoribus. Cice-  
ro Tuscul. 4. *Alexandrium regem, inquit, videmus,  
cum interemisset Clitum familiarem suum, vix à se ma-  
nus abstinuit, tanta vis fuit pœnitendi, Ovid. lib. 1.  
de Ponto Elegia 1.*

*Pœnitet, & factò torqueor ipse meo.*

Quin apud Ethnicos fuit Dea hoc nomine ap-  
pellata, de qua Ausonius in disticho.

*Sum Dea, quæ facti non factique exigo pœnam,  
Nempe ut pœniteat, sic metanea voceor.*

2. In Scripturis μετανοια sumitur pro mutatio-  
ne consilii simul, & afflictione mentis & cor-  
poris, Job. 42. vers. 6. *Idcirco me reprehendo, &  
ago pœnitentiam in favilla & cinere.* Jonæ 3. Ni-  
nivitæ pœnitentiam egerunt in Jejuniis & cinere  
faccis induti. Joelis 2. vers. 12. & 13. *Conver-  
tinini ad me in toto corde vestro, in jejunio, & in  
fletu, & in planctu, & scindite corda vestra, & non  
vestimenta vestra.* Sapientiæ 5. vers. 3. *dicentes  
intra se, pœnitentiam agentes, & præ angustia spiri-  
tus gementes, &c.* Matth. 11. vers. 21. Et Luc. 10.  
vers. 13. *Si in Tyro & Sidone factæ fuissent virtutes,  
quæ factæ sunt in vobis, olim in cilicio & cinere seden-  
tes pœniterent.*

3. Ecclesia μετανοια in eadem significatione  
semper usurpavit, ut patet ex constanti ejus  
traditione. In præfatione insignes Tertulliani,  
& sancti Cypriani textus protulimus, in qui-  
bus virtus pœnitentiæ cernitur tota in emenda-  
tione, morum, doloribus, & luctuosis operibus.  
Lactantius institut. libro 6. cap. 24. *Græci, in-  
quit, melius & significantius μετανοια dicunt, quam  
nos possumus resipiscentiam dicere; resipiscit enim, &  
mentem suam quasi ab insania recipit, quem errati piget,*  
casti-

*castigatque seipsum dementiæ, & confirmat animum ad rectius vivendum; tum illud ipsam maximè cavet, ne rursus in eosdem laqueos inducatur. Sanctus Augustinus Sermone 351. aliàs homil. 50. Non sufficit ad pœnitentiam mores in melius emendare, nisi etiam satisfiat Deo per pœnitentiæ dolorem, per humilitatis gemitum, per contriti cordis sacrificium, cooperantibus lacrymis. Sanctus Gregorius humil. 34. in Evangelia, ait: Pœnitentiam agere est perpetrata mala plangere, & plangenda non perpetrare.*

Denique in Ecclesia tum Orientali, tum Occidentali, Pœnitentia, qua Catechumeni præparabantur ad Baptismum, & lapsi ad reconciliationem, peragebatur in luctu, in jejuniis & aliis carnis afflictationibus. Unde mirari licet Novatorum temeritatem, qui ausi sunt mutare vocum significationes ab omnibus receptas, hac sola ducti ratione, quòd eorum errores explodant.

Quod afferunt ex Tertulliano contra Marcionem, nullius est ponderis; Tertullianus quippe eo loci loquitur de pœnitentia, quæ Deo tribuitur in veteri Testamento, scribitque contra illum Hæreticum pœnitentiam non arguere in Deo imperfectionem, quemadmodum in hominibus; quia secundum vim nominis græci sonat mutationem, in Deo quidem operum, sed sine tristitia; in hominibus verò consilii cum dolore & tristitia, ex qua procedunt gemitus, lacrymæ, & alia opera luctuosa, quæ latè describit libro de Pœnitentia.

Q. 3. *Suntne alia Pœnitentiæ nomina?*

R. Duo alia ex Scripturis sortita est, quæ solo vocis sono Hæreticorum machinas subvertunt. Itaque

Voca-

Vocatur 2. cordis compunctio, à verbo *compungo*, quo Scripturæ pluribus in locis exhibent cor pœnitentis quasi confixum doloris aculeis, ut Act. 2. vers. 37. *His autem auditis compuncti sunt corde*, Psalm. 4. *quæ dicitis in cordibus vestris, in cubilibus vestris compungimini*: idest, quæ per diem malè cogitastis, per noctis quietem mente revolvite, & inde dolete, Psal. 34. in sensu allegorico, de Judæis per orbem dispersis in pœnam sui sceleris, nec propterea pœnitentibus, *dissipati sunt, nec compuncti*. Unde sanctus Augustinus in Psalmum 57. paulò ante finem, ait: *Pœnitentia hujus temporis dolor medicinalis est: pœnitentia hujus temporis (Judicii extremi) dolor pœnalis est. Non vis illas pati spinas, hic compungere spinis pœnitentiæ, ut facias, quod dictum est, conversus sum in ærumna mea, dum configitur spina . . . . modò fac, modò compungere, ne in te fiat quod dictum est de quibusdam detestabilibus, discissi sunt, nec compuncti*.

Sed celebre est in Ecclesia, & à primis sæculis consecratum contritionis nomen, quo virtus pœnitentiæ indigitatur.

Derivatur autem à verbò *contero*, quo Scriptores sacri sæpè sæpiùs utuntur ad significandum intimum Pœnitentis dolorem, Isaias 57. vers. 15. *Hæc dicit Excelsus . . . . in excelsò & sancto habitans, & cum contrito & humili spiritu*, Psalm. 50. *Cor contritum & humiliatum, Deus non despicias*, Psalm. 146. *qui sanat contritos corde, & alligat contritiones eorum*. Quæ verba expendens sanctus Augustinus enarr. in hunc Psalmum, sic scribit: *Quid est conterere cor? Notum sit, charissimi, fiat, ut sanari possitis. Et paulò post: Audi quid te velit offerre (scil. pro peccatis) sequitur & dicit, Sacrificium Deo spiritus contribu-*

tribulatus, cor contritum & humiliatum, Deus non despicias : *Sanat ergo contritos corde ; quia illis appropinquat ut sanet, sicut dicitur in alio loco, prope est Dominus his qui obtriverunt cor (scilic. Psal. 33. in quo legimus secundum Vulgatam Editionem, qui tribulato sunt corde :) Qui obtriverunt cor ? humiles. Qui non obtriverunt cor ? superbi. Contritum sanabitur, elidetur elatum . . . sanat, inquit, contritos corde ; sanat ergo humiliatos corde, sanat confidentes, sanat seipsos punientes, in se severum iudicium exercentes, ut possint esse illius misericordiam sentientes.*

S. autem Thomas in 4. dist. 17. qu. 2. & in Suplemento quæst. 1. artic. 1. docet virtutem pœnitentiæ dici contritionem per metaphoram ductum à duro & scabroso lapide, qui nisi frangatur, resistit, manum contrectantem, & comprimentem pungit, læditque ; sed attritus, seu confractus facile cedit : contritus autem perfectè, & quasi in pulverem redactus, mollis sentitur, potestque madefactus quamlibet figuram accipere. Similiter cor lapideum peccatoris est intractabile, obsistit monitis & exhortationibus, correptionis tela in illud emissa, impudenter remittit in corripientem, nam *sapientior sibi piger videtur septem viris loquentibus sententias*, ut dicitur Prov. 26. vers. 16. At dolore fractum, jam docile est ac humile, præceptis & sanis consiliis acquiescit eo facilius ac promptius, quò perfectior est ejus dolor.

Duplex enim est dolor : alius imperfectus, qui attritio dicitur, quasi cor peccatoris atterat, & velut in majusculas partes frangat : alius perfectus, qui dicitur contritio cor conterens, ac in minutissimas partes comminuens. Priori dolore attritus peccator non resistit sicut prius acquies-

quiescit iis quæ audit absolutè necessaria ad salutem consequendam, vitandamque damnationem æternam; sed cor ejus fractum duntaxat, necdum veluti in pulverem comminutum quandam duritiem retinet, hoc est, plures servat cupiditates, per quas in levioribus resistit. Posteriori verò dolore cor confixum & contritum non repugnat nisi malo, & cupiditatibus ad illud impellentibus, fit docile, & quasi lutum in manibus figuli, tractabile ad omnem pietatis formam: *Quod est contritum*, inquit sanctus Chrysostomus hom. 9. in epistola ad Hebræos, *non exurgit, non ferit, sed est paratum ad omne malum perferendum. Ejusmodi est cordis contritio, etiamsi contumelia affecta fuerit, etiamsi malè & indignè accepta conquiescit, nec ad ultionem incenditur gratia illustrante.* In quo autem attritio, & contritio inter se differant, expendetur suo loco.

Q. 4. *Quomodo definitur virtus Pœnitentiæ?*

R. Definiri potest ex dictis, virtus moralis infusa inclinans peccatorem ad detestationem, & dolorem proprii peccati, quatenus est offensa Dei cum efficaci emendationis ac satisfactionis proposito.

Dicitur 1. *Virtus*; Quia virtus est habitus electivus secundum rectam rationem: atqui recta ratio exigit, ut quis malum detestetur; & si fecerit, doleat, ad meliorem frugem se convertat; & si quem læserit, satisfactionem ei offerat.

Ergo pœnitentia, seu contritio non est tremor & motus animi coactus, ex apprehensione judiciorum Dei, ut finxerunt Lutherus & Calvinus; sed est actus liber judicio rationis imperatus. Solet quidem præire pœnarum timor ut in  
Nini-



Ninivitis, qui ad Jonæ prædicationem plenam terroribus, ut loquitur Concilium Tridentinum sess. 14. cap. 4. pœnitentiam egerunt; sed voluntariè, & liberè sequitur ipsa contritio seu pœnitentia, quemadmodum sub anathemate definit idem Concilium, can. 5. ejusdem sessionis.

Dicitur 2. *Moralis*; Quia non habet Deum pro objecto, sed satisfactionem ipsi debitam & exhibendam; nam ex S. Thoma 3. part. qu. 85. art. 3. ad primum, pœnitentia se habet ad Deum, sicut justitia commutativa ad hominem: atqui objectum justitiæ non est homo, sed res homini debita, & ei reddenda tanquam fini cui: ergo nec Deus est objectum pœnitentiæ, sed satisfactio ei exhibenda.

Dices: sicut ad charitatem pertinet gaudere de bono amici; ita & tristari de ejus malo: ergo pœnitentiæ virtus est ipsamet charitas, ac proinde virtus Theologica.

Distinguo anteced. Tristari modo charitati proprio, Conc. Tristari modo pœnitentiæ proprio, Nego anteced. Itaque omnis virtus refugit malum oppositum bono, quod prosequitur. Religio v.g. inclinatur ad detestandam omnem irreverentiam contrariam cultui Dei, quod est ejus objectum: vir justus per justitiam ægrè fert proximum injustè opprimi, per charitatem nomen Dei blasphemari. Ergo sicut illi dolores sunt distinctarum virtutum, quia eliciuntur ex diverso honestatis motivo, ita dolor quo dolemus ob proprium peccatorum, quatenus est offensa Dei, est specialis virtutis, nempe pœnitentiæ illudque amplius suadet exemplo filii, qui ob injuriam patri irrogatam aliter dolet si ab aliis, aliter si a

femetipso fuerit irrogata; in posteriori quippe hypothefi non folum pietate ad dolendum movetur ficut in priori; fed etiam pœnitentia, quæ ficut pietas nudè ac fimpliciter fpectat injuriam patris, fed quatenus à feipfo illata eft, unde nafcitur fpeciale dolendi motivum.

Dicitur 3. *Infufa*; Juxta illud Jer. 31. v. 19. *Postquam . . . convertifti me, egi pœnitentiam.* Act. 5. verf. 31. *hunc principem & Salvatorem Deus exaltavit dextera fua, ad dandum pœnitentiam Ifraeli.* Et capite 11. verf. 18. *Ergo & gentibus pœnitentiam dedit Deus ad vitam.* Et ratio eft, quia vera pœnitentia difponit ad juftificationem, tenditque ad abolendam Dei offenfam, ad exhibendam pro ea fatisfactionem, & reconciliandum hominem cum Deo: atqui virtus naturalis, & acquifita non poteft ifta præftare, ut definitum eft capite 3. fefione 6. Concilii Tridentini: *Si quis dixerit fine præveniente Spiritus Sancti inspiratione, atque ejus adjutorio hominem . . . pœnitere poffe ficut oportet, ut ei juftificationis gratia conferatur; anathema fit:* Ergo virtus pœnitentiæ revera eft fupernaturalis & infufa, meritòque Clerus Gallicanus hæreticam pronuntiavit anno 1700. hancce propofitionem, *probabile eft, fufficere attritionem naturalem, modò honeftam.*

Dices: virtus pœnitentiæ infunderetur vel ante juftificationem, vel in ipfa juftificatione: atqui neutrum dici poteft. Non ante juftificationem; quia virtutes morales non infunduntur ante gratiam fanctificantem & charitatem, utpote illarum appendices: neque etiam in juftificatione, cum foret tum inutilis, deletò jam peccato, abolita Dei offensa & reconciliatione perfecta: fani-

sanitate enim adepta, rejiciuntur remedia; utpote supervacanea: Ergo.

Nego minorem, ad cujus confirmationem respondeo.

1. Pœnitentia, quamvis ante justificationem non infundatur quoad habitum, propter rationem in objectione allatam; infunditur tamen quoad actum; peccator quippe movetur ad pœnitentiam, per gratiam Spiritus Sancti nondum quidem inhabitantis, sed assistentis & disponentis ad justificationem, ut diximus Tract. de Gratia, ubi de justificatione. 2. In ipsa justificatione cum gratia sanctificante & charitate, infunditur habitus pœnitentiæ, qui tum dici nequit inutilis, & quidem multiplici de causa. 1. quia peccata licet in justificatione deleta, toties displicere debent, quoties eorum memoria recurrit, juxta illud Isaia 38. *recogitabo tibi omnes annos meos in amaritudine animæ meæ.* David accepto hocce divino oraculo, 2. Reg. 12. *Dominus transfudit peccatum tuum, nedum lacrymas continuerit, quin tam inopinatum Dei beneficium fuit illi incentivum flendi amplius, ut constat ex pluribus ejus psalmis. Laboravi in gemitu meo, inquit Psal. 6. lavabo per singulas noctes lectum meum, lacrymis meis stratum meum rigabo.* Si autem David jam certior factus peccata sibi fuisse dimissa, nihilominus ea tam amarè deflebat memor se graviter deliquisse in Deum, quem in dies magis ac magis experiebatur sibi optimum; quanto magis nos affligi debemus, qui post susceptum Sacramentum, idè nescimus utrùm odio an amore firmi digni, ut continuus sit nobis dolor, quòd aliquando in Deum peccaverimus? Ita S. Gregorius libro 2. epistol. 22. ad piam Matronam, *secura*

de peccatis remissis, inquit, fieri non debes : nisi cùm jam in die vitæ tuæ ultimo, plangere eadem peccata minime valebis . . . . quoadusque veniat, semper trepida metuere culpas debes, atque eas quotidianis fletibus lavare. Auctor libri de vera & falsa pœnitentia inter opera S. Augustini cap. 13. Ubi dolor finitur, inquit, deficit & pœnitentia. Si autem pœnitentia finitur, quid relinquitur de venia? 2. Quia ex S. Thoma 3. part. qu. 84. art. 8. vera pœnitentia non solum removet peccata præterita; sed etiam præservat hominem à peccatis futuris. Hinc habitus pœnitentiæ non fuit infusus cum cæteris virtutibus in animam Christi; quia nec peccavit; nec peccare potuit : contra verò per Baptismum infunditur in parvulis, non quidem propter peccatum originale; cùm enim propria voluntate non sit contractum, de eo non potest esse pœnitentia propriè dicta, ut docet Doctor Angelicus; infunditur ergo propter mutabilitatem voluntatis humanæ, quæ, quamdiu peregrinamur à Domino, deficere potest; ideoque secundum communem Theologorum sententiam primi parentes in statu innocentie instructi fuerunt pœnitentiæ habitu, quo à peccato servarentur; est enim virtus, inquit Magister Sententiarum lib. 4. distinct. 14. qua commissa mala cum emendationis proposito plangimus, & plangenda ulterius committere nolumus. Secunda definitionis pars compete-  
bat Adamo innocenti, utraque nobis : habitus pœnitentiæ erat illi antidotum; nobis remedium, simul & antidotum. Unde S. Chrysostomus lib. 1. de compunctione, per totam vitam plangendum, inquit, ut vel sic occupata in luctu & lacrymis anima erubescat peccare. Denique lugentes pro charorum suorum amissione interrogemus . . . . aufugiunt continuo, nec usquam

quam apparent omnes illæ molles & dissolutæ deliciæ, nūquam ventris cura, aut sollicitudo carnis habetur . . . .  
 procul omnis illa infania congregandæ pecuniæ, procul omnis cupiditas possidendi; honoris autem & ambitionis omnis apud eos gloria tunc verè ut fœnum, & velut flos fœni videtur. Cùm igitur ista sint naturalia doloris & tristitiæ consuetaria, Deus in justificatione infundit pœnitentiæ habitum, ut justificatus sæpè sæpius recogitans in amaritudine animæ suæ, quàm graviter in Deum deliquerit, non tangatur peccati illecebris; sed sibi dictum putet illud Os. 9. *Noli lætari Israel, noli exultare sicut populi; quia fornicatus es à Deo tuo.*

3. Justus indiget habitu pœnitentiæ, ut expungat reatum pœnæ temporalis, qui ut plurimum remanet, remissa jam culpa, namque ex dicendis Deus non reconciliatur cum lapsis post Baptismum, nisi ea lege, ut divinæ ejus justitiæ satisfaciant, nec vera esset pœnitentia sine proposito satisfaciendi, utpotè ipsi essentiali, ut patet ex ejus definitione. Unde sanctus Gregorius, vel quivis Auctor Commentariorum in Librum primum Regum, scribit lib. 6. *Signum ergo veræ conversionis non est in oris confessione, sed in afflictione pœnitentiæ.* Tunc namque bene conversum peccatorem cernimus, cùm digna afflictionis austeritate delere nititur, quod loquendo confitetur. Unde Joannes Baptista malè conversos Judæos ad se confluentes increpans ait: *Genimina viperarum, quis ostendit vobis fugere à ventura ira? facite ergo dignos fructus pœnitentiæ: In fructu ergo, non in foliis, aut ramis pœnitentia cognoscenda est. Quasi arbor quippe bona voluntas est.* Confessionis ergo verba, quid sunt aliud nisi folia? Non ergo nobis folia propter seipsa, sed propter fructum

expetenda sunt ; quia idcirco omnis confessio peccatorum expetitur , ut fructus pœnitentiæ subsequatur. Unde & Dominus arborem foliis decoram , fructu sterilem maledixit : quia confessionis ornatum non recipit sine fructu afflictionis. Eadem mente Tertullianus longè ante scripserat lib. de Pœnitentia c. 9. Satisfactio confessione disponitur , confessione pœnitentia nascitur , pœnitentia Deus mitigatur. Et sanctus Augustinus ep. 153. aliàs 54. Nihil aliud agit , inquit , quem veraciter pœnitet , nisi ut id quod mali fecerit impunitum esse non sinat. Eo quippe modo sibi non parcenti ille parcit , cuius altum justumque iudiciū nullus contemptor evadit. Viderint ergo quæ signa nominis secum reconciliati , & pœnitentiæ in cordibus infusæ præferant , qui post perceptum reconciliationis Sacramentum , omnem doloris sensum deponunt , quippe immemores pacti cum Deo in Sacramento initi , nempe se ei omnem , quam voluerit , satisfactionem exhibituros ; molliora quæque sectantur , adversa , quibus iustitia divina eos exagitat , in peccatorum vindictam , invito animo patiuntur , & levia à Confessario imposita perfunctoriè & negligenter decurrunt,

4. Denique in justificatione infunditur habitus Pœnitentiæ contra peccata , quæ ut quotidiana sunt , quotidiana quoque de iis debet esse pœnitentia , alioquin multitudine sua obruent , ut docet sanctus Augustinus sermon. 351. aliàs hom. 50 & epist. 265. aliàs 108. Si collecta contra nos fuerint , ita nos gravabunt & opprimant , sicut unum aliquod grande peccatum. Quid enim interest ad naufragium , utrum uno grandi fluctu navis operiatur , & obruatur : an paulatim subrepens aqua in sentinam , & per negligentiam derelicta atque contempta , implicet navem,

*navem & submergat. Propter hæc jejunia, elemosynæ, & orationes invigilant.*

Atque ex his patet virtutem pœnitentiæ tam arctè connexam esse cum gratia sanctificante seu charitate, ut ab ea divelli nequeat, utpote ejus proprietas, parique gradu simul crescere in unoquoque sanctitatem & pœnitentiam. Quin sanctus Thomas in 4. dist. 14. & in Supplem. qu. 16. art. 2. docet, virtutem pœnitentiæ remanere in Beatis, non quidem quoad actum doloris & tristitiæ, quam non admittit summa felicitas: sed quoad alios actus, putà detestationis peccati, laudis, & gratiarum actionis pro infinita Dei in eos misericordia.

Dicitur 4. *Inclinans peccatorem ad detestationem & dolorem proprii peccati*; non enim possumus de peccato alterius pœnitentiam agere, sed dolere duntaxat. Et ratio est, quia pœnitere est resipiscere, consilium mutare, ad sanam mentem redire: atqui ista competere nequeunt, nisi ei, qui se malè egisse agnoscit: Ergo pœnitentia non potest esse nisi de proprio peccato.

Dicitur 5. *quatenus est offensa Dei*; quia pœnitentia, utpote quædam species justitiæ, est ad alterum, tenditque ad abolendam offensam ipsi allatam, & pro ea satisfactionem exhibendam: Ergo dolere præcisè, vel quia turpe est nos peccasse, & inde confundimur, vel quia animadversione sumus digni, idque sine respectu ad Dei offensam; non est actus virtutis pœnitentiæ, sed amoris privati, quod operæ pretium est advertere.

Dicitur 6. *cum emendationis proposito*, ut virtus pœnitentiæ distinguatur tum à tristitiâ sæ-

cull, quæ mortem operatur, ut loquitur Apostolus 2. Corinth. 7. vers. 10. tum à pœnitentia reproborum, qui Sapient. 5. vers. 3. exhibentur *pœnitentiam agentes*; & *præ angustia spiritus gementes*: ejusmodi enim tristitia animum dejicit, nec ad meliorem frugem convertit; contra verò pœnitentiæ virtus animos accendit, in spem erigit; & quod peccatum est, efficaciter emendat ac corrigit; *quæ enim secundum Deum tristitia est*, inquit Apostolus 2. Cor. 7. *pœnitentiam in salutem stabilem operatur . . . . ecce enim hoc ipsum, secundum Deum contristari vos, quantam in vobis operatur sollicitudinem . . . . sed desiderium; sed æmulationem, sed vindictam?* Quibus verbis carpitur falsa eorum pœnitentia, qui ubi se lapsos advertunt; animo franguntur, gemunt desides, absque ulla resurgendi sollicitudine: parvulos diceres, qui cum ceciderint, jacentes indulgent lacrymis, donec quis eos erigat; *pertinet enim ad pœnitentiam*, inquit sanctus Thomas 3. part. q. 90. artic. 4. *ut detestentur peccata præterita cum proposito immutandi vitam in melius, quod est quasi pœnitentiæ finis.*

Dicitur 7. *efficaci*: namque ex Tertulliano lib. de Pœnitentia cap. 2. *ubi emendatio nulla, pœnitentia necessario vana; quia caret fructu suo, cui eam Deus servit, id est hominis saluti.* Qui autem efficaciter intendit mores corrigere, novamque vitam inchoare, simul cogitat de mediis, quibus finem propositum consequi possit, illaque sollicitè inquit, juxta illud Psalm. 37. *cogitabo pro peccato meo, sive, ut legit sanctus Augustinus, curam geram pro peccato meo, quæ verba expendens sanctus Doctor, sic scribit: Quid est curam genere pro peccato suo? Si diceres, curam geram pro vulnere meo, quid intel-*  
ligere-



*ligeretur, nisi dabo operam ut sanetur? Hoc est enim curam gerere pro delicto, semper intendere, semper studiosè & sedulo agere, ut sanes peccatum. Ecce de die in diem plangis peccatum tuum, sed fortè lacrymæ currunt, manus cessant . . . . hoc est, curam geram pro peccato meo, faciam omnia quaecumque facienda sunt ad abolendum & sanandum peccatum meum. Quem igitur verè pœnitet, secum perpendat quibus viis, quave ratione melioris vitæ propositum exequatur: videat, & apud se dicat cum Apostolo, quis me deinceps separabit à charitate Dei, an versutus ille litigator, & iniquus rerum mearum invasor, adversus quem tamdiu capitali odio flagravi? an superbia; propter quam toties rixatus sum, & alios convitiis proscidi? an avaritia, quæ mihi hætenus inimicitiarum ac gravium peccatorum causa extitit? Quod si fortè alicubi se infirmum agnoscat, ea conquirat remedia, quorum ope confidere possit se victorem fore malarum cupiditatum; alioquin propositum inchoandæ novæ vitæ, quantumcunque vehemens, erit prorsus inefficax; intentus enim finis acquiri non potest, nisi per media accommodata. Unde mirum non est, quodd vera pœnitentia paucorum sit, ut scribit sanctus Pacianus epistola 3. cùm plerique pœnitentes, si tamen pœnitentes dixeris, nequidem de viis ineundis ad emendandos mores necessariis cogitent, aut deliberent.*

*Dicitur 8. & satisfactionis proposito; justitia enim, quam pœnitentia imitatur, in eo consistit, ut personæ læsæ satisfiat: hoc pretio, inquit Tertullianus lib. de Pœnit. cap. 6. Dominus veniam addicere instituit: hac pœnitentiæ compensatione redimen-*

*dam proponit impunitatem.* Sanctus quoque Augustinus ferm. 20. aliàs 3. ex editis à Sirmundo, *impunitum*, inquit, *non potest esse peccatum; impunitum esse non decet, non oportet, non est justum.* Ergo quia *impunitum non debet esse peccatum: puniatur à te, ne puniaris pro illo.* Peccatum tuum judicem te habeat, non patronum. Et ferm. 113. aliàs 35. de verbis Domini; *quid est enim homo pœnitens, nisi homo iratus sibi? ut accipiat veniam, de seipso exigit pœnam.*

Huic definitioni addendum est propositum confitendi Sacerdoti si agatur de pœnitentia post Baptismum; quia Sacramentum Pœnitentiæ est necessarium baptizatis lapsis necessitate medii & præcepti divini, ut suo loco dicetur.

## §. II.

*De necessitate virtutis Pœnitentiæ.*

**A**gimus hîc duntaxat de necessitate Pœnitentiæ, quatenus præcisè virtus est, dicturi postea de ejus necessitate, quatenus est Sacramentum; diversa quippe est utriusque necessitatis ratio, & seorsim tractanda, ut vitetur error in quem bene multi impingunt, qui aliam pœnitentiæ necessitatem non agnoscunt præter eam, quæ in præcepto Confessionis annuæ includitur, circa quam plura suo loco expendemus. Interim

Q. 1. *Pœnitentia estne necessaria?*

R. Est necessaria adultis necessitate tum medii, tum præcepti.

Prima pars, quæ est de necessitate medii, probatur 1. ex Scriptura Luc. 13. vers. 3: *nisi pœnitentiam habueritis, omnes similiter peribitis.* Matth. 11. vers. 20. Christus exprobrat civitatibus, quæ  
ad

ad prædicationem suam miraculis confirmatam, Pœnitentiam non egerunt, additque versu sequenti, Tyrum & Sidonem, si ea habuissent salutis auxilia, pœnitentiam fuisse acturas; quibus verbis declarat pœnitentiam esse medium prorsus necessarium ad veniam & salutem consequendam, perditionemque Bethsaitidum & Tyrriorum tribuendam eorum impœnitentiæ. Propterea, inquit Isaias cap. 30. vers. 18. *expectat Dominus, ut misereatur vestri.* Et Apostolus Rom. 2. vers. 4. *Ignoras quoniam benignitas Dei ad pœnitentiam te adducit?* Secundum autem duritiam tuam & impœnitens cor, thesaurizas tibi iram. Denique juxta omnes Patres & Theologos, impœnitentia finalis est peccatum ad mortem sine ullo veniæ, sive salutis remedio: nec Baptismus, nec quodvis aliud Sacramentum adulto impœnitenti prodesse potest. Christus Sacramentorum auctor, Evangelium suum auspicatus est à pœnitentia, *cœpit Jesus prædicare & dicere, pœnitentiam agite*, Matth. 4. vers. 17. Sanctus Petrus exegit pœnitentiam ab iis, quos ad Baptismum præparabat, *pœnitentiam* (inquit) *agite, & baptizetur unusquisque vestrum*, Act. 2. Tractatu de Baptismo retulimus disciplinam Ecclesiæ erga Catechumenos, & laboriosas exercitationes, quibus probabat eorum pœnitentiam, priusquam eos ad Baptismum admitteret.

Nec dicas Christum, Marci ultimo, solam fidem ab initiandis exigere: *qui crediderit, inquit, & baptizatus fuerit, salvus erit.* Et Act. 8. vers. 36. interroganti eunucho, *ecce aqua, quid prohibet me baptizari?* respondet Philippus, *si credis ex toto corde, licet.* Namque fides, quæ disponit ad Sacramenta, non est mortua, sed operans spem, odium

odium peccati, novæ vitæ propositum, & cætera, quæ latè profecuti sumus Tract. de Gratia, ubi de dispositionibns ad justificationem.

Probatur 2. ex Concilio Tridentino sess. 14. cap. 4. in quo sic habet: *fuit autem quovis tempore ad impetrandam veniam peccatorum, hic contritionis motus necessarius.*

Probatur 3. ratione Theologica: illud est necessarium necessitate medii, quo deficiente etiam sine nostra culpa, ultimus finis acquiri non potest; sic Baptismus v. g. est necessarius necessitate medii; quia ejus defectu nullus potest introire in regnum Dei: atqui deficiente pœnitentia, etiam sine nostra culpa, ut contingeret ei, qui statim post peccatum mortale versus esset in amentiam, finis ultimus acquiri non potest: Ergo.

Secunda pars ex præcedente sequitur; quæ enim instituta sunt ut media necessaria, ea quoque sunt præcepta; recta quippe ratio dictat assumendum medium, sine quo finem, ad quem tendere oportet, consequi non possumus, atque omnium judicio peccaret, qui vel Baptismum negligeret, vel omnem cibum rejiceret; quia nec sine Baptismo salus æterna obtineri potest, nec sine cibo vita animalis conservari: atqui ex dictis pœnitentia est necessaria necessitate medii: Ergo & præcepti.

Dices: per amorem Dei super omnia expellitur omne peccatum, peccator efficitur justus, filius Dei, & hæres vitæ æternæ: dicitur enim 1. Joan. 4. *omnis qui diligit, ex Deo natus est.* Et cap. 3. *Scimus quoniam translati sumus de morte ad vitam,*

*vitam, quoniam diligimus fratres: Ergo pœnitentia non est necessaria necessitate medii.*

Nego conseq. falsò quippe supponit peccatorem accendi amore Dei super omnia, absque ulla displicentia & dolore, quod illum injuria affecerit. Enimverò filius, qui graviter in patrem deliquit, præteritam offensam novo contemptu augere videretur, si nullo præmisso pœnitentiæ signo, nulla satisfactione oblata domum rediret ea peracturus, quæ sunt filii obsequentissimi. Quis credat Deum super omnia ab eo diligere, cui non displicent flagitia præterita, quibus commoda temporalia comparavit? Peccator itaque divino amore succensus, dicat oportet cum S. Augustino: *Sero te amavi, bonitas antiqua.*

Instabis; non repugnat peccatorem tam subito rapi in Dei amorem, ut in memoriam non veniant peccata præterita, & verisimile est ita contigisse pluribus Martyribus: atqui in illa hypothesis dubitare non licet, quin ille veniam consequatur: Ergo.

Distinguo maj. ut in memoriam non veniant peccata præterita sigillatim & distinctè, Concedo: generatim & confusè, Nego maj. non enim potest fieri quin cum displicentia advertat se hactenus privatum fuisse divino illo amore tam debito, tamque optabili.

Q. 2. *Pœnitentia estne etiam necessaria ad remissionem peccati venialis?*

R. Affirmat sanctus Augustinus epist. 63. aliàs 48. in qua sic scribit circa finem, *nec quemquam putes ab errore ad veritatem, vel à quocunque seu magno, seu parvo ad correctionem sine pœnitentia posse transire.* Idipsum docet sanctus Thomas q. 87. art.

art. 1. & art. 3. scribit Sacramentalia v. g. lustrationem aquæ benedictæ remittere peccata venialia, *in quantum inclinant ad motum pœnitentiæ*. Et ratio est, quia peccatum veniale est inordinatus amor creaturæ: Ergo quamdiu voluntas inordinatè adhærebit creaturæ, tamdiu remanebit ejus peccatum: atqui non tolletur inordinatus ille amor, nisi displiceat: Ergo ad remissionem peccati venialis requiritur pœnitentia, quam sanctus Augustinus laudato serm. 351. vocat quotidianam, quia quotidiana sunt ejusmodi peccata; *alioquin esset homini periculum deficiendi*, inquit sanctus Thomas cit. art. 1. ad 1. *cum defereret appetitum proficiendi, seu tollendi impedimentum spiritualis profectus quæ sunt peccata venialia*.

Addit tamen Angelicus Doctor eodem art. 1. perfectionem requiri pœnitentiam ad remissionem peccatorum lethaliū, quàm ad remissionem venialium, ad quam dicit sufficere virtuales & implicitam displicentiam, *in eo quodd*, inquit, *aliquis hoc modo fertur in Deum & res divinas, ut quidquid sibi occurrat, quodd cum ab hoc motu retardaret, displiceret ei, & doleret se hoc commisisse, etiamsi actu de illo non cogitaret?* quod tamen non sufficit ad remissionem peccati mortalis, nisi quantum ad peccata oblita post diligentem inquisitionem.

Q. 3. Quando & quoties obligat præceptum pœnitentiæ?

Certum est 1. negativum pœnitentiæ præceptum, quo prohibemur delectari in memoria præteriti peccati, & de eo gloriari, obligare semper & pro semper; quia nunquam licet malè agere: atqui ejusmodi delectatio & jactantia est per se mala, & quidem in eodem genere peccati cum

cum ipsa actione quæ delectat, adeò ut qui se jactat quòd v. g. mulierem seduxerit, gravem de inimico vindictam sumpserit, &c. lethalter peccet; quia ejusmodi actiones sunt gravia peccata. Idem dicito de iis, qui illicitis illis oblationibus applaudunt. Minor tamen erit culpa, si arrideant non propter ipsummet flagitium, sed propter solertem & ludicrum modum, quo perpetratum est. Verùm, qui sese effert ex malis artibus, vel ex eo capite valde est vituperandus, quod aliis sit malo exemplo, & peccandi materiam subministret. Viderint ergo, qui ex peccatis adolescentiæ sibi plausum captant.

Certum est 2. affirmativum pœnitentiæ præceptum urgere saltem in mortis periculo; constat enim apud omnes impœnitentiam finalem esse grave peccatum.

Certum est 3. idem præceptum semel, saltem quolibet anno, obligare omnes Fideles, cum sine vera pœnitentia non possint facere satis Legi Ecclesiasticæ, qua tenentur singulis annis peccata sua confiteri proprio Sacerdoti, ut suo loco explicabitur.

Tota igitur difficultas in eo versatur, utrùm, qui in grave peccatum lapsus est, debeat statim pœnitentiam agere, vel possit eam ad annum differre: vel saltem ad aliquot dies?

R. Peccat, qui conscius peccati lethalis, pœnitentiam differt ad annum. Responsio probata manet ex dictis Tract. de Actibus humanis, ubi de Spe p. 662. & de Charitate p. 757. & seq. Si enim quisque ex præcepto charitatis tenetur quàm sæpissimè elicere actus amoris Dei super omnia, manifestum est eum, qui se peccati lethalis reum

cogno-

cognoscit, non posse sine peccato pœnitentiam ad annum differre; cùm ex dictis nemo possit diligere Deum, nisi displiceat peccatum lethale, cuius se conscius meminit.

Confirmatur 1. Contra legem naturalem peccat, 1. qui rem alienam detinet, domino rationabiliter invito, nec excusatur ejus in solvendo mora, eo prætectu quòd dominus ex solutionis dilatione nullum patiatur detrimentum; fit enim illi injuria eo præcisè, quòd re sua privetur invitus, nec ulla fit in debitore differendi ratio. 2. qui cùm proximum gravi injuria affecerit, nedum satisfaciendi occasionem capiet, juxta illud Matth. 5. *vade prius reconciliari fratri tuo*; quin oblatam negligit, ac debita satisfactione animo proximi à se injustè exulcerato mederi contemnit: atqui peccati lethalis reus incommunicabilem Majestatis divinæ titulum, nempe rationem ultimi finis, summa injuria in creaturam transtulit, exigitque Deus, ut peccator honorem sibi ablatum quantocius restituat ac repareret. *Non tardes*, inquit Eccl. 5. *converti ad Dominum, & ne differas de die in diem. Subitò enim veniet ira illius & in tempore vindictæ disperdet te.* Neve peccator moras traheret, ita pollicitus est veniam pœnitenti, ut crastinum non promiserit peccatori; ait enim Apoc. 3. v. 3. *pœnitentiam age; si ergo non vigilaveris, veniam ad te tanquam fur, & nescies qua hora veniam ad te*: Ergo peccator novo peccato se obnoxium reddit, qui in longum tempus suam differt pœnitentiam.

Confirmatur 2. Peccator longo tempore v. g. per annum impœnitens, tamdiu est Deo invisus, juxta illud Sapientiae 14. *odio sunt Deo impius & im-*



& impietas ejus, è numero filiorum Dei expunctus, & exhæres regni cœlestis, utpotè habitualiter averſus à ſuo Creatore, converſus verò ad creaturam tanquam ad ultimum finem: atqui in tantam Dei offenſionem cecidiſſe, maxima eſt omnium pœna. *Si quis eſt*, inquit S. Chryſoſtomus, *qui mente ac ſenſu præditus ſit, is certè gehennæ pœnam tolerare malit, quam adverſo Deo ſtare.* Cùm ergo peccator impœnitens eam nihili faciat, dubium non eſt quin Deus illius impœnitentiam in gravem ſui contemptum imputet: *non dolere quia peccaveris*, inquit idem S. Chryſoſtomus homilia 14. in Matth. *magis irasci Deum, quàm illud ipſum, quod ante peccaveras.* Deinde ubi quis à charitate per peccatum excidit, ibi manet, donec eum pœniteat, in via ſalutis non progreditur, fruſtra tempus terit, & malè operas ſuas collocat, nulum ex iis lucrum percipit, quod ſit vitæ æternæ condignum. *Si charitatem . . . non habuero*, inquit Apoſtolus 1. Cor. 13. *nihil ſum . . . nihil mihi prodeſt.* Quare in ejusmodi ſocordes meritò illud Evangelii contorqueas: quid hic ſtatis tota die, imo toto menſe, aliquando etiam toto anno otioſi? Quare non dediftis pecuniam meam ad menſam, & ex talento fidei ac ſpei, quod credidi vobis nullum lucrum feciſtis? quam autem grave ſit illud negligentiae peccatum, aperit ſequens juſti Judicis ſententia Matth. 25. *inutilem ſervum ejicite in tenebras exteriores, illic erit fletus & ſtridor dentium.* Denique peccator, qui pœnitentiam diu differt, morali periculo iterum labendi ſe exponit, ut conſtat ex dictis Tractat. de Gratia pag. 474. & ſequentibus, ubi fuſe & evidentiffimè probavimus hominem ſine gratia ſan-

etificante, etsi absolutè ; moraliter tamen non posse per diuturnum tempus vitare omnia peccata lethalia. *Peccatum*, inquit S. Gregorius hom. 11. in Ezech. quod per pœnitentiam non deletur, suo pondere ad aliud trahit.

Peccat autem, qui sciens & volens se exponit morali peccati periculo, adde, & æternæ damnationis ; hanc enim postremam rationem plures è Theologis tum veteribus, tum recentioribus maximè urgent contra lapsos, qui multo tempore ad pœnitentiæ remedia non confugiunt ; & exinde docent munus esse Confessarii inquirere à pœnitentibus quamdiu pœnitentiam procrastinarent. Sed superest quæstio, quæ & quanta debeat esse ejusmodi procrastinatio, ut censeatur grave peccatum.

R. 2. Ita diversa est Theologorum sententia, ut ex iis aliud certo definiri non possit, quàm quod prima nostra responsione stabilivimus, nempe pœnitentiam sine novo peccato ad annum non posse protrahi.

S. Antoninus 3. p. 14. cap. 18 docet eum qui lapsus est in peccatum mortale, teneri conteri statim ac illius meminit, sic enim scribit, *quantum ad peccata mortalia, de quibus quis nondum habuit contritionem, videtur quod semper teneatur quando peccatum menti occurrit, ad actu odiendum, & detestandum peccatum, alias peccat mortaliter peccato omissionis, quousque conteratur ; moxque hanc suæ sententiæ rationem affert ; nec enim, inquit, per momentum licet stare in peccato : imminet enim maximum periculum, nempe damnationis æternæ.*

Schola Scotistarum cum suo principe in 3. distinct. 17. vult hominem, quem nondum ad-

missi

missi peccati lethalis pœnituit, teneri diebus festis actum contritionis elicere; scriptum quippe est Levit. c. 16. *Sabbatum enim requietionis est, & affligetis animas vestras religione perpetua.* Deinde Fideles sacris illis diebus Missæ Sacrificio interesse debent, & aliis religionis operibus vacare: atqui peccator, nisi contritus fuerit, ista ritè non præstabit, dicente Domino, Isa. i. *Ne offeratis ultra sacrificium frustra: incensum abominatio est mihi: neomeniam, & sabbatum, & festivitates alias non feram, iniqui sunt cœtus vestri.* In quem locum sic scribit sanctus Hieronymus, *omnis conventus, qui non affert hostias spirituales, nec audit quod in quinquagesimo Psalmo canitur, sacrificium Deo spiritus contribulatus, cor contritum, & humiliatum Deus non despicit; abominabilis est Deo; namque ex sancto Augustino in Psal. 77. pietas cultus Dei est, nec colitur ille nisi amando; hoc enim colitur quod diligitur.* Et ex sancto Gregorio lib. 4. dial. cap. 59. *necessè est, ut cum hæc agimus, nosmetipsos Deo in cordis contritione mactemus.*

Verùm ista momenta facile solvuntur. Ac 1. quidem Levit. 16. agitur de festo expiationis, quolibet anno semel celebrando die decima mensis septimi; unde ex hoc loco ad summum colligi potest ea animi tempestate solemnem pœnitentiam fuisse Judæis præscriptam, sicut Christianis tempore Paschali. 2. Legenti laudatum caput Isaïæ, patebit Deum ibi increpare impios Judæos, qui licet in omni flagitiorum genere defixi & obstinati, cæremoniis legalibus Deum se placaturos confidebant. 3. SS. Patrum textus probant duntaxat peccatorem, ut debito modo festa celebret, & sacro intersit, debè-

debere ex displicentia anteaactæ vitæ tendere ad perfectam contritionem, eo affectu sacrificium & alias preces offerre; ut sibi Deum propitium reddat, eamque gratiam impetret, qua peccatorum vincula, quibus constringitur, tandem excutiat. Porro pius ille affectus in Deum, ut omnium bonorum auctorem, sufficit ad obeunda religionis officia diebus festis præscripta; est enim supremus cultus soli Deo exhibendus, & verus amor: non quidem perfectæ charitatis, nec proinde perfectæ contritionis, sed ad eam disponit. Ita ferè plerique Thomistæ. Enimverò quilibet virtutis actus est amor & desiderium boni, ad quod inclinatur unaquæque virtus: actus temperantiæ, v. g. est amor honestatis, quæ relucet in moderato usu ciborum; actus iustitiæ est voluntas, seu desiderium (in quo includitur amor) reddendi unicuique quod suum est: actus religionis est amor & zelus divini cultus, quin & ipsa fides, licet sit virtus intellectualis, non est tamen sine dilectione, ut docet S. Augustinus; quia nemo credit nisi volens, & piè affectus erga verbum Dei. Denique omnis gratia actualis est aliqua dilectio, utpote pia voluntatis motio & affectio, ex qua Fideles piè peragere possunt, quæ diebus festis præscribuntur, ac proinde nulla est sufficiens ratio asserendi præceptum contritionis obligare sacris illis diebus. Quidonam ergo obligat extra periculum mortis, & tempus Paschatis?

R. 3. Vel peccatum menti occurrit quatenus est Dei offensa; vel omnino non occurrit, aut saltem nisi secundum ejus consuetudinem, verbi gr. pœnam, dedecus, & alia incommoda, quæ ex peccato sequuntur.

Si

Si primum, peccatorem statim pœnitere debet; vel enim attendit ad offensam Dei cum delectatione, vel indifferenter, vel cum dolore & displicentia: atqui peccat procul dubio in prima & secunda hypothesi: in prima quidem, quia delectatio illa est per se mala, & peccatum formaliter, ut jam diximus: in secunda etiam, quia filius contemnit patrem, creatura Creatorem, eo ipso, quo ejus injuriam fert indifferenter: ergo peccator tenetur conteri, saltem imperfectè, statim atque meminit se in Deum peccasse. Et hoc sensu vera videtur sententia S. Antonini, quæ est S. Thomæ & Bonaventuræ: sic enim scribit S. Thomas in quartum distinct. 17. quæst. 3. art. 1. referturque quæst. 3. supplem. art. 3. his verbis: *Cum propositum confitendi sit annexum contritioni, tunc tenetur aliquis ad hoc propositum, quando ad contritionem tenetur, scilicet, quando peccata memoriæ occurrunt.* Et S. Bonaventura in 4. dist. 16. quæst. 2. pro loco & tempore (debet conteri) *videlicet cum recogitat mala sua, in quibus offendit Deum.*

Si secundum, nempe si peccatorem ex defectu attentionis ad offensam Dei non pœniteat, certò definiri non potest, quanta debeat esse procrastinatio, ut ejus negligentia grave peccatum censeatur; præceptum enim pœnitentiæ, utpote affirmativum, non obligat semper & pro semper, sed pro loco & tempore, ut mox dicebat S. Bonaventura. Sed cum tempus præcise definiri non possit, ultra quod peccator suam conversionem protrahens, graviter peccaret, & aliunde constet ex dictis Tract. de charitate, quam sæpissimè nos teneri elicere actus amoris Dei, quod non potest peccator quamdiu manet impœnitens,

certum capiat, & incertum dimittat, hoc est, quamprimum offensam Dei abolere, & pro ea satisfacere studeat, nec induret cervicem suam, Scriptura clamante: *Estote parati, quia qua hora non putatis, filius hominis veniet*, Luc. 12. vers. 40. Et iterum, *Vigilate ergo, quia nescitis qua hora Dominus vester venturus sit*, Matth. 24. v. 42.

Mitto circumstantias, in quibus determinatè præceptum pœnitentiæ per accidens obligat, ut si peccator teneatur ministrare, aut recipere Sacramentum.

### §. III.

#### *De nomine Sacramenti Pœnitentiæ.*

Nunc & deinceps Pœnitentiam spectamus, non præcise quatenus est virtus, sed quatenus Sacramentum novæ legis.

Q. I. *Quanam sunt nomina Sacramenti Pœnitentiæ?*

R. Frequentiùs vocari solet,

Primo; manuum impositio; quia pœnitentes olim Ecclesiæ reconciliabantur per manus Sacerdotalis impositionem, *si creditur continuò moriturus*, inquit Concilium Carthaginense IV. cap. 76. de Pœnitente infirmo, qui obmutuerat, *reconcilietur per manus impositionem, & infundatur ori ejus Eucharistia*. Ut autem ejusmodi manuum impositio distingueretur ab ea, quæ adhibetur in Sacramento Confirmationis & Ordinis, dicebatur manus impositio reconciliatoria, vel in pœnitentiam. Utrum verò pertineat ad essentiam, aut integritatem Sacramenti expendetur suo loco.

Secun-

Secundò, exomologesis apud Græcos, quæ secundum vim nominis idem significat, quod apud Latinos confessio. Ex usu autem accipitur pro integra actione pœnitentiæ: *Is actus*, inquit Tertullianus, libro de Pœnitentia cap. 9. *qui magis Græco vocabulo exprimitur, & frequentatur, exomologesis est, qua delictum Domino nostrum confitemur, non quidem ut ignaro, sed quatenus satisfactio confessione disponitur, confessione pœnitentia nascitur, pœnitentia Deus mitigatur. Itaque exomologesis prosternendi & humiliificandi hominis disciplina est, conversationem injungens misericordiæ illi: De ipso quoque habitu atque victu mandat, sacco & cineri incubare, corpus sordibus obscurare, animum mœroribus dejicere, &c.*

Tertiò, secunda post naufragium tabula; ut enim, confracta navi, unum vitæ servandæ superest refugium, si fortè liceat tabulam aliquam de naufragio arripere; ita post amissam Baptismi gratiam, nulla salutis spes, nisi ei, qui ad pœnitentiæ Sacramentum confugerit. Hæc Sacramenti denominatio Novatoribus maximè displicet, utpotè quæ adversetur palmari eorum errori, quo statuunt hominem justificari sola fide, seu fiducia, qua certò sibi persuadet se esse prædestinatum, & merita Christi sibi in Baptismo fuisse irrevocabiliter applicata. Unde concludunt baptizatorum pœnitentiam aliam non esse, quàm memoriam baptismi suscepti, qua excitatur & nutritur ejusmodi fiducia; sic enim scribit Calvinus, libro 4. Institut. cap. 19. §. 17. *Sed dictum est Hieronymi pœnitentiam esse secundam post naufragium tabulam. Cujuscumque sit, quin planè impium sit, excusari nequit, si ex eorum sensu exponitur. Quasi verò per peccatum deleatur Baptismus, & non potius in memoriam*

revocandus sit peccatori, quoties de remissione peccatorum cogitat, ut illinc sese colligat, animumque recipiat, & fidem confirmet . . . . . Apertissime itaque dixeris, si Baptismum dixeris pœnitentiæ Sacramentum, cum in confirmationem gratiæ, & fiduciæ sigillum iis datus sit, qui pœnitentiam meditantur. Sed quamvis vel sola auctoritas sancti Hieronymi in omnium Auctorum scriptis versatissimi, ut loquitur S. Augustinus, satisfuerit sancto Thomæ quæst. 87. art. 6. & omnibus Theologis, ut retinuerint illud pœnitentiæ nomen, ipse tamen illud non excogitavit, sed à veteribus acceptum posteris tradidit; Tertullianus enim ducentis ferè annis ipso antiquior, eodem nomine pœnitentiam indigitat lib. de Pœnitentia cap. 4. *Eam tu peccator, inquit, ita invade, ita amplexare, ut naufragus alicujus tabulæ fidem; hæc te peccatorum fluctibus mersum perlevabit, & in portum divinæ clementiæ protelabit.* Quam loquendi rationem Patres Tridentini suo calculo comprobaverunt, sess. 6. c. 14. his verbis, *quam secundum post naufragium deperditæ gratiæ tabulam sancti Patres aptè nuncuparunt.*

Quarto, usu receptum est, ut vulgò dicatur pœnitentiæ Sacramentum; quo nomine intelligunt Fideles pœnitentiam alio modo requiri ad hoc Sacramentum, quam ad cætera. Pœnitentia quippe respectu aliorum Sacramentorum, est duntaxat dispositio prævia, & consciis peccati lethalis necessaria ad fructum sacramentalem percipiendum. In hoc verò Sacramento non solum est dispositio requisita ad remissionem peccatorum obtinendam: sed insuper ingreditur Sacramenti compositionem, estque ejus pars essentialis, ut §. sequenti explicabitur. Quamobrem si peccator fictè,  
hoc



hoc est, sine vera pœnitentia accederet ad Baptismum, & ad quoddvis aliud Sacramentum, peccaret, quidem, nihilominus verum reciperet Sacramentum, sed informe, ut ajunt, id est, sine fructu; quia pœnitentia non est pars essentialis Baptismi, aut alterius Sacramenti: contra verò ejusmodi fictio, seu falsa & insufficiens pœnitentia, non tantum informe, ut opinati sunt nonnulli, sed prorsus nullum redderet pœnitentiæ Sacramentum; quia sicut Baptismus collatus sine aqua est irritus, & Extrema Unctio sine oleo; ita & Sacramentum Pœnitentiæ sine vera suscipientis pœnitentia, utpotè quæ non minus sit ei essentialis, quàm aqua naturalis Baptismo, & oleum Extremæ Unctioni. Unde meritò Sacramentum Pœnitentiæ aliquando nuncupatur Baptismus lacrymarum, laboriosus Baptismus, quemadmodum docent Patres Tridentini sess. 14. c. 2. ut discat ejus Minister sui muneris esse explorare, an vera sit pœnitentia, & eò attentius, quod constet sæpius exhiberi falsam, quàm in administratione Baptismi aquam Sacramento conficiendo ineptam.

## §. IV.

*De differentia virtutem Pœnitentiæ inter & ipsum Sacramentum.*

Q. 1. *Quomodo virtus Pœnitentiæ differt ab ipso Sacramento?*

R. Differt sicut pars à toto, v. g. corpus humanum ab homine; Sacramentum enim est totum, virtus verò pœnitentiæ pars Sacramenti.

Q. 2. *Quid Sacramentum Pœnitentiæ complectitur præter ipsam pœnitentiæ virtutem?*

R. Complectitur ritum exteriorem, hoc est, efficax gratiæ signum sensibile, à Christo Domino institutum.

Explicatur responsio matrimonii exemplo. Sicut enim Christus matrimonium, (quod antea solum fuerat, & nunc est in non baptizatis contractus naturalis, quo mas & fœmina legitimè conjunguntur in individuum vitæ societatem,) erexit in baptizatis ad dignitatem Sacramenti novæ legis, quatenus illud instituit ut signum sensibile suæ unionis indissolubilis cum Ecclesia. Similiter pœnitentiæ, quæ peccatoribus semper fuit necessaria ad veniam impetrandam, Christus præscripsit ritum externum tanquam efficax gratiæ signum ab iis, qui post Baptismum lapsi fuerint, necessitate mediæ observandum; & ita virtus pœnitentiæ, adjuncto illo ritu seu signo, obtinuit dignitatem Sacramenti novæ legis respectu eorum, qui lapsi sunt post Baptismum; nam respectu Catechumenorum, & eorum qui nondum sunt initiati, pœnitentia non est Sacramentum, sed retinet duntaxat nomen & rationem virtutis.

Q. 3. *In quo genere signi est ille ritus à Christo institutus?*

R. In genere judicii reconciliativi, hoc est Sacramentum illud perficitur in forma judiciorum forensium, excepto quòd illa tendant ad puniendum reum, sintque judicia vindicativa; illud verò ad absolvendum reum; & ideo tribunal in quo exercetur, non est tribunal iræ, sed misericordiæ à Christo institutum ad reconciliandum peccatorem cum Deo quem offendit. Ita Patres Tridentini, sess. 14. cap. 2. ubi de lapsis post baptismum sic docent, *ante hoc tribunal tanquam reos sisti voluit,*

*voluit, ut per Sacerdotum sententiam . . . . . possint liberari. Cap 6. de absolutione: Non est, inquiunt . . . nudum ministerium . . . sed ad instar actus judicialis, quo ab ipso (Sacerdote) velut à Judice sententia pronuntiatur. Et cap. 7. quoniam igitur natura & ratio judicii illud exposcit, ut sententia in subditos duntaxat feratur, &c. Et can. 9. Si quis dixerit absolutionem sacramentalem . . . . non esse actum judiciale, sed nudum ministerium pronuntiandi & declarandi remissa esse peccata confitenti . . . anathema sit.*

Constat ergo apud Catholicos Sacramentum Pœnitentiæ fuisse à Christo institutum in forma judicii reconciliativi: ex quo facile intelligi potest, quæ debeant esse hujus Sacramenti partes, quæve requirantur ut ritè peragatur.

Enimverò omne judicium reconciliativum ex quatuor partibus constat, & duo necessariò supponit & connotat.

Præsupponit 1. offensam; sicut enim restitutio necessario supponit debitum, alioquin esset liberalis largitio; ita reconciliatio supponit offensam, quam reus abolere nititur oblata satisfactione. 2. Judicem, qui habeat potestatem judicii exercendi, & sententiæ ferendæ.

Partes vero ex quibus constat judicium reconciliativum, sunt 1. accusatio, qua reus culpam suam agnoscit, eam confitetur. 2. Dolor & detestatio, quòd in ejusmodi culpam lapsus fuerit, cum proposito non peccandi de cætero. 3. Satisfactio pro irrogata offensa. 4. Sententia, qua Judex ex potestate sibi concessa, reum sic pœnitentem & sic affectum (ut satisfecerit, vel satisfacere paratus sit) absolvit, reconciliatque cum persona læsa.

In

In eo itaque differt iudicium reconciliativum à iudicio vindicativo, quòd in iudicio vindicativo non requiratur, ut reus crimen agnoscat, confiteatur, cum dolore detestetur, & pro eo satisfactionem offerat; sed satis est, si ab alio accusatur, & ab idoneis testibus reus convincatur, ut Iudex sententia sua pœnam in illum etiam renitentem decernat. Contra verò reconciliatio nec esse, nec intelligi potest, nisi reus se iniquè egisse fateatur, & inde dolere se ostendat; quandiu enim protervè se excusat, defenditque quod gessit, nec pravum mutat consilium, personæ læsæ animum à se avertit, & ampliùs accendit; nedum sibi conciliet. Potest quidem persona læsa oblatam à reo satisfactionem remittere, nec aliud exigere, præter dejectum ejus animum, quem in humili criminis sui confessione & detestatione exhibet. Unde si persona læsa ulteriorem satisfactionem expetat, illa satisfactio erit duntaxat iudicii pars integralis, non verò essentialis, cum sine ea iudicium reconciliativum concipi, & existere possit.

Ergo peccata post Baptismum commissa, necessariò præsupponuntur Sacramento Pœnitentiæ, meritòque damnata est ab Academia Parisiensi anno 1665. hæc propositio: *Confessio valida est deficientibus peccatis; potuit ergo beatissima Virgo, licèt nec contritionem habuerit, nec ullum, vel levissimum peccatum commiserit beato Joanni confiteri, scilicet sacramentaliter.* Peccata tamen non sunt pars Sacramenti, sed materia circa quam abolendam versatur Sacramentum, sicut medicina circa morbum, quem expellere nititur: & eo sensu solent dici remota pœnitentiæ materia.

Dixi:

Dixi : *Peccata post Baptismum commissa* ; Quæ enim præcesserunt , huic iudicio subijci nequeunt , cum Ecclesia ex Patribus Tridentinis sess. 14. c. 2. in neminem iudicium exerceat , qui non prius in ipsam per Baptismi januam fuerit ingressus ; *Quid enim mihi* , inquit Apostolus , 1. Cor. 5. *de iis , qui foris sunt , judicare ?*

Ergo partes , ex quibus componitur Sacramentum Pœnitentiæ , sunt sententia Sacerdotis , seu verba absolutionis , contritio , confessio , & satisfactio pœnitentis ; in iis enim consistit iudicium reconciliativum. Verba absolutionis rationem habent formæ , utpotè quæ expressius significant remissionem peccatorum : confessio facta Sacerdoti , contritio ipsi manifestata , & satisfactio sunt ipsa Sacramenti materia , quemadmodum docent Concilium Trident. cit. sess. 14. c. 3. his verbis : *Sunt autem quasi materia hujus Sacramenti , ipsius pœnitentis actus , nempe contritio , confessio , & satisfactio. Qui quatenus in pœnitente ad integritatem Sacramenti , ad plenamque & perfectam peccatorum remissionem ex Dei institutione requiruntur , hac ratione pœnitentiæ partes dicuntur.* Præiverat Eugenius IV. in Decreto pro Armenis , *quartum Sacramentum* , inquit , *est pœnitentia , cujus quasi materia sunt actus pœnitentis* , nempe cordis contritio , oris confessio , & satisfactio , cum hoc tamen discrimine ; quòd contritio & confessio sint partes essentielles , satisfactio verò pars duntaxat integralis ; quia , ut jam diximus , iudicium reconciliativum nec esse , nec concipi potest , nisi reus culpam suam agnoscat ac detestetur , benè autem etiamsi ex indulgentia personæ læsæ actu non satisfaciat. Hinc pœnitentibus moribundis , & usu rationis destituti-

tis absolutio impertitur, nulla imposita satisfactio.

Dices 1. Ejusmodi moribundi etiam sine confessione, absolvuntur: Ergo confessio non est Sacramento essentialis.

Distinguo anteced. Sine confessione explicita & distincta singulorum peccatorum, Concedo: Sine confessione implicita & confusa omnium peccatorum, Nego anteced. eo enim ipso quo quis Confessarium petit, se peccatorem agnoscit & confitetur.

Distinguo similiter consequens: Ergo confessio explicita & distincta non est essentialis, Conc. Implicita & confusa, Nego consequ. Itaque explicita confessio peccatorum, quæ post diligens examen memoriæ occurrunt, est quidem præcepti divini, & idè observanda quantum fieri potest. Sed quia præceptum non obligat in iis circumstantiis, in quibus est impossibile, tunc satis est ad veritatem Sacramenti, ut quis generatim peccata sua confiteatur.

Dices 2. Votum satisfaciendi non minus est necessarium: quam votum confitendi: Ergo satisfactio est æquè essentialis Sacramento, ac confessio.

Nego consequ. Falsò enim supponitur quòd ad Sacramentum sufficiat votum confessionis, nec illud inferri potest ex nostra responsione; in ea quippe asserimus confessionem actualem saltem confusam, quæ in eo intelligitur, qui Confessarium efflagitat, esse Sacramento essentialem, quod de satisfactione actuali dici nequit propter rationem allatam. Votum quidem satisfaciendi Deo, & confitendi peccata etiam sigillatim, est essentialiale

tiale Sacramento, sed non constituit illius partem à contritione distinctam; includitur enim in proposito fervandi omnia legis præcepta: atqui explicita peccatorum confessio, & satisfactio sunt præcepti divini, ut suo loco probabitur: ergo nullus est verè pœnitens ac contritus, nisi paratus sit ad omnia & singula peccata sacramentaliter explicanda, & ad exhibendam eam satisfactionem, quam Deus imposuerit sive per suum Ministrum, sive per se immediatè, putà morbis & aliis adversis casibus quibus punire solet hominum peccata; nam ex Apostolo, Hebr. 12. vers. 6. *Flagellat (Deus) ... omnem filium quem recipit*; & ideo necesse est, ut verè pœnitens dicat cum Davide Psal. 37. *quoniam ego in flagella paratus sum.*

Dices 3. Cum Scoto in 4. dist. 16. qu. 1. Sola absolutio est Sacramento essentialis: *Trium hæc*, inquit, (scilicet contritio, confessio & satisfactio) *requiruntur vel prævia, vel sequentia*; nam reconciliatio formaliter consistit in ipsa absolutione, in qua rescinditur prior sententia de puniendo reo: rescinditur autem propter pœnitentis confessionem, dolorem, & animum paratum ad exhibendam satisfactionem, quæ sunt materia proxima, circa quam versatur absolutionis sententia, & eatenus dicuntur à Concilio Tridentino, *partes & quasi materia hujus Sacramenti*; non quòd illud componant, sed quòd circa illas proximè versetur, remotè verò circa peccata post Baptismum commissæ.

Confirmatur, Sacramentum Pœnitentiæ ex dictis institutum est in forma judicii: atqui in judiciis humanis sola sententia est actus judicialis; solus enim Judex exercet judicium, ad quod prævia

via sunt accusatio, examen testium & rei. Ergo Sacramentum Pœnitentiæ in sola absolutione essentialiter consistit. Ita Scotistarum Schola.

Respond. Hanc Scoti sententiam difficilè conciliari cum laudata doctrina Concilii Tridentini definientis contritionem, confessionem, & satisfactionem esse partes hujus Sacramenti, materia enim circa quam, valdè improprie diceretur pars illius rei, quam non componit. Cur autem Concilium dixerit hujusmodi actus pœnitentis esse quasi materiam, explicat Catechismus Romanus agens de Sacramento Pœnitentiæ num. 17. his verbis: *Neque verò hi actus, quasi materia à sancta Synodo appellantur, quia veræ materiæ rationem non habeant; sed quia ejus generis materia non sint, quæ extrinsecus adhibeatur, ut aquæ in Baptismo, chrismâ in Confirmatione.* Uno verbo non sunt propriè materia physica, utpotè qui sint actus materiæ oppositi; in hoc tamen Sacramento rationem habent materiæ sacramentalis; quia minùs clarè & distinctè effectum sacramentalem significant, quàm sententia Sacerdotis; quæ idcirco dicitur Sacramenti forma juxta ea quæ tradidimus Tract. de Sacramentis in genere, ubi de eorum materia & forma.

Ad confirmationem respondeo negando minorem; judicia enim humana conflantur ex accusatione, testimonio, examine rei, & sententia Judicis.

Instabis 1. dispositio non est pars rei, ad quam disponit: atqui actus pœnitentis sunt dispositiones ad Sacramentum Pœnitentiæ; ergo non sunt ejus partes.

Nego min. Sunt quidem dispositiones ad effectum Sacramenti, non verò ad ipsum Sacramentum, sed illud componunt.

Insta-



**Instabis 2.** Si actus pœnitentis sunt partes Sacramenti, ergo sunt signa gratiæ; Sacramenta enim sunt in genere signi. Ergo gratiam producunt; quia Sacramenta novæ legis efficiunt quod significant, nisi ponatur obex. Ergo ipse pœnitens est cum Sacerdote Minister Sacramenti pœnitentiæ, accepit claves regni cœlorum, & potestatem remittendi peccata: atqui hæc sunt longè absurdissima. Ergo.

Respondeo, actus pœnitentis esse reverà signa, & quidem efficacia remissionis peccatorum & gratiæ sanctificantis, quatenus conjuncti sunt cum forma absolutionis; sub illo enim respectu instituti sunt à Christo ad significandam & producendam gratiam sanctificantem. Unde sicut aqua ante institutionem Baptismi non significabat interiorem ablutionem, nec etiam nunc significat, nisi jungatur cum forma Baptismali, per quam determinatur ejus usus ad abluendum, cum posset esse ad refrigerandum, diluendum, &c. ita nec pœnitentia seu contritio, nec accusatio sui, nec satisfactio, licet per se sint dispositiones si ex gratia fiant, ad veniam à Deo obtinendam; tamen ante Christum, nec etiam hodie sunt signa divinitus instituta, nisi quatenus dicunt ordinem ad absolutionem sacramentalem, & cum ea moraliter junguntur. Neque inde sequitur pœnitentes esse Ministros Sacramenti, accepisse claves regni cœlorum ad remittenda peccata; nam satis non est ministrare materiam Sacramenti, ut ministrans dicatur Sacramenti Minister, sed insuper requiritur, ut qui eam ministrat, eam etiam conjungat cum forma, & active concurret ad conficiendum Sacramentum, alias qui panem mi-

nistrat ad Eucharistiam, & chrisma ad Confirmationem, aquam ad Baptismum, dicendus esset Minister illorum Sacramentorum, quod in nullius mentem venerit.

Instabis 3. satisfactio juxta hodiernam Ecclesiæ disciplinam, non impletur, nisi perfecto jam Sacramento: ergo non est pars Sacramenti, nec signum efficax remissionis peccatorum.

Distinguo antec. Perfecto Sacramento essentialiter, Conc. Perfecto integraliter, Nego antec. Nam satisfactio est Sacramenti pars integralis, ut diximus. Adde satisfactionem dupliciter spectari posse, scilicet, vel in executione, vel in impositione, & acceptance. Hoc posteriori modo debet præcedere absolutionem, ut cum ea conjungatur ad producendam gratiam sanctificantem, & remissionem peccatorum. Priori verò modo ita subsequitur, ut sit etiam cum ea moraliter conjuncta tanquam pars Sacramenti integrans, quæ significat & operatur ex opere operato, ut ajunt, remissionem pœnæ temporalis, ut infra dicetur.

Instabis 4. Christus integrum pœnitentiæ Sacramentum instituit: atqui non instituit pœnitentiam, nec ullam ex ejus partibus, sed solam absolutionis formam; namque ante adventum ejus peccatores cum Deo reconciliabantur contritione, ex Psal. 50. *Cor contritum & humiliation, Deus, non despicias*: & confessione ex Psal. 31. *Dixi, confitebor adversum me injustitiam meam Domino, & tu remisisti impietatem peccati mei*: Ergo.

Distinguo minor: Non instituit pœnitentiam quoad substantiam, & virtutem quam ex gratia, & ex

& ex opere operantis, habebat disponendi ad justificationem, quemadmodum nec instituit aquam & oleum, ex quibus conficiuntur Sacramenta, Conc. Non instituit quoad significationem, ut sint signa sensibilia, & ex opere operato efficacia remissionis peccatorum, Nego min.

Urgebis : Atqui contritio non potest esse signum sensibile, cum sit actus spiritualis intus latens in corde : Ergo.

Distinguo subsumptum : Non potest esse signum sensibile per se, Concedo : Per voces & alios nutus, Nego subsumptum. Sic mutuus consensus sponsorum per verba fit sensibilis, & signum sacramentale. Itaque ad remissionem peccatorum ante adventum Christi, satis erat ut contritio esset nota Deo, qui eam inspirabat, & confessio ipsi fieret, nunc autem ex institutione Christi necesse est ut contritio innotescat Sacerdoti, & pœnitens ore confiteatur ; nec propterea existimandum est novum onus hominibus esse impositum, quin Christianis gratulandum, quod omnipotens Dei bonitas tam præsens, tamque efficax remedium sanandis eorum vulneribus paraverit.

Dices 3. In judiciis examen imprimis est necessarium, nec sine eo Judex justè judicare potest : ergo examen recenseri debet inter partes Sacramenti pœnitentiæ.

Probatur antec. Ex vulgari effato, Judex judicare debet secundum allegata & probata, id est, rationem non habeat eorum quæ allegantur, nisi plenè probentur ; atque in hanc rem testes audit, repetit, reum interrogat, cum testibus illum componit ; & si quid in iis ex imperitia & negli-

gentia peccaverit, ejus sententia in superiori tribunali rescinditur, & irrita declaratur. Quòd si ejusmodi examen essentiale est judicio vindicativo, quantò magis reconciliativo, in quo reus ipse est accusator & testis? Quis enim nesciat hominem in suis vitiis pervidendis cœcum esse, in alienis perspicacem? Avarus, aut superbus v. gr. quam in aliis detestatur avaritiam, aut superbiam, eo minùs in seipso agnoscit, quo magis ea laborat. Adde homines vulgo ad morem vivere, potiùs quàm ad legem & rationem, minusque attendere quid Deus præcipiat, quàm alii communiter faciant. Denique supra demonstravimus ex iis qui in æternum pereunt, vix quemquam etiam ex peritioribus excipiendum, quem ignorantia vincibilis ad impœnitentiam finalem non perduxerit; crimen enim virtus vocatur, dum publicè geritur, inquit S. Cyprianus epist. i. ad Donatum, & quisquis alios non imitatur, offendit, non auditur, sed noxiæ singularitatis reus traducitur. Quæ cum ita esse quotidiana experientia demonstret, perspicuum est Confessarium non debere secundùm allegata judicare, nisi per examen prudenter probaverit sinceram & integram esse confessionem, veram contritionem, & firmum emendationis propositum, alioquin rescinderetur à supremo Judice prolata ab ipso absolutionis sententia, & ipse cœcus cum cœco, cui ducatum præbet, in foveam caderet.

Distinguo antec. Examen imprimis est necessarium, semper, Nego; Nam in pœnitentibus, qui timidæ sunt conscientiæ, mores ad legem Dei sollicitè exigunt, & ad Sacramentum frequenter  
acce-

accedunt, fatis probata est sincera confessio & contritio absque ullo examine: examen necessarium est, ut plurimum, subdistinguo, tamquam aliquid Sacramento prærequisitum & extrinsecè disponens, Conc. Propter rationes in confirmationem objectionis allatas, & minimè contemnendas, tamquam pars intrinsecè componens & constituens Sacramentum, Nego antec. Quia Sacramentum est essentialiter & integraliter perfectum, & rata absolutionis sententia, modò adsit confessio sincera & integra, contritio vera, & satisfactio debita. Esto quòd pœnitens quàm sæpius Confessarii examine indigeat, ne pro vera falsam pœnitentiam obtrudat.

Dices 4. Manus impositio est materia sacramenti Pœnitentiæ à Christo instituta; quod enim semper & ubique ab omnibus in Ecclesia est observatum, illud censendum à Christo traditum: atqui semper, & ubique, & ab omnibus manus impositio adhibita est in collatione Sacramenti Pœnitentiæ: Ergo.

Nego antec. Neque enim Matth. 16. & 18. ubi promittitur hoc Sacramentum; neque Joan. 20. ubi instituitur, neque in ullo alio Scripturæ textu extat aliquod manus impositionis vestigium.

Ad Confirmationem respondeo distinguendo, quod semper, ubique, & ab omnibus observatum est tamquam ad substantiam Sacramenti pertinens, est à Christo traditum, Concedo: Tamquam cæremonia accidentalis, Nego: Namque in Baptismo exorcismi, & immersio semper, ubique & ab omnibus adhibita sunt, nec propterea dici possunt institutionis divinæ; quia nunquam Ecclesia ejusmodi ritus observavit, quasi essent

divinitus instituti. Constat autem manus impositionem Sacramento Pœnitentiæ non esse essentialem, sed merè accidentalem, ex eo quòd in nullo Concilio fuerit præscripta tanquam necessaria; nec Eugenius IV. in suo Decreto, nec Patres Tridentini, qui accuratè descripserunt Sacramenti pœnitentiæ partes, meminere impositionis manus.

Instabis: Ille ritus accidentalis dici nequit, quem celebres Theologi asserunt essentialem: acqui Guillelmus Antifiodorensis, Vincentius Bellovac. Guillelmus Parisiensis, Alexander de Hales, Marian. Victorin. Thomas Valdensis, & plures alii asserunt manus impositionem esse Sacramento Pœnitentiæ essentialem: Ergo.

Distinguo maj. Quem celebres Theologi asserunt essentialem, juxta communem Catholicorum sententiam, Conc. Contra communem sententiam, Nego maj. Porro scholæ Principes, ut S. Thomas 3. p. qu. 84. art. 4. & opusculo 22. c. 4. Scotus, & eorum discipuli docent ejusmodi ritum esse accidentalem; venerandus tamen est ob antiquitatem, nec negligendus.

Q. 4. *Estne necesse ut contritio, quatenus habet rationem partis Sacramenti, sit supernaturalis?*

R. 1. De fide quidem est contritionem supernaturalem requiri ad obtinendum effectum Sacramenti, scilicet remissionem peccatorum. Sed ad Scholæ controversiam pertinet, num contritio naturalis sufficiat ad perficiendum Sacramentum Pœnitentiæ, quemadmodum aqua naturalis est materia idonea Sacramenti Baptismi, oleum olivarum Sacramenti Extremæ Unctionis.

Affir.

Affirmarunt nonnulli recent. quin. S. Thomas, cum junior scriberet in quartum, eam sententiam amplexus est; sic enim habet dist. 17. q. 3. art. 4. *Confessio potest esse informis, & quamvis tunc non percipiat absolutionis fructum, tamen recedente fictione, percipere incipiet . . . unde non tenetur postmodum iterare confessionem, qui fictus accedit, (hoc est sine vera & supernaturali contritione) sed tenetur postmodum fictionem suam confiteri.* Nihilominus

R. 2. Communis est sententia omnino tenenda, Sacramentum Pœnitentiæ absque contritione supernaturali esse planè irritum, ac proinde iterandum. Et ratio est, quia nullum Sacramentum validè conferri potest absque materia quam Christus instituit: atqui contritio, seu attritio supernaturalis, sola est materia à Christo instituta: Ergo.

Minor probatur. Eam solam materiam Sacramenti Pœnitentiæ Christus instituit, quæ cum forma conjuncta est efficax ad producendam ex opere operato gratiam sanctificantem: atqui contritio naturalis non est efficax ad producendam ex opere operato gratiam sanctificantem, sed sola contritio supernaturalis: Ergo. Ut igitur contritio naturalis censeretur materia divinitus instituta Sacramenti Pœnitentiæ, deberet in aliquo casu producere gratiam, sicut aqua naturalis in Baptismo parvulorum: illud autem dici nequit sine errore. Ergo Sacramentum Pœnitentiæ non potest esse simul validum & informe, quemadmodum Baptisma & cætera Sacramenta; quia sufficiens & necessaria dispositio ad effectum Sacramenti Pœnitentiæ est ipsamet essentialis materia Sacramenti, ac proinde quoties Sacramentum est

ratum ac validum, toties pœnitens est dispositus ad ejus effectum. Contra verò Baptisma & alia Sacramenta possunt esse valida, etiamsi suscipiens non sit dispositus ad eorum effectum percipiendum. Ergo Sacramentum Pœnitentiæ est iterandum, quando pœnitens effectui ejus obicem posuit; quia illud Sacramentum fuit irritum, cum caruerit materia essentiali; secùs sentiendum de Baptismo, & aliis Sacramentis; valida enim sunt, etiamsi suscipiens caruerit debitis dispositionibus, nec proinde iteranda; quia suscipientium dispositiones non sunt partes essentielles hujusmodi Sacramentorum.

Q. 5. *Quomodo definitur Sacramentum pœnitentiæ?*

R. Ex dictis rectè describitur, Sacramentum à Christo Domino institutum, quo per juridicam Sacerdotis absolutionem homini contrito & confesso remittuntur peccata post Baptismum commissa, competenti satisfactione injuncta.

Singulæ definitionis partes post præcedentem expositionem ulteriori explicatione non indigent. Sed, quod longe operosius est, jam sigillatim sunt probandæ & asserendæ non solum contra Hæreticos, sed etiam adversus fictos pœnitentes.

Primo itaque loco ostendemus pœnitentiam esse Sacramentum propriè dictum, à Christo Domino institutum, & quidem à Baptismo distinctum ad delenda peccata post Baptismum commissa. 2. Habere vim remittendi omnia peccata, esseque necessarium necessitate medii iis, qui à gratia Baptismi exciderunt. 3. Sacerdotem in hoc Sacramento sedere tanquam Judicem, & ex potestate sibi à Christo concessa, verum judicium exer-



exercere. 4. Quæ contritio requiratur ad veritatem hujus Sacramenti. 5. Confessionem oris esse à Christo institutam. 6. Deum in hoc Sacramento ita remittere offensam, & reatum pœnæ æternæ, ut exigat satisfactionem ad delendum reatum pœnæ temporalis, cui pœnitentes post absolutionem remanent obnoxii. 7. Quibus verbis debeat concipi absolutio, quam diximus esse formam hujus Sacramenti, & præcipuam illius partem. Et ita sicut omnes lineæ colliguntur in centro; sic quæcunque discutienda sunt in hocce prolixiori Tractatu, ad allatam definitionem revocantur, exceptis tamen nonnullis difficultatibus circa speciales hujus Sacramenti effectus, quibus ultimo loco faciemus satis.

## CAPUT II.

Utrum Pœnitentia sit Sacramentum propriè dictum à Baptismo dictinctum?

Plures à primis sæculis circa Sacramentum Pœnitentiæ erraverunt; sed illud propterea ex albo Sacramentorum non expunxere.

Secundo sæculo Montanus, (à quo Montanistæ, dicti etiam Cataphryges à Provincia Phrygiæ, unde oriundus erat ille Hæresiarcha, & Pepuziani à vico Pepuze, ubi conventus suos celebrabant, quibus Tertullianus tandem se adjunxit stupenda in tanto viro cæcitate) distinxit inter peccata graviora, nempe idololatriam, homicidium, & mœchiam, & peccata minus gravia. Priora voluit esse veluti casus divinæ elementariæ ita reservatos, ut ab Ecclesia nullatenus remitti

D S

possent;

possent; ideoque in ejus secta vocabantur irremissibilia, non quidem absolute; concedebat enim eorum veniam à Deo obtineri posse lacrymis, jejuniis, & aliis carnis afflictionibus. His autem gravioribus peccatis exceptis, Hæresiarcha ille agnovit Ecclesiæ concessam esse potestatem remittendi peccata lapsis post Baptismum, ac proinde Pœnitentiæ Sacramentum admisit. Ita Tertullianus libro de Pudicitia cap. 18. ubi Montanistarum errorem sic exponit: *Salva illa pœnitentiæ specie post fidem, quæ aut levioribus delictis veniam ab Episcopo consequi poterit, aut majoribus à Deo solo.*

Ætate sancti Cypriani, hoc est tertio mediante sæculo, Novatianus Presbyter Romanus Sedem Apostolicam ambiens adversus sanctum Cornelium legitimum Pontificem schisma fecit, Pseudo-Episcopum Romanum à temulentis Episcopis ordinari se curavit, ex Eusebio lib. 6. Historiæ cap. 43. atque ut Cornelium, qui lapsos in idololatriam pœnitentes recipiebat, in invidiam adduceret, adjutus Novato Carthaginensi, schismati hæresim addidit, docuitque sicut Montanus peccatum idololatriæ à solo Deo esse remissibile. Utrum autem ulterius progressus fuerit, quæstio est. Asserit sanctus Ambrosius libro 1. de Pœnitentia cap. 3. ipsum censuisse omnia pariter peccata post Baptismum commissa, esse in Ecclesia irremissibilia. Quodd autem plures ex ejus discipulis in eodem errore fuerint versati, docent Eusebius citato libro 6. cap. 43. Philastrius libro de hæresibus hæresi 34, sanctus Epiphanius hæresi 59. & sanctus Pacianus epistola 3. ad Sympronianum Novatianum: ubi sic loquitur:

quitur: *Tractatus omnis Novatianorum, quem ad me (confertis undique propositionibus) destinasti, hoc continet, quod post Baptismum pœnitere non liceat, quòd mortale peccatum Ecclesia donare non possit, imò quòd ipsa pereat recipiendo peccantes.* Atque ex iis scriptoribus Patres Tridentini sessione 14. capite primo hæc de Novatianis referre non dubitarunt: *Novatianos remittendi potestatem olim pertinaciter negantes, magna ratione Ecclesia Catholica tanquam hæreticos explosit, atque condemnavit.*

Certum tamen est Novatianos, qui & Cathari, id est, puri dicti sunt, vulgo agnovisse cum Montanistis potestatem dimittendi peccata post Baptismum commissa, exceptis duntaxat idololatria, homicidio, & mœchia; sic enim de iis scribit Sanctus Ambrosius cit. lib. 1. de Pœnitentia cap. 2. *Ajunt Novatiani se exceptis gravioribus criminibus relaxare veniam levioribus. Non hoc quidem auctor vestri erroris; in eo igitur patrem vestrum propria damnatis sententia, qui distinctionem peccatorum facitis, quæ solvenda à nobis putetis, & quæ sine remedio (nempe ab Ecclesia ministrando) esse arbitremini: Sanctus enim Doctor eodem capite subiecit, ajunt se Domino deferre reverentiam; cui soli remittendorum criminum potestatem reservant.* Hinc Novatus, ex Socrate lib. 4. Historiæ cap. 28. scripsit ad omnes ubique Ecclesias, ne eos, qui dæmonibus immolaverant, ad sacra Mysteria admitterent; sed ut hortarentur eos ad pœnitentiam, qua indulgentiam criminum à Deo consequerentur.

Duodecimo sæculo Valdenses, ex Reynero, errarunt quidem circa Ministrum Sacramenti pœnitentiæ: *Dicunt, inquit, quòd nullus possit absolvi à malo sacerdote. Item quòd bonus laicus potestatem habeat*

*babeat absolvendi.* Sed constanter retinuerunt septenarium numerum Sacramentorum usque ad decimum sextum sæculum, quo à Calvinistis decepti, duo tantum Sacramenta cum ipsis admiscere, ut fusè probat Illustrissimus Bossuet Meldensis Episcopus lib. 2. Variationum.

Decimo quarto sæculo Wiclefus, ex Thoma Valdensi tom. 2. de Sacramentis c. 141. docuit cum Valdensibus claves non operari in malis Sacerdotibus, quem errorem Joannes Hus, & Hieronymus de Praga decimo quinto sæculo amplexi sunt, & nos confutavimus Tractatu de Sacramentis in genere : sed ipsum Sacramentum non sustulere, ut patet ex citato lib. Variationum.

Decimo sexto sæculo Lutherus lib. de capt. Babyl. tria numerat Ecclesiæ Sacramenta, scilicet, Baptismum, Pœnitentiam, & Panem; sed in calce operis negat pœnitentiam esse Sacramentum propriè dictum. Melanchton ejus assecla sibi etiam in hoc capite non constitit; nam in Apologia Confessionis Augustanæ, pœnitentiam inter Sacramenta reponit; & in locis communibus editis anno 1522. pœnitentiam è numero Sacramentorum expungit. Lutherani tamen passim videntur habere pœnitentiam pro Sacramento; utuntur enim Catechismo, quem Lutherus edidit; in quo, ut refert laudatus Episcopus Meldensis lib. 3. Variation. Minister audita confessione pœnitentis, hisce verbis concionalibus eum absolvit : *Ego, ex Christi mandato, remitto tibi peccata tua in nomine Patris, &c.*

Dixi, *concionalibus*; Quia in mente Pseudo-Reformatorum, Sacramenta non operantur, nisi quatenus excitant fidem, quæ sola remittit peccata,

cata, & absolutio est nudum ministerium, quo Minister declarat remissa esse peccata confitenti : quem errorem Concilium Trident. anathemate percutit can. 9. sess. 14.

Zwinglius & Calvinus cæteris Hæreticis audaciores, apertè & constanter negarunt pœnitentiam esse Sacramentum, & in eo errore versantur omnes Calvinistæ, qui cum magistro suo verba Christi Domini, Joan. 20. *Quorum remiseritis peccata, remittuntur eis*, detorquent ad prædicationem Evangelii, qua lapsi revocantur ad memoriam Baptismi, & excitantur ad credendum justitiam in illo Sacramento acceptam, amitti non posse. Verba Calvini retulimus cap. præced. §. 3.

Atque falsa ejusmodi expositione Calvinistæ putant se declinare tela à Sanctis Patribus in Novatianos contorta. Nimirum, inquiunt, non negamus cum illis Hæreticis omnia peccata in Ecclesia remitti posse, imò omnes uno ore constanter asserimus Ecclesiam accepisse potestatem remittendorum quorumcunque peccatorum ; sed contendimus duntaxat Ecclesiam id præstare, quatenus per prædicationem Evangelii lapsos in ea fide firmat, quòd Fidelibus baptizatis nulla peccata imputentur ; quam impiam novitatem Concilium Trident. sess. 14. tribus Canonibus damnavit. Canone 1. sic habet : *Si quis dixerit in Catholica Ecclesia pœnitentiam non esse verè & proprie Sacramentum . . . . anathema sit.* Canone 2. *Si quis Sacramenta confundens, ipsum Baptismum pœnitentiæ Sacramentum esse dixerit, quasi hæc duo Sacramenta distincta non sint, atque idèd pœnitentiam non rectè secundam post naufragium tabulam appellari : anathema sit.* Et Canone 3. *Si quis dixerit, verba illa Domini Salvatoris,*

vatoris , accipite Spiritum Sanctum , &c. non esse intelligenda de potestate remittendi & retinendi peccata in Sacramento Pœnitentiæ ; sicut Ecclesia Catholica ab initio semper intellexit ; detorserit autem , contra institutionem hujus Sacramenti , ad auctoritatem prædicandi Evangelium , anathema sit. Quare ad propositam quæstionem

R. De fide est pœnitentiam verum esse Sacramentum , in ratione judicii à Christo Domino institutum , & à Baptismo distinctum. Tres sunt responsionis partes.

Prima pars probatur 1. ex Scriptura. Christus Matth. 16. promittit Petro se illi daturum claves regni cœlorum ; ut quodcunque ligaverit aut solverit super terram , maneat in cœlis ligatum aut solutum. Idem promissum ligandi & solvendi ad Apostolos extendit Matth. 18. ac tandem illud actu & de facto confert post resurrectionem. Joan. 20. his verbis , *quorum remiseritis peccata* , &c. Unde Patres Tridentini sess. 14. cap. 1. colligunt Sacramentum Pœnitentiæ tum præcipuè fuisse institutum , cum Apostolis jam in Sacerdotes ordinatis , scilicet in ultima cœna , Christus à mortuis suscitatus , dixit : *Accipite Spiritum Sanctum* , &c.

Quod autem laudata Christi verba , Joan. 20. Sacramentum propriè dictum demonstrent , probatur. Namque ad Sacramentum tria requiruntur. 1. signum externum divinitus institutum. 2. promissio gratiæ , signo , seu ritui exteriori annexa. 3. mandatum divinum illius signi , seu ritus exterioris observandi. Atqui hæc tria in illis verbis continentur. 1. Signum , seu ritus externus ; cum enim potestas hæc concessa

remit-

remittendi & retinendi peccata , exerceri debeat inter homines , sanè interveniant quædam signa exteriora necesse est , quibus pateat tum Apostolis quinam sint solvendi , quive ligandi , tum ipsis pœnitentibus an fuerint soluti vel ligati. 2. eo ipso promittitur gratia , quo promittitur remissio peccatorum ; quia ex dictis de Gratia , ubi de justificatione , peccata lethalia non remittuntur , nisi per gratiæ sanctificantis infusionem. 3. denique in illis verbis imponitur præceptum tum Apostolis utendi potestate hic sibi concessa ; ait enim Christus se eos ad hoc remittere , *sicut misit me Pater* , inquit , *& ego mitto vos . . . . accipite Spiritum Sanctum , quorum remiseritis , &c.* tum ipsis peccatoribus recurringendi ad claves Ecclesiæ ; aliàs peccata eorum in cœlo retinerentur , *quorum retinueritis* , inquit , *retenta sunt* : quæ verba denotant necessitatem non solum præcepti , sed etiam medii.

Frustra Novatores nituntur laudata verba detorquere ad prædicationem Evangelii. 1. Quia Christus ante Passionem discipulis potestatem prædicandi dederat , & eos ad prædicandum miserat , Matth. 10. & Luc. 10. 2. quia hic confertur potestas ligandi & solvendi. Atqui ista aptari nequeunt prædicationi ; Evangelium enim omnibus est prædicandum ; juxta illud Matth. 28. *docete omnes gentes*. Peccata verò omnibus nec sunt remittenda , nec retinenda , sed quibusdam remittenda , aliis verò retinenda. 3. quia Evangelizans non potest prædicatione sua retinere auditorum peccata. Quin , quantum in ipso est , sive mineatur , sive promittat , omnium peccata solvit , quatenus secundum adversarios auditores excitat ,  
mo-

movetque ad credendum promissionibus divinis : quòd si qui non credant, non verbi ministerium, sed duritia & incredulitas auditorum ligat peccata. 4. quia excogitata ab adversariis laudatorum verborum expositio est prorsus aliena ab omnium Veterum mente ; ut docent Patres Tridentini citato cap. 1. his verbis : *quo tam insigni facto , & verbis tam perspicuis , potestatem remittendi & retinendi peccata ad reconciliandos fideles post Baptismum lapsos, Apostolis & eorum legitimis successoribus fuisse communicatam universorum Patrum consensus semper intellexit.* Sed illud nobis jam demonstrandum incumbit. Quare

Probatur 2. ex constanti Ecclesiæ & Sanctorum Patrum traditione. Sanctus Cyprianus epist. 54. ad Cornelium Summum Pontificem , sic scribit : *Statueramus quidem jampridem , Frater charissime, participato invicem nobiscum consilio , ut qui in persecutione infestatione supplantati ab adversario , & lapsi fuissent , agerent diu pœnitentiam plenam ; & si periculum infirmitatis urgeret , pacem sub ictu mortis acciperent... quando permiserit ipse , qui legem dedit , ut ligata in terris , etiam in cœlis quoque ligata essent : solvi autem possent illic , quæ hic prius in Ecclesia solverentur.* Hæc perspicue dicuntur de absolutione , quæ fit in pœnitentia , non verò in prædicatione Evangelii.

S. Pacianus Barcinonensis Episcopus epist. 1. ad Sympronianum Novatianum , *solus hoc , inquires, Deus poterit (remittere peccata.) Verum est , sed & quod per Sacerdotes suos facit , ipsius potestas est.* Nam quid est illud , quod Apostolis dicit , *quæ ligaveritis , &c.*

Hæc contra Novatianos , qui non negabant lapsis prædicandum esse Evangelium ; sed absolutionis beneficium ipsis pœnitentibus esse imper-  
tiendum,



tiendum, contendebantque illos ad misericordiam Dei esse remittendos, & hac parte spem illorum esse erigendam. Contra verò S. Pacianus cum sancto Cypriano, & aliis Orthodoxis propugnabant ejusmodi lapsis nec prædicationem Evangelii esse subtrahendam, nec iisdem pœnitentibus denegandam esse absolutionem: Ergo una erat sententia omnium non solum Catholicorum, sed etiam Novatianorum, potestatem ligandi & solvendi distinctam esse à prædicatione Evangelii.

Sanctus Hilarius in cap. 16. Matthæi sic exclamat, *ò beatus cœli janitor, cujus arbitrio claves æterni aditus traduntur: cujus terrestre judicium præjudicata auctoritas sit in cœlo!*

Sanctus Chrysostomus lib. 3. de Sacerdotio, qui terram incolunt, atque in ea versantur, his commissum est, ut ea, quæ in cœlis sunt dispensent: iis datum est, -ut potestatem habeant, quam Deus optimus neque Angelis, neque Archangelis datam esse voluit, neque enim ad illos dictum est, quæcumque alligaveritis, &c. Atqui Angelis aliquando concessum est annuntiare Evangelium.

Pergit autem sanctus Doctor: *babent quidem & terrestres Principes vinculi potestatem, verum in corpus tantum. Id autem quod dico Sacerdotum vinculum, ipsam etiam animam contingit, atque ad cœlos usque pervadit; usque adeò, ut quæcumque infernè Sacerdotes confecerint, illa eadem Deus supernè rata habeat, ac servorum sententiam Dominus confirmet. Etenim quid hoc aliud esse dicas, nisi omnem rerum cœlestium potestatem illis à Deo concessam! quorumcunque, ait, peccata retinueritis, retenta sunt. Quænam, obsecro potestas hæc una major esse queat? Pater omnifariam Filio potestatem dedit. Ceterum*

D. Habert Theolog. Tom. VI. E terum

*teriam video ipsam eandem omnifariam potestatem à Deo Filio illis traditam.*

S. Hieronymus epist. 1. ad Heliodorum, comparat pœnitentiam cum Baptismo & Eucharistia, *Absit*, inquit, *ut de his quidquam sinistrum loquar, qui Apostolico gradu succedentes Christi corpus sacro ore conficiunt, per quos & nos Christiani sumus, qui claves regni cœlorum habentes, quodammodo judicant ante diem judicii.* Et infra: *non solum Sacerdotes, cum regenerant, sed etiam postea, condonandorum peccatorum obtinent potestatem.*

Sanctus Ambrosius lib. 1. de Pœnitentia cap. 2. de Novatianis hæc habet: *Sed ajunt se Domino deferre reverentiam, cui soli remittendorum criminum potestatem reservent. Imò nulli majorem injuriam faciunt, quam qui volunt ejus mandata rescindere, commissum munus refundere.* Nam cum ipse in Evangelio dixerit Dominus Jesus, accipite Spiritum Sanctum, quorum remiseritis, &c. Atqui ut jam monuimus, controversia non erat Novationos inter & Catholicos, an prædicandum esset Evangelium, nec ne, lapsis in idololatriam, & fiducia nutrienda veniæ à Deo obtinendæ:

Sanctus Augustinus epist. 228. aliàs 180. ad Honoratum de Sacerdotibus fugientibus tempore persecutionis, sic scribit: *An non cogitamus, cum ad istorum periculorum pervenitur extrema, nec est potestas ulla fugiendi, quantus in Ecclesia fieri soleat ab utroque sexu, atque ab omni ætate concursus, aliis Baptismum flagitantibus, aliis reconciliationem, aliis etiam pœnitentiæ ipsius actionem, omnibus consolationem, & Sacramentorum confessionem & erogationem; Ubi si Ministri desint, quantum exitium sequitur eos, qui de isto sæculo vel non regenerati exeunt, vel ligati? Quantus est etiam*

etiam luctus fidelium suorum qui eos secum in vitæ æternæ requie non habebunt. Plura in hoc textu habentur notatu digna. Primum, sanctus Augustinus apertè distinguit Baptismum à Sacramento Pœnitentiæ. Secundum, discrimen ponit inter ipsam pœnitentiam, seu pœnitentiæ actionem, & reconciliationem, sive absolutionem, ut intelligamus virtutem Sacramenti non esse totaliter repetendam ab actione pœnitentis, quasi vim non habeat, nisi ex opere operantis, sed præsertim ex ipsa Sacerdotis sententia. Tertium, Sacramentum Pœnitentiæ esse æquè necessarium ad salutem lapsis post Baptismum, ac Baptismum ipsum nondum regeneratis; cum sine Sacramento Pœnitentiæ lapsos decedentes sequatur æterna perniciēs. Quartum, sententiam Sacerdotis non esse merè declaratoriam, ut docuerunt plures è veteribus Scholasticis, nec semper supponere peccata confitentis jam esse dimissa; sed illa verè expungere; si enim jam essent dimissa, falsò supponeret sanctus Doctor pœnitentes, qui hinc abeunt sine Sacramento Pœnitentiæ, in vitæ requie locum non habituros.

Sanctus Bernardus serm. in Natali sanctorum, Petri & Pauli, *Petro*, inquit, *quid potentius, qui claves regni cælorum tam singulariter accepit, ut præcedat sententia Petri sententiam cæli?*

Denique una semper fuit, & etiam nunc est Occidentalium & Orientalium etiam Schismaticorum fides circa Sacramentum Pœnitentiæ. Illud autem Apostolicum est & Catholicum, inquit Vincentius Lyrinensis, quod semper & ubique servatum est.

Dices, plures è sanctis Patribus textum sancti

Joannis cap. 20. interpretantur de Evangelii prædicatione, *Solvunt eos Apostoli*, inquit sanctus Hieronymus in cap. 44. *Isaiæ, sermone Dei, & testimoniis Scripturarum, & exhortatione virtutum.* Ergo

Distinguo anteced. interpretantur de Evangelii prædicatione per quandam extensionem, quatenus scilicet Sacerdotes per doctrinam disponunt peccatores ad remissionem peccatorum in Sacramento obtinendam, Concedo: interpretantur juxta vocum proprietatem, ita ut in eorum mente, solvere aut remittere peccata, nihil sit aliud quam Evangelium prædicare, Nego anteced. Nam ipsemet S. Hieronymus tum laudata mox epistola, tum in caput 16. & 18. Matthæi distinguit potestatem ligandi & solvendi à potestate prædicandi.

Confirmatur. Diaconi in sua Ordinatione audiunt ab Episcopo: *Oportet Diaconum prædicare*, S. Stephanus prædicavit Jerosolymis, Act. 6. Et S. Philippus Diaconus Samariæ, Act. 8. Quin & Diaconissæ, de quibus Apostolus 1. Timoth. 5. docebant imperitas & rusticanas mulieres, ex Concilio IV. Carthaginensi can. 12 Atqui nullus ex sanctis Patribus scripsit unquam Diaconos aut Diaconissas propter ejusmodi ministeria accepisse claves regni cœlorum, & potestatem ligandi atque solvendi. Ergo.

Secunda pars, nempe Sacramentum pœnitentiæ à Christo fuisse institutum in ratione judicii reconciliativi, constat ex testimoniis laudatis in confirmationem præcedentis responsionis; ligare enim & solvere, sententiam ferre, procul dubio sunt actus Judicis: atqui ex Scriptura & sanctis Patribus mox laudatis, præsertimque ex Sanctis  
Pacia-

Paciano, Hilario, Chrysoftomo, Bernardo, Sacerdotes in hoc pœnitentiæ tribunali ligant & solvunt, sententiam proferunt.

Confirmatur. Verba, quibus Sacerdos conficit Baptismum, Eucharistiam, &c. vocantur à Patribus orationes, invocationes, nusquam verò sententia, absolutio. Quid ita? nisi quia Sacerdos in ejusmodi Sacramento Judicem non agit, sicut in Sacramento Pœnitentiæ.

Tertia pars, scilicet Pœnitentiam esse Sacramentum à Baptismo distinctum, probatur ex Scriptura, quæ clarè distinguit Baptismum inter & Pœnitentiam, tanquam inter duo planè diversa, utpote quæ seorsim sint à Christo instituta & præscripta, & quidem in diversa forma & materia; Baptismum quippe ante Passionem, in aqua instituit Joan. 3. & exinde Discipuli ejus baptizarunt, Joan. 4. Pœnitentiæ verò Sacramentum post Resurrectionem instituit in forma judicii, Joan. 20. *quorum remiseritis peccata*, inquit, *remittuntur eis, & quorum retinueritis, retenta sunt.* Quæ posteriora verba præceptum denotant, ut supra exposuimus: ergo reverà Baptismus & Pœnitentia sunt Sacramenta distincta.

Nec dicant Adversarii citato 20. cap. Joannis, institutam & præscriptam esse dumtaxat prædicationem Evangelii ad memoriam Baptismi refricandam. Namque nullibi legimus Apostolos lapsis post Baptismum in memoriam revocasse divinam illam regenerationem ad veniam obtinendam; quin eos semper hortati sunt ad Pœnitentiam. Petrus Act. 8. Simoni Mago ait, *pœnitentiam age ab hac nequitia tua.* Apostolus 1. Cor. 5. non remitti Corinthium incestum ad Baptismi memoriam, sed il-

lum ligat tradens Satanæ in interitum carnis, ut spiritus salvus fiat in die Domini nostri Jesu Christi; tum 2. Cor. 2. eundem solvit pœnitentia fructum. S. Jacobus etiam peccatoribus ait c. 5. *confitemini alterutrum peccata vestra, & orate pro invicem, ut salvemini.* Et Sanctus Joan. 1. epist. cap. 1. *Si confiteamur peccata nostra, fidelis est & justus, ut remittat nobis peccata nostra:* Ergo Adversariorum doctrina de memoria Baptismi nullo Scripturarum testimonio fulcitur, quin evidenter eis repugnat.

Neque opponant expressis quidem verbis, suum dogma in Scripturis non contineri, sed tanquam necessariam conclusionem ex eis erui, nempe Oseæ 2. habetur, *sponsabo te mihi in sempiternum.* Et Hebr. 13. *non te deferam, neque derelinquam;* quæ vera non essent, nisi fœdus; quod Deus nobiscum in Baptismo pepigit; stet in æternum, adeò ut nihil aliud requiratur ex parte peccatoris ad veniam obtinendam, quàm firma fiducia in promissis divinis. Ne, inquam ista opponant; namque 1. promissa illa, *sponsabo te mihi in sempiternum, non te deferam;* qui manducat hunc panem, *vivet in æternum,* sunt conditionata, nempe si peccator ipse pactum non violat, Deum non deferat, seipsum peccato non perimat; scriptum quippe est Ezech. 18. vers. 24. *Si autem averterit se Justus à justitia sua, & fecerit iniquitatem, secundum omnes abominaciones, quas operari solet impius . . . omnes justitiæ ejus, quas fecerat, non recordabuntur: in prævaricatione, qua prævaricatus est, & in peccato suo, quod peccavit, in ipsis morietur.* Et ex Sancto Augustino, Deus neminem deserit, nisi prius deferatur. Unde autem habent Adversarii fœdus violatum non refarciendum, nisi per memoriam Baptismi?

2. de-

2. detur reparari per fictitiam ejusmodi memoriam, quid inde pro suo errore colligent? An præter Baptismum, nullum veri nominis Sacramentum esse admittendum, sed solam Evangelii prædicationem, quæ in memoriam revocet inviolabile Baptismi fœdus? At ipsi Cœnam Dominicam agnoscunt pro vero Sacramento instituto ad excitandam Baptismi memoriam: Ergo non sequitur ex eo quòd gratia Baptismi amitti non possit, exteriorem pœnitentiæ ritum non esse Sacramentum, accommodatum saltem ad revocandam Baptismi memoriam.

Probatur 2. ex Traditione, pœnitentiam esse Sacramentum à Baptismo prorsus distinctum.

Tertullianus lib. de Pœnitentia cap. 7. sic habet: *clausa licet ignoscentiæ janua, & intinctionis sera obstruëta, aliquid adhuc permisit patere. Collocavit in vestibulo pœnitentiam secundam, quæ pulsantibus patefaciat.*

S. Athanasius lib. de peccato in Spiritum Sanctum: *est, inquit, inter Baptismum & Pœnitentiam non leve discrimen. Quem enim pœnitet, is desinit quidem peccare, sed tamen retinet vulnereum cicatrices: qui autem baptizatur, jam veterem hominem exuit.*

Sanctus Pacianus epist. 3. ad Sympronianum, scribit: *Baptismus Sacramentum est Dominicæ Passionis, pœnitentium venia, meritum confitentis. Illud omnes adipisci possunt: quia gratia Dei donum est, id est, gratuita Dei donatio: labor verò iste paucorum est, qui post casum resurgunt, qui post vulnera convalescunt, qui lacrymosis vocibus adjuvantur, qui carnis interitu reviviscunt.* Similia habet sanctus Chrysostomus hom. 9. in epist. ad Hebræos.

Sanctus Augustinus lib. 2. de adulterinis con-

jugiis cap. 16. de peccato homicidii , sic habet : Si à Catechumeno factum est , Baptismate abluatur ; & si à baptizato , pœnitentia & reconciliatione sanatur. Et epist. 98. aliàs 33. si infans post Baptismum propria incipit habere peccata , illa non regeneratione auferuntur , sed alia curatione sanantur.

Dices : sanctus Augustinus variis in locis remissionem peccatorum , quæ post Baptismum committuntur , tribuit Baptismo , sic enim habet lib. 1. de nupt. & concup. cap. 30. Sic , inquam , accipiendum est , ut eodem lavacro regenerationis , & verbo sanctificationis omnia prorsus mala hominum regeneratorum mudentur atque sanentur , non solum peccata , quæ omnia nunc remittuntur in Baptismo ; sed etiam quæ posterius humana ignorantia vel infirmitate contrahuntur ; non ut Baptisma , quoties peccatur , toties repetatur ; sed quia ipso quoddam semel datur , fit ut non solum antea , verum etiam postea quoriamlibet peccatorum venia fidelibus impetretur. Et epist. 185. aliàs 50. Quidquid ab eis , qui post acceptam Baptismum hic vivunt , infirmitate humana contrahitur quarumcunque culparum , propter ipsum lavacrum dimittitur. Similia habet lib. de peccato originali cap. 39. & 40. & lib. contra Julianum c. 18. Ergo , inquiunt Calvinistæ , nostra sententia est Augustini.

Distinguo anteced. tribuit Baptismo tanquam primæ radici necesseriò præsuppositæ sequentibus salutis subsidiis , Concedo : tribuit Baptismo tanquam causæ proximæ , & exclusis aliis Sacramentis , & salutis subsidiis , Nego anteced. Enimvero sanctus Augustinus argumentatur de regeneratione supernaturali , quæ fit per Baptismum , sicut de vita naturali , quam accipiunt homines  
gene-



generatione carnali. Quemadmodum enim in ordine naturali, quod homo per ætatem crescat, quod ex morbo convalescat; quod hæreditatem paternam capeſcat, denique quod post mortem aliquando reſurrecturus ſit, id totum ſic tribuitur ejus nativiti tanquam primæ radici, ut non excludantur alimenta, quibus augmentum accipit, remedia quæ eum priſtinæ ſanitati reſtituant, & ſpecialis Dei virtus, quæ illum poſt mortem ad vitam revocabit. Ita ſpiritali regenerationi adſcribi debet, tanquam primæ radici, quod fidelis per Sacramentum Confirmationis in juſtitia perficiatur, per Euchariftiam ſpiritaliter vegetetur, & per pœnitentiam ſanetur, aut etiam mortuus ſuſcitetur, & per lumen gloriæ viſione Dei intuitiva veluti hæreditate paterna fruatur. Sed audiendus eſt ipſemet Sanctus Auguſtinus citato cap. ut perſpicuum fiat, quàm injuſte Adverſarii verbis ejus abutantur, & vanè ejus patrocinio gloriantur. *Quid enim prodeſt, inquit, vel ante Baptiſmum pœnitentia (Adde, & Euchariftia) niſi Baptiſmus ſequeretur, vel poſtea, niſi præcederet? In ipſa quoque Dominica Oratione, quæ quotidiana eſt noſtra mundatio, quo fruſtu, quo effectu diceretur, dimitte nobis debita noſtra, niſi ab eis, qui baptizati ſunt, diceretur? Itemque eleemoſynarum largitas, & beneficentia quantalibet, cui tandem ad dimittenda ſua peccata prodeſſet, ſi baptizatus non eſſet? Poſtremo re-generatorum ipſa felicitas, ubi non habebit Eccleſia maculam aut rugam . . . . . quorum erit niſi baptizatorum?* Quibus verbis luce clarius eſt Sanctum Auguſtinum Baptiſmo jam ſuſcepto, non ſolam Evange-  
 lii prædicationem ſuperſtruere, ſed & pœnitentiam, orationem, eleemoſynam, & alia bona  
 E. 5 opera,

opera , tanquam media necessaria ad remissionem peccatorum obtinendam.

### CAPUT III.

In quo consistat ligandi & solvendi potestas Ecclesiæ concessa?

**C**apite præcedenti vindicavimus ab adversariis concessam Ecclesiæ solvendi potestatem. Superest jam ut expendamus in quo præcisè consistat illa potestas, circa quam difficultatem tres sunt sententiæ.

Prima est Heterodoxorum, qui eam reponunt in nuda, & concionali declaratione peccata esse remissa. Sed hæc sententia damnata est ut hæretica à Synodo Trident. sess. 14. can. 9. his verbis: *Si quis dixerit absolutionem Sacramentalem Sacerdotis non esse actum judiciale, sed nondum ministerium pronuntiandi & declarandi remissa esse peccata confitenti... anathema sit.* Veritas hujusce definitionis probata est cap. præcedenti, in quo demonstravimus potestatem ligandi atque solvendi, distinctam esse à potestate prædicandi Evangelium.

Secunda sententia est Magistri Sententiarum, lib. 4. dist. 18. ubi supponit ad Sacramentum Pœnitentiæ requiri contritionem charitate perfectam, ideoque peccatum semper esse remissum priusquam actu subjiatur clavibus Ecclesiæ, ex quo falso principio concludit potestatem solvendi seu absolutionem esse tantum declaratoriam remissionis peccatorum. Hanc sententiam amplexi sunt Sanctus Bonaventura in 4. art. 2. qu. 1. Alexander de Hales ibid. qu. 21. Joannes Major dist. 14. qu. 2. Gabriel qu. 1. art. 1. & alii.

Dif-

Differt autem hæc sententia à præcedente, 1. quia non confundit, sicut prior, potestatem ligandi & solvendi cum potestate Evangelium prædicandi, contenditque Sacerdotes in tribunali pœnitentiæ non esse solum præcones divinæ clementiæ, sed Judices agere, & juridicè declarare peccata esse remissa. 2. quia juxta illos Theologos, contrito quantumcunque perfecta peccata non delet, nisi in ordine ad claves Ecclesiæ. 3. quia in illa sententia absolutio producit secundam gratiam, seu augmentum gratiæ sanctificantis. Duo autem illa posteriora negant auctores & Patroni primæ sententiæ.

Quæstio movetur circa hanc secundam sententiam, num à Concilio Tridentino fuerit proscripta? Negant communiter Theologi, ac imprimis qui Concilio interfuerunt, ut Andreas Vega lib. 13. cap. 33. de justificatione, Dominicus Soto in 4. dist. 20. qu. 2. & Salmeron tom. 2. Tractatu 18. Præterea Cardinalis Palavicinus in Historia Concilii Trident. lib. 10. cap. 12. scribit Concilium damnasse dumtaxat errorem eorum, qui dicebant absolutionem esse nudum ministerium declarandi remissa esse peccata.

Fatendum tamen est ejusmodi sententiam non satis cohærere cum doctrina Concilii, & communiter rejicitur, ut temeraria & erronea. Unde Facultas Parisiensis die prima Julii anno 1638. sua censura confixit quemdam librum de Virginitate, in quo Author statuebat necessariam esse ad Sacramentum Pœnitentiæ contritionem charitate perfectam, & absolutionem nihil aliud esse, quàm juridicam declarationem peccata esse remissa. Quas Propositiones sacra Facultas declaravit quietis anima-

animarum perturbativas, communi & omninò tutæ praxi Ecclesiæ contrarias, efficaciam Sacramenti Pœnitentiæ immunitivas, & insuper temerarias & erroneas.

Tertia sententia, quæ ubiquè tandem obtinuit, quamque ex veteribus Theologis tenuerunt Principes Scholæ, S. Thomas in 4. dist. 18. in Summa quoque 3. p. q. 84. art. 3. ad 5. & Scotus in eundem librum 4. dist. 22. & ante eos Hugo Victorinus lib. 2. de Sacram. part. 14. cap. 8. & Richardus etiam Victorinus lib. de potestate ligandi & solvendi c. 21. ambo Magistri Sententiarum coætanei, acriter insurrexerunt in secundam Sententiam. *Extat*, inquit Richardus, *quorundam sententia tam frivola, ut videnda potius, quam refellenda videatur; putant Sacerdotes non habere potestatem solvendi sed ostendendi solutos. Sed nunquid Dominus dixit, quod solutum ostenderitis, erit solutum? Dicunt Sacerdotes non habere potestatem remittendi peccata, cum Dominus hoc dicat; & dicunt habere potestatem ostendendi remissa, cum Dominus hoc non dicat: Quare juxta hanc tertiam sententiam ad propositam quæstionem*

R. Sacerdotes verè & propriè remittunt peccata, non verò declarant tantum esse remissa. Ita expressis verbis Catechismus Romanus in omnibus Ecclesiis cum laude receptus p. 2. de Pœnitentia §. 21. *Neque enim, inquit, ut in veteri lege Sacerdotes testimonio suo aliquem à lepra liberatum esse renuntiabant: ita nunc in Ecclesia ea tantum potestas Sacerdotibus facta est, ut aliquem à peccatis absolutum esse declarent, sed verè tanquam Dei ministri absolunt.*

Probatur 1. ex Scriptura: Christus Joan. cap. 20. v. 21. sæpius laudato, confert Apostolis eam pote-

potestatem, quam à Patre acceperat: *sicut misit me Pater*, inquit, *& ego mitto vos*. Hæc cum dixisset, pergit Evangelista, *insufflavit, & dixit eis: Accipite Spiritum Sanctum, quorum remiseritis peccata, remittuntur eis, &c.* Atqui Christus ex potestate à Patre accepta, non declaravit tantum peccata esse remissa, sed verè & propriè ea remisit. Ita intellexerunt Pharisei, cum ex verbis ejus accepto scandalo, dixerunt Luc. 5. *Quis est hic, qui loquitur blasphemias? quis potest dimittere peccata, nisi solus Deus?* Certè non offendebantur quòd declarasset Paralytico dimissa esse ejus peccata, quemadmodum olim Nathan declaravit Davidi: sed quòd sibi arrogaret potestatem, quæ solius Dei est: Christus vero tam singularem potestatem sibi à Patre collatam, miraculo statim probavit. *Ut autem sciatis*, inquit, *quia Filius hominis habet potestatem in terra dimittendi peccata (ait Paralytico) tibi dico, surge*. Hanc autem potestatem communicavit Ministris suis cit. cap. Joan. 20. Enimverò voces illæ, *remittere peccata* ex nativa significatione, & in omnium hominum acceptione non denotant declarationem peccati dimissi, sed ipsammet actua-lem remissionem, atque in ea significatione accipiuntur, ubi sermo est de Baptismo. Cur autem in alia eaque metaphorica acceptione usurparentur, ubi agitur de Sacramento Pœnitentiæ, cum Scripturæ & Traditio iisdem vocibus utantur ad significandam utriusque Sacramenti virtutem; nec ullum fundamentum præbeant distinguendi in hoc verbo, *dimittere*, duplicem significationem? *Non interest*; inquit S. Ambrosius lib. de Pœnitentia c. 7. *utrum per pœnitentiam, an per lavacrum hoc jus sibi datum vindicent Sacerdotes: idem in utroque*

*utroque mysterio est.* Et S. Cyrillus Alexandrinus l. 12. Joannem similiter scribit, *duobus modis Dei Spiritu afflati homines peccata remittunt, ac retinent, vel cum dignos admittunt ad Baptismum, & indignos excludunt; vel cum filios Ecclesiæ peccantes corripunt, ac pœnitentibus ignoscunt.* Atqui in Baptismo non declarant tantum peccata esse remissa, sed revera ea remittunt: ergo & in Sacramento pœnitentiæ.

Probatur 2. ex sanctis Patribus cap. præcedenti laudatis, quorum alii, ut sancti Hilarius & Bernardus, docent sententiam Petri præcedere sententiam cœli; quod verum non esset, si Petrus solum declararet peccata in cœlo jam esse dimissa. Alii, ut S. Augustinus laudata epist. 228. de fuga in persecutione, scribunt defectu absolutio-  
nis periclitari hominum salutem, quæ sanè in tuto esset, si absolutio esset dumtaxat juridica declaratio peccata esset à Deo dimissa. Alii expressè asserunt Sacerdotes non solum declarare peccata dimissa, sed ea remittere. Ita S. Chrysostomus lib. 3. de Sacerdotio, ubi sic habet: *Corporis lepram purgare, seu verius dicam, baud purgare quidem, sed purgatos probare, Judæorum Sacerdotibus solis licebat: At verò nostris Sacerdotibus non corporis lepram, verum animæ sordes, non dico purgatas probare, sed purgare prorsus concessum est.*

Dices 1. Solus Deus peccata dimittit, Isa. 43. *Ego sum, ego sum ipse, qui deleo iniquitates tuas.* Ergo.

Jamdudum ad tritam illam Novatianorum objectionem responderunt Sancti Pacianus & Ambrosius, *quod per Sacerdotes facit (Deus) ipsius potestas est.* Quare ad eorum mentem,

Di.

Distinguo ant. solus Deus peccata dimittit, ut causa princeps, & independens, Concedo: solus, excludendo causam instrumentalem & ministerialem, Nego anteced.

Dices 2. constans est Sanctorum Patrum doctrina, Sacerdotes plus non posse erga peccatores, quàm Apostolos erga Lazarum quatrduanum, quem tum solvere potuerunt, cùm jam à mortuis esset suscitatus, & foras prodiisset vivus: *mortuus est peccator*, inquit Sanctus Augustinus serm. 67. aliàs 8. de verbis Domini, *maximè ille, quem moles consuetudinis premit, quasi sepultus est Lazarus... quis eum suscitabit, nisi qui, remoto lapide, clamavit dicens: Lazare, prodi foras? Quid est autem foras prodire, nisi quod occultum erat, foras prodire? Qui confitetur, foras prodit. Foras prodire non posset, nisi viveret: vivere non posset, nisi resuscitatus esset.* Et concione 2. in Psalm. 101. *Cùm audis hominem pœnitere peccatorum suorum, jam revixit: cùm audis hominem confitendo proferre conscientiam, jam de sepulchro eductus est, sed nondum solutus est. Quando solvitur? à quibus solvitur? Quæ solveritis, inquit, in terra, erunt soluta & in cœlo. Meritò per Ecclesiam dari solutio peccatorum potest, suscitari autem ipse mortuus, non nisi intus clamante Domino potest... loquimur ad aures vestras; quod autem intus agitur, non à nobis sed ab illo agitur.*

S. Gregorius similia habet hom. 26. in Evangelia. *Tunc, inquit, vera est absolutio præsidentis, cùm interni arbitrium sequitur Judicis. Quod benè quatrduani mortui resuscitatio illa significat, quæ videlicet demonstrat, quia prius mortuum Dominus vocavit, & vivificavit, dicens: Lazare, veni foras, & postmodum is qui vivens egressus fuerat à Discipulis est solutus.*

*Ecce*

*Ecce illum Discipuli jam viventem solvunt , quem Magister resuscitaverat.*

Atque ex hoc principio S. Hieron. in caput 16. Matthæi , nimix arrogantiæ arguit Sacerdotes , qui se peccata dimittere jactitant , cùm opus illud sit divinæ virtutis ; sic enim habet : *locum istum (nempe,) tibi dabo claves, &c.) Episcopi & Presbyteri non intelligentes , aliquid sibi de Phariseorum assumunt supercilio , vel ut damnent innocentes , vel solvere se noxios arbitrentur , cùm apud Deum non sententia Sacerdotum , sed reorum vita quærat. Legimus in Levitico de Leprosis , ubi jubentur , ut ostendant se Sacerdotibus : & si lepram habuerint , hinc à Sacerdote immundi fiant , non quòd Sacerdotes leprosos faciant & immundos , sed quòd habeant notitiam leprosi & non leprosi , & possint discernere mundum ab immundo. Quomodo ergo ibi leprosi Sacerdos mundum vel immundum facit , sic & hic alligat & solvit Episcopus & Presbyter non eos qui fontes sunt , vel innoxii : sed pro officio suo cùm peccatorum audierit varietates , scit quis ligandus sit , quisve solvendus. Ergo.*

Distinguo antecedens , Sacerdotes non plus habere potestatis quoad aliquid , nempe quoad interiorem fidei illustrationem , cordis compunctionem , & alios pœnitentiæ motus , Concedo : quoad omnia , quasi per eorum ministerium non infundatur gratia sanctificans ; quæ peccatum formaliter expellit , sicut nec per ministerium Apostolorum anima rationalis infusa est quatruiduano cadaveri , Nego anteced. Itaque allata Lazari comparatio omni ex parte æqua non est ; in eo quippe discrimen est inter cadaver , & hominem peccato mortuum , quòd in cadavere nec sensus , nec ullus motus vitalis inesse possit , quamdiu  
absens



absens fuerit anima ; ipsa prius redeat , uniaturque absolutè necessum est, quàm cujusquam operationis vitalis particeps fiat. Contra verò anima à Deo per peccatum separata , & ideo mortua , supernaturaliter ac vitaliter moveri potest à Spiritu Sancto assistente , quamvis nondum inhabitante , priusquam Deo per gratiam sanctificantem uniatur , sicque plenè reviviscat ; namque interiores fidei illustrationes , timor gehennæ , spes in Dei misericordia , contritio cordis , propositum melioris vitæ , sunt actus supernaturales inchoatæ vitæ , quibus commotus peccator , foras exit per confessionem , & accusationem sui , tuncque manus Apostolica seu Sacerdotalis , illum solvit à vinculo mortis , quod est peccatum , & perfectæ vitæ restituit , quatenus per ejus ministerium infunditur gratia sanctificans , seu charitas , quæ est unio animæ cum Deo vita ipsius.

In eo igitur stat comparatio , quòd sicut Apostoli frustra cadaver Lazari solvissent , nisi prius Christus magna voce clamasset : *Lazare veni foras* , & simul spiritum vitæ restituisset , quod non erat virtutis Apostolicæ , sed omnipotentiae divinæ : ita temerè & incassum manus Sacerdotalis peccatores solvere præsumeret , nisi prius efficaciter audissent Deum interiùs clamantem : *Convertimini ad me in toto corde vestro*. Atque hæc de resurrectione Lazari collata cum justificatione peccatoris per Sacramentum Pœnitentiæ.

Ut autem solvatur difficultas petita à leprosis , quos Sacerdotes veteris legis mundos aut immundos declarabant , duplex immunditia tum in leproso , tum in peccatore distinguenda est. In leproso quidem alia est immunditia naturalis , quæ

ex ipsius putidi morbi naturâ exurgit, propter quam, ne cæteros infestet, ab eorum consortio arcetur: alia legalis orta ex lege, quæ Judæos ejusmodi morbo contaminatos à Sacris excludebat. Primam immunditiam non tollebant Sacerdotes: sed ad summum nonnulla præscribebant, quibus morbus sanari posset, ac tandem pluribus diebus probatum leprosum, ut refertur Levit. cap. 13. & 14. sanatum declarabant. Secundam verò immunditiam, hoc est, legalem pro potestate à Deo sibi collata, auferebant Sacrificiis & aliis cæremoniis legalibus citato cap. 14. præscriptis, nec leprosum sic probatum declarabant dumtaxat, sed revera efficiebant mundum. Similiter in quolibet peccatore duplicem immunditiam distinguere oportet, actualem scilicet, & habitua-lem. Actualis est mentis cæcitas, qua bona terrena pluris facit, quàm cœlestia; & cordis duritia, qua malum delectat, & virtus displicet: habitualis verò est ipsa macula peccati, & privatio gratiæ sanctificantis, quæ sequitur ex pravis actibus præteritis. Nam homicidium aut adulterium præteriit, inquit Sanctus Augustinus, sed manet reatus peccati. Primam immunditiam, actua-lem nempe, Deus per se solum tollit, secundam verò per suum Ministrum. Sed sicut in veteri lege Sacerdos legalem immunditiam ex lepra contractam abstergere non poterat, quin prius probasset leprosum verè esse sanatum, & si quid dubii superesset, illum recludere tenebatur ex cit. cap. 13. donec ipsi constaret eum pristinæ sanitati esse restitutum, tuncque Sacrificiis & aliis cæremoniis legalibus mundum non solum declarabat, sed etiam efficiebat. Sic in nova lege Minister Christi

sti solvere nequit à reatu culpæ & pœnæ æternæ, nisi quos Deus sanaverit à pristinis erroribus, & illicitis cupiditatibus; non Sacerdotum sententia, inquit Sanctus Hieronymus, sed reorum vita apud Deum quæritur. Vita, inquam, non pristina, cum in reis mala fuerit, sed recens mutata, & à pravis desideriis expurgata, de qua si satis non constiterit Sacerdoti, ut prudens iudicium ferre possit, illos pro officio suo recludet, hoc est, differet, quoadusque deprehendat Deum ipsis placatum & propitium abstulisse immunditiam actua-lem, hoc est, cor lapideum, & dedisse cor carneum, at tunc demum illos solvet ab immunditia habituali, nempe à reatu peccati & pœnæ æternæ. Et hæc ad mentem S. Doctoris; ait enim, *cum peccatorum audierit varietates, scit quis ligandus sit, quisve solvendus.* Nimirum cum per Confessionem Sacramentalem intellexerit, an lepra sit perseverans, aut volatilis, ut dicitur cit. cap. 13. Lev. hoc est, an reus peccaverit ex inolita consuetudine contrariis operibus nondum correctâ, tumque differendo eum ligabit an ex infirmitate, & præter piam agendi consuetudinem, tuncque illum non solum declarabit, sed revera solvet, scilicet reatu peccati, ac pœnæ æternæ.

Atque ex hac explicatione facile conciliantur Sancti Patres, qui secum pugnare videntur, cum potestatem remittendorum peccatorum Ecclesiæ concessam ita asserunt contra Montanistas & Novatianos, ut uno ore conclament solius Dei esse peccata dimittere: *solus Dominus*, inquit Sanctus Cyprianus ser. de lapsis, *misereri potest; veniam peccatis, quæ in ipsum commissa sunt, solus potest largiri.* Sanctus quoque Ambrosius lib. 3. de Spiritu San-

Est cap. 18. *Per Spiritum Sanctum peccata donantur : homines autem ad remissionem peccatorum ministerium suum exhibent , non ius alicujus potestatis exercent : nempe solus Deus veniam peccatis largiri potest ; non solum quia virtus ejus & potestas per Ministros Ecclesiæ operatur ; sed maximè quia Ministri nequeunt pro libitu solvere quos voluerint , sicut Episcopus potest pro libitu , quamvis illicitè , Sacerdotes ordinare indignos & minimè vocatos ; verè enim non solvunt , nisi quos Deus efficaciter vocaverit , quodammodo suscitaverit , & à pravis cupiditatibus ipse priùs solverit. Deus thesauris suis providet , inquit Tertullianus lib. de pœnit. cap. 6. nec sinit obrepere indignos.*

Dices 3. negari non potest , quin *absolvere* idem planè significet ac *solutum declarare* ; namque 1. in foro externo Judex dicitur absolvere injustè accusatum , cùm eum innocentem declarat. 2. qui cum perfecta contritione accedit ad tribunal pœnitentiæ , jam remissionem peccatorum consecutus est , & nihilominus Sacerdos , excepta ejus confessione , super eo verè pronunciat , *Ego te absolvo* , quod falsò diceret , nisi verba illa juxta usum receptum significarent , *Ego declaro peccata tua esse dimissa* : Ergo.

Nego anteced. In primo enim exemplo injustè accusatum simul absolvit à falsis criminationibus , & innocentem declarat. In secundo etiam Sacerdos non declarat quod nescit , scilicet peccata esse remissa , cùm nec ipsi , nec pœnitenti constet contritionem , de qua sermo est , charitate esse perfectam. Sed esto ex divina revelatione id noverint , quemadmodum nota fuit Christo perfecta contritio mulieris peccatricis Luc. 17.

Nihil.

Nihilominus absolutio non erit nuda declaratio; verba enim illa, *ego te absolvo*, significant, Ego, quantum in me est, remitto peccata tua, do tibi gratiam reconciliativam, quod verum est, 1. respectu ejus qui accessit jam justificatus: tum quia recepit gratiam peccati remissivam: tum quia amplius cum Deo reconciliatur, & crescit in ejus gratia: tum quia ipsi remittitur aliquid pœnæ temporalis, quæ ex dicendis luenda remanet, culpa jam in Sacramento Pœnitentiæ deleta. 2. respectu etiam illius, qui defectu dispositionis ponit gratiæ obicem; nam Minister Sacramenti, quantum in se est, illum solvit à peccato, quemadmodum Medicus hoc ipso, quo præsens & efficax remedium offert infirmo, verè dicit, *ego te sano*, etiam si morosus infirmus noluerit eo uti.

## CAPUT IV.

Ad quæ peccata se extendat solvendi potestas Ecclesiæ concessa?

Ordo doctrinæ postulat, ut investigemus circa quæ peccata exerceri possit illa solvendi potestas, per quam verè & propriè dimitti peccata, capite præcedenti demonstravimus.

Diximus jam potestatem illam non se extendere ad peccata, quæ Baptismus præcesserunt, utpote extra Ecclesiam commissa; quia solvendi potestas exercetur per modum judicii: atqui Ecclesia non judicat de iis quæ foris sunt: Ergo potestas solvendi non se extendit ad peccata Baptismus præcedentia, ac proinde qui in ætate adulta baptizatus est, frustra misceret in Confessione

Sacramentali peccata Baptismum præcedentia cum peccatis Baptismum subsequētib; de prioribus enim Sacerdos iudicium ferre non potest.

Tota igitur quæstio esse potest de peccatis post Baptismum commissis, circa quam duplex est oppositus error; alter, quem perstrinxit Leo X. in sua Bulla contra Lutherum art. 8. & Concilium Tridentinum sess. 14. can. 7. nimirum non licere confiteri peccata venialia: alter Montanistarum & Novatianorum, quo negabant esse in Ecclesia potestatem remittendi graviora quædam peccata. Contra utrumque errorem ad propositam quæstionem

R. Solvendi potestas se extendit ad omnia omnino sive leviora, sive graviora peccata post Baptismum commissa, ita tamen ut venialia sint materia circa quam dumtaxat sufficiens, lethalia vero necessaria. Responsio est de fide quoad utramque partem; ita enim definiit Concilium Tridentinum sess. 14. cap. 7. his verbis; *Si quis dixerit in Sacramento Pœnitentiæ ad remissionem peccatorum necessariam non esse jure divino, confiteri omnia & singula peccata mortalia, quorum memoria cum debita & diligenti præmeditatione habeatur. Et paucis interjectis, de venialibus sic pergit; aut dixerit eos, qui omnia peccata confiteri student, nihil relinquere velle divinæ misericordiæ ignoscendum; aut demum non licere confiteri peccata venialia; anathema sit.*

Prima pars, quæ est de venialibus, probatur 1. ex Scriptura Matth. 16. & 18. promittit Deus se daturum Apostolis eam potestatem, ut quæcunque solverint in terris, soluta quoque forent in cœlis. Joannis autem c. 20. promissum exequitur his verbis: *Accipite Spiritum Sanctum, quo-*  
rum

rum remiseritis peccata &c. nulla in iis testimoniis peccatorum discretio, omnia sive levia, sive gravia, Christus absque exceptione asserit dimitti posse ab Apostolis & eorum successoribus: Ergo.

Probatur 2. ex Traditione.

Tertullianus vicinus temporibus Apostolorum, cùm jam ad Montanum defecisset, ita denegavit Ecclesiæ potestatem dimittendi graviora peccata, ut in ea agnoverit potestatem dimittendi leviora, quæ enumerat lib. de Pudicitia cap. 19. his verbis: *Et hic enim illam Joannes (asserens neminem esse sine peccato) commendavit, quod sint quædam delicta quotidianæ incurfionis, quibus omnes simus objecti: cui enim non accidet, aut irasci iniquè & ultra Solis occasum: aut & manum immittere: aut facile maledicere: aut temerè jurare; aut fidem pacti destruere: aut verecundia, aut necessitate mentiri? In negotiis, in officiis, in quæstu, aut victu, in visu, in auditu quanta tentantur, ut si nulla sit venia istorum, nemini salus competat? Horum ergo erit venia per exoratorem Patris Christum.*

Nec dicas Tertullian. hic vocare levia comparatè solum ad graviora, cùm manum in proximum mittere, & ei maledicere sint peccata lethalia. Namque iis annumerat iram, mendacium ex verecundia, & cætera quotidiana peccata, à quibus vita, etiam Justorum, immunis esse nequit: atque ejusmodi peccata quotidiana non sunt lethalia; hæc enim Justi cautè declinant, & quidem plures per totam vitam.

Atque vel ex hoc testimonio satis liquet universalem Ecclesiæ praxim, secundum quam Fideles peccata venialia subicere solent clavibus Ecclesiæ non esse novam, sed ab Apostolis descen-

dere, cùm tempus assignari nequeat, ex quo cœperit in Ecclesia.

Dixi, peccata venalia esse Sacramenti materiam sufficientem; quia, ut docent Patres Tridentini sess. 14. cap. 5. *Venialia, quibus à gratia Dei non excludimur, & in quæ frequentius labimur, quamquam rectè & utiliter, citraque omnem præsumptionem in Confessione dicantur, quod piorum hominum usus demonstrat, taceri tamen citra culpam, multisque aliis remediis expiari possunt.*

Dices 1. Peccata lethalia vulgò dicuntur necessaria Sacramenti materia: ergo solvendi potestas exerceri non potest, nisi circa peccata lethalia, quemadmodum ex eo quòd aqua naturalis sit necessaria Baptismi materia, Baptismus sine aqua conferri nequit.

Distinguo anteced. Peccata lethalia dicuntur materia necessaria, hoc est, necessariò clavibus subjicienda, Conc. Necessaria ipsi Sacramento, ita ut nisi pœnitens confiteatur se reum peccati mortalis, potestate clavium absolvi nequeat, quemadmodum nec Catechumenus sine aqua tingi, Nego antec. Quod autem priori sensu, non posteriori peccata lethalia dicantur necessaria Sacramenti materia, patet ex eo quod venalia simul vocentur materia sufficiens; si enim hæc materia sufficiat Sacramento, proculdubio alia materia, nempe peccatum mortale, non est necessaria posteriori sensu.

Dices 2. Sancti Patres plura suggerunt remedia, quibus peccata venalia curari possint, scilicet, orationes, lacrymas, eleemosynas, jejunia, injuriarum condonationes, nusquam verò Sacramentum Pœnitentiæ proponunt: Ergo,

Nego



Nego conseq. Quia ex argumento negativo nihil concludi potest contra universalem Ecclesiæ praxim, maximè quando argumentum, in quo versatur scriptor, nonnulla prætermitti postulat: Patres quippe tractant de remediis necessariis, iisque continuo adhibendis ad eluenda peccata venialia; cùm enim vita hominis sit militia super terram, nec possit quis tam solerter declinare ictus adversarii, scil. concupiscentiæ & superbiæ, quin sæpius vulneretur, juxta illud Prov. 24. vers. 16. *Septies . . . cadet Justus*, continuis ei opus est remediis: atqui Confessio Sacramentalis nec est necessaria ad delenda peccata venialia, ut jam diximus, nec continua esse potest: ergo mirum non est, si ejus non meminere SS. Patres: dum enumerant remedia necessaria & quotidiana sanandis peccatorum venialium vulneribus. Sed ex eorum verbis concludamus necesse est hallucinari eos, qui quotidianis peccatis mederi se putant Confessione Sacramentali absque ullo doloris sensu & cordis compunctione, semper parati ad committendum & confitendum. *Septies* quidem in die cadit Justus, sed per quotidianam pœnitentiam toties resurgit: *Peccatum*, inquit S. Chrysostomus, hom. 11. in 1. ad Cor. *si quando ad animam ejus divertit, hospes est, non incola.*

Secunda pars, quæ est de peccatis lethalibus quibuscunque, probatur 1. ex Scriptura, quæ laudatis cap. Matth. 16. & 18. & Joan. 20. nullis limitibus solvendi potestatem Apostolis concessam circumscribit, *quæcumque solveritis super terram, erunt soluta & in cælo. Quorum remiseritis peccata, remittuntur eis.* Hic quidquid peccati nomine intelligitur, Apostoli absque exceptione dimittere possunt.

sunt. Hac potestate usus est Apostolus 2. Cor. 2. erga Corinthium horrenda ipsis gentibus fornicatione pollutum, nempe cum uxore patris sui 1. Cor. 5. vers. 1. ipsum enim post duram pœnitentiam Ecclesiæ restituit. Vim hujusce exempli Tertull. Montanista factus, declinare non potuit cap. 14. lib. de pudic. nisi negando, reclamante ipsa textus evidentia, unum, & eundem esse hominem, quem Apostolus 1. Corinth. 5. Satanæ tradiderat in carnis interitum, & quem 2. Corinth. 2. tam benignè suscepit. Hunc locum adversus Novatianos urgent sanctus Athanasius epist. 4. ad Serapionem, & S. Ambrosius lib. 1. de Pœnitentia cap. 7.

Probatur 2. ex Traditione.

S. Clemens Alexandrinus apud Euseb. lib. 3. Historiæ c. 23. refert S. Joannem Evangelistam Ecclesiæ reddidisse perditissimum juvenem, qui post Baptismum latronum ducem se constituerat: errantem ovem quæsit B. Apostolus, ad Ecclesiam reduxit, ac pœnitentiæ lacrymis purgatam communioni restituit.

Sanctus Cyprianus epist. 54. cum 36. aliis Episcopis, scribit ad Sanctum Cornelium Summum Pontificem, se communi consilio decrevisse lapsos in persecutione, ac sacrificiis illicitis maculatos, sed postea pœnitentes, Ecclesiæ reconciliandos ante pœnitentiam integrè peractam, si periculum infirmitatis urgeret: *Nec enim, inquit, fas erat, aut permittebat paterna pietas, & divina clementia Ecclesiam pulsantibus claudi, & dolentibus & deprecantibus spei salutaris subsidium denegari, ut de sæculo recedentes sine communicatione, aut pace Domini dimitterentur, cùm permiserit ipse, qui legem dedit, ut ligata in terris, etiam*

*in cœlis ligata essent : solvi autem possent illic , quæ hic prius in Ecclesia solverentur.* Mitto posteriores Patres , ut sanctum Pacianum , sanctum Ambrosium , & alios , qui ex professo Novatianorum errorem confutarunt , ex quibus constat Ecclesiæ traditam fuisse à Christo potestatem solvendorum quorumcunque peccatorum.

*Solvuntur Objectiones.*

Multa obijciuntur contra posteriorem responsionis nostræ partem , quibus ut fiat satis , operæ pretium est advertere peccatum dupliciter dici posse irremissibile. 1. Ex parte subjecti , nempe si peccator , propter gravitatem , & multitudinem peccatorum , prorsus deferatur à Deo , careatque omni gratia ad agendam pœnitentiam ; peccatum enim cum impœnitentia conjunctum , est absolute irremissibile. 2. Ex parte potestatis , quæ ad solvenda omnia peccata sese non extendat , quasi admittendi sint quidam graviores casus , ita Deo reservati ut ab eis , Ecclesia etiam pœnitentes absolvere nequeat. Utrùm autem Deus aliquos ita deferat , ut pœnitendi gratiam ipsis prorsus denegat , quæstio est Scholæ , quam expendimus suo loco in Tractatu de gratia , ubi varias Theologorum opiniones retulimus. Utrùm verò Deus graviorum quorundam peccatorum veniam sibi reservaverit , pertinet ad dogma fidei , quòd hic tractamus.

Qui opinantur Deum quibusdam , v.g. obduratis , donum pœnitentiæ denegare , facile se extricant ab omnibus difficultatibus , quæ petuntur è Scripturis , in quibus legitur Deum in interitu impio-

impiorum ridere, quibusdam peccatis veniam non concedere sive in hoc seculo, sive in futuro, esse quoddam peccatum ad mortem, pro quo expiando non relinquitur hostia, &c. Una enim eorum responsio est, idè peccata illa non dimitti; quia deest in peccatoribus vera & legitima pœnitentia; Deus enim, inquiunt, omnibus verè pœnitentibus veniam promisit; sed nemini pollicitus est se donum pœnitentiæ concessurum, ne homines spe veniæ liberiùs in peccata ruerent, & clementiam Dei facerent servitutem, ut loquitur Tertullianus.

Qui verò nobiscum aliter de bonitate Dei sentiunt, docentque Deum neminem totaliter deserre, quamdiù hîc superest, sed omnes, etiam induratos, ad pœnitentiam adducere, auxiliis saltem remotè sufficientibus, quæ impotentiam moralem non excludunt, sed physicam dumtaxat, ut diximus cit. Tractatu de Gratia, consequenter admittunt quædam peccata, maximè induratorum, esse moraliter irremissibilia, non ex parte seu defectu potestatis Ecclesiæ, sed ex parte subjecti, seu defectu peccatoris, qui nunquam totas vires exeret ad agendam, ut par est, pœnitentiam; sicque ad momenta ex Scripturis & Patribus deprompta, quibus Hæretici contra doctrinam Catholicam astruere nituntur quædam peccata esse irremissibilia, respondent distinguendo: Irremissibilia dicuntur ex parte seu defectu potestatis Ecclesiæ negant: ex parte seu defectu subjecti non pœnitentis ut oportet, non concedunt, sicut patroni prioris sententiæ, sed subdistinguunt; dicuntur irremissibilia moraliter, concedunt: physicè & absolutè, negant.

Hæc

Hæc quidem solutio est veluti clavis pervia ad referenda quæ occurrunt obscura in libris sacris & SS. Patrum; sed præferendæ sunt, quia ipsimet textus jamjam obtinendi suppeditant, solutiones. Itaque

Dices 1. 1. Reg. 2. habetur: *Si peccaverit vir in virum: placari ei potest Deus: Si autem in Dominum peccaverit vir, quis orabit pro eo?* 2. Machabæorum 9. v. 13. de Antiocho legitur, *orabat . . . hic scelestus Dominum, à quo non esset misericordiam consecuturus.* Et Matth. 12. v. 31 *Omne peccatum & blasphemia remittetur hominibus: spiritus autem blasphemiae non remittetur; & quicumque dixerit verbum contra Filium hominis, remittetur ei; qui autem dixerit contra Spiritum sanctum, non remittetur ei, neque in hoc sæculo, neque in futuro.* Quem locum expendens S. Athanasius epist. 4. ad Serapionem, probat 1. non omnia baptizatorum peccata esse in Spiritum sanctum, ut immerito Origenes & Theognostus dicebantur asseruisse; quia cum omne peccatum in Spiritum sanctum sit irremissibile, vicissent Novatiani, negantes Ecclesiæ potestatem dimittendi gravia peccata post Baptismum commissa. Deinde S. Doctor statuit suam sententiam, nempe peccatum in Spiritum sanctum esse singularem peccati speciem; unde concludit contra Novatianos, non omnia Baptizatorum peccata esse irremissibilia, sed certum quoddam, quo negatur Christi divinitas, & opera ejus Beelzebub adscribuntur.

R. 1. Generatim. Quæ hîc opponuntur ex Scriptura, non de baptizatis scripta sunt, cum nondum extaret Baptismi præceptum: atqui nullus, five Montanista, five Novatianus ausus est dicere in Baptismo omnia peccata non posse dimitti.

R. 2.

R. 2. Ad singula.

Ad primum respondeo cum S. Ambrosio libro 1. de Pœnitentia cap. 9. non esse dictum, *nul-  
lus orabit*, sed *quis orabit*? quia ad Deum tali in ca-  
su exorandum, opus est homini singularis apud  
Deum gratiæ, qualis Moyses fuit, qui Deum Ju-  
dæis ob idololatriam iratum placavit. Et cap. 10.  
S. Doctor scribit eodem sensu accipiendum illud  
1. Joan. 5. *Qui scit fratrem suum peccare peccatum non  
ad mortem, petat, & dabitur ei vita peccanti non ad mor-  
tem. Est peccatum ad mortem, non pro illo dico, ut ro-  
get quis; nempe Apostolum non prohibere quo-  
minus Fideles orent pro ejusmodi peccatore, sed  
innuere dumtaxat non ita esse certum orationis  
effectum, ac si oratio fieret pro peccante non ad  
mortem; quia ex S. Augustino l. 1. de serm. Dom.  
in monte c. 22. Illius peccati tanta labes est, ut depre-  
candi humilitatem subire non possit. Et lib. retract.  
c. 19. recensens illa verba, ne viderentur peccanti  
ad mortem omnem veniæ spem adimere, sic scri-  
bit: *Addendum fuit, si in hac tam scelerata mentis per-  
versitate finierit hanc vitam; quoniam de quocunque pes-  
simo in hac vita constituto non est utique desperandum, nec  
pro illo imprudenter oratur, de quo non desperatur.**

Ad secundum respondeo cum sancto Thoma  
in 4. distinct. 1. *Dicendum, inquit, quod veniam verè  
consecuturus fuisset Antiochus, si verè pœnituisset; sed  
non habuit veram pœnitentiam; quia non amore justitiæ  
dolebat peccata, sed timore pœnæ, quam expectabat, aut  
dolore pœnæ, quam sustinebat. Si igitur Antiochus  
ex perfecta cordis contritione ad Deum fuisset  
conversus, veniam fuisse consecuturum non du-  
bitaret sanctus Augustinus, qui ser. 352. alias 27.  
inter homilias 50. sic scribit de Juda sceleratiore,  
capit.*

capit. 3. *Judam traditorem non tam scelus quod commisit, quàm indulgentiæ desperatio fecit penitus interire.*

Quòd de Antiocho diximus, idem de Esau sentiendum; flevit quidem, Hebr. 12. vers. 17. non peccata, sed amissam hæreditatem; fratris enim occidendi consilium animoolvebat: *Venient*, inquit, Gen. 27. *dies luctus patris mei, & occidam fratrem meum Jacob.* Quanquam illa Apostoli verba, non invenit pœnitentiæ locum, non videntur intelligenda, nisi de pœnitentia Isaac, ad quam Esau lachrymis patrem suum movere conabatur, ut scil. benedictionem Jacobo impertitam revocaret; sed non modò sanctus Senex illam non revocavit facti pœnitens, quin illam expressè confirmavit, *benedixi ei*, inquit, *& erit benedictus.*

Ad tertium exposuimus Tract. de peccatis pag. 189. quid sit peccatum in Spiritum sanctum, & quo sensu dicatur irremissibile; nempe quatenus gravioris illius peccati reus pœnitentiæ remedia, sine quibus nullum peccatum remitti potest, penitus negligit.

Ad confirmationem petitam ex auctoritate tum Origenis & Theognosti, tum sancti Athanasii; Respondeo 1. obscura esse verba, quæ in laudata epistola tanquam ex Origene & Theognosto proferuntur; ait enim sanctus Athanasius sententiam illam inquisitione adhuc indigere, ne fortè profundior in illis ipsorum dictis mens lateat.

2. Origenes disertè & constanter doctrinam Catholicam adversus Montanistas propugnavit, ut colligitur ex variis ejus scriptis; sed præsertim lib. 3. contra Celsum, cui exprobranti quòd Ecclesia homines variis sceleribus post Baptismum inqui-

inquinatos reciperet, sic respondet: *Rursum resipiscentes haud secus quàm redivivos recipit: tandem post longiorem melioris mentis approbationem, ea tamen conditione, ut, qui lapsi sunt, in posterum excludantur ab omnibus dignitatibus Ecclesiasticis.*

3. Sanctus Athanasius id unum probat, scilicet non omnia baptizatorum peccata esse in Spiritum sanctum; sed unum quoddam singulare, quod quidem fatetur irremissibile; quo verò sensu hic non explicat, sed disertè exponit Tractatu de communi essentia Patris, Filii, & Spiritus sancti, ubi sic habet: *Sunt alii, qui in Spiritum sanctum impingunt, qui scilicet, in Christi veritatem blasphemiam dicunt, ajuntque, in Beelzebub ejicit dæmonia. De istis intelligendum est, quod ait; non remittetur neque in præsentis sæculo, neque in futuro; quin & hoc observandum est, non dixisse Christum, blasphemanti & pœnitentiam agenti remissionem dandam non esse, sed blasphemanti, id est, in blasphemia perseveranti: quandoquidem nullum est peccatum irremissibile apud Deum illis, qui verè ex animo, ut par est, pœnitentiam agunt.*

Cæterum, movere non debet, quòd sanctus Athanasius in laudata epistola dixerit, peccatum in Spiritum sanctum esse irremissibile; namque ista loquendi ratio, utpote ex Evangelio desumpta, familiaris est sanctis Patribus, etiam iis, qui ex professo & constanter usque ad mortem Novatianos infectati sunt. S. Cyprianus lib. 3. ad Quirinum cap. 28. ait, *non posse in Ecclesia remitti ei, qui in Dominum deliquerit.* S. Pacianus epist. 3. ad Sympronianum de peccato in Spiritum sanctum: *Hoc ergo est, inquit, quod in Ecclesia non dimittitur.* S. Ambrosius lib. 1. de Spiritu sancto cap. 3. *Si quis Spi-*  
*ritus*



*ritus sancti majestatem abnegét, non potest ibi exoratio esse veniæ, ubi sacrilegii plenitudo est. Et ad virginem lapsam sic loquitur: Inhære pœnitentiæ usque ad exitum vitæ, nec tibi præsumas ab humano die posse veniam dari, quia decipit te, qui hoc tibi polliceri voluerit; quæ enim proprie in Dominum peccasti, ab illo te convenit in die judicii expectare remedium.*

Atqui certo certius est in his & similibus textibus, ubi sermo est non solum de singulari blasphemiâ in Spiritum sanctum, sed etiam de plerisque aliis in Deum peccatis, laudatos Patres non deseruisse causam Ecclesiæ, quam tam strenue adversus Novatianos propugnarunt; sed baptizatos deterrere voluisse, ne spe veniæ incautiùs prolaberentur, cum difficile sit, aliquando etiam moraliter impossibile eam consequi: *Paucorum est, inquiebat supra S. Pacianus, qui post casum resurgunt, qui post vulnera convalescunt, qui lachrymosis vocibus adjuvantur, qui carnis interitu reviviscunt.* Et S. Ambrosius testatur plures se vidisse, qui in gratia steterint (quamvis sint admodum rari) quàm qui semel amissam recuperaverint. Ergo æquitas postulat ut simili modo interpretemur S. Athanasium, & S. Hieronymum in epistola 149. ad Marcellam, cum nudè asserunt, duce Christo, Spiritum blasphemix non remitti, neque in hoc sæculo, neque in futuro.

Instabis: In laudata epistola ad Serapionem non agitur utrùm gravia peccata post Baptismum sint moraliter impossibilia; sed utrùm simpliciter & absolutè remitti nequeant. Atqui sanctus Athanasius asserit unum quoddam singulare in Spiritum sanctum esse irremissibile, cætera verò remitti

mitti posse, quamvis difficilius: Ergo S. Athanasius sensit cum Novatianis, peccatum in Spiritum sanctum absolutè non posse in Ecclesia remitti.

Nego secundam majoris partem, nempe in laudata epistola quæstionem versari, an peccata post Baptismum sint absolutè irremissibilia; sed utrum omnia rectè dicantur in Spiritum sanctum; illud autem posterius negat S. Athanasius, ne inde argumentum sumant Novatiani pro suo errore, cum Christus in Evangelio asseruerit peccatum in Spiritum sanctum non remitti neque in hoc sæculo, neque in futuro.

Distinguo etiam minor. Asserit peccatum in Spiritum sanctum esse irremissibile, juxta Scripturæ sensum, Conc. Juxta doctrinam Novatianorum; Nego minor. Non explicat quidem hic, quo sensu Christus dixerit peccatum illud non remitti neque in hoc sæculo, neque in futuro; sed disertè exposuit Tractatu supra laudato de communi essentia Patris, & Filii, & Spiritus sancti.

Urgebis: Atqui ex S. Athanasio vicissent Novatiani, si omnia peccata post Baptismum essent in Spiritum sanctum, utpote irremissibilia: non vicissent autem si peccatum in Spiritum sanctum esset dumtaxat moraliter irremissibile. Ergo in mente S. Athanasii peccatum in Spiritum sanctum est absolutè irremissibile.

Distinguo subsumptum, vicissent ex aliqua parte, quatenus dicebant (saltem juxta S. Athanasium) nulla baptizatorum peccata remitti posse in Ecclesia, Conc. Si enim omnia & singula sunt blasphemix in Spiritum sanctum, non remittuntur neque in hoc sæculo, neque in futuro: at obli-

obfistit S. Athanasius, docens blasphemiam in Spiritum sanctum, esse quoddam singulare peccatum, ac proinde Novatianos gratis & sine fundamento asserere omnia & singula baptizatorum peccata non posse in Ecclesia remitti: vicissent omni ex parte, Nego subsumpt. Nam superest quæstio, quam S. Doctor alibi solvit, ut diximus, scil. quo sensu peccatum in Spiritum S. sit irremissibile; eam autem hîc non ingreditur; quia satis est ad ejus propositum, probasse non omnia peccata post Baptismum esse in Spiritum sanctum; nec proinde posse dici irremissibilia.

Cur autem peccatum in Spiritum sanctum cæteris difficilius remittatur, aperit S. Pacianus epistol. 3. his verbis: *Quia in cæteris peccatis, aut errore labimur, aut frangimur metu, aut carnis infirmitate superamur.* Hinc Apostolus 1. ad Timoth. 1. ait se misericordiam consecutum, quia ignorans fecerat in incredulitate: & ipsemet Christus Dominus cit. cap. Matth. 12. asserit peccatum blasphemiae in Filium hominis, hoc est, in ejus humanitatem, esse dimittendum; ipsa enim ejus infirmitas, & abjectio blasphemantes aliqua ex parte excusabant.

At in blasphemia contra dona Spiritus sancti, hoc est contra veritatem, quæ manifestabatur per miracula, & alia bona opera, nihil est quod ejusmodi peccati gravitatem minuere possit, ut observat S. Chrysostomus hom. 42. in Matth. ubi sic loquitur: *Spiritusne, inquires, blasphemiae non dimitte-  
tur pœnitentibus? quod omnino falsum esse patet; nam &  
hoc peccatum dimissum scimus, cum multis eorum, qui ta-  
lia in Spiritum sanctum dixerant, ignotum esse constet.  
Quid igitur est quod dicis? significare voluit multò minùs*

cæteris hoc esse ignoscibile ac veniale. Quamobrem? quia videlicet quisnam esset Christus ignorabant: Spiritus autem sancti gratia multis, & magnis signis seipsam manifestaverat.

Dices 2. Hebr. 6. dicitur: *Impossibile est eos, qui semel sunt illuminati . . . & prolapsi sunt, rursus renovari ad pœnitentiam, rursus crucifigentes subimelipsis Filium Dei, & ostentui habentes.* Ergo.

Distinguo antec. Impossibile est rursus renovari per Baptismum, Conc. per Sacramentum Pœnitentiæ, subdistinguo; impossibile est renovari ea perfectione & plenitudine, quæ confertur in Baptismo, Conc. Renovari per veram cum Deo reconciliationem, iterum distingui potest; impossibile est moraliter, Conc. Absolutè, Nego antec. Tripliciter itaque exponitur iste Apostoli locus, propter cujus obscuritatem multi in Ecclesia latina hancce epistolam seriùs in canonem receperunt.

Primo, S. Athanasius citata epistola 4. Ambrosius lib. 2. de pœnit. cap. 7. Epiphanius hæresi 50. Chrysostomus hom. 9. in epist. ad Hebr. quem ibidem sequuntur Theodoretus, Theophylactus, & Oecumenius, S. Augustinus in expositione inchoata epist. ad Rom. & S. Joannes Damascenus lib. 4. orthodox. fidei cap. 10. locum illum interpretantur de renovatione, quæ fit per Baptismum, quasi Apostolus falsam Judæorum opinionem pervertere voluerit hisce verbis: *Ne existimetis, o Judæi, Baptisma Evangelicum simile esse baptismatibus legalibus,* quæ toties in lege Mosaica repetere licuit, quoties aliquis nova immunditia contaminatus fuerat: Baptisma quippe Evangelicum est tum divina quædam regeneratio; sicut enim homo semel nascitur, ita  
semel

semel in Christo renasci potest; tum signum mortis Christi: *Quicumque baptizati sumus in Christo Jesu, in morte ipsius baptizati sumus; consepulti enim sumus cum illo per Baptismum in mortem*, Rom. 6. Unde cum iterum baptizari, esset quasi Christum secundo crucifigi, subdit vers. 6. *rursùm crucifigentes sibi met-ipsis Filium Dei, & ostentui habentes.*

Secundò, Origenes & Theognostus apud S. Athanasium cit. epist. 4. & quamplurimi recentiores, locum illum intelligunt de renovatione, quæ sit per Sacramentum Pœnitentiæ, sed non eodem modo mentem suam explicant.

Alii volunt Apostolum dixisse moraliter dumtaxat impossibile esse sic renovari, aliàs sibi contradiceret, utpote qui incestum Corinthium post duram pœnitentiam communioni Fidelium restituerit, 2. Cor. 2. & scripserit Gal. 4. se iterum pariturire Galatas, qui à gratia exciderant, & à Christo evacuati erant, Gal. 5. Sed ex iis, qui locum Apostoli de Sacramento Pœnitentiæ interpretantur, nonnulli contendunt Apostolum non intelligendum de impossibilitate morali, sed de absoluta: tum quia res, quæ frequenter contingit, ut pœnitentia post lapsum, non dicitur simpliciter impossibilis, tum quia Apostolus in hac eadem epistola vocem, *impossibile*, semper usurpat ad significandam absolutam impossibilitatem, ut c. 6. *impossibile est mentiri Deum*: Cap. 10. *impossibile enim est sanguine hircorum & taurorum auferri peccata*; Cap. 11. *sine fide autem impossibile est placere Deo.*

Alii igitur volunt Apostolum scribere impossibile esse lapsos renovari per Sacramentum Pœnitentiæ, ea facilitate & perfectione, qua renovati fuerant per Baptismum; nam ex sancto Athanasio

epist. 4. sæpiùs laudata, latum est discrimen inter renovatìonem regenerationis, & renovationem reconciliationis: *Is quem pœnitet, inquit, peccare quidem desinit, retinet tamen vulnerum cicatrices: qui autem baptizatur, veterem exuit hominem, renovatur supernè genitus spiritu gratiæ.* Et ex Patribus Tridentinis sess. 14. cap. 2. *Alius est præterea Baptismi, alius pœnitentiæ fructus: per Baptismum enim Christum induentes, nova prorsus in illo efficimur creatura, plenam & integram peccatorum omnium remissionem consequentes: ad quam tamen novitatem & integritatem per Sacramentum Pœnitentiæ, sine magnis nostris fletibus & laboribus, divina id exigente iustitia, pervenire nequaquam possumus: ut meritò pœnitentia laboriosus quidam Baptismus à sanctis Patribus dictus fuerit.*

Instabis: Apostolus ejusdem epistolæ cap. 10. vers. 25. & 26. lapsis post Baptismum adimittit omne remedium; sic enim habet: *Non deferentes collectionem nostram, sicut consuetudinis est quibusdam. . . voluntariè enim peccantibus nobis post acceptam notitiam veritatis, jam non relinquitur pro peccatis hostia: terribilis autem quædam expectatio judicii, & ignis æmulatio: Ergo.*

Distinguo anteced. Lapsis per apostasiam a Christo, & in ea permanentibus, ut verba illa declarant, *non deferentes collectionem nostram.* Conc. Lapsis quibusque pœnitentibus, Nego anteced. His itaque verbis occurrit Apostolus falsæ Judæorum opinioni, qui expectant alium Messiam & Redemptorem, scribitque nullam relinqui hostiam iis, qui deserunt collectionem seu Religionem Christianam.

Q. Unde colligitur peccata lethalia post Baptismum commissa, esse materiam necessariam Sacramenti Pœnitentiæ?

R. I.

R. 1. Non colligitur ex illis verbis præcisè : *Quorum remisistis peccata, remittuntur eis*, Joan. 20. *Et quæcunque solveritis super terram, erunt soluta & in cælo*. Matth. 18. quia verba illa indicant quidem Sacramentum Pœnitentiæ esse quoddam remedium utile & efficax, sed non unicum ad delenda quælibet peccata, sive leviora, sive graviora; cum sine eo venialia solvi & dimitti possint. Itaque

R. 2. Colligitur ex verbis cum præcedentibus connexis : *quorum retinueritis, retenta sunt; quæcunque alligaveritis super terram, erunt ligata & in cælo*. His enim verbis declarat Christus quædam esse peccata, quæ nisi hîc dimittantur & solvantur per claves Ecclesiæ, nunquam dimittenda nec solvenda sunt in cælo : Atqui illa peccata non sunt venialia : si enim Justus decedat cum venialibus per claves Ecclesiæ nondum dimissis nec solutis, nihilominus Deus ea dimittet & solvet : Ergo verba Christi debent intelligi de peccatis lethalibus post Baptismum, clavibus Ecclesiæ necessariò subji-ciendis.

Ergo Sacramentum Pœnitentiæ est necessarium necessitate medii lapsis post Baptismum; quia sine eo saltem in voto, salutem consequi nequeunt.

Ergo est quoque iisdem lapsis necessarium necessitate præcepti divini, Deus enim eo ipso quo instituit medium absolute necessarium ad salutem, præceptum imposuit illius usurpandi. Infideles, verbi gratia, & Catechumeni tenentur ad Baptismum recurrere; quia sine ipso non possunt introire in regnum cœlorum. Utrum autem Sacramentum Pœnitentiæ sit necessarium necessitate præcepti Ecclesiastici, etiam iis, qui non sunt peccato mor-

tali contaminati, nec proinde præcepto divino astricti, expendemus, ubi de Confessione.

## CAPUT V.

Quis sit Minister Sacramenti Pœnitentiæ.

**Q**uæ hætenùs dicta sunt de ligandi & solvendi potestate, provocant ad inquirendum sine intermissione penes quos sit in Ecclesia divina illa potestas.

Valdenses, teste Reinerio libro 5. sentiebant laicum probum, non verò improbum Sacerdotem habere potestatem absolvendi.

Wiclefus eundem errorem amplexus est. Hinc est quòd Martinus V. in sua Bulla ad calcem Concilii Constantiensis, in quo damnatus est ille Hæreticus jam defunctus, voluit hæreseos Wiclefi suspectos interrogari, num crederent quòd Fideles, habita copia Sacerdotis idonei, teneantur de necessitate salutis confiteri Sacerdoti, & non laico, seu laicis quantumcunque bonis & devotis?

Pseudo-reformati, ut asserunt peccata post Baptismum dimitti per prædicationem Evangelii, quatenùs fidem excitat, consequenter docent solvendi potestatem esse penes eos, qui promissa Dei in Evangelio contenta annuntiant etiam per jocum. Kemnitius tamen asserit id officii esse Pastorum, & ita observant Ecclesiæ, quæ utuntur Lutheri Catechismo, in quo præscribit confessionem peccatorum faciendam Pseudo-ministro.

Omnes ejusmodi errores damnavit Concilium Tridentinum sess. 14. sic enim habet can. 9. *Si quis dixerit absolutionem sacramentalem Sacerdotis non esse actum*



actum judiciale, sed nudum ministerium pronuntiandi & declarandi remissa esse peccata confitenti, modò tantum credat se esse absolutum; aut Sacerdos non seriò, sed joco absolvat; aut dixerit non requiri confessionem pœnitentis, ut Sacerdos eum absolvere possit; anathema sit. Et can. 10. Si quis dixerit Sacerdotes, qui in peccato mortali sunt, potestatem ligandi, & solvendi non habere: aut non solos Sacerdotes esse ministros absolutionis; sed omnibus, & singulis Christi Fidelibus esse dictum, quæcunque ligaveritis, &c. quorum verborum virtute quilibet absolvere possit peccata, publica quidem per correctionem dumtaxat, si correptus acquieverit; secreta vero per spontaneam confessionem; anathema sit. Et capite 7. Quoniam igitur natura, & ratio judicii illud exposcit, ut sententia in subditos dumtaxat feratur; persuasum semper in Ecclesia Dei fuit, & verissimum esse Synodus hæc confirmat, nullius momenti absolutionem eam esse debere, quam Sacerdos in eum profert, in quem ordinariam, aut subdelegatam non habet jurisdictionem.

Ad propositam igitur quæstionem,

R. De fide est in Ministro Sacramenti Pœnitentiæ requiri duplicem potestatem, scilicet, Ordinis Sacramentalis & jurisdictionis, ac proinde Ministrum Sacramenti Pœnitentiæ esse solum Sacerdotem, Episcopum, vel Presbyterum, qui habeat jurisdictionem. Duæ responsionis sunt partes: prima de necessitate potestatis Ordinis, quam quilibet Sacerdos recipit in sua inauguratione; secunda, de necessitate potestatis jurisdictionis, quæ confertur per legitimam vocationem, seu missionem, ut infra exponemus.

Prima pars probatur 1. ex Scriptura, Joan. 20. Christus Dominus non alios alloquitur, quàm Apostolos, cum ait: *Quorum remiseritis peccata, &c.*

Ergo soli Apostoli & eorum successores acceperunt à Christo potestatem dimittendornm peccatorum. Et ita Ecclesiam semper intellexisse testantur Patres Tridentini sessione 14. c. 1 Quare,

Probatur 2. Ex Traditione, cujus locupletes testes sunt, præter sanctos Pacianum, Chrysostomum, Hieronymum, Augustinum, c. 2. laudatos, sanctus Ambrosius libro 1. de Pœnitentia cap. 2. *Fus hoc, inquit, solis permillum est Sacerdotibus.* Innocentius I. epist. ad Decentium cap. 7. sic scribit: *Cæterum de pondere æstimando delictorum, Sacerdotis est judicare, ut attendat ad confessionem pœnitentis, & ad fletus atque lacrymas corrigentis, ac tunc jubere dimitti, cum viderit congruam satisfactionem.* Sanctus Leo epist. 82. aliàs 91 cap. 2. ait: *Sic divinæ bonitatis præfidiis ordinatis, ut indulgentia Dei nisi supplicationibus Sacerdotum nequeat obtineri; mediator enim Dei & hominum homo Christus Jesus hanc præpositis Ecclesiæ tradidit potestatem, ut & confitentibus actionem pœnitentiæ darent, & eosdem salubri satisfactione purgatos, ad communionem Sacramentorum per januam reconciliationis admitterent.*

Probatur 3. Quia illi soli ex institutione divina judicium exercere possunt in Ecclesia, quos Spiritus Sanctus posuit regere Ecclesiam Dei, & præesse Fidelibus. Atqui soli Episcopi & Presbyteri positi sunt regere Fideles: nulli Diacono dicitur in sua inauguratione, oportet Diaconum præesse; Quia, ut habet liber Pontificalis, Diaconus (à fortiori inferiores Clerici) ad ministrandum ordinatur. At Pontifex munia Presbyteri declarat his verbis: *Oportet Presbyterum prædicare, benedicere, baptizare, offerre & præesse:* Ergo.

Dices 1. Jacobi 5. vers. 16. habetur: *Confitemini*

ni ergo alterutrum peccata vestra & orate pro invicem, ut salvemini: Ergo alii, præter Sacerdotes, confessiones excipere possunt, ac proinde confitentes absolvere.

Resp. 1. ad antecedens, non esse unum hujusce textus intellectum.

Alii illum intelligunt de Confessione Sacramentali, ita ut sensus sit, confitemini, homines, hominibus, (sicque *alterutrum*) non quibuslibet, sed Presbyteris, de quibus Apostolus præmiserat verbis immediatè præcedentibus: *Infirmatur quis in vobis? inducat Presbyteros Ecclesiæ, & orent super eum, ungentes eum oleo in nomine Domini, &c.* ex quibus verbis infert, *confitemini ergo alterutrum peccata vestra*; quæ conclusio non videretur elici ex præmissis, nisi confessio facienda esset Presbyteris, de quibus facta est mentio.

Alii, ut Venerabilis Beda, hunc locum interpretantur de confessione peccatorum venialium. *In hac sententia, inquit, illa debet esse discretio, ut quotidiana levique peccata coequalibus alterutrum confiteamur: porro gravioris lepræ immunditiam Sacerdoti pandamus.*

Alii contendunt S. Jacobum velle dumtaxat, ut omnes candidè fateamur peccata nostra, nec ea protervè excusemus, nempe, ut humili nostra confessione alios provocemus ad orandum pro nobis. Sed quidquid sit de antecedente,

Respondeo 2. Negando ultimam consequentiam, nempe quòd alii præter Sacerdotes, excepta aliorum confessione, possint illos absolvere. Olim quidem Fideles in periculo mortis constituti, in quo Sacerdotis copiam non habebant, solebant confiteri peccata sua alicui ex laicis astantibus

tibus', ut constat ex Magistro Sententiarum libro 4. distinct. 17. & ex sancto Thoma in hunc locum ; sed Confessio illa non erat propriè sacramentalis ; sic enim scribit Angelicus Doctor quæst. 8. Supplementi capite 2. ad 1. *Confessio ex defectu Sacerdotis laico facta, sacramentalis est quodammodo, (quia scilicet, est materia Sacramenti) quamvis non sit Sacramentum perfectum, quia deest ei quod est ex parte Sacerdotis, nimirum absolutio.* Et ad tertium : *Et ideo oportet quod iterum confiteatur Sacerdoti cum copiam habere potuerit ; & præcipue quia, ut dictum est, Sacramentum Pœnitentiæ perfectum non fuit.*

Dices 2. Sanctus Cyprianus epist. 11. permittit Diaconis, absente Presbytero, etiam absolvere pœnitentes ; sic enim scribit : *Quoniam tamen video facultatem veniendi ad vos nondum esse . . . . occurrendam puto fratribus nostris, ut qui libellos à Martyribus acceperunt, si incommodo aliquo, aut infirmitatis periculo occupati fuerint, non expectent præsentiam nostram, quin apud Presbyterum præsentem quemcumque, vel, si Presbyter repertus non fuerit, & urgere exitus cœperit, apud Diaconum quoque exomologesim (confessionem) facere delicti sui possint ; ut manus eis in pœnitentiam imposita, veniant ad Dominum cum pace, quam dari Martyres literis ad nos factis desideraverunt.*

Quod autem per impositionem manuum debeat intelligi absolutio ; patet tum quia scribit beatus Martyr, pœnitentes per huiusmodi manus impositionem profecturos cum pace ad Dominum, quod sperandum non esset, nisi habuisset vim peccata dimittendi : tum quia per illam manus impositionem conceditur pœnitentibus quod Martyres desideraverunt : atqui Martyres efflagitaverunt, ut ejusmodi pœnitentes Deo & Ecclesiæ reconciliaren-

liarentur : Ergo sanctus Cyprianus censuit ista per Diaconum, absente Presbytero, præstari posse, ac proinde Diaconum habere solvendi potestatem, sicut & baptizandi, saltem extraordinariam in casu necessitatis.

Confirmatur. Eandem disciplinam obtinuisse, in Hispania quidem testantur anno 303. Patres Eliberitani can. 3. in Gallia octava sæculo Alcuinus lib. 1. de divinis Officiis: in Angliâ duodecimo sæculo Concilium Eboracense, & Concilium Londinense, Odo etiam de Soliaco Episcopus Parisiensis eodem sæculo.

Distinguo antecedens, sanctus Cyprianus permittit Diaconos absolvere pœnitentes à pœnis canonicis, eosque communioni Ecclesiæ restituere, Concedo : Absolvere sacramentaliter, & à peccatis solvere, Nego antecedens. Itaque in illa epistola agitur de lapsis publicè pœnitentibus, quorum alii durioribus pœnitentiæ laboribus jam defungebantur; alii stadium pœnitentiæ nondum ingressi, ad illud decurrendum prostrati ad pedes Episcopi, & Clerici suppliciter afflagitabant admitti. Tum Episcopus, & cum ipso Presbyteri & inferiores Clerici manus illis imponebant in pœnitentiam, cui tunc subiciebantur. Interim donec stadium absolvisset, à sacris Mysteriis abstinebant, ac propterea abstenti vulgò dicebantur. Pro eorum pace & perfecta reconciliatione, Martyres ad sanctum Cyprianum supplices libellos direxerant, quorum precibus annuens beatus Martyr absens propter persecutionem, scribit ad Clerum, permittitque ut in ejus absentia, si qui pœnitentes infirmitatis periculo occupati fuerint, Presbyter eos reconciliet, quamvis  
juxta

juxta receptam Ecclesiæ disciplinam, illud munus esset Episcopi. Quòd si desit Presbyter, Diaconus eorum exomologesim, id est, confessionem excipiat, tum manum eis imponat in pœnitentiam, quam si convaluissent, peragere tenebantur, continuòque ab excommunicatione, qua Sacris interdicebantur, illos absolvat, Ecclesiæ reconciliet, ac etiam Viaticum Corporis Domini administret, & ita veniant ad Dominum cum pace; Quia, inquit sàctus Thomas in Supplemento, quæst. 8. art. 2. *Quamvis Sacramentum efficere non possit, (qui non est Sacerdos) ut faciat id quod ex parte Sacerdotis est, absolutionem, scilicet, defectum tamen Sacerdotis Summus Sacerdos supplet, nimirum propter pœnitentiàm, humilitatem, contritionem, & fervens desiderium suscipiendi Sacramentum.* Fecit ergo S. Cyprianus, quantum ex ipso fuit, quidquid postulaverant Martyres.

Atque hæc expositio loci alioquin difficilis suadetur 1. ex sermone ejusdem S. Cypriani de lapsis, ubi agnoscit potestatem dimittendi peccata, esse Sacerdotum propriam: *Confiteantur, inquit, singuli delictum suum, dum adhuc qui deliquit in sæculo est, dum admitti confessio ejus potest, dum satisfactio & remissio facta per Sacerdotes apud Dominum grata est.* 2. Ex Eusebio, qui Historiæ lib. 6. cap. 44. refert ex S. Dionysio Alexandrino, Presbyterum infirmitate detentum, Eucharistiam transmisisse per puerum ad quendam pœnitentem, nomine Serapionem periculosè decumbentem, cùm nondum esset absolutione sacramentali donatus. 3. Ex Alcuino, qui citato libro scribit solis Episcopis & Presbyteris claves regni cœlestis fuisse traditas. 4. ex Odone de Soliaco, qui Statuto 56. satis explicat con-

confessionem, quam à Diaconis in necessitate excipi permittit, non esse sacramentalem; sic enim habet: *prohibetur districtè ne Diaconi ullo modo audiant confessiones, nisi in arctissima necessitate; claves enim non habent, nec possunt absolvere.*

Secunda pars, quæ est de potestate jurisdictionis absolutè necessaria ad absolvendum, probatur 1. ex Scriptura, Christus enim Jo. 20. illam conjungit cum potestate Ordinis: *Sicut misit me Pater, inquit, & ego mitto vós.* En potestas jurisdictionis, cum per ista verba Apostoli, jus accipiant regendi Ecclesiam, & gubernandi Fideles. Pergit autem Christus: *Accipite Spiritum Sanctum, quorum remiseritis peccata, quibus verbis confert potestatem Ordinis.*

Probatur 2. iis omnibus momentis, quibus supra cap. 2. demonstravimus Sacramentum Pœnitentiæ esse à Christo institutum in ratione iudicii reconciliativi, quod exerceri non potest sine jurisdictione.

Confirmatur 1. ex Concilio Lateranensi IV. can. 21. his verbis: *Si quis . . . . alieno Sacerdoti voluerit iusta de causa sua confiteri peccata, licentiam prius postulet, & obtineat à proprio Sacerdote; cum aliter ipse illum non possit absolvere vel ligare.* 2. Ex decreto Eugenii IV. pro Armenis: *Minister hujus Sacramenti, inquit, est Sacerdos habens auctoritatem absolvendi, vel ordinariam, vel ex commissione Superioris.*

Dices 1. Quilibet Presbyter in sua inauguratione accipit potestatem dimittendi peccata, non enim frustra Episcopus manus ipsi imponens, dicit: *Accipite Spiritum Sanctum, quorum remiseritis peccata; remittuntur eis: Ergo.*

Distin-

Distinguo antecedens : Accipit potestatem incompletam, Concedo : Completam, subdistinguo; si cum potestate Ordinis simul jungatur potestas jurisdictionis, seu missio ad plebem regendam, Concedo : Secus, Nego anteced. Itaque Apostoli completam acceperunt potestatem remittendorum peccatorum; Joan. 20. quia Christus simul eos præposuit regendis Fidelibus : *Sicut misit me Pater*, inquit, *& ego mitto vos*. Ita antiquitus cum Presbyteri in sua inauguratione ascriberentur alicui Ecclesiæ gubernandæ sub auctoritate Episcopi, plenam accipiebant potestatem dimittendorum peccatorum. Sed ex quo obtinuerunt ordinationes vagæ, ut loquuntur, contra quas multum disceptatum est in Concilio Tridentino, pluribus asserentibus non posse iri obviam malis, quæ in Ecclesia obrepserant, nisi sancta Synodus, exemplo Concilii Chalcedonensis, penitus prohiberet Ordinationes sub titulo patrimonii; Presbyteri sic ordinati indigent speciali deputatione, qua ipsis assignentur subditi, quos ligare, aut solvere possint.

Dices 2. Jurisdictio necessaria non est necessitate Sacramenti, sed præcepti dumtaxat ad conficienda alia Sacramenta, collatio, verbi gratia, Baptismi, vel Ordinis, quamvis sine jurisdictione sit illicita, valet tamen, nec iterari potest : Ergo.

Nego consequentiam, & paritatem, Disparitas est, quod forma aliorum Sacramentorum non sit actus judicialis sicut absolutio, essentialiter supponens in Ministro jurisdictionem, ut docent Concilium Tridentinum sess. 14. cap. 7. his verbis : *Quoniam igitur natura & ratio judicii illud exposcit,*

*ut*



ut sententia in subditos dumtaxat feratur, persuasum semper in Ecclesia Dei fuit, & verissimum esse Synodus hæc confirmat, nullius momenti absolutionem eam esse debere, quam Sacerdos in eam profert, in quem ordinariam aut subdelegatam non habet jurisdictionem.

Dices 3. Privati sibi possunt eligere Judicem arbitrum, & ejus judicio se subicere: Ergo Fideles quemlibet Sacerdotem possunt eligere in Confessarium, eumque sibi constituere Judicem.

Distinguo antecedens, possunt eligere in causis merè civilibus; in quibus agitur dumtaxat de rebus, de quibus liberè tanquam domini disponere possunt, Concedo: in criminalibus, in quibus controvertitur de offensa contra Rempublicam, aut ejus Principem, Nego antecedens; in ejusmodi enim controversiis judicium est penes personam læsam, vel eos, in quos Respublica transtulit suam auctoritatem. Porro peccata, quæ sunt materia circa quam judicii pœnitentialis, sunt Dei offensa, ac proinde ligari aut solvi nequeunt nisi ab eis, quos Deus vocavit ad illud judicium exercendum.

Dices 4. sine jurisdictione, quilibet Sacerdos excipere potest confessiones peccatorum venialium, & ab iis absolvere: ergo potestas jurisdictionis non est necessaria necessitate Sacramenti.

Nego antecend. Contrarium enim declaravit Congregatio Cardinalium sub Innocentio XI. an. 1679. his verbis: *Ne venialium confessio fiat simpliciter Sacerdoti non approbato ab Episcopo aut Ordinario. Si Confessarii etiam Regulares, aut quicumque alii Sacerdotes secus egerint, sciant Deo optimo maximo se rationem reddituros esse, neque defuturam Episcoporum & Ordinariorum justam & rigorosam animadversionem in con-*

*tra facientes . . . & facta de præmissis omnibus, ac de verbo ad verbum relatione, Sanctitas sua probavit, ac præfens Decretum typis mandari ac publicari voluit.*

## CAPUT VI.

Satisfit variis difficultatibus circa potestatem jurisdictionis.

Q. 1. *Quotuplex est potestas jurisdictionis?*

R. Duplex, ordinaria, & delegata.

Ordinaria est ea, quæ competit habenti ex officio curam animarum, v g. Parocho in sua Parochia, Episcopo in sua Diœcesi, Summo Pontifici in tota Ecclesia, Superioribus etiam Regularibus in sua Congregatione.

Delegata est ea quæ committitur Sacerdoti non habenti curam animarum.

Q. 2. *Quis delegare potest ad audiendas Confessiones?*

R. Juxta vulgare effatum, quivis habens jurisdictionem ordinariam delegare potest. Sed cum ex inordinata delegatione multi orirentur defectus & magna confusio, non sine animarum perniciæ; nempe Parochi nonnumquam delegabant vagos Sacerdotes, flagitiosos, & incapaces: quin Regulares, etiam aliquando apostatæ, seu prætextu privilegiorum Sedis Apostolicæ, renitentibus aut insciis Pastoribus, indiscriminatim peccatores absolvebant; Concilium Tridentinum occurrit tantis malis saluberrimo hocce Decreto sess. 23. cap. 15. de reformatione: *quamvis Presbyteri, inquit, in sua ordinatione à peccatis absolvendi potestatem accipiant, decernit tamen sancta Synodus, nullam etiam Regularem posse confessiones sæcularium etiam Sacerdotum audire, nec*  
ad

*ad id idoneum reputari, nisi aut Parochiale beneficium, aut ab Episcopis per examen, si illis videbitur esse necessarium, aut aliàs idoneus judicetur, & approbationem, quæ gratis detur, obtineant: privilegiis & consuetudine quacunque, etiam immemorabili, non obstantibus.*

Circa hocce Decretum plura sunt diligenter notanda.

Primum, nullus Parochus potest ullum Sacerdotem delegare ad accipiendas confessiones suorum Parochianorum, nisi fuerit ab Episcopo approbatus.

Secundum, Decretum illud non spectat habentes Beneficium, cui cura animarum annexa est; quia censentur approbati eo ipso, quo Episcopus ejusmodi Beneficium ipsis contulit.

Tertium, nequidem Sacerdotes sæculares possunt absolvi à Sacerdote, qui nec habet Beneficium cum cura animarum nec ab Episcopo est approbatus. Contrariam doctrinam proscripserunt Innocentius XI. anno 1679. & Clerus Gallicanus anno 1700.

Quartum, hoc Decreto revocata sunt privilegia Regularium, si quæ antea habuerint, absolvendi sine licentia Episcopi; sic enim habet: *Privilegiis & consuetudine quacunque, etiam immemorabili, non obstantibus.* Et ita declararunt Summi Pontifices Pius IV. in Bulla quæ incipit, *in principis Apostolorum*, in qua sic habet: *Omnia illa & singula privilegia, exemptiones, immunitates . . . mare magnum, & aliæ gratiæ in his omnibus & singulis, in quibus illa Statutis & Decretis Concilii Tridentini contrariantur, ipso jure revocata, cassata, & annullata, ac ad ipsius Concilii terminos atque limites redacta sint, & esse censeantur.* Sanctus Pius V. in Bulla, cujus

initium est, *Romani Pontificis*, revocat Bullam, *etsi Mendicantium*, prius à se editam, in qua Concilio Tridentino derogare visus fuerat in gratiam Mendicantium.

Idem præstitit Gregorius XIII. sua Constitutione, quæ incipit, *in tanta negotiorum mole*. Illud tandem agnoverunt an. 1633. Præpositi Monasteriorum urbis Parisiensis hocce scripto, quod tradiderunt Eminentissimo Cardinali Richelio. *Nous soussignez Religieux de divers Ordres, tant en notre nom, qu'au nom de tous les Religieux de nos Ordres en France, desquels nous promettons de nous faire avouer; reconnoissons que nous ne devons, ni nous ne pouvons oïr les Confessions des personnes seculieres, sans l'approbation & licence de Messieurs les Ordinaires, lesquelles ils peuvent revoquer quand bon leur semblera, &c.*

Cum autem extinctam controversiam quidam Regulares anno 1655. fuscitassent in Diœcesi Andegavensi, hancque Propositionem evulgassent, *Concilium Tridentinum non obligat Regulares in Gallia ad obtinendas approbationes ab Episcopis, ut sæcularium Confessiones audire possint*, Clerus Gallicanus Parisiis congregatus eam damnavit ut temerariam, scandalosam, falsam, Sedi Apostolicæ, Conciliis tum œcumenicis, tum Provincialibus, & præcipuè sacro Tridentino injuriosam, & contrariam. Quod judicium Alexander VII. suo Decreto confirmavit anno 1659. declaravitque eandem Propositionem falsam, temerariam, scandalosam, in hæresim & schisma inducentem, sacro Concilio Tridentino, & Sedi Apostolicæ injuriosam.

Sed necdum quiescere Regulares; quidam enim anno 1666. Diœcesis Agennensis insurrexerunt contra quædam Statuta Episcopi approbationem

tionem spectantia , & tanquam ab abusu provocaverunt ad supremum Senatum Burdigalensem, qui cum eorum votis contra Episcopum favisset, Rex Christianissimus Ludovicus XIV. uti Canonicarum Sanctionum vindex, in suo sanctiori Concilio rescidit anno 1668. Senatusconsultum Burdigalense , & solemniori Edicto sanxit, ut in suo regno servarentur circa approbationem , quæ Concilium Tridentinum , plures Synodi Provinciales in Gallia, ut Rothomagensis , Burdigalensis, Bituricensis, Narbonensis, Tolosana, &c. & Summi Pontifices Pius IV. Sanctus Pius V. Gregorius XIII. Clemens VIII. Paulus V. Gregorius XV. Urbanus VIII. & Alexander VII. mandarunt, scilicet, nullum Regularem idoneum esse ad audiendas sæcularium Confessiones, nisi obtenta Episcopi approbatione, quam limitare & revocare possit absque eo quod revocationis causam aperire teneatur.

Post celebre illud Edictum, quod Episcopi Galliæ in commentariis suæ Curiae Episcopalis, inferere curarunt, siluere Regulares, maxime cum Clemens X. paulo post, hoc est, anno 1670. Constitutionem, quæ incipit, *Superna*, ediderit, in qua eadem continentur circa approbationis necessitatem, facultatem eam limitandi & revocandi, quæ in præfato regio Edicto.

Eam tamen Constitutionem non receperunt Galliæ Antistites, utpote quæ nonnulla inserta habeat disciplinæ Ecclesiæ Gallicanæ minus consentanea.

Nihilominus ex ea constat Regulares nulla Privilegia à Sede Apostolica obtinere, quibus

Confessiones sæcularium excipere possint, non obtenta aut revocata Episcopi approbatione.

Dices; Ecclesia nihil mutare potest circa substantiam Sacramentorum, ut probavimus Tractatu de Sacramentis in genere: atqui si Episcopi approbatio esset necessaria ad veritatem Sacramenti Pœnitentiæ, Concilium Tridentinum mutasset hujusce Sacramenti substantiam, cum ante Concilium Tridentinum aliud non requiretur ex parte Ministri, ac ejus veritatem, quam potestas Ordinis, & jurisdictionis.

Concessa majore, Nego minorem; Aliud enim etiam nunc non requiritur ex parte Ministri, quam potestas Ordinis & jurisdictionis. Sed Patres Tridentini, ut contra plures abusus integritati Sacramenti & saluti Fidelium providerent, decreverunt jurisdictionis ad absolvendum necessariæ incapaces deinceps fore Sacerdotes, tam sæculares, quam Regulares, qui curam animarum non habuerint, nisi prius fuerint ab Episcopo approbati. Porro penes est Ecclesiam concedere vel denegare jurisdictionem quibus voluerint.

Q. 3. *Regulares possuntne absque approbatione Episcopi excipere confessiones Monialium, quæ ipsis sunt subjectæ, & ab Episcopi jurisdictione exemptæ?*

R. Non possunt; ita enim statuit Gregorius XV. Constitutione, quæ incipit, *Inscrutabili*, & Clerus Gallicanus anno 1700. hancce quorundam Regularium propositionem damnavit ut falsam, & a Concilii Tridentini mente alienam; *Religiosæ exemptæ possunt absolvi à sacerdote non approbato ab Episcopo, sive Sacerdos ille sit sæcularis, sive Regularis.*

Q. 4. *Sacerdos approbatus in una Diœcesi, censeturne approbatus in cæteris?*

R. Mi-

R. Minimè, ut constat tum ex Clementina *Dudum*, tit. de Sepulturis, tum ex laudata Constitutione, *Superna*, Clementis X. tum ex sacra Congregatione, cujus declarationem refert Barbofa parte secunda de officio & potestate Episcopi.

Q. 5. *Parochi possuntne sibi eligere quem voluerint Confessarium?*

R. Possunt, modò Confessarius ille sit ab Episcopo approbatus; id enim habetur cap. *Ne pro dilatione*, tit. de pœnitentiis & remissionibus: *Ne pro dilatione pœnitentiæ periculum immineat animarum, permittimus Episcopis, & aliis Superioribus Ecclesiasticis, nec non minoribus Prælati exemptis, ut etiam præter sui Superioris licentiam, providum & discretum sibi possit eligere Confessorem.* Parochos autem Sanctus Thomas 2. 2. q. 188. art. 4. & 5. vocat Prælatos inferiores, & 3. p. qu. 67. art. 2. ad secundum, Ecclesiarum minores Principes. Et hunc Decretalis sensum confirmat antiqua & hodierna consuetudo.

Q. 6. *Parochus indigetne Episcopi approbatione, ut excipiat Confessiones Fidelium aliarum Parochiarum?*

R. 1. Si bona fide versentur in ejus Parochia, v. g. cujusdam negotii perficiendi causa, tam Parochus, quàm alii Sacerdotes ibidem approbati, possunt ejusmodi confessiones excipere, etiam si Parochiani illi sint alterius Diœcesis; quia censentur Parochiæ membra, saltem quoad jus recipiendi Sacramenta ad salutem necessaria, sive utilia.

Dixi 1. *si bona fide*, quia si data opera, ut disciplinam Diœcesis vel Parochiæ suæ eludant, aliò divertant, ibi non possunt absolvi, ut declaravit Clemens X. laudata Constitutione.

Dixi 2. *Sacramenta ad salutem necessaria*, sive *utilia*; quia non possunt ibi suscipere Sacramentum matrimonii, nisi ibidem fixerint domicilium.

R. 2. Parochi non possunt sine approbatione Episcopi expressa vel tacita audire Confessiones aliorum Parochianorum, sive extra suam Parochiam, sive in sua Parochia, si Parochiani illi ex professo ad eam confluunt etiam bona fide, ut peccata sua confiteantur. Ita declarat Concilium Senonense anno 1524. *Interrogent, inquit, Sacerdotes pœnitentes ad Confessionem accedentes, an sint Parochiani, maxime si de ipso dubitant; quia non debent absolvere nec audire in confessione, nisi suos Parochianos.* Et ratio ex dictis est petenda, nempe Parochi eo ipso censentur ab Episcopo approbati, quo instituuntur ad Curiale Beneficium: Ergo sicut institutio est limitata ad tale beneficium, ita & jurisdictio ac approbatio: Enimverò qui capax est unius Curiae, plerumque est incapax aliarum.

Dixi, *sine approbatione Episcopi expressa, vel tacita*; alterutra enim sufficit.

Approbatio est expressa, cum scripto vel expressis verbis conceditur. Tacita verò, cum Episcopus non contradicit necessariae consuetudini, secundum quam vicini Parochi etiam diversae Diœceseos sese mutuò juvant ad sustinenda onera Pastoralia.

Ergo si Parochus alienos Parochianos absolveret, Episcopo propter graves causas contradicente, puta, quia omnes indiscriminatim admittit, publicos usurarios, concubinarios, aliorum bonorum raptores & detentores, &c. irrita & vana erat ejus absolutio vel ex solo defectu jurisditionis & approbationis.

*Sed*



*Sed quid, si Parochus, silente Episcopo, prohibeat, ne Parochiani apud alium Parochum peccata deponant?*

R. 1. Parochi se faciles in hac parte præbere debent suis Parochianis, de quibus nulla sit suspicio eos disciplinæ vitandæ causa Parochi sui iudicium subterfugere. Ita Sanctus Carolus Borromæus in XI. Synodo Diœcesana. Et rationem affert Sanctus Thomas. in 4. Sententiarum & Supplement. quæst. 8. art. 4. ad 6. *Peccaret, inquit, Sacerdos, si non esset facilis ad præbendam licentiam alteri confitendi; quia multi sunt aded infirmi, quodd potius sine confessione morerentur, quam tali Sacerdoti confiterentur. Unde illi qui sunt nimis solliciti, ut conscientias subditorum per confessionem sciant, multis laqueum damnationis injiciunt, & per consequens sibi ipsis.*

R. 2. Absolutio in iis circumstantiis impertita ab alieno Parocho censeri debet irrita; quia Episcopus laudatam consuetudinem conditionatè tantum approbare præsumitur, nempe si proprius Parochus consentiat. Episcopi quidem Regulares absolutè approbant pro confessionibus audientis in eorum Oratoriis extra tempus Paschale; quia, cum ibi deputentur pro tota civitate & vicinia, nimis grave esset & onerosum tum pœnitentibus tum Confessariis, si semper Parochorum consensus requireretur, & de eo certiores fieri deberent Confessarii. Sed cum Regulares ad Parochias ab Episcopo mittuntur cum facultate prædicandi & absolvendi, facultas illa solet esse conditionata, & cum hac clausula, *de consensu Parochorum*; id enim postulare videtur suavitas regiminis, & ordinis tranquillitas.

Dixi, *extra tempus Paschale*; nam specialis est difficultas, discutienda ubi de Confessione, utrum

Regulares ab Episcopo absque ulla temporis exceptione approbati possint Paschali tempore excipere Fidelium Confessiones sine Parochorum consensu?

R. 3. Si Parochi prohibitio non sit in ædificationem, sed in destructionem, procedatque ex inordinato affectu; & animo anxio ac moroso, ad Pastoralem Episcopi sollicitudinem pertinet, ut Parochiani fruantur libertate, quam Ecclesia vult eis concedi, & cognita causa, illis det licentiam, etiam tempore Paschali, adeundi alios probatæ vitæ & capacitatis Confessarios, etiam renittente proprio Parocho.

Dices: Episcopus nihil potest contra receptos universalis Ecclesiæ Canones, multò minùs contra jus divinum: atqui ex Canone, *omnis utriusque sexus*, qui est Concilii IV. Lateranensis, ubique recepto, quilibet Fidelis tenetur confiteri proprio Sacerdoti (qui est Parochus secundum interpretationem Summorum Pontificum, & plurium Conciliorum Provincialium, ut suo loco dicitur) aut alteri de ejus licentia, *cùm aliter ipse illos non possit solvere aut ligare*, verba sunt Canonis. Præterea Parochi sunt institutionis divinæ, & jure divino pascere debent oves sibi creditas: Ergo Episcopus nullum, iis invitis, subtrahere potest eorum jurisdictioni.

Concessa majore, distinguo primam partem min. quilibet saltem semel in anno tenetur confiteri proprio Sacerdoti, aut alteri cum ejus consensu, ita ut non excludatur Episcopus, Concedo: ita ut excludatur, Nego min. propositio enim hoc posteriori sensu damnata est I. à Joanne XXII. in Joanne de Poliaco Theologo Parisiensi, qui asserbat  
stante

stante Canone, *omnis utriusque sexus*, nec Episcopum, nec Papam efficere posse, ut Confessio facta alieno Sacerdoti sine consensu proprii valeret. 2. à Clero Gallicano an. 1655. in quodam moderno, qui contendebat laudato Canone, excludi Summum Pontificem & Episcopum.

Enimverò sicut nullus crediderit Regem quidquam è sua suprema auctoritate detraxisse, dum edixit omnes cives primo loco jus suum persecuturos coram Judice, quem in Provincia eis constituit, nec stante illo Edicto, posse ex speciali gratia, aut debere ex causa, puta si Judex esset consanguineus partis adversæ, concedere literas; quas *Committimus* vocant, hoc est diploma optandi fori opportunioris gratia. Similiter Summus Pontifex & Episcopi in Lateranensi Concilio congregati, ita Fideles adstrinxerunt ad deponenda peccata proprio Sacerdoti, aut alteri de ejus consensu, ut jus quod habent à Deo gregem pascendi sibi non ademerint. Sic in Concilio Tridentino decreverunt nullum fore matrimonium, nisi celebraretur coram Parocho, aut altero Sacerdote de ejus consensu, quod non excludit Episcopum.

Distinguo etiam alteram minoris partem Parochi jure divino pascere debent oves sibi creditas, dependenter & conjunctim cum Episcopo, Concedo: independenter & separatim ab Episcopo, quasi non habeat immediatam jurisdictionem in Parochianos, Nego minorem. Itaque licet Parochorum jurisdictio sit primariò a Christo instituta, ipsi tamen & eorum Parochiani immediatè subsunt jurisdictioni Episcopali, juxta constantem doctrinam sacræ Facultatis Parisiensis, ad  
quam

quam cùm anno 1664. delatæ fuissent sex Propositiones cujusdam Jacobi de Vernant, quibus auctor ille negabat jurisdictionem Parochorum esse à Christo institutam, sic illas perstrinxit: *Hæ sex Propositiones, quatenus asserunt vel inferunt potestatem jurisdictionis Curatorum non esse immediate à Christo, quantum ad institutionem primariam, falsæ sunt, & decretis sacre Facultatis contrariæ; salva semper immediata Episcoporum in Prælatos minores seu Curatos, & plebem subditam autoritate.*

Non est igitur gradus jurisdictionis Parochum inter & Episcopum, sicut Episcopum inter & Metropolitanum, ut inferendum videtur ex oblationibus nonnullorum contra Episcopos, & eorum Vicarios generales, cùm pro officio suo ex rationabili causa Parochianis opitulantur inconsultis Curatis, fortè morosis & difficilioribus. Et ratio est, quia, ut diximus Tractatu de Legibus pag. 364. Parochiæ seorsim spectatæ non sunt communitalis perfectæ, sed partes dumtaxat communitalis perfectæ, nempe Diœceseos, cui præest Episcopus tanquam caput unius & ejusdem corporis mystici; cujus membra sunt singulæ Parochiæ, quas immediate regit & administrat, Parochis cooperantibus ex institutione Christi. Hinc est quòd Parochi auctoritatem non habeant condendi leges, sed eas ab Episcopo accipiant, tam pro se, quàm pro Parochianis, careant foro externo, subsintque immediate tam ipsi, quàm Parochiani foro Episcopi. Denique primis Ecclesiæ sæculis, cum nondum essent erecti Parochiales tituli, Presbyteri, quos nunc Curatos vocamus, cum Episcopo convivebant, & ab ejus regimine ita pendeabant, ut nequidem neophytos bapti-

baptizarent, nec peccatores pœnitentiæ publicæ obnoxios admitterent. Distinctio autem Parochiarum, quæ postmodum secuta est, & titularum Parochialium, quæ sanè non est juris divini, sed Ecclesiastici, aliquid mutavit in forma regiminis, sed nihil ex jurisdictione Episcoporum detraxit, immediata semper manet in Curatos & plebem. Contra verò dignitas Metropolitana, & dignitatis Episcopalis constituunt diversos jurisdictionis gradus; quia sicut Metropolitanus, ita & Episcopus præest Communitati perfectæ, quæ in spiritualibus est sui juris, habet suas leges ac Statuta, suum forum independentem à Metropolitano, qui in iis (licet Superior) nihil mutare potest nisi ad ipsum tanquam à gravamine provocetur.

Q. 7. *Qui Religionis causa ex diversis Diœcesibus & provinciis peregrinantur ad sacras quasdam aedes; possuntne ibi à peccatis absolvi?*

R. Si mala fide & primariò illuc proficiscantur, ut disciplinam suæ Diœceseos declinent, absolvi nequeunt, juxta ea, quæ supra diximus ad sextam quæstionem: si verò bona fide, & Religionis causa primariò illuc peregrinentur absolvi possunt; Sacerdotes enim illius loci tacitè sunt approbati.

Q. 8. *Sufficitne ad approbationem tacitam interpretativa intentio Episcopi, qualis esset respectu Sacerdotis singularis meriti, quem certò rogaret Episcopus audire confessiones, si sciret eum die solemni diversari in Parochia, cujus Parochus infirmus est, & plures Parochiani Sacramenta expetunt?*

R. Minimè; quia interpretativa Episcopi intentio nihil est aliud, quàm ejus dispositio ad appro-

probandum illum Sacerdotem, si casus in quo versatur quæstio, ei innotesceret: atqui satis non est Episcopum dispositum esse ad approbandum; sed requiritur insuper ut actu & de facto approbet, aut approbaverit.

Ergo, inquires, ex consuetudine, juxta quam Parochi etiam diversæ Diœceseos, mutuam sibi opem ferunt, non habetur approbatio tacita, si Episcopus ejusmodi consuetudinem ignoret.

Distinguo consequens, si consuetudo sit recens introducta, & ipso Episcopo ignorante, Concedo: si introducta sit sub Prædecessoribus Episcopi, qui præsumuntur consuetudinem approbasse, Nego consequ.

Q. 9. *Parochus qui dimisit Beneficium, indigetne approbatione ad audiendas Confessiones in eadem Parochia?*

R. Indiget; quia de eo sentiendum, sicut de Confessario delegato, post elapsum temporis terminum suæ approbationis: atqui Confessarius ille non potest absolvere elapso temporis termino: Ergo.

Quæst. 10. *A quo Episcopo debet approbari Confessarius?*

R. A pœnitentis Episcopo, utpote qui solus ex Episcopis in pœnitentem habeat ordinariam jurisdictionem: ac proinde solus per approbationem delegare potest ad absolvendum illum pœnitentem.

Q. 11. *Vagi & peregrini à quibus absolvi possunt?*

R. A Sacerdotibus approbatis in locis, per quæ transeunt; tempore tamen Paschali adire tenentur Parochum loci, aut cum ejus licentia Sacerdotem approbatum. Ita Sanctus Carolus in

XI. Synodo Diœcesana : *advenas*, inquit, & *peregrinos*, quos intra *Parochiæ suæ fines* brevi tempore in *Diœcesi morari contigerit*, audire liceat etiam tempore *Paschali*, nisi fortasse de industria eò accesserint, ne in *Parochiali Ecclesia Sacramenta sumant*. Eadem habet S. Thomas in quartum distinct. 21.

Q. 12. *Parochus potestne audire Confessiones Parochianorum suorum extra suam Parochiam?*

R. Potest etiam extra Diœcesim : quia *jurisdictio*, quam habet in illos, non cadit in locum, sed in personas, nec ulla lex prohibet quominus eorum *Confessiones* extra *Parochiæ suæ fines* excipiat. Ad amovendum tamen scandalum, quod pati posset qui loco præest, quodd extraneus & ignotus Sacerdos in ipsius *Ecclesia Confessiones* auderit, debent illum monere, & licentiam petere.

Q. 13. *Qui semel ab Episcopo est examinatus & approbatus, potestne iterum ad examen vocari, ut prorogetur ejus approbatio?*

R. Pius V. anno 1571. in Bulla, quæ incipit, *Romani Pontifices*, in qua revocat plura Privilegia, quæ Mendicantibus prius concesserat; illud tamen vult eis conservari, nempe eos, qui semel ab Episcopo in Civitate & Diœcesibus suis prævio examine approbati fuerint, ab eodem Episcopo iterum non examinari. Ex quibus verbis Suarez disput. 28. sect. 8. assertione 1. duo infert : primum, Regulares posse examini subjici, si prius non fuerint examinati ab eodem Episcopo, quamvis ab ejus Prædecessore : alterum, Sacerdotes sæculares posse examinari quoties voluerit Episcopus; alioquin privilegium non foret, Regulares posse semel tantum examinari; & rationem assert, cur Sacerdotes

tes sæculares possint ab eodem Episcopo sæpiùs examinari; nec enim, inquit, *Episcopus semel examinando, & approbando aliquo titulo se obligavit illud examen semper firmum habere . . . . præsertim cum moraliter loquendo, possint occasiones occurrere, ob quas prudenter hoc fiat; sæpè enim examen per alios fit, & non recte fit, & aliquando moraliter constat plures indignos vel negligentia, vel casu inter dignos esse approbatos.* Sed hæc ratio æquè efficaciter concludit pro Regularium, ac pro sæcularium examine iterando. Quamobrem Præfules Gallicani inhærentes laudato Tridentini Decreto, Regulares ac sæculares toties examini suo subjiciunt, quoties expedire videtur, maximè cum Gregorius XIII. indulta Regularibus à Pio V. Prædecessore suo reduxerit ad leges sancitas à Concilio Tridentino, & Bulla Pii V. non fuerit in Galliis recepta, sicut nec Bulla Clementis X. quæ idem Privilegium Regularibus, quod Pius Quintus indulget; imo Senatus Parisiensis expresse prohibuit, ne typis mandaretur.

Quæst. 14. *Quot modis limitari potest approbatio?*

R. Quatuor. 1. quoad locum, quomodo solent approbari Vicarii Curatorum, scilicet ut audiant Confessiones in Parochia dumtaxat ipsis designata. Vulgò tamen addunt Episcopi; & in vicinia, propter frequentes, quæ occurrunt occasiones ferendi opem vicinis Parochis. 2. quoad personas, puta sæculares; Moniales enim non comprehenduntur in approbatione generatim concessa; sed ad earum Confessiones excipiendas requiritur specialis approbatio, ut constat, tum ex declaratione Cardinalium, quam refert Barbosa 2. part. de officio & potestate Episcopi: tum

ex



ex sæpiùs laudata Bulla Clementis X. tum ex universali praxi Ecclesiæ Gallicanæ. 3. quoad tempus, v. g. ad annum. 4. quoad casus, quos sibi reservant Summus Pontifex & Episcopi. Sed de Casibus reservatis sequenti capite.

## CAPUT VII.

## De Casibus reservatis.

Q. I. *Extatne in Ecclesia potestas reservandi casus?*

R. Negant Pseudo-reformati, & quidem consentaneè ad præjactum ab ipsis falsum principium, nempe potestatem absolvendi consistere in prædicatione Evangelii quatenus excitat audientium fidem ac fiduciam omnia peccata sibi dimitti: concionator enim non potest ejusmodi fidem impedire, nec proinde peccata reservare. Addunt tamen pertinere ad disciplinam & rectum ordinem: ut atrociora crimina, si publica fuerint, judicio Consistorii reserventur ad cæterorum terrorem; quamvis conscii ejusmodi criminum per fidem coram Deo sint absoluti. Contra impium illum errorem extat Canon. 11. sess. 14. Concilium Tridentini, qui sic habet: *Si quis dixerit, Episcopos non habere jus reservandi sibi casus, nisi quoad externam politiam, atque idè casuum reservationem non prohibere, quominus Sacerdos à reservatis verè absolvat; anathema sit.* Quare ad propositam quæstionem

R. De fide est Summum Pontificem & Episcopos posse sibi reservare casus, à quibus inferiores Sacerdotes absolvere nequeunt, etiam in foro conscientiæ, nisi potestate ab illis delegata.

Probatur 1. ex praxi universalis Ecclesiæ, cui testimonium perhibet Concilium Viennense XV. Generale anno 1311. in Clementina, *Religiosi*, in qua sic loquitur Summus Pontifex Clemens V. de Religiosis; *Quibus etiam in virtute sanctæ obedientiæ, & sub interminatione maledictionis æternæ districtius inhibemus, ne in casibus Sedi Apostolicæ, aut locorum Ordinariis reservatis quemquam absolvere præsumant.*

Probatur 2. ratione, quam Patres Tridentini sess. 14. cap. 7. deducunt ex ipsamet natura Sacramenti Pœnitentiæ, quod cum exerceatur per modum iudicii, essentialiter in Ministro prærequirit jurisdictionem, ita ut nullius momenti sit absolutio, ut loquuntur laudati Patres, quam Sacerdos in eum profert, in quem nullam habeat jurisdictionem. Cum autem jurisdictio sit penes Ecclesiæ dispositionem, Episcopi illam restringere aut extendere possunt, prout disciplinæ & salutis animarum expedire videbitur. Sic in Republica quædam causæ criminales ita reservantur Supremo Senatui, ut de eis inferiores Iudices judicare nequeant.

Q. 2. *Quinam casus reservare possunt?*

R. Patres Tridentini citato cap. 7. hancce potestatem agnoscunt in Summo Pontifice & Episcopis. Aliorum non meminere, nec fert usus ut Parochi sibi casus reservent. Congregationes tamen Regularium quosdam subditorum casus reservant Provincialibus, & Monasteriorum Præfectis.

Q. 3. *Quot requiruntur, ut casus in individuo censeatur reservatus?*

R. Quatuor, 1. ut actus sit lethaliter malus; cum enim peccata venialia non sint materia Sacramenti

menti Pœnitentiæ necessaria, retineri aut reservari nequeunt. Unde si Confessarius advertat peccatum pœnitentis non pertingere ad malitiam mortalem defectu sufficientis cōsensus, aut propter levitatem materiæ, poterit illum absolvere. Idem dicendum in dubio probabili, peccaveritne lethalliter, vel non.

Sed operæ pretium est hic monere materiam, quæ secundum se spectata levis est, vel etiam indifferens, ex circumstantiis tamen & fine, quem sibi præfixit Legislator, posse esse gravissimam, & idè rectè prohiberi etiam sub censuris reservatis, utpote quæ viam aperiat multis criminibus & scandalis. Sic plures Episcopi, propter gravissimas causas, prohibent Clericis sub pœna suspensionis sibi reservatæ, frequentare popinas, licèt temperanter comedere & bibere in popina præcisè, non sit res per se mala.

2. Actus debet esse exterior; quia Ecclesia, cùm non judicet de internis, non reservat, nec censuris percellit peccata, quæ ex corde non exeunt, puta hæresim sola mente conceptam, ac proinde quilibet Sacerdos approbatus ab ea absolvere potest. Necesse tamen non est ut actus exterior in alicujus notitiam venerit; reservatio enim & censuræ cadere possunt in actus exteriores, etiam occultissimos.

3. Peccatum, v.g. homicidium, aut adulterium, debet esse consummatum, capit. *hoc autem*, de pœnit. dist. 1. nisi aliter in Statuto expressum fuerit; quia odia non sunt amplianda, sed restringenda: atqui pœna, ut reservatio & censura, est odiosum quid. Quare ubi de ejusmodi pœnis agitur, non intelliguntur nomine homi-

cidii inflicta vulnera animo occidendi, nisi mors sequatur; nec nomine adulterii actus propudiosi & infandi contra castitatem, sed ipsamet carnalis copula.

Dixi, *nisi aliter in Statuto expressum fuerit*; quia Superiores nonnunquam expressè sibi reservant etiam actus, qui solent esse prævii ad ultimum; sic provocatio ad duellum, & ejusdem acceptatio, etiamsi non sequatur conflictus, expressè reservantur. Similiter in quibusdam Diœcesibus tactus impudici, & alia obscœna Confessarium inter & pœnitentem, etiam seclusa copula carnali.

Quartò. Requiritur ut peccatum sit à pubere commissum; cùm enim ætatis & ingenii imbecillitas ex parte excuset impuberes, eorum peccata non comprehenduntur inter casus reservatos. Pubertas autem incipit in masculis ab anno 14. completo, & in fœminis à 12. completo.

Q. 4. *Quis absolvere potest à casibus reservatis?*

R. 1. Jurisdictione ordinaria potest Superior, qui eos sibi reservavit, Vicarius ejus Generalis; & Pœnitentiarius; delegata verò quilibet Sacerdos ab ipsis specialiter delegatus. Dico *specialiter*; quia juxta regulam 81. in 6. *in generali concessione non veniunt ea, quæ quis non esset verisimiliter in specie concessurus*; alioquin si quilibet Sacerdos generaliter approbatus posset absolvere à reservatis, nulli essent casus reservati.

Ergo specialiter delegatus non potest, auditis peccatis reservatis, remittere pœnitentem absolvendum à Sacerdote generaliter dumtaxat approbato; quia delegatus delegare non potest nisi à Superiore facultatem subdelegandi acceperit: ejusmodi autem facultas videtur necessaria ei, qui

qui vices Pœnitentiarii gerit ex commissione & mera delegatione, ut contingit in quibusdam Diœcesibus, in quibus nullus est Pœnitentiarius ex officio & ratione Beneficii; vix enim fieri potest, ut omnes, qui ad ipsum confluunt, audiat & absolvat; præterquam quòd quibusdam, utpote nondum dispositis, differenda sit absolutio, videreturque onus intolerabile, si ex remotioribus locis iterum ad illum redire cogerentur.

R. 2. In articulo mortis quilibet Sacerdos potest absolvere ab omnibus peccatis & censuris reservatis. Ita declararunt Patres Tridentini cit. cap. 7. sess. 14. his verbis: *Piè admodum, ne hac ipsa occasione aliquis pereat, in eadem Ecclesia Dei custoditum semper fuit, ut nulla sit reservatio in articulo mortis, atque ideò omnes Sacerdotes quoslibet pœnitentes à quibuscvis peccatis & censuris absolvere possunt.*

R. 3. Episcopi absolvere possunt à peccatis Summo Pontifici reservatis subditos, qui præ infirmitate, aut alio impedimento ad Sedem Apostolicam recurrere nequeunt, ex cap. *ea noscitur*, lib. 5. tit. 39. de Sententia excommunicationis. *Mulieres*, inquit Clemens III. *senes & valetudinarii, seu membrorum destitutionibus impediti; licèt ad Apostolicam Sedem non veniant, ab Episcopis valeant Fidelium communioni restitui.* Eadem repetit cap. *quod de his*, eodem titulo. Et ante eum Alexander III. cap. *de cætero*, eodem titulo. Et ratio est, quia reservandi potestas est in ædificationem & salutem Fidelium, non in perniciem & destructionem: nec Episcopi, qui atrociora crimina ad Sedis Apostolicæ iudicium referre cœperunt, priusquam Summus Pontifex ullum sibi reservasset, præsumi possunt voluisse sibi adimere potestatem

subditis subveniendi in necessariis. Illud enim notatu dignum est, quod reservatio injustæ Clericorum percussionis, quæ tempore præcessit cæteras reservationes, cœperit in Concilio Remensi anno 1131. & Londinensi anno 1138. ac tandem communi omnium Episcoporum voto confirmata sit in generali Synodo Lateranensi secunda sub Innocentio II. can. 15. anno 1139, atque vel ex hoc exemplo liquet Episcopos non ex delegatione, sed jure ordinario subditos absolvere à casibus Sedis Apostolicæ reservatis, cum eam adeundi deest facultas.

Dices, quando non patet aditus ad Summum Pontificem, pœnitentes possunt recurrere ad Regulares, qui ex privilegio Sedis Apostolicæ absolvere possunt à casibus ipsi reservatis.

R. 1. Clemens VIII. die nona mensis Januarii anno 1601. declaravit Regulares non habere ejusmodi facultatem: verba hujusce declarationis infra referemus. 2. absque Episcoporum contumelia dici nequit eos teneri graviores causas remittere ad judicium eorum, qui sunt ipsis inferiores. Hancce injuriam imprimis cavet ipse Summus Pontifex, qui Rescripta in causis gravioribus, puta matrimonialibus, Beneficiorum provisionibus, & aliis casibus sibi reservatis, semper dirigit ad Ordinarium, vel ejus Officiales, & quidem secundum leges Regni, in quo abusus esset, si ejusmodi Rescriptorum vel Bullarum executio alteri mandaretur, exceptis dumtaxat iis, quæ in foro pœnitentiæ, utpote occulta, tractanda sunt: sed Concilium Tridentinum præcipua, quæ hîc suboriri possent, dubia sustulit. Quare

R. 2.

R. 2. Episcopi, juxta declarationem Concilii Tridentini sess. 24. cap. 26. de reformat. absolvere possunt ab omnibus peccatis & censuris, ac irregularitatibus ex delicto (homicidio voluntario excepto) modò illa deducta non sint ad forum contentiosum. *Liceat Episcopis, inquit Patres, in irregularitatibus omnibus & suspensionibus ex delicto occulto provenientibus, excepta ea, quæ oritur ex homicidio voluntario, & exceptis aliis deductis ad forum contentiosum, dispensare: & in quibuscunque casibus occultis, etiam Sedi Apostolicæ reservatis, delinquentes quoscunque sibi subditos in Diœcesi sua per seipsos aut Vicarium ad id specialiter deputandum, in foro conscientiæ gratis absolvere, imposita pœnitentia salutari. Idem & in hæresis crimine in eodem foro conscientiæ eis tantum, non eorum Vicariis sit permissum.* Sed hæc pars Decreti ultima, quæ spectat hæresim, non est recepta in Galliis, ubi non solum Episcopi; sed & eorum Vicarii Generales, modò in eorum literis expressa mentio fiat de hæresi, sicut de aliis casibus in hocce Decreto expressis, absolvent ab omni hæresi etiam publica, & ad eum effectum delegant. Quid verò intelligendum sit nomine homicidii voluntarii, exponemus ubi de irregularitatibus.

Difficultatem movent nonnulli Ultramontani circa vocem, *occultis*, contenduntque crimen reservatum non posse dici occultum, si in duorum vel trium notitiam ita venerit, ut eorum testimonio probari possit in foro externo, nec proinde Episcopum illius solvendi habere potestatem: confirmantque suam sententiam quadam Cardinalium declaratione. Sed alii, etiam Ultramontani, ex adverso asserunt, crimen hic

dici occultum, quamdiu secundum Navarrum non evadit famosum, etiamsi probari possit: secundum Toletum quamdiu ad forum contentiosum non est deductum, & hanc sententiam sequitur Sanchez libro 2. de matrimonio disput. 37. numero 12. utpote omnino conformem Concilii Decreto, in quo Patres exponunt quæ delicta vocaverint occulta, dum in textus decursu ea sola excipiunt, quæ deducta sunt ad forum contentiosum, adeo ut in eorum mente crimen censura & irregularitas censeantur occulta, si ad forum contentiosum non fuerint deducta. Unde concludit idem Author, quod si crimen ad forum contentiosum deductum non potuerit probari, occultum maneat, & Episcopus ab eo absolvere possit. Hæc sententia apprime convenit praxi Regni, in quo notorietas facti non admittitur.

Q. 5. *Regulares Privilegiati possuntne absolvere à casibus Episcopo reservatis?*

R. Minimè, idque constat tum ex dictis capite præcedenti pro necessitate Episcopalis approbationis: tum ex Bullis & Declarationibus Summorum Pontificum.

Gregorius XIII. rogatus à Sancto Carolo Borromæo, an Regulares ex privilegio Sedis Apostolicæ possent in casibus, quos sibi Episcopus reservaverit, absolvere pœnitentes, hocce responsum dedit die decimo Septembris an. 1577. ex facultatibus per Mare magnum, aliave Privilegia Regularibus concessa, factam eis non esse potestatem absolvendi à casibus ab Episcopis reservatis.

Clemens VIII. die nono mensis Januarii anni 1601. in Congregatione Sanctæ Romanæ Ecclesiæ  
Cardi-



Cardinalium in negotiis Episcoporum & Regularium præposita, prohibuit Sacerdotibus omnibus, tam sæcularibus, quàm Regularibus, etiam Societatis Jesu, per universam Italiam extra urbem degentibus ad Confessiones audiendas probatis, *Ne quis eorum sub prætextu Privilegiorum eorum ordinibus, Congregationibus, Collegiis, aut Societatibus, aut Archiconfraternitatibus sæcularium, aut singulis personis concessorum, ab ullo ex casibus clarè vel dubiè in Bulla in Cœna Domini legi solitæ contentis, vel aliàs quomodocunque Sedi Apostolicæ reservatis, aut in futurum, & per sanctitatem suam: ejusve successores pro tempore in eadem Bulla vel aliter reservandis; nec etiam à casibus, quos Ordinarii locorum hætenus reservarunt, vel imposternum reservabunt . . . . absolutionis beneficium de cætero impendere audeat aut præsumat . . . . sub pœna contrafacientibus tam Regularibus, quàm sæcularibus, excommunicationis, &c. Præterea noverint pœnitentes absolutionem, si quam obtinebunt contra hujusmodi prohibitionem, esse nullam, nulliusque roboris & momenti.*

Urbanus VIII. die 17. Novembris 1628. in eadem Congregatione, *Censuit per confirmationem Privilegiorum, quas Regulares à Sede Apostolica post sacrum Concilium Tridentinum obtinuerunt, nequaquam revixisse privilegia prius ab eodem Concilio, ac deinde etiam ipsius Congregationis Decretis sublata atque extincta, si quæ habebant absolvendi à casibus Ordinario loci reservatis . . . . ac si secus egerint absolutiones nullas atque irritas fuisse ac fore.* Hæc declaratio Regulares non solum intra, sed etiam extra Italiam degentes comprehendit.

Alexander VII. anno 1659. in Brevi ad Episcopum Andegavensem, propositionem, qua Regulares contendebant vi suorum Privilegiorum

posse se in Galliis absolvere à peccatis Episcopis reservatis, damnavit tanquam falsam, Episcoporum authoritati, Apostolicæ Sedi injuriosam.

Clemens X. in laudata Bulla, quæ incipit, *superna*, declaravit *ex facultatibus per Mare magnum, aliave Privilegia Regularibus cujuscunque Ordinis, Instituti, aut Societatis etiam Jesu concessis factam eis non esse potestatem absolvendi à casibus ab Episcopo reservatis. Addit, Etiam si haberent privilegium absolvendi ab omnibus casibus Sedis Apostolicæ reservatis.*

Q. 6. Confessarius, qui non habet potestatem absolvendi à casibus reservatis, potestne audita pœnitentis confessione, eum absolvere à non reservatis, & remittere ad Superiorem pro reservatis?

Affirmarunt S. Antoninus, Sotus, Cajetanus, & alii quamplurimi ex Veteribus, quos secutus est S. Carolus Borromæus 4. part. act. Ecclesiæ Mediolan. de instructionibus pœnitentiæ, recentiores verò communiter negant id licere, cum quibus

R. Confessarius non potest extra casum necessitatis, absolvere pœnitentem à casibus non reservatis remittendo illum ad Superiorem pro reservatis; tum quia ita fert praxis hodierna: tum quia Confessio Sacramentalis jure divino debet esse integra: atqui non est integra sacramentaliter, quando omnia peccata, quæ memoriæ occurrunt, clavibus Ecclesiæ non subjiciuntur; non subjicerentur autem in nostra hypothesi; Confessarius enim ille caret clavibus seu potestate respectu casuum reservatorum: Ergo.

Dixi, *extra casum necessitatis*; in circumstantiis enim, in quibus pœnitens non potest ad Superiorem remitti sine ejus infamia, & aliorum scandalo, potest absolvi (si aliunde dispositus sit) cum onere

onere adeundi Superiorem, nec sine fundamento præsumitur Superiorem non tantum excepturum, si prævidisset (quod ex dictis non sufficit,) sed reverà excepisse hunc necessitatis articulum, qui non est ita extraordinarius; potestas enim reservandi casus concessa est in ædificationem & utilitatem Fidelium.

Q. 7. *Sacerdos qui non habet potestatem absolvendi à casibus reservatis, verène absolvit à non reservatis, ita ut satis sit pœnitenti sic absoluto, confiteri postmodum sola peccata reservata?*

R. Irrita est & prorsus nulla ejusmodi absolutio, tam respectu peccatorum non reservatorum, quam respectu reservatorum, teneturque pœnitens iterum peccata sua integrè confiteri.

Probatur 1. ex Concilio Tridentino sess. 14. cap. 7. ubi loquens de casuum reservatione, docet nullius esse momenti absolutionem, quam Sacerdos in eum profert, in quem nullam habet jurisdictionem: atqui absolutio esset magni momenti, si remitteret directè peccata non reservata, & indirectè reservata.

Nec dicas Sacerdotem generaliter approbatum, habere jurisdictionem in pœnitentem respectu peccatorum non reservatorum; namque 1. sequeretur pœnitentem, qui non est conscius ullius peccati mortalis nisi reservati, posse absolvi directè à venialibus, indirectè verò à peccato mortali reservato, quod est absurdissimum. 2. Quia ex citato cap. 7. Concilii Tridentini, Sacerdos inferior non potest ferre sententiam in eum, qui ligatus est peccato reservato; quia non est ei subiectus, nec ullam in eum habet jurisdictionem:  
Ergo

Ergo hoc ipso quo Superior reservat aliquod peccatum, reum subtrahit foro inferioris.

Probatur 2. ex laudatis Declarationibus Clementis VIII. & Urbani VIII. qui ejusmodi absolutiones pronuntiant nullas, irritas, nullius roboris & momenti, ac proinde confessiones esse integrè iterandas.

Dices, ex ista responsione sequuntur gravia incommoda, & ut videtur, absurda. Potest enim contingere ut pœnitens bona fide confiteatur omnia peccata, nesciens unum ex iis esse reservatum, nec Confessarius advertat, sive ex ignorantia, sive ex negligentia, sive ex aliqua causa inculpabili. Sed quod gravius est, fortè pœnitens, etiam post diligens examen, non recordatur, nec deinceps recordabitur se lapsum in aliquod peccatum reservatum. Quibus suppositis, utitur ille eodem Confessario usque ad mortem, nec habet perfectam contritionem, quæ extra Sacramentum delet peccatum, damnabitur; sicque reservatio, quæ ex institutione sua bona est, fiet illi mors, etiam sine ejus culpa, quod quàm alienum sit à mente Superiorum, nemo non videt: Ergo.

Nego anteced. nempe ex nostra responsione sequi ullum absurdum; namque 1. in omnium sententia, irrita est absolutio pœnitenti concessa, qui confitetur ei qui falsò creditur Sacerdos, aut approbatus, nec bona fides, in qua pœnitens usque ad mortem permanet, liberabit eum à damnatione æterna propter lapsus præteritos, nisi Deus misericorditer ei inspiret contritionem perfectam. 2. In sententia apud Veteres valdè communi, quamque sanctus Carolus proponit sequendam in sua Diœcesi, nempe inferiorem Sacerdotem

tem posse absolvere directè à non reservatis, & indirectè à reservatis, imposito onere conveniendi superiorem pro reservatis, reservatio non adimit inferiori Sacerdoti omnem jurisdictionem in pœnitentem; sed in peccata dumtaxat reservata. Unde, quamvis in sententia, cui adhæremus tanquam veriori, non liceat extra casum necessitatis, absolvere pœnitentem cum onere adeundi Superiorem, absolutio tamen erit valida, ubi Superior suam intentionem expresse-rit, sicut S. Carolus.

3. Juxta communem sententiam, cui eo ipso consentire censentur Superiores, quo ei non contradicunt, cum eum ignorare non possint, in casu necessitatis inferior validè & licitè absolvit directè quidem à non reservatis, indirectè verò à reservatis, pro quibus pœnitens Superiorem postea adire tenetur. Quæ autem major necessitas absolvendi saltem indirectè à reservatis, quàm cum pœnitens propter invincibilem oblivionem non potest ea confiteri? peccata, quæ post diligens examen memoriæ non occurrunt, per absolutionem indirectè remittuntur juxta doctrinam Concilii Tridentini, nec in ejusmodi necessitate obligat præceptum divinum confitendi omnia & singula peccata mortalia. Porro si Deus sic peccatoribus indulget, nec ratio, nec justitia dubitare sinunt, quin fuerit eadem Superioris intentio ac voluntas, cum casus sibi reservavit, ut ab eo casu inferior indirectè absolvere possit, qui inculpate è memoria pœnitentis excidit.

Q. 8. *Si quis lapsu memoriæ, & ex inadvertentia inculpabili oblitus esset unum ex pluribus peccatis reservatis Superiori exponere, reservatio hujusmodi peccati essetne subla-*

*sublata ita ut jam solvi posset à quolibet Sacerdote approbato?*

R. Afferuimus in praxi pœnitentiaria torrente Authorum quodammodo abrepti. Sed re maturius discussa, distinguendum videtur: vel Superior quibusdam indiciis manifestavit se tollere omnem reservationem, vel non. Si primum, nulla remanet reservatio. Unde qui ea præstitit, quæ præscripta erant in Bulla Jubilæi, & postea recordatur se ex oblivione inculpabili non confessum peccatum reservatum, potest absolvi à quolibet Sacerdote approbato; quia Summus Pontifex Jubilæi gratia, expressè tollit omnem peccatorum & censurarum reservationem. Si secundum, nempe si Superior nequidem cogitavit de aliis peccatis, præter ea, quæ ipsi sacramentaliter sunt exposita, nulla lex, nullave efficax ratio proferri potest, ex qua concludere liceat ejusmodi peccata omissa non esse ampliùs reservata. Afferuntur quidem nonnullæ rationes, quas *convenientias* vocant, sed quis nesciat ex iis solis nihil cèrtò concludi?

Q. 9. *Absolutio vel virtute Jubilæi, vel authoritate Superioris collata, tollit-ne reservationem, etiamsi fuerit irrita defectu dispositionis in pœnitente?*

R. Minimè, ne opposita sententia satis firmo nititur fundamento. Patet de absoluteione incassum data virtute Jubilæi; quia ejusmodi indulgentia non conceditur, nisi verè pœnitentibus. De alia verò probatur; nam Superior ordinarius non tollit reservationem, nisi sacramentaliter absolvendo, vel ad inferiorem Sacerdotem remittendo: atqui nec sacramentaliter absolvit, cùm supponatur absolutio nulla, nec ad inferiorem remisit:

misit Ergo. Delegatus quoque nihil potest circa peccata reservata extra Sacramentum: cum ergo irritum & planè nullum fuerit Sacramentum, peccata manent reservata.

Q. 10. *Facultas generatim concessa absolvendi à casibus reservatis, extenditurne ad censuras iisdem annexas?*

R. Si sit concessa à Summo Pontifice pro casibus ipsi reservatis, extenditur; alioquin nihil concederet, cum nullus sit casus ipsi reservatus, qui non habeat annexam censuram. Circa verò casus, quos Episcopi sibi reservant, est difficultas; quia plures ex iis casibus sunt sine censura, & usus videbatur invaluisse, ut qui ab Episcopo obtinuisset facultatem absolvendi à casibus ipsi reservatis, censeretur facultatem habere à censuris iisdem annexis. Verùm non ita constat, quòd usus ille sit ad mentem omnium Episcoporum: Eminentissimus quippe Archiepiscopus Parisiensis nuper declaravit in generali concessione absolvendi à casibus sibi reservatis non comprehensi facultatem absolvendi ab omnibus censuris iisdem annexis. Unde exoptandum videtur ut Episcopi in ejusmodi concessionibus indefinitis exprimant quæ sit eorum intentio circa censuras iis annexas, ut alicubi observatur.

Q. 11. *Peccatum estne reservatum in eo, qui cum peccavit, ignorabat reservationem?*

R. Est reservatum; quia gravitas peccati est causa sufficiens reservandi ejus absolutionem, nec requiritur contumacia in peccante sicut ad incurrendam censuram. Unde qui lapsus esset in peccatum, cui annexa est censura, invincibiliter ignorans peccatum illud esse reservatum cum censu-

censura, nulla quidem censura esset ligatus, nihilominus non posset à culpa absolvi, nisi per Ordinarium, aut ejus delegatum.

Q. 12. *Quilibet Sacerdos approbatus potestne absolvere ab omnibus casibus reservatis juxta privilegia quibusdam Confraternitatibus à Summo Pontifice concessa, quando Episcopus illas Confraternitates in sua Diœcesi institui permisit?*

R. Non potest, nisi sit ab Episcopo specialiter ad id approbatus: tum quia ex Alexandro VII. supra laudato non sine injuria Sedis Apostolicæ asseritur, quòd facultatem concesserit absolvendì à casibus Episcopo reservatis: tum quia Clemens VIII. nostram responsionem expressè confirmavit die septima Decembris anno 1604. edita constitutione, quæ incipit: *Quæcunque à Sede Apostolica.*

Q. 13. *Qui in articulo mortis absolutus est à casibus reservatis per Sacerdotem non approbatum, saltem specialiter, si præter spem convalescit, teneturne adire Superiorem?*

R. Si nulla censura sit casibus reservatis annexa, una est omnium sententia, eum non teneri: quia ex dictis omnis Sacerdos in illo articulo est approbatus pro quolibet casu etiam reservato, & ita directè ab eo absolvit, nec proinde ulla ratio est, cur sic absolutus recurrat ad Superiorem, sicut qui absolutus est tantum indirectè in altero necessitatis casu, verbi gr. ad vitandam infamiam aut scandalum, ut supra diximus. Quin Sambonivius tom. 2. casu 46. extendit nostram responsionem ad casus, quibus annexa est censura, nisi Confessarius ipsis, si convalescit, Superiorem adeundi onus imposuerit, cap. enim *de cætero*, cap. *ea noscitur*, & cap. *quod de bis*, lib. 5. tit. 39. de sententia



tia excommunicationis, onus illud non imponunt, sed monent à Confessario imponendum: *Ceterum*, inquit Clemens III. cit. cap. *quod de his: ab his in forma Sacramenti exigi consuevit, ut resumptis viri us & opportunitate concessa, Romanam Ecclesiam in propria persona debeant visitare.* Bonifacius quidem VIII. in sexto, lib. 5. tit. I I. de sententia excommunicationis, statuit sic absolutum teneri adire Superiorem sub pœna reincidentiae, ut loquuntur: *Dernimus*, inquit, *ne sic censuræ illudant Ecclesiasticæ, in eandem sententiam recidere ipso jure.* Verum canon ille non est ubique in Gallia receptus, viget in Diœcesi Remensi & Virdunensi: in Parisiensi & Carnotensi pœnitens, remoto periculo seu impedimento; tenetur se sistere coram superiore, sed nulla ei imponitur pœna, si neglexerit. Quare debet quisque consulere Ritualement librum suæ Ecclesiæ.

Q. 14. *Ecclesia suppletne aliquando defectum potestatis in Ministro Sacramenti Pœnitentiæ?*

R. Supplet in iis quæ sunt juris Ecclesiastici, quando duo simul concurrunt. 1. Quando est titulus coloratus, id est, habens speciem veri tituli, quamvis reverà sit nullus. 2. Quando est error publicus, ita ut omnes communiter præsumant titulum esse verum. Deficiente autem horum alterutro, Ecclesia defectum non supplet. Hinc duo Sacerdotes canonicè instituti ad idem Parochiale Beneficium, pendente lite, Parochianos validè absolvunt, quamvis unus dumtaxat Pastor esse possit, quia habent ambo titulum coloratum, nempe institutionem, & communiter creduntur canonicè instituti. Contra verò Sacerdos, qui confessiones excipit post præfixum ap-

D. Habert Theolog. Tom. VI. K proba-

probationis tempus, licèt ab omnibus existimetur approbatus, invalidè absolvit; quia caret titulo saltem colorato.

Dixi, in iis quæ sunt juris Ecclesiastici; ut innuerem Ecclesiam non posse supplere quæ sunt juris divini, putà irritam Presbyteri ordinationem, insufficientem pœnitentis attritionem, etiamsi probabiliter, & publicè habeantur illa ut rata, ista ut sufficiens; hæc enim ab Ecclesia non pendent, sicut jurisdictionis concessio, aut denegatio. Quare meritò damnata est ab Innocentio Undecimo anno 1679. à Clero Gallicano anno 1700. & ab aliis passim Episcopis sequens propositio: *Non est illicitum in Sacramentis conferendis sequi opinionem probabilem de valore Sacramenti.*

Atque hæc de potestate Ministri Sacramenti Pœnitentiæ.

Plura dicenda supersunt de ejus scientia, prudentia, sanctitate & charitate, sine quibus ritè, ac utiliter Sacramentum administrare non potest; sed cùm ea latè profecuti fuerimus in praxi Pœnitentiæ, rectà pergimus ad ea, quæ sunt necessaria ex parte pœnitentis, nempe contritionem, confessionem, & satisfactionem, quas diximus esse partes materiales Sacramenti.

## CAPUT VIII.

### De Contritione.

Cum singulas jam Sacramenti Pœnitentiæ partes expendi à nobis accuratius oporteat, duximus

mus incipiendum à contritione, quæ est prima pars & maxime necessaria hujusce Sacramenti.

Prima quidem est juxta Concilium Tridentinum sess. 14. cap. 4. quia cæteræ ab illa tanquam à causa sua pendent; conceptus quippe de perpetrato peccato dolor ad id adducit peccatorem, ut accuset ipse se, seque nocentem esse fateatur; contra verò quamdiu peccatum amabit suum; aut aliqua peccati illecebra detinebitur, quavis ratione, vel exemplo excusabit delicta, vel dissimulabit, *via stulti recta in oculis ejus*, Prov. cap. 12. Verum ubi primum singulari quadam misericordia Deus optimus spiritum compunctionis, ac pœnitentiæ infuderit, tunc in corde peccatoris cernere est quod fieri solet in malè affecto corpore, ac pravis humoribus tumente; movetur nempe stomachus subito quodam tot humorum fastidio, ac quidquid noxium est, protinus evomit: idem repente fit in anima, intolerans quippe & impatiens earum macularum, quæ intra se antea latebant, eas sincera confessione deponit, ejuratque, & peccatorum turpitudinem, aut numerum, nedum elevet, exaggerat potius & amplificat, salva tamen veritate. Hinc ardens illud desiderium faciendi Deo satis, & forti quadam severitate puniendi illa delicta, quibus, dum aberat contritio, parcebatur.

Est quoque præ ceteris Sacramenti partibus necessaria contritio; ipsa enim sola aliquando defectum supplet aliarum; istæ verò nunquam sine contritione prodesse queunt.

Est & aliud, quod diligentiam tum Confessarii, tum pœnitentis in investiganda veræ contritionis ratione acuerere debeat, nempe ista Sacra-

menti pars longè frequentius, quàm cæteræ deesse solet, adeò ut si semel, aut bis Sacramentum irritum fuerit defectu vel potestatis in Ministro, vel integræ confessionis in pœnitente, decies invalidè conferatur defectu sinceræ contritionis.

Contritio autem dupliciter spectari potest, scilicet, generatim & speciètim; est enim quoddam genus, cujus species sunt contritio perfectæ, & attritio.

De contritione generatim sumpta, satis superque egimus cap. I. §. I. pag. 14. & seq. Nunc expendere nobis incumbit, quæ sint contritionis perfectæ & attritionis propria, & quomodo ambæ illæ contritionis species inter se differant.

Sed cùm juxta Dialecticorum regulam, quod convenit generi, illud necessariò conveniat & speciei, operæ pretium est monere neutram contritionis speciem esse idoneam Sacramenti materiam, nisi cuilibet competant proprietates contritionis generatim sumptæ; hoc est, nisi sit 1. dolor supernaturalis à Spiritu sancto inspiratus. 2. Universalis, qui se extendat ad omnia & singula peccata saltem mortalia. 3. Novæ vitæ propositum includat absolutum & efficax, eo modo quo exposuimus cit. §. hinc consulendo.

### §. I.

#### *De Contritione perfectæ.*

Q. I. *Quid est contritio perfectæ?*

R. Describitur à Patribus Tridentinis sess. 14. c. 4. contritio quæ charitate perficitur, hoc est, quæ ex motivo perfectæ charitatis elicitur, aut imperatur. Per primam vocem designatur

tur genus, in quo contritio perfecta convenit cum imperfecta, seu attritione: per reliquas differentia; qua distat contritio perfecta ab attritione; hæc enim non elicitur à charitate saltem perfecta, ut infrà dicetur.

Q. 2. *Contritio perfecta reconciliatne peccatorem antequam Sacramentum actu percipiat?*

R. Reconciliat.

Probatur 1. ex Scriptura & SS. Patrum testimoniis, quibus Tract. de Baptismo cap. 10. asseruimus Catechumenos à peccatis purgari per votum Baptismi cum charitate conjunctum: *Charitas enim operit multitudinem peccatorum*, 1. Petri cap. 4. v. 8.

Probatur 2. ex Concilio Tridentino, & ex Decretis Summorum Pontificum.

Concilium quidem Tridentinum sic habet sess. 14. cap. 4. *Docet præterea etsi contritionem hanc aliquando charitate perfectam esse contingat, hominemque Deo reconciliare, priusquam hoc Sacramentum actu suscipiatur, ipsam nihilominus reconciliationem ipsi contritioni sine Sacramenti voto, quod in illa includitur, non esse adscribendam.* Non ait Concilium contritionem charitate perfectam hominem Deo reconciliare aliquando, nempe, ut interpretatur Estius, in casibus duntaxat necessitatis; sed expressè docet contritionem aliquando charitate esse perfectam, tuncque hominem Deo reconciliare cum Sacramenti voto; refertque Cardinalis Pallavicinus, lib. 12. cap. 10. Historiæ Concilii adèd persuasum fuisse Patribus virtutem illam inesse contritioni perfectæ, ut paratus esset Canon, quo definiretur hancce veritatem fide divina esse credendam, nisi Archiepiscopus Calaritanus exposuisset hujus-

modi quæstionem pertinere ad controversias Scholæ, in qua graves Theologi, ut Adrianus & Cajetanus, docebant contritionem perfectam extra Sacramentum non justificare, nisi fortè in casibus extraordinariis, ut in articulo mortis, in quo non haberetur copia Confessarii.

Pius V. Gregorius XIII. & Urbanus VIII. hancce Baji Propositionem septuagesimam damnarunt: *Per contritionem etiam cum charitate perfecta & cum vero voto percipiendi Sacramentum, non remittitur crimen extra casum necessitatis aut martyrii sine actuali susceptione Sacramenti.* Præiverat Sacra Facultas Parisiensis anno 1560. die 27. Julii, judicaveratque hujusmodi propositionem esse hæreticam.

Probatur 3. Ratione, in lege veteri perfecta contritio peccata delet: per eam Manasses veniam consecutus est: David, ut ex ferventi doloris sensu protulit: *Peccavi*, mox audivit à Propheta: *Dominus quoque transtulit peccatum tuum*, 2. Reg. c. 12. quia ex S. Chrysostomo homil. 7. in secundam ad Timoth. *sicut ignis, ubi sylvam occupaverit, omnia purgare consuevit; ita & charitatis fervor, quocunque inciderit, omnia perimit, atque perrumpit; ubi charitas est, omnia sublata sunt mala.* Atqui gratia Evangelii nihil detraxit efficaciam perfectæ contritionis: Ergo Momenta quæ solent opponi contra nostram responsionem, solvimus citat. Tract. de Baptismo, cap. 10.

Q. 3. *Contritio perfecta estne dispositio necessaria ad Sacramentum?*

Afferuerunt plures Theologi tum ante Concilium Trident. ut Hugo Victorinus lib. 2. de Sacram. p. 14. cap. 8. Richardus Victorinus lib. de potestate ligandi & solvendi, & cap. 7. & 19. Magister

gister Sententiar. lib. 4. dist. 17. Guillelmus Antiodorensis lib. 4. de pœnit. Albertus Magnus in 4. dist. 18. art. 13. Alexander Halensis part. 4. Summæ quæstione 8. S. Bonaventura in quartum dist. 18. art. 2. Robertus de Sorbona opusc. de itinere Paradisi: & alii, tum in Concilio Trident. ut Joannes Æmilianus, quemadmodum refert Cardinalis Palavic. lib. 12. Hist. cap. 10. tum post Concilium Trident. ut Medina lib. de Pœnit. Gabriel lib. de pœnit. cap. de Contritione; Marianus Victorin. lib. de Sacramento Conf. cap. 13. Non cefuere quidem in Concilio Trident. qui, ut scribit idem Historicus cit. loco contenderent, ejusmodi sententiam censuræ esse subjiciendam; sed abstinuerunt Patres, utpote quæ videretur pertinere ad quæstiones Scholæ, plurimumque distaret ab errore tum Wiclefi, cujus fuit hic articulus in Concilio Constantiensi damnatus: *Si homo fuerit debite contritus, omnis confessio exterior seu sacramentalis est sibi superflua & inutilis*: tum Pseudo-reformatorum, apud quos absolutio non est nisi concionalis declaratio peccata esse dimissa. In mente vero laudatorum Theologorum, absolutio est sententia verè juridica, qua confertur augmentum gratiæ sanctificantis, solviturque juxta quosdam reatus pœnæ æternæ: secundum autem alios communiter remittitur pars pœnæ temporalis, major vel minor pro dispositione pœnitentis. Nihilominus

R. Cum communi Theologorum sententiâ omnino retinenda, contritionem perfectam non esse dispositionem necessariam ad Sacramentum.

Probatur 1. iisdem Scripturæ & SS. Patrum testimoniis, quibus capite 3. evicimus à Christo

concessam fuisse Sacerdotibus potestatem non solum juridicè declarandi, peccata esse dimissa, sed reverà remittendi.

Probatur 2. ex Synodo Tridentina, quæ etsi eo in negotio nihil decernere voluerit, mentem tamen suam sat dilucidè aperuit sess. 14. cap. 4. ubi docet contritionem aliquando perfectam esse, hominemque reconciliare, priusquam hoc Sacramentum actu suscipiatur. Ergo in ejus mente ad Sacramentum ritè suscipiendum, non debet semper esse perfecta contritio, quæ prius hominem Deo reconciliet.

Probatur 3. auctoritate Summorum Pontificum Pii Quinti, Gregorii XIII. & Urbani VIII. qui hancce Baji propositionem quinquagesimam quintam damnarunt: *Peccator pœnitens non vivificabitur ministerio Sacerdotis, sed à solo Deo, qui pœnitentiam suggerens & inspirans vivificat eum, & resuscitat; ministerio autem Sacerdotum solus reatus tollitur.*

Probatur 4. tum ex Catechismo Romano, qui parte 2. cap. de pœnitent. §. 47. conceptis verbis hujusce contritionis perfectæ necessitatem in Sacramento excludit; tum ex judicio Sacræ Facultatis Parisiensis, quæ anno 1638. de quibusdam propositionibus Claudii Seguenot, sic mentem exposuit: *Quæ tradit (Auctor ille) de attritionis insufficiëntia, & contritionis ex perfecta charitate absoluta necessitate adrecipiendum Sacramentum Pœnitentiæ, & quæ addit & approbat de absolutione, quod nihil aliud sit, quam declaratio juridica peccati jam remissi, damnavit quoque Facultas, & censuit has propositiones esse quietis animarum perturbativas, communi & omninò tutæ praxi Ecclesiæ contrarias, efficaciæ Sacramenti imminutivas, & insuper temerarias,*  
ac er-



*ac erroneis.* Tum denique ex Clero Gallicano, qui anno 1700. in declaratione de dilectione Dei in pœnitentiæ sacramento requisita, sic habet: *Hæc duo imprimis ex Sacro-Sancta Synodo Tridentina monenda, & docenda esse duximus; primum ne quis putet in utroque Sacramento requiri, ut præviam contritionem eam quæ fit charitate perfectâ, & quæ cum voto Sacramenti, antequam actu suscipiatur, hominem Deo reconciliet.*

Sed cùm charitas dupliciter possit esse perfecta, nimirum appretiativè & intensivè, ut fusè exposuimus Tract. de Charitate c. 1. à pag. 695. ad pag. 702. ad quas remittimus, idcirco

Q. 4. *Quæ charitatis perfectio requiritur, ut contritio extra Sacramentum peccata deleat, ac Deo reconciliet?*

Duæ sunt oppositæ sententiæ in Scholis celebres, & hinc inde acri studio agitatæ.

Prima statuit quemlibet charitatis actum appretiativè summum cum voto Sacramenti hominem Deo reconciliare.

Probatur 1. ex Scriptura, quæ veniam peccatori promittit statim atque ad Deum ex toto corde convertitur, illumque super omnia diligit, Isa. 55. *Derelinquat impius viam suam, & vir iniquus cogitationes suas: & revertatur ad Dominum, & miserebitur eius.* Ezech. 18. *Cùm enim averterit se justus à justitia sua, & fecerit iniquitatem, morietur in eis.... & cùm averterit se impius ab impietate sua.... ipse animam suam vivificabit.* Ergo sicut justus per quodlibet peccatum; siue intensum, siue remissum, modò sit grave & lethale, statim excedit à gratia: ita impius per quemlibet amorem Dei etiam remissum,

missum, modò sit summus appretiativè, mox amissam vitam gratiæ recuperat, Prov. 8. vers. 17. *Diligentes me diligo*; diligentes, inquam ego, non quavis dilectione, sed ea quæ præcipitur primo legis mandato: *Diliges Dominum Deum tuum ex toto corde tuo*: Atqui per quemlibet amorem Dei appretiativè summum impiùs derelinquit viam suam, ad Deum toto corde revertitur, diligit Deum super omnia, juxta primum & maximum legis mandatum: Ergo.

Probatur 2. ex Sanctis Patribus; qui charitati & contritioni, nulla facta mentione gradus & intensiõis, vim purgandi peccata tribuunt.

S. Chrysostomus epist. ad Theodorum lapsum, sic scribit: *Talis, crede mihi, talis est Dei erga homines pietas, ut pœnitentiam nusquam respuat, si ei sincerè & simpliciter offeratur . . . & quod adhuc præstantius, etiamsi non potuerit quis explere in præsentì satisfaciendi ordinem, quantulumcumque tamen & quamlibet brevi tempore gestam non respuit pœnitentiam.*

Sanctus Augustinus Tractatu 9. in Joan. de charitate differens, sic habet: *Quam cum habere cœperit, Spiritum Sanctum habebit: quam si non habuerit, sine Spiritu Sancto erit. Et quomodo corpus tuum sine spiritu (quod est anima tua) si fuerit, mortuum est: sic anima tua sine Spiritu Sancto, idest, sine charitate si fuerit, mortua deputabitur.* Tract. 5. in 1. Joan. *Non discernuntur filii Dei à filiis Diaboli, nisi per charitatem: qui habent charitatem, nati sunt ex Deo; qui non habent, non sunt nati ex Deo.* Et serm. 35. aliàs 2. de diversis cap. 12. *Deum non vides, inquit, ama, & habes. Quàm multa in damnabilibus cupiditatibus amantur, & non habentur! Deus nobis de compendio se offert,*

*fert, clamat nobis, amate me; quia non potestis amare me, nisi habueritis me.*

Sanctus Leo epist. 91. *Nec misericordiæ Dei, inquit, mensuras possumus ponere, nec tempora definire, apud quem nullas patitur moras vera conversio.*

Probatur 3. ratione triplici. Prima. Quia qui Deum super omnia diligit, etiam actu remissio, vult Deo in omnibus placere: *Minima charitas, inquit S. Thomas 2. 2. qu. 24. art. 5. se extendit ad omnia illa, quæ sunt ex charitate diligenda: omnem Dei offensam averfatur, cum Deo conjungitur per amorem amicitiae: Quid ergo ultra desiderari potest, ut Deo gratus sit & acceptus?*

Secunda. Quia non potest assignari, quis in charitate intensiōis gradus necessarius sit ad delenda peccata extra Sacramentum. Non omnium possibilitium maximus; cum charitas possit crescere in infinitum, nec ulla creatura sit capax producendi actum infinitum: non maximus, qui in hac mortali vita elici queat, alioquin nec ipse Apostolus, qui ardenti amore cupiebat dissolvi & esse cum Christo, veniam fuisset consecutus, cum minus intensè Deum diligeret, quàm beata Virgo: non denique intensior quolibet amore rerum creatarum, putà amore sui ipsius, parentum, ac filiorum; quia intensior ille amor cum non sit in nostra potestate, omnes de salute sua desperare deberent; quivis enim experitur se ex humana infirmitate (quam vincere non potest, quantumcunque displiceat) vehementius commoveri morte propinquorum, & aliis temporalibus incommodis, quàm offensa Dei, quamvis tamen Deum plus appretiativè, quam seipsum aut parentes diligit.

Ter.

Tertia ratio. Facile intelligitur, quomodo Deus iusto iudicio damnet à se averfos; hi quippe merentur à Deo rejici, qui primi illum rejecerunt; à creatura in æternum torqueri, in qua suum finem ultimum constituerunt; & in vitæ exitu excidere per subtractionem divini influxus, tum à fide, quam in iniustitia detinuerunt: tum à spe, quæ in ipsis sine observatione mandatorum fuit inanis & præsumptionis occasio. Sed non potest concipi quomodo rejiciat conversum ad se totaliter, licet remissè, & reprobando faciat aversum; nam omnis reprobus est à Deo aversus: atqui omnis qui diligit Deum super omnia; quamvis remissè, est ad Deum totaliter conversus, *statim atque Dei amor extiterit*, inquit sanctus Chrysostomus, hom. 9. in epist. ad Rom. *homo infra se posita habet*: Ergo.

Respondent Patroni oppositæ sententiæ reverà non damnandum fore, qui Deum super omnia remissè diligit; quia in articulo mortis Deus supplet defectum Sacramenti.

Contra: remissus Dei amor super omnia, vel est dispositio per se sufficiens, & ultima ad gratiam sanctificantem, vel non? Si primum, gratia sanctificans non separatur ab amore Dei super omnia; posita enim ultima dispositione, statim introducitur forma: *Nullas patitur moras vera conversio*, inquebat supra S. Leo. Si secundum, nulla extat sive in Scripturis, sive in Traditione, Dei promissio perficiendæ charitatis in casu extremæ necessitatis.

Imò, inquiunt illi Theologi, constans est Ecclesiæ Traditio non desperandum de salute pœnitentium, qui absque Sacramento fortè moriuntur:

tur : Pœnitentes, inquit Concilium Carthagenſe IV. can. 79. *qui attentè leges pœnitentiæ exequuntur, ſi caſu in itinere, vel in mari mortui fuerint, ubi eis ſubveniri non poſſit; memoria eorum & orationibus & oblationibus comanendetur.* Similia ſtatuerunt Concilia Vafenſe, Arelatenſe II. & Toletanum XI. ſanctus Ambroſius de obitu Imperatoris Valentiniani ſine Baptiſmo defuncti, non dubitat de ejus ſalute. Et S. Auguſtinus libro 4. de Baptiſmo cap. 22. ſcribit impleri inviſibiliter quod deerat, *cùm myſterium Baptiſmi non contemptus Religionis, ſed articulus neceſſitatis excludit.* Ergo ea ſemper fuit mens Eccleſiæ Deum in extremis ſupplere defectum Sacramenti.

Diſtinguenda eſt conſequentia; ſupplere aliquando, ut in Latrone in Cruce juxta Chriſtum pendente, quem S. Auguſtinus cit. cap. 22. in exemplum aſſert, veriſſimum eſt: ſupplere ſemper, falſiſſimum. Orat quidem Eccleſia pro omnibus Fidelibus, qui ſive perceptis, ſive expetitis Sacramentis diem clauſerunt extremam, ſed inde non ſequitur omnes illos ad Deum & ad requiem æternam abire. Hoc unum certum eſt, quòd ſi cum voto Sacramenti abeant perfectè contriti, ſalvabuntur: utrùm verò ex imperfectè contritis, Deus perfectè contritos reddat, incertum, nec illud colligi poteſt ex ſuffragiis Eccleſiæ, cùm ea non deneget, niſi iis, quos conſtat obiſſe impœnitentes. Addo plures vi morbi non eſſe rationis compotes, ut amor Dei, qui fuerat in eis remiſſus, intendatur, perficiaturque, ac proinde, ſi per ſe non ſufficiat ad juſtificationem, ut contendunt Patroni oppoſitæ ſententiæ, illi pœnitentes cum amore Dei ſuper omnia, ſed remiſſo

misso damnabuntur, quod videtur longè absurdissimum. Nec dicant Deum in illis extremis gratiam habitualement infundere, etiam si subiectum ad illam non sit ultimò dispositum: illud enim est singulare privilegium martyrii, ut constat tum ex Scriptura, tum ex Traditione. Vide quæ in hanc rem dicta sunt Tractatu de Baptismo cap. 9.

Secunda Sententia requirit in contritione, quæ extra Sacramentum iustificet, intensiorem charitatis gradum, Deo, non hominibus notum.

Probatur autem hæc sententia 1. ex Scriptura, quæ acrem dolorem & intensum amorem à peccatoribus exigit, ut veniam à Deo consequantur. Deuteron. 4. *Cum quæsieris Dominum Deum tuum, invenies eum; si tamen toto corde quæsieris, & tota tribulatione animæ tuæ.* Joelis 2. *Convertimini ad me in toto corde vestro, in jejuniis, & in fletu, & in planctu; & scindite corda vestra;* quæ sanè vehementiam doloris denotant necessariam ad peccatorum remissionem obtinendam. Talis fuit dolor Davidis, cum post comminationes Dei terribiles exclamavit: *Peccavi*, 2. Reg. 12. vers. 13. *Tres syllabæ sunt*, inquit S. Augustinus serm. 393. aliàs 41. ex homil. 50. *sed in his tribus syllabis flamma sacrificii cordis (ex quo flumina lacrymarum proruperunt) ascendit in cælum.* Talis quoque pœnitentia mulieris peccatricis, quæ lacrymis suis lavit pedes Christi, Luc. 7. & S. Petri, qui flevit amarè, Matth. 26.

Probatur 2. ex Catechismo Romano à sancto Pio V. probato, & ubique recepto ac laudato, sic enim habet parte 2. de institutione Sacramenti Pœnitentiæ: *Ut hoc concedamus, contritione peccata deleri, quis ignorat eam adeo vehementem, acrem & incensam esse oportere, ut doloris acerbitas cum scelerum*

rum

rum magnitudine æquari conferrique possit ? Et quoniam pauci (in veteri lege) ad hunc gradum pervenirent ; fiebat etiam ut à paucissimis hac via peccatorum venia speranda esset. Quare necesse fuit ut clementissimus Dominus facilliori ratione hominum saluti consuleret , quod quidem admirabili consilio effecit , cum claves regni cœlestis Ecclesiæ tradidit. Quæ verba adeo clara , etsi non habeant vim definitionis fidei , continent tamen doctrinam sanam iudicio tum summi Pontificis Pii V. tum omnium communiter Episcoporum : ac proinde idem Sanctissimus Pontifex Pius V. non damnavit trigesimam & sexagesimam-septimam Baji propositionem , nisi quia auctor is asseruit charitatem etiam perfectam posse consistere cum peccato mortali.

Probatur 3. ex Patribus , qui omnes uno ore vehementem dolorem & intensum amorem à pœnitentibus exigunt. Tertullianus de pœnitentia scribens , ait cap. 9. *Mandat . . . . . animum mœroribus dejicere . . . . . ingemiscere , lacrymari , & mugire dies noctesque ad Dominum . . . . . ut in peccatorem promuntians Dei indignatione fungatur , & temporali afflictatione æterna supplicia non dicam frustretur , sed expungat.* Sanctus Cyprianus ferm. de lapsis in fine : *Quàm magna deliquimus , inquit , tam granditer defleamus. Alto vulnere diligens & longa medicina non desit : pœnitentia crimine minor non sit . . . . . Putas facile eum (Dominum) misereri tui , quem tuum non esse dixisti ? Orare oportet impensius & rogare , diem luctu transigere , vigiliis noctes ac fletibus ducere , tempus omne lacrymosis lamentationibus occupare , stratos solo adhærere cineri , in cilicio volutari & sordibus , &c.* Similia habet sanctus Ambrosius ad virginem lapsam cap. 8. ubi sic ait : *Sed quanta putas & qualis necessaria pœnitentia*

*nitentia, quæ aut æquet crimina, aut certè exæquet? Sanctus quoque Augustinus serm. 278. aliàs 34. de diversis cap. 12. Sunt, inquit, quædam gravia & mortifera, quæ nisi per vehementissimam molestiam humiliationis cordis, & contritionis spiritus, & tribulationis pœnitentiæ non relaxantur. Hæc dimittuntur per claves Ecclesiæ. Et sanctus Cæsarius hom. 1. Quomodo, inquit, solet mater orbata super amissione unici filii sui fracto pectore lamentari; ita convenit super unicam suam (animam) sed cùm spe reparationis affligi . . . . Necessè super hanc unicam crininum mucrone confossam totum pondus doloris effundi, si fortè possit lacrymarum vivificata fontibus, calore fidei suscitari.*

Verùm isthæc Patrum testimonia parùm favent huic posteriori sententiæ: tum quia in iis agitur de pœnitentia necessariâ ad obtinendam in Sacramento peccatorum remissionem, ut legenti Tertullianum, & Sanctum Cyprianum patebit, & indicat sanctus Augustinus, dum subdit: *Hæc dimittuntur per claves Ecclesiæ*; Patroni autem posterioris sententiæ non requirunt incensam charitatem ad Sacramentum Pœnitentiæ: tum quia Patres loquuntur de tota actione pœnitentiæ prout complectitur etiam satisfactionem, quæ antiquitus solebat præcedere absolutionem sacramentalem. Atqui ex Concilio Tridentino sess. 14. cap. 8. & in omni Catholicorum sententia, satisfactio debet, quantum possibile est, æquare criminum magnitudinem. Fatendum quidem est tot gemitus & lacrymas, totque acerbis corporis afflictationes fluere ex summo cordis dolore; sed quis Catholicorum neget dolorem ad Sacramentum necessarium debere esse summum saltem appretia-

e, ex quocunque tandem motivo procedat,  
sive



sive ex metu gehennæ, sive ex desiderio recuperandæ beatitudinis per peccatum amissæ? quibus motivis Tertullianus, sanctus Cyprianus, & sanctus Ambrosius incitant pœnitentes, sive ex motivo amoris Dei super omnia. Controversia autem, in qua versemur, est de charitate requisita ad delenda peccata extra Sacramentum, an debeat esse in gradu intenso, quod laudati Patres non attingunt, saltem directè, ac dilucidè.

Quæstionem in utramque partem sincerè ac candidè agitavimus: tum ut testificaremur nostram in graves Theologos observantiam, qui magno numero stant, alii pro priore, alii pro posteriore sententia: tum ut vitaremus eorum offensionem, qui utentur labore nostro; non desunt enim, qui in hacce Scholæ controversia ita uni parti addicti sunt, ut ægrè ferant, si altera ab aliis propugnetur. Quamobrem quid verisimilius nobis videatur, exponemus, neutram opinionem impugnando, sed utramque, quantum fieri potest, conciliando. Quod, ut assequamur, nonnulla prænotanda sunt.

Notandum itaque 1. duplicem esse charitatis fervorem: alium sensibilem, cum sensus vehementer commoventur ad amandum Deum, & dolendum ob ejus offensam; alium spiritalem; cum voluntas, etsi immotis, vel etiam reluctantibus sensibus, toto suo pondere fertur in Deum propter infinitam ejus bonitatem, & ita ei displicet Deum offendisse, ut promptè ac sine cunctatione, atrocissima quæque potius eligeret, quàm Dei offensam. Sensus autem eò vehementiùs commoventur, quò objecta sunt eis præsentiora, & magis eos feriunt: atqui objecta sensibilia sunt

sensibus proximiora, & insolita ac inexperta magis eos feriunt; ab assuetis enim non fit passio. Hinc est quòd virtute provecti fervidum illum dilectionis impetum, & sensibilem contritionis vehementiam, quibus initio conversionis incitabantur, minùs in se sentiant, nec sine sollicitudine & animi anxietate, quasi pristinum virtutis studium remiserint; nisi edoceantur illas sensuum commotiones rerum usu & assuetudine defervere, cum interim animus nova virtutis incrementa acquirat.

Igitur, etsi expetenda sit isthæc sensibilis contritio, multùm quippe juvat ad pietatem maximè eos, qui necdum à corporeis delectationibus sunt ablactati; cùm sine ea vix animum ad spiritualia intendat; absolute tamen necessaria non est sive extra Sacramentum, sive in Sacramento; cùm in nostra potestate non sit; sensus enim non moventur ad nutum voluntatis.

Notandum 2. amorem Dei, & dolorem de peccato posse esse sensibilibiter intensum, & tamen inefficacem: *Multi*, inquit sanctus Isidorus libro 2. de summo bono cap. 16. *lacrymas indefinenter fundunt, & peccare non desinunt.* Et capite 33. quod refertur distinct. 3. de pœnitentia: *Ille qui plangit peccatum, & iterum admittit peccatum, quasi si quis lavet laterem crudum; quia quantò magis laverit, tantò magis lutum facit.* Quàm ardens in Augustino fuerit amor continentiae, & simul inefficax; & quàm intensus ejus dolor quòd intemperatè viveret, ipsemet describit libro 8. Conf. cap. 8. *Ego*, inquit, *fremebam spiritu indignans turbulentissima indignatione, quòd non irem in placitum & pactum tecum, Deus meus, in quod eundum esse omnia ossa mea clamabant.*

bant. Et infra : *tam multa ergo feci, ubi non hoc erat velle quod posse; & non faciebam, quod & incomparabili affectu amplius mihi placebat . . . . . faciliusque obtemperabat corpus tenuissimæ voluntati animæ, ut ad nutum membra moverentur, quàm ipsa sibi anima ad voluntatem suam magnam in sola voluntate perficiendum. Et capite 12. flebam amarissima contritione cordis mei.*

Notandum 3. amorem charitatis divini eo modo quo Tractat. de Spe pag. 674. distribuimus timorem Dei, scilicet, in filialem & initialem; namque, ut ibidem observavimus, in utroque illo timore includitur charitatis amor, sed inchoatus & imperfectus in initiali, robustus verò & perfectus in filiali.

Timor castus & perfectè filialis solo motivo infinitæ Dei bonitatis mentes accendit ad illum amandum, mandata ejus observanda, & offensam propulsandam. Æternæ quidem felicitatis promissa; & intentatæ pœnarum minæ occasionem illi præbent, ut cernere est in Ninivitarum pœnitentia; sed inde vires non accipit: per se fortis est ac prævalidus ad frangendos nodos omnes, quibus animi vinciuntur ac retardantur: *Fortis est ut mors dilectio . . . aquæ multæ non potuerunt extinguere charitatem*, Cant. 8. Timor verò initialis, in quo intelligitur charitas inchoata, ex duobus motivis, ac totidem virtutum actibus coalescit, scil. ex motivo divinæ bonitatis, quæ voluntatem suaviter allicit ad diligendam justitiam, ac præsertim totius justitiæ fontem, Deum nempe, ejusque offensam detestandam: & ex motivo spei, quæ injicit timorem gehennæ, & amorem concupiscentiæ in beatitudinem.

Initialis timor efficit ratione inchoatæ chari-

tatis quam includit, ut Deus & mandata ejus suaviter diligantur, sed nondum fortiter, nisi ratione spei adjunctæ, quæ timore gehennæ & desiderio felicitatis æternæ incipientes tam vehementer incitat, ut eorum impetum interdum cohibere necesse sit. Conferri potest cum hisce rivulis, qui cum murmure, ac sonitu flaut, quos tamen vel exigua moles apposita, vel tenue saxum à suo cursu deflectit: cum contra ingentes fluvii ad mare properent lapsu gravi, sed ita silenti, ut vix labi ac fluere, imò & residere, & quasi consistere undas è longinquo crederes: voluntur tamen tanta vi, tantoque pondere, ut non modò non diverti aliò, aut coerceri ulla interposita mole queant, sed etiam cuncta evertant, diruant, ac secum trahant. Haud secus contingit iis, qui susceptionem primam divini amoris, & iis, qui ejusdem perfectionem attigere. Priorum impetus & ardor frangitur obvia quavis difficultate, imò & interdum succumbunt, ceduntque tentationi, nisi hos gehennæ metus & amor concupiscentiæ in beatitudinem, contineant. Posteriores verò, id est, qui amore casto & timore filialis aguntur, incessu firmo progrediuntur, obvias quasque tentationes prætervolant sola Deo displicendi formidine, sed ita sincera & latente, ut interdum sese non succubuisse demirentur, cum illos divini amoris ignes intus in corde suo ardescere sensu non percipiant.

His prænotatis ad propositam quæstionem

R. Amor castus & perfectè filialis in quovis gradu hominem Deo reconciliat extra Sacramentum: initialis verò minimè. Utrum autem in Sacramento, expendetur suo loco.

Prima

Prima pars, quæ est de amore casto & perfectè filiali, probatur iisdem momentis, quibus nititur utraque sententia, quam nostra responsione conciliare intendimus; nempe amor ille in quo vis gradu est ex toto corde & super omnia, fortis & prævalidus ad expugnandum extinguendumque omnem peccati affectum: dolor, qui eum sequitur, est vehemens & ex tota, si non sensus saltem animi tribulatione, æquari conferrique potest cum scelerum magnitudine, & pauci sine multis precibus, lacrymis, pœnitentiæ afflictationibus ad illam charitatis perfectionem perveniunt: Ergo is castus & verè filialis amor est ultima dispositio, quam Scriptura & Patres requirunt ad reconciliandum Deo peccatorem.

Secunda pars, quæ est de amore initiali, probatur: quia amor ille esset ultima dispositio ad gratiam sanctificantem, vel ratione sui præcisè, vel ratione actuum spei, scilicet intensi timoris gehennæ, & fervidi desiderii beatitudinis, quibus admixtus roboratur: atqui neutrum dici potest. Non quidem posterius in omnium sententia; hætenus quippe inauditum fuit in Scholis, timorem gehennæ, & amorem concupiscentiæ in beatitudinem, justificare extra Sacramentum.

Neque etiam prius dici potest: tum quia ex dictis amor initialis per se debiliior est, quàm ut voluntatem ab illicitis affectibus prorsus avellat; ergo non satis disponit ad gratiam sanctificantem, sicut nec primus gradus caloris lignum disponit ad ignem, cum ab eo non expellat qualitates inimicas, frigidum scilicet & humidum: tum quia Deus non solet dona sua conferre statim atque placent & expetuntur, sed differt, donec ruptis

omnibus repagulis, in ea toto corde feramur; *petendo & quærendo crescis, ut capias*, inquit Sanctus Augustinus *serm. 61. aliàs 5. de verbis Domini, servat tibi Deus, quod non vult citò dare, ut & tu discas magna magnè desiderare.* Et sanctus Chrysostomus *hom. 30. in Genes. nostrum ergo sit opus continuis insistere precibus; & non agrè ferre, si differatur quod poscimus, sed longanimes esse.* Neque enim *renuens nostras preces differt; sed hac arte sedulos nos efficiens ad semetipsum attrahere vult.* Castitas Augustino placebat *incomparabili affectu*, verba illius sunt; ad eam tamen non pervenit, quamdiu semisauciam, inquit *Confess. cap. 8. hac atque hac versabat & jactabat voluntatem, parte assurgente cum alia parte cadente, luctantem.* Quàm multi ad Deum suspirant, alii pro humilitate, quæ ipsis deest, alii pro patientia, & nihilominus, data occasione superbiæ & impatientiæ motibus persæpè abripiuntur; quia virtutes illas necdum integrè ac fortiter desiderant. Si ergo inferiora Dei dona non statim infunduntur propter initialem & inchoatam eorum dilectionem, nec à fortiori omnium donorum præstantissimum, nempe gratia sanctificans & charitas, quæ est justitiæ plenitudo.

Dices: quilibet charitatis amor sive initialis, sive castus & perfectè filialis, est ex toto corde, ac proinde per se fortis ac strenuus, utpote appetitativè summus; illud enim est discrimen inter virtutes morales & Theologicas, quòd istæ cum habeant Deum pro objecto, in illum ferantur motivo infinito, fides divina veritate, spes Dei omnipotentia & misericordia, charitas infinita ejus bonitate: ergo hujusmodi virtutum actus sunt necessariò appetitativè summi, ac per se

se prævalidi & efficaces ; & ita quilibet charitatis amor , etiam initialis , hominem Deo reconciliat extra Sacramentum.

Nego anteced. & ejus confirmationem , quia in omnium Philosophorum ac Theologorum sententia primus cujusque finis effectus est ejus volitio , seu simplex amor , qui præcedit saltem natura intentionem , seu desiderium efficax , in quo virtualiter continentur mediorum electio & casus , quemadmodum fusè exposuimus Tract. de Actibus humanis pag. 56. Igitur sicut humanitas v. g. spectata in ratione finis movet primò ad sui amorem , qui est humilitas inchoata , ut agnoscit S. Franciscus Salesius scribens ad quandam virginem , quæ ex amore hujusce virtutis impensè dolebat , quòd tumentibus animi affectibus plerumque cederet : similiter affectus credulitatis , in eo qui nondum est plenè Catholicus , est quoddam initium fidei , & initialis Dei ac mandatorum ejus dilectio , est inchoatæ charitatis effectus.

Ergo hacce nostra sententia conciliari videntur oppositæ , quas retulimus , sententiæ , ita enim statuimus cum Patronis secundæ sententiæ , quemlibet charitatis amorem extra Sacramentum non sufficere ad reconciliandum peccatorem ; sed fortem ac strenuum requiri ; ut simul concedamus Patronis primæ sententiæ amorem illum fortem & efficacem , in quovis gradu justificare extra Sacramentum.

## §. II.

*De Attritionis notione, ac differentia à contritione perfecta.*

**A**ttentionis nomen, quod à verbo, *attero*, ductum esse duximus capit. 1. §. 1. non solum apud Scripturam & Patres non occurrit, sed neque apud Theologos ante decimum tertium sæculum.

Nomine autem attritionis veteres Theologi intellexerunt contritionem intensam & perfectam, quæ præcedit infusionem gratiæ sanctificantis, adeo ut in eorum mente contritio & attritio differant sicut fides formata & informis, hoc est, ratione subjecti, idemque dolor charitate perfectus dicatur contritio in homine iusto; attritio verò in peccatore ad gratiam sanctificantem dispositio. Ita referunt Alexander de Hales lib. 4. q. 17. art. 1. S. Bonaventura in 4. dist. 17. part. 2. artic. 2. qu. 3. ad 4. S. Thomas in 4. dist. 17. & in Supplem. qu. 1. art. 3. Sed omiſſa illa attritionis acceptione, utpote à Scholis rejecta,

Q. 1. *Quid est Attritio?*

R. Describitur à Patribus Tridentinis sess. 14. c. 4. dolor imperfectus, qui vel ex turpitudinis peccati consideratione, vel ex gehennæ & pœnarum metu concipitur communiter cum spe veniæ, & excludens peccandi voluntatem.

Dicitur 1. *dolor*, utique supernaturalis; namque ex dictis capite 2. dolor naturalis, nec est pars materialis Sacramenti, nec dispositio adejus effectum: quin Patres Tridentini conceptis verbis docent laudato capite hujusmodi dolorem, *domini Dei esse & Spiritus Sancti impulsus, non adhuc qui-*



*quidem inhabitantis, sed tantum moventis, quo pœnitens adjutus viam sibi ad justitiam parat.*

Dicitur 2. *imperfectus*, non quidem in sua specie: sed comparatè ad dolorem contritionis perfectæ, qui longè est præstantior; omnes quippe virtutes sunt perfectæ in suo genere; ut diximus Tractatu de Spe; sed differunt inter se, sicut stella differt à stella in claritate: alia claritas Solis & charitatis; alia claritas Lunæ & spei; alia claritas stellarum & cujuslibet virtutis.

Dicitur 3. *qui concipitur vel ex turpitudinis peccati consideratione, vel ex gehennæ pœnarum metu.* Quibus verbis exprimitur differentia attritionis à contritione perfecta; hæc enim concipitur ex perfecto charitatis amore.

Sed difficultas est, quænam peccati turpitudine possit esse attritionis motivum; triplex enim turpitudine spectatur in peccato. 1. peccantem infamia aspergit; & turpitudinis notam vitæ illius inurit. 2. naturam rationalem dehonestat & inquinat. 3. opponitur pulchritudini justitiæ, quam Deus, Fides & Religio commendant.

Certum est 1. dolorem ex primæ turpitudinis consideratione profluentem magis animam inquinare; quàm purgare; oritur enim ex amore laudis humanæ, qui nisi referatur ad Dei gloriam, & proximi salutem ac commodum, vanus est & vitiosus; *Sanctus videt*, inquit S. Augustinus lib. 5. de Civ. cap. 13. *qui & amorem laudis vitium esse cognoscit.* Et cap. 14. *Huic igitur cupiditati melius resistitur sine dubitatione, quàm creditur; tantò enim quisque est Deo similior, quantò ab hac immunditia mundior.*

Certum est 2. Dolorem ex scditate peccati conceptum, quatenus præcisè animi ulcus dete-

git, esse merè naturalem, quin & sæpiùs vituperio dignum; ut qui fluere soleat ex superbia, & ex amore inordinato propriæ excellentiæ, ut advertit S. Augustinus cit. lib. 5. cap. 20. his verbis: *Nec illi (Stoici) se ab ista defenderint fœditate, qui, cum alia spernant judicia velut gloriæ contemptores, sibi placent; videntur, & sibi placent. Nam eorum virtus (si tamen ulla est) alio modo quodam humanæ subditur laudi; neque enim qui sibi placet, homo non est.* Adde propositionem, qua à dispositionibus necessariis ad absolutionem, excluditur quilibet ad Deum offensum respectus, à Clero Gallicano damnatam fuisse anno 1700. uti temerariam, perniciosam, ducentem in hæresim.

Restat igitur ut attritio, quam Tridentini Patres describunt veluti quoddam salutare remedium adversus peccatum, non concipiatur nisi ex tertia turpitudine peccati, quatenus nempe contraria est pulchritudini justitiæ & legis æternæ.

Dicitur 4. *cum spe veniæ, & excludens peccandi voluntatem*, quibus attritio convenit cum contritione perfecta, ut suprâ diximus; distinguitur verò ab infructuosa & coacta pœnitentia, quam in inferno agunt desperati, Sap. c. 5.

Dicitur 5. *communitè*, qua voce significant Tridentini Patres attritionem ex aliis motivis aliquando concipi, ac primò quidem ex amore beatitudinis; qui enim vitam æternam ardentè desiderat, consequens est ut doleat, quòd illius amittendæ periculum peccando incurrerit; quanquam in timore gehennæ intelligitur amor beatitudinis, timor quippe mali oritur ex amore boni oppositi, timor ægritudinis, v. g. ex amore sanitatis, & eò

eo magis quis gehennam timet, quò impensius beatitudinem suam diligit. 2. Fluit etiam attritio ex initiali & inchoato charitatis amore; qui enim Deum diligere incipit, doleat quoque necesse est, quòd illum offenderit.

Q. 2. *Quomodo attritio differt à contritione perfecta?*

R. Attritio, quæ concipitur ex timore gehennæ, & ex amore concupiscentiæ beatitudinis supernaturalis, differt essentialiter à contritione perfecta quia illi actus essentialiter differunt, qui habent objecta motiva, seu formalia, specie diversa; ab iis enim speciem & essentiam desumunt, ut sæpius dictum est, ubi de virtutibus Theologicis: Atqui attritio sic concepta, & contritio perfecta habent objecta motiva, seu formalia specie diversa: ad illa movetur peccator vel timore pœnæ, vel amore concupiscentiæ in beatitudinem; ad istam verò amore infinitæ Dei bonitatis. Porrò motivum vitandæ pœnæ & consequendæ beatitudinis, specie differt à motivo charitatis: Ergo.

R. 2. Attritio profluens ex inchoato charitatis amore, non differt nisi accidentaliter à contritione perfecta, quemadmodum puer infirmus à viro perfecto; quia idem est utriusque motivum. Ita plures è veteribus Theologis, ut Guillelmus Parisiensis Tractatu de Sacramento Pœnitentiæ capite 6. in quo sic scribit: *Attritio ad contritionem sic est . . . sicut calefactio ad arsiōem, & sicut illuminatio, quæ est umbra ad irradiationem, hoc est, sicut umbra crepusculi ad radium . . . sunt ergo unius & ejusdem speciei, & non differunt nisi secundum magis & minus.* At Albertus Magnus in quartum dist. 16. artic.

artic. 10. *dicendum*, inquit, *meo judicio quòd unus & idem dolor in substantia, potest esse attritionis & contritionis.*

Ex hacce attritionis explicatione nascitur gravis in scholis controversia, præsertim à tempore Concilii Tridentini; num quævis attritionis species ex recensitis, sufficiat in Sacramento, nam constat ex §. præcedenti, nullam extra Sacramentum sufficere.

Dixi, *præsertim à tempore Concilii Tridentini*; quia ante illud tempus communis erat Theologorum sententia, attritionem ex timore gehennæ conceptam, sine inchoato charitatis amore, non posse hominem Deo reconciliare etiam in Sacramento. Id agnoscunt, qui opinionem de sufficientia hujusce attritionis invexerunt, ut Dominicus Soto in 4. dist. 18. qu. 3. art. 2. *Doctrina*, inquit, *de attritione, qua in Sacramento fit contritio, licet vera sit, non est tamen ita multum vetus; Patres enim antiqui solam contritionem agnoscebant necessariam ad Confessionem.* Similia habent Melchior Canus, Suarez, Comitulus, & alii, quorum verba alibi commodiùs laudabimus.

### §. III.

*Utrum Concilium Tridentinum quidquam statuerit circa recens motam de Attritione controversiam?*

Mirum est opinionem de sufficientia attritionis servilis, quæ non nisi timide in publicum prodiit, quamque ejus auctores ut minimè certam, nec in praxi tutam induxerunt, tantam progressu

gressu temporis auctoritatem sibi arrogasse, ut à nonnullis jactari soleat, tanquam fidei dogma à nullo violabile, propter Concilii Tridentini sess. 14. cap. 4. auctoritatem, quam obtendunt, contra quos ad propositam quæstionem,

R. Indubitatum esse debet Concilium Tridentinum non diremisisse controversiam in qua versamur, nec definiisse attritionem ex metu gehennæ conceptam in Sacramento sufficere.

Probatur 1. ex eis quæ in Concilio acta fuisse refert Cardinalis Palavicinus in sua Historia. Ac primò quidem narrat Eminentissimus Historicus lib. 4. c. 13. delineatum fuisse Decretum circa dispositiones ad justificationem requisitas, in quo, cum non appellaretur Dei amor, Patres censuerunt hæc inferenda verba, *Illumque tanquam omnis justitiæ fontem diligere incipiunt*, prout habetur sess. 6. cap. 6. *quod attinet*, inquit laudatus Historicus, *ad id, quod dicitur de dilectione Dei; advertendum est per tenorem Decreti prius delineatì, nullam fieri dilectionis mentionem; sed Salvatorem Alepium Archiepiscopum Turritanum, Claudium Faicum Societatis Jesu, &c. monuisse ut aliquis charitatis actus infereretur. Cumque id ad omnium Patrum judicium relatum fuisset . . . viginti tres ex ipsis disertè illud comprobasse, ideoque insertum Decreto.*

Respondent Patroni oppositæ sententiæ, alii, quod Decreto insertum est intelligendum de amore spei & concupiscentiæ: alii cit. sess. 6. cap. 6. agi de dispositionibus ad justificationem extra Sacramentum obtinendam.

Contra 1. ex Palavicino plures monuerunt, ut aliquis charitatis actus infereretur, quod Patres comprobarunt. 2. Concilium agit de justificatione,

catione, cujus causam instrumentalem dicit. cap. 7. ejusdem sessionis esse Sacramentum Baptismi: Ergo agit de justificatione, quam Baptismus operatur tanquam causa instrumentalis. Præterea absurdum est Concilium non tradidisse dispositiones ad Baptismum ritè suscipiendum necessarias, maximè cum Lutherani & Calvinistæ nullam statuerent necessariam præter fidem: atqui de iis alibi non tractat: Ergo.

Confirmatur nostra responsio ex Canone 3. ejusdem sess. 6. in quo Sancta Synodus expresse distinguit inter amorem spei & charitatis, asseritque utrumque prærequiri ad justificationem: Si quis, inquit, *dixerit sine præveniente Spiritus Sancti inspiratione atque ejus adjutorio, hominem credere, sperare, diligere, aut pœnitere posse sicut oportet, ut ei justificationis gratia conferatur; anathema sit.*

Sed veniamus ad caput 4. sess. 14. quo Adversarii maximè nituntur, cum revera eorum opinionem funditus subvertat. Patres Tridentini quibusdam Theologis curam delineandi Decreti in sessione 14. ferendi de attritione demandaverant, illa autem delineatio sic se habebat ex eodem Historico lib. 12. cap. 10. *Illam contritionem, quam Theologi attritionem vocant, quòd imperfecta sit, & solum vel ex turpitudinis peccati consideratione, vel ex gehennæ & pœnarum metu, qui servilis timor dicitur, concipiat, si voluntatem peccandi excludat, & dolorem qualemcumque ac delictis commissis exprimat, statuit hæc Sancta Synodus, & declarat non solum non facere hominem hypocritam, & magis peccatorem (ut quidam blasphemare non verentur) verum etiam sufficere ad Sacramenti hujus constitutionem, ac domum Dei esse, ac Spiritus Sancti impulsum verissimum, non adhuc quidem inhabitantis,*

bitantis, sed tantam moventis, quo pœnitens adjutus (cum sine aliquo dilectionis in Deum motu esse vix queat) viam sibi ad justitiam munit, & per eum ad Dei gratiam facilius impetrandam disponitur. Sed, pergit Historicus, laudatus Episcopus Joannes Æmilianus Hispaniensis Tudetanus Antistes, monuit falsò dici hujusmodi dolorem sine amore vix unquam concipi posse . . . . quòd autem hæc attritio satis esset Sacramento constituendo: ita ut homini attrito deleantur peccata absolutionis supervenientis vi, variare auctororum sententias, adeoque id esse tollendum. Quamobrem Decretum, sicut nunc extat, reformatum est.

Porro in Decreto, quod nunc extat, expuncta sunt ex oblata Patribus delineatione, quæ majusculis literis pinximus, nolueruntque Tridentini Patres decernere, 1. attritionem concipi solum ex gehennæ & pœnarum metu. 2. timorem gehennæ esse servilem, cum servilitas oriatur dumtaxat ex mala voluntate, quam vera attritio excludit. 3. attritionem vix esse posse sine aliquo dilectionis in Deum motu, eamque in Sacramento sufficere & loco hujusce vocis, *sufficere*, inseruerunt, *disponere*.

Ergo frustra aerem verberant, qui importunè vociferari non cessent, Concilium Tridentinum definiisse attritionem ex gehennæ metu conceptam, sufficere in Sacramento; illud enim non definiit, quod tam solemniter declaravit se nolle definire, dum ex delineato Decreto expunxit verbum, *sufficere*.

At, inquirunt, ex contextu Decreti, quod nunc extat, necessariò colligitur sufficientia hujusce attritionis.

Ergo, inquam ego, Concilium sibi contradixit;

xit; dixit, & non dixit hancce attritionem sufficere. Non dixit quidem, cùm insertum in Decreto verbum, *sufficere*, deleverit: dixit verò ut ex verbis ejus colligunt Adversarii. Quis autem Catholicorum contradictionis notam Concilio œcumenico affinget? Sed audiamus Adversariorum ratiunculas.

Objiciunt 1. Concilium opponit attritionem extra Sacramentum ipsimet attritioni in Sacramento, docetque eam extra Sacramentum ita viam ad justitiam parare, ut adeam non perducatur: contra verò in Sacramento disponere: *Et quamvis, inquit, sine Sacramento Pœnitentiæ per se ad justificationem perducere peccatorem nequeat, tamen eum ad Dei gratiam in Sacramento Pœnitentiæ impetrandam disponit.* Nulla autem esset oppositio, si attritio, de qua est sermo, satis non esset ad reconciliationem peccatoris in Sacramento; sensus enim foret, quamvis attritio extra Sacramentum per se ad justificationem non perducatur; tamen in Sacramento per se ad eam non perducit, quæ loquendi ratio est absurda, nugatoria, & Concilio prorsus indigna.

2. nisi illa attritio in Sacramento sufficiat, Concilium non determinavit quæ sit necessaria Sacramenti Pœnitentiæ materia; necessaria enim hujusce Sacramenti materia vel est contritio perfecta, vel contritio imperfecta: atqui ex Sancta Synodo perfecta contritio non est materia necessaria: ergo nisi statuerit contritionem imperfectam seu attritionem, quæ ex pœnarum metu concipitur, esse idoneam Sacramenti materiam, non determinavit quæ sit ejus materia necessaria, quod cum dici nequeat, fatendum omninò est Concilium in hoc Decreto statuisse attritionem



ex pœnarum metu conceptam in Sacramento sufficere.

R. 1. Generatim, si quid valeant momenta opposita, illud unum efficiunt, nempe Tridentinos Patres Catholicis fucum fecisse, hoc est, obscurè & latenter docuisse, quod palam & solemniter testati sunt se nolle docere, cum verbum, *sufficit*, ex Decreto suo expunxerunt, quod absque eorum injuria dici nequit, à qua ut vindicentur,

R. 2. Sigillatim ad singula.

Ad primum, Nego Concilium opponere attritionem extra Sacramentum ipsimet attritioni cum Sacramento conjunctæ; alioquin sic scribere debuerat, *Quamvis sine Sacramento Pœnitentiæ per se ad justificationem perducere peccatorem nequeat, illum tamen in Sacramento ad eam perducit; vel, ad eam impetrandam sufficit*; illud enim exigebat comparatio. Sed Patres eo ipso declararunt hanc non esse suam mentem, quo verbum, *sufficit*, è Decreto delendum censuere.

Concilium igitur in hocce Decreto docet attritionem esse actum liberum & utilem, tum initio, tum in progressu conversionis ad justitiam obtinendam, perstringitque duos Lutheri errores. Alterum, quo statuebat dolorem ex metu gehennæ conceptum, esse coactum & involuntarium: alterum, quo asseribat, quæ ex illo dolore fiunt bona ante justificationem, verè esse peccata. Ergo, inquit ser. de pœnit. in assertione art. sexti, *peccatum assero quidquid ante gratiam fit ab homine*, tantum abest, ut præparet ad gratiam. Contra verò Tridentini Patres docent attritionem ex pœnarum metu conceptam, donum Dei esse,

& Spiritus Sancti impulsus, quo adjutus peccator liberè tum initio conversionis, & priusquam ad Sacramentum accedat, tum in ipso Sacramento ad justitiam sese disponit; quemadmodum fides ita est initium nostræ salutis, ut in progressu nutrienda & augenda sit, nedum referenda. Quodd autem ista sit mens Concilii, patet ex can. 5. qui est summa capitis quarti, ubi sic loquitur: *Si quis dixerit eam contritionem, quæ paratur per discussionem, collectionem, & detestationem peccatorum, qua quis recogitat annos suos in amaritudine animæ suæ ponderando peccatorum suorum gravitatem, multitudinem, fœditatem, amissionem æternæ beatitudinis, & æternæ damnationis incursum, cum proposito melioris vitæ, non esse verum & utilem dolorem, nec præparare ad gratiam, sed facere hominem hypocritam & magis peccatorem: demum illam esse dolorem coactum & non liberum, ac voluntarium; anathema sit.*

Ad secundum, respondeo 1. Neque Concilium definivit quæ sit materia essentialis sive Confirmationis, an Chrisma, aut manus impositio; sive Presbyteratus, an instrumentorum porrectio, aut sola manus impositio: quisve sit Sacramenti Matrimonii minister, an Sacerdos, an ipsi contrahentes.

2. Concilium definivit contritionem, quæ est dolor & detestatio peccati, cum proposito non peccandi de cætero, esse partialem Sacramenti materiam. Non attingit autem ex quo motivo dolor ille fluere debeat; quia, ut scribit Cædinalis Palavicinus lib. 12. cap. 10. *Theologorum mens erat, ut error Hæreticorum damnaretur . . . . non item ut ferrent sententiam de Scholastica quæstione, hujusmodi timor, non solum absque contritione animi perfecta (de quo controuer-*

*troverſia vix fuit, ſicut patebit) ſed etiam abſque eo quodd ullus excitetur amor imperſectus, ſufficiat ad peccatorum remiſſionem.*

Probatur 2. ex Theologis, qui vel Concilio interſuere, vel non ita poſt illud abſolutum ſcripſere. Hi quippe aut ſufficientiam attritionis ſine inchoato charitatis amore negant, aut pro ea ſiſtant, ut opinionem ſuam in praxi minimè tutam, utpote novam, aſſerant. Unde evidenter colligitur, quæſtionem, in qua verſamur, ſolutam non fuiſſe a Concilio. Igitur Palavicinus lib. 12. cap. 10. poſtquam plures appellavit, qui in Sacramento Pœnitentiæ neceſſitatem inchoatæ charitatis in Concilio propugnabant, concludit his verbis: *Aliquod dumtaxat veſtigium comperio opinionis negantis neceſſitatem amoris in iis, quæ Granatenſis diſputavit.*

Fredericus Nauſea Episcopus Vienneniſis in Austria, & Franciſcus Sonnius Antverpieniſis Episcopus è Concilio reduces pro neceſſitate inchoati Dei amoris ſcripſerunt; ille in Catechiſmo à ſe edito, ſic habet: *Nec eſt, ut abſque bujuſmodi contritione (quam ſupra dixerat eſſe converſionem à peccato ad Deum) Sacerdos quemquam verè poſſit abſolvere*; iſte Tractatu 4. de pœnitentia cap. 6. ſic loquitur: *ſi remiſſa, vel ſolo metu pœnæ evadendæ, eſt attritio non efficiens veram pœnitentiam, attamen ad illam præparans.*

Cardinalis Toletus è Societate Jeſu lib. 3. c. 4. editionis annò 1599. 1609. & 1610. *Prima quidem attritio, inquit, ſi talis ſit, ut cognoscat pœnitens ſe non deteſtari peccatum, ut eſt Dei offenſa, ſed tantum ut eſt alicujus mali cauſa, & pœnæ inferni, quamvis bonus actus ille ſit, tamen non ſufficit ad Sacramentum*; imò

qui sic accederet, peccaret denuò, & non impleret præceptum, sed esset repetendum. Laudavi de industria tres editiones, Antverpiæ & Colonia Agrippinæ excusas; quia aliæ circumferuntur adulteratæ.

Ex iis verò, qui pro sufficientia attritionis ex solo pœnarum metu conceptæ in Concilio pugnarunt, tres numerantur scilicet Dominicus Soto, Melchior Canus, & Andreas Vega. Hi post absolutam sessionem decimam quartam suam opinionem proponunt, ut minimè certam: sic enim scribit Soto in 4. dist. 18. q. 3. art. 2. *Accedit demum quoddam doctrina hæc de attritione, quæ in Sacramento fit contritio, licet sit vera, non est tamen ita multum vetus; Patres enim antiqui solam contritionem agnoscebant necessariam ad Confessionem. Revera eum, qui mihi diceret non se pœnitere propter Deum, absolvere non aude-rem.* Vega quoque lib. 13. in Concilium Trident. c. 33. argumento 1. *Attritio, inquit, sufficit ad dignè Sacramenta ista, Baptismum & Pœnitentiam, recipienda, & consequendam per ea gratiam, siquidem invincibiliter existimetur contritio, & non aliàs.* Quibus posterioribus verbis significat Auctor teneri pœnitentem eniti ad Dei amorem, & nisi probabili-ter crediderit se eo moveri, non debere absolvi. Melchior Canus part. 5. prælectione de pœnitentia sic loquitur: *Quoddam autem attritio sufficiat, quamvis verum sit, non est tamen adeo certum & indubitatum, & ideo Concilium Florentinum communisque sententia tenens certum, dimittens incertum, pœnit contritionem partem hujus Sacramenti.*

Suarez insignis Theologus è Societate Jesu, qui scripsit XVI. exeunte sæculo, in eandem, in quam Canus, abiit sententiam; sic enim mentem suam explicat tom. 4. in 3. part. q. 90. art. 4. disp.

15. sect. 14. nu. 17. *Licet sit probabilis opinio attritionem cognitam cum Sacramento sufficere ad justificationem, tamen non est certa, & potest esse falsa . . . hic autem est morale dubium: cum illa opinio nec valdè antiqua sit, nec multum communis.*

Paulus Comitulus ex eadem Societate in Responsis moralibus lib. 1. q. 32. Suaris vestigiis inhærens, ait, *plures magnique Theologi in pœnitente antequàm absolvatur, contritionem veram charitate formatam requirunt.*

Vasquez quoque in 2. 2. q. 19. art. 6. disp. 63. *Qui ad Sacramentum accedit cum sola attritione scita, licet non se exponat periculo efficiendi irritum Sacramentum (quod putat posse esse informe) exponit se tamen periculo frustrandi Sacramentum effectu suo, in quo non minor est irreverentia contra Religionem. Neque usque adeo certum est attritionem pœnitenti esse satis.*

His addere liceat Gamachæum nostrum Professorem Regium tom. 3. c. 8. de pœnitentia, ubi sic habet: *Etiam si agnoscamus Sacramentum Pœnitentiæ revera facere ex attritis contritos non tamen id omnino indubitatum, neque ex professo ab Ecclesia definitum. Ita communiter scribebant Theologi temporibus Concilii Trid. viciniore. Sed orta postmodum Casuistarum turba, opinio de sufficientia attritionis ex pœnarum metu conceptæ, tantum sibi arrogavit, ut ejus Patroni contra fidem Historiæ, quam verisimile est ipsos ignorasse, eam tanquam de fide tenendam, & à Concilio Trid. definitam, publicè asseruerint, & contra sentientes uti Catholicæ doctrinæ impugnatores prosciderint, non sine gravi Fidelium perturbatione, quam ut compimeret Summus Pontifex Alex. VII. Decretum edidit die 5. Maji anno 1667. in quo prohibet sub*

pœna excommunicationis latæ sententiæ, Apostolicæ Sedi reservatæ, ne qui quocunque gradu & dignitate etiam Episcopali fulgeant, *audeant aliqujus censuræ Theologicæ, alteriusve injuriæ aut contumeliæ noxa taxare alterutram sententiam, sive negantem necessitatem aliqualis dilectionis Dei in præfata attritione, ex metu gehennæ concepta, quæ hodie inter Scholasticos communior videtur; sive afferentem dictæ dilectionis necessitatem, donec ab hac sancta Sede fuerit aliquid hac in re definitum.*

Dixit Summus Pontifex priorem sententiam suo tempore visam fuisse communiorem, propter Casuistarum multitudinem, qui ea ætate contra constantem Antiquiorum traditionem ubique hanc propositionem obtrudebant: *Concilium Tridentinum adeo expressè definiuit attritionem, quæ non vivificet animam, quæque supponatur sine amore Dei esse, sufficere ad absolutionem, ut anathema pronuntiet adversus negantes.* Quam quidem propositionem primo perstrinxerant 46. Theologi Parisienses anno 1696. & postmodum, scilicet anno 1700. Clerus Gallicanus hisce verbis: *Hæc propositio falsa est, temeraria, Concilio Tridentino contraria, & in errorem inducit.*

#### §. IV.

*Utrum Attritio ex metu pœnarum concepta, sit sufficiens dispositio ad Sacramentum Pœnitentiæ?*

Quam in hacce Scholarum controversia amplectamur partem præscribunt Gallicani Antistites, quibus nos non obtemperare nefas; oves quippe Pastores audiunt & sequuntur; sic autem loquun-

loquuntur Pastores nostri in generalibus comitiis anni 1700. ubi de dilectione Dei in Pœnitentiæ Sacramento requisita ; *Ne quis putet in utroque Sacramento (Baptismi & Pœnitentiæ) securum se esse si præter fidei & spei actus non incipiat diligere Deum, tanquam omnis justitiæ fontem.* Et nonnullis interjectis pergunt, *placet etiam caveri à Sacramenti Pœnitentiæ ministris, ne in hoc Pœnitentiæ Sacramento aliisque Sacramentis conferendis sequantur opinionem probabilem, relicta tutiore, neve pœnitentes ipsorum fidei animam suam committentes admonere cessent, ut in pœnitendo inchoatæ saltem dilectionis Dei ineant viam, quæ sola secura sit, graviter peccaturi in hoc salutis discrimine, vel eo solo, quodd certis incerta præponant.* Quare juxta regulam hic nobis præscriptam ad propositam quæstionem,

R. Opinio asserens attritionem ex gehennæ metu conceptam, non sufficere in Sacramento, nisi includat initialem saltem charitatis amorem, sola secura est, & in praxi sequenda.

Probatur 1. argumento negativo ; quia neque Christus, neque Apostoli, neque Sancti Patres usquam dixerunt peccatorem solo pœnarum metu veniam consequi. Ergo gratis & absque ulla auctoritate illud asseritur.

Nec dicant Adversarii constare ex Scriptura & Traditione, peccata dimitti per Sacramenta Baptismi & Pœnitentiæ, quæ idcirco dicuntur Sacramenta mortuorum ; unde probabiliter colligitur præter fidem, spem & gehennæ timorem non requiri charitatem ad ea ritè suscipienda ; alioquin essent Sacramenta vivorum, supponerentque peccata dimissa ; cum quilibet actus charitatis deleat peccatum. Ne, inquam, hoc dicant ;

1. quia ex dictis §. 2. initialis actus charitatis per se peccatum expellere nequit. 2. quia Christus Sacramentorum auctor, Apostoli & Sancti Patres, qui eorum vim & efficaciam commendarunt, à pœnitentibus ad illa Sacramenta accedentibus eandem pœnitentiam, quam olim Prophetæ in veteri Lege, cujus Sacramenta erant egena & vacua, exegerunt, quæ scilicet esset ex toto corde ad Dominum conversio; verbis quippe Prophetarum mox referendis, exposuerunt Tertullianus, Sanctus Cyprianus, & alii Patres, quæ etiam in novo Testamento debeat esse peccatorum pœnitentia.

Probatur 2. positivè ex Scriptura veteris Testamenti Isaïæ 45. vers. 21. *Convertimini ad me & salvi eritis.* Ezechielis 18. v. 30. & 31. *Convertimini, & agite pœnitentiam ab omnibus iniquitatibus vestris, & non erit vobis in ruinam iniquitas, . . . & facite vobis cor novum & spiritum novum.* Joelis 2. v. 12. & 13. *Convertimini ad me in toto corde vestro, in jejunio, & in fletu, & in planctu, & scindite corda vestra.* Atqui timor gehennæ i. corda non convertit, ex S. August. lib. de natura & gratia cap. 57. ubi scribit, *sub lege est, qui timore supplicii, quod lex minatur, non amore justitiæ se sentit abstinere ab opere peccati, nondum liber, nec alienus à voluntate peccandi.* Similia habet S. Bern. epist. 11. de diligendo Deo in 3. *Est qui confitetur Domino quoniam potens est, & est qui confitetur Domino, quoniam sibi bonus est; & item qui confitetur quoniam simpliciter bonus est.* Primus servus est, & timet sibi; secundus mercenarius est, & cupit sibi; tertius filius est, & defert Patri. Itaque & qui timet, & qui cupit, uterque pro se agunt. Quamobrem *utro de illa dictum, lex Domini immaculata conver-*  
tens



tens animas, quodd scilicet illa sola sit, quæ ab amore sui & mundi avertere possit animum, & in Deum dirigere. Nec timor quippe, nec amor privatus convertit animam. Mutant interdum vultum vel actum, affectum nunquam. Facit quidem etiam servus nonnunquam opus Dei; sed quia non sponte, in sua adhuc duritia permanere convincitur. Facit & Mercenarius, sed quia non gratis, propria trahi cupiditate cognoscitur. . . . sit itaque servo sua lex timor ipse, quo constringitur. Sit mercenario sua cupiditas, qua & ipse arctatur. . . . sed harum nulla aut sine macula est, aut animas convertere potest. Charitas verò convertit animas quas facit & voluntarias. S. etiam Thomas 2. 2. qu. 19. art. 6. de timore sic habet: Timor servilis ex amore sui causatur; quia est timor pœnæ, quæ est detrimentum proprii boni: Ergo per timorem gehennæ peccator non convertitur ad Dominum; tanquam ad terminum ad quem, tendit conversio, ut loquitur Sanctus Thomas, cum in se ipso remaneat, tanquam in termino à quò, proprio commodo consulens. 2. neque etiam timor gehennæ cor novum & spiritum novum tribuit, ut qui pertineat ad legem veterem, & servos faciat, juxta illud Rom. 8. Non accepistis spiritum servitutis iterum in timore, sed accepistis spiritum adoptionis filiorum, qui sanè est amor charitatis. Unde S. August. lib. contra Adimantum cap. 17. Brevissima, inquit, & appertissima differentia duorum Testamentorum, timor & amor. Illud ad hominem veterem, hoc ad novum pertinet. Et S. Thomas 1. 2. q. 107. art. 1. ad 2. Omnes differentie, inquit, quæ assignantur inter legem novam & veterem, accipiuntur secundum perfectum & imperfectum; præcepta enim legis cujuslibet dantur de actibus virtutum. Ad operanda autem virtutum opera aliter inclinantur imperfecti ex aliqua

*causa extrinseca, putà ex comminatione pœnarum, & ideo lex vetus, quæ dabatur imperfectis, dicebatur lex timoris : in quantum inducebat ad observationem præceptorum per comminationem quarundam pœnarum . . . & propter hoc etiam lex vetus dicitur cohibere manum, non animum; quia qui timore pœnæ ab aliquo peccato abstinet : non simpliciter ejus voluntas à peccato recedit, sicut recedit voluntas ejus, qui amor justitiæ abstinet à peccato; & propter hoc lex nova quæ est lex amoris, dicitur animum cohibere. Porro lex vetus, utpote timoris, justitiam non contulit, ex Apostolo, Gal. 2. v. 16. ex operibus legis non justificabitur omnis caro. Et Heb. 7. v. 18. & 19. Reprobatio quidem sit præcedentis mandati propter infirmitatem ejus & inutilitatem; nihil enim ad perfectum adduxit lex.*

Non minùs luculenta novum Testamentum suppetit testimonia pro necessitate amoris Dei saltem initialis in attritione; Christus enim Joan. 14. v. 21. ait: *Qui . . . diligit me, diligetur à Patre meo, & ego diligam eum. Et vers. 23. si quis diligit me . . . ad eum veniemus, & mansionem apud eum faciemus.* En conditio, sine qua Pater & Filius ad peccatorem non venient, nempe si diligat. Quis verò Apostolorum aut Sanctorum Patrum, aut veterum Theologorum locum illum cum conditione disjunctiva intellexit, si diligat, vel si minimè diligens, Sacramentum percipiat, ad eum venient Pater & Filius? 1. Joan. 3. v. 14. *Qui non diligit manet in morte.* 1. Cor. 16. v. 22. *Si quis non amat Dominum nostrum Jesum Christum, sit anathema.* Quomodo ergo absolvendus, cui anathema dicendum.

Vis hujusce argumenti melius percipietur, & magis Lectorem afficiet proposito exemplo pœnitentis

tentis, qui dolet quòd proximum injustè læserit, sed simul candidè fatetur se nondum posse adduci, ut illum diligat. Detestor, inquit; hancce meam agendi rationem, utpote viro probo indignam, firmiterque propono, me nunquam illi injuriam illaturum, sed quòd amore benevolentiae & amicitiae illum diligam, supra me est, nec sentio me erga illum ita esse affectum. Porro si omnium judicio peccator ita dispositus non debet absolvi eo prætextu, quòd per Sacramentum ex attrito facturus sit contritus, quantò minùs qui timore gehennæ concussus, hoc est, amore proprii commodi detestatur omnem Dei offensam, cum spe veniæ dolet se peccasse, proponitque se deinceps non peccaturum, sed confitetur cor suum nullatenus moveri infinita Dei bonitate, necdum Creatorem suum posse diligere amore amicitiae?

Probatur 3. ex Patribus. S. Chrysostomus hom. 4. in 2. ad Cor. sic loquitur: *Quòd peccaveris ingemisce, non quòd pœnas daturus sis (nihil enim est hoc) sed quòd Deum tam benignum, tamque te amantem offenderis.*

S. Augustinus epist. 145. aliàs 144. *Ille timor pœnæ, inquit, tormentum habet, & non est in charitate. Tantum porrò quisque peccatum odit, quantum justitiam diligit. Lib. 2. contra adversarium legis c. 7. Desiderium peccandi non exstinguitur, nisi contrario desiderio rectè faciendi, ubi fides per dilectionem operatur, non per jubentem literam, timore pœnæ, sed per juvantem spiritum dilectione justitiæ. Sermon. 169. aliàs 15. de verbis Apostoli, c. 6. Quisquis fecerit quod lex jubet, non amando justitiam, sed timenda pœnam, facit quidem secundum justitiam, quæ ex lege est, homo sine querela,*  
non

*non furatur, non adulterat . . . non concupiscit rem proximi sui : potest hoc, potest fortassis : unde ? timore pœnæ. Quamquam qui timore pœnæ non concupiscit, puto quia concupiscit (nimirum timor cupiditatem comprimit, ne in actum erumpat, sed eam non tollit.)* Terrore ingenti armorum atque telorum etiam Leo revocatur à præda, & tamen Leo venit, Leo redit : prædam non rapuit, non malitiam posuit. Si talis es, adhuc iustitia est, qua iustitia tibi consulis ne torquearis. Quid magnum est pœnam timere ? Quis eam non timet ? Quis sceleratus ? quis nefarius ? Sed hoc interest inter timorem tuum, tinoremque latronis : quoddam latro timet leges hominum : & ideo facit latrocinium ; quia sperat se fallere leges hominum ; tu autem leges ejus times, quem fallere non potes. Nam si fallere posses, quid non fecisses ? Ergo & concupiscentiam tuam non amor tollit, sed timor premit. Ad ovile venit lupus ; latratu canum, & clamore pastorum ab ovili reversus est lupus : ipse tamen semper est lupus. In ovem vertatur. Facit enim & hoc Dominus, sed ipsa est iustitia ejus, non tua. Enarratione in Psal. 77. Ex corde nullo modo fieri potest, quod formidine sit pœnæ, non dilectione iustitiæ. Et in ser. de tempore 7. nunc in appendice 117. Pœnitentiam certam non facit, nisi odium peccati, & amor Dei.

S. Chrysologus sermon. 94. *Absolvi vis ? ama. Charitas operit multitudinem peccatorum.*

Sanctus Leo ser. 7. de jejuniis septimi mensis de dilectione Dei & proximi, sic loquitur : *Tanta est sub hujus geminæ charitatis edicto utriusque copula Testamenti, ut sine istarum connexionum virtutum, nec lex quemquam inveniat iustificasse, nec gratia.*

S. Gregorius lib. 12. Moral. cap. 22. accipiens in sensu tropologico quod scribitur 4 Reg. cap. 4. de

de mortuo puero , quam Giezi cum baculo Eli-  
fæi Prophetæ suscitare non potuit, sic scribit : *Is  
quem terroris virga suscitare non potuit , per amoris spi-  
ritum puer ad vitam rediit.*

Respondent Patroni oppositæ sententiæ ex  
ejusmodi Scripturæ & Patrum textibus , colligi  
dumtaxat necessarium esse ad veniam peccato-  
rum in Sacramento obtinendam , amorem Dei  
generatim sumptum , sed non definiri an amor ille  
debeat esse charitatis , aut spei & concupiscentiæ.  
Quin nonnulli eorum laudata Cleri Gallicani ver-  
ba ad amorem spei restringere conantur.

Contra 1. ex laudatis textibus timor pœnæ  
non sufficit ad remissionem peccatorum , ergo  
neque amor spei & concupiscentiæ : in timore  
quippe mali necessario intelligitur amor & concu-  
piscencia boni oppositi , nec quisquam timeret  
amittere quod possidere non concupisceret ; ma-  
jus ergo non est Deum concupiscere ut ultimum  
finem , quàm timere ne nos reprobet.

Contra 2. si laudati textus æquè de amore con-  
cupiscentiæ ac charitatis possunt intelligi , ex nul-  
lo Scripturæ textu , nequidem ex isto : *Diliges  
Dominum Deum tuum ex toto corde tuo*, Matth. cap.  
22. necessitas charitatis colligitur , cùm in adver-  
sarium mente Deum ex toto corde diligamus ,  
& ad illum convertamur æquò amore spei & cha-  
ritatis.

Contra 3. meridiana luce clarior est laudata  
Cleri Gallicani declaratio ; namque 1. conceptis  
verbis distinguit amorem charitatis ab amore spei ;  
*Ne quis putet*, inquiunt Antistites, *in utroque Sacra-  
mento securum se esse, si præter fidei & spei actus non  
incipiat diligere Deum.* 2. Cavent, ne Presbyteri in  
Sacra-

Sacramento Pœnitentiæ conferendo, consequantur opinionem probabilem de valore Sacramenti, relicta tutiore, declarant insuper opinionem, quæ in attritione requirit inchoatam saltem Dei dilectionem, solam esse securam. Hanc igitur opinionem probabilem & securam opponunt alteri opinioni probabili quidem, sed minimè tutæ. Quæro autem quæ sit illa de attritione opinio probabilis in eorum mente? An opinio de attritione naturali? At illam damnant, ut hæreticam; an attrito ex gehennæ metu sine ulla Dei dilectione, sine ullo ad Deum offensum respectu? at illam declarant temerariam, scandalosam, perniciosam, & inducentem in hæresim. Restat ergo, ut solam opinionem de attritione ex metu gehennæ, & ex amore spei concepta, agnoscant probabilem, sed minimè securam. Solam ergo securam cognoscunt, quæ requirit in attritione inchoatum charitatis amorem. Enimverò quis credat eos voluisse attritionem, quæ includit inchoatum charitatis amorem non esse securam, illam verò quæ concipitur ex amore concupiscentiæ tantum, solam esse tutam, & in praxi sequendam? 3. Docent non satis adimpleri posse utrique Sacramento necessarium vitæ novæ inchoandæ propositum, si pœnitens primi, ac maxime mandati, quo Deus toto corde diligitur, nullam curam gerat: *Nec sit saltem animo ita præparato, ut ad illud exequendum divina opitulante gratia, sese excitet ac provocet.* Quomodo verò præparatus erit animus ad exequendum primum mandatum, nisi illud diligit? neque enim latro censetur dispositus ad exequendum quod audit præceptum, *non furaberis*, nisi illud diligit: non diliget autem, quamdiu justitiam non amaverit.

verit. Ergo à pari ut quis sit paratus ad exequendum primum & maximum mandatum, diligit illud necesse est, sed illud non diligit; nisi Deum simul diligit; repugnat enim eum amare præceptum diligendi Deum & proximum amore benevolentiae, seu amicitiae, qui nec Deum nec proximum in se spectatos adhuc diligit. Sed de hoc argumento iterum. Denique si præjudicata adversariorum opinio tenebras offendit laudatæ declarationi, alioquin per se evidenti, adeant illius auctores, adhuc superest magno Ecclesiæ bono è duobus sacri illius cætus Præsidibus alter, scil. Eminentissimus Cardinalis *de Noailles*. Archiepiscopus Parisiensis, ex cujus ore didicimus eam fuisse Cleri Gallicani sententiam, quam hic exponimus. Id ipsum nobis, dum viveret, testificatus est Illustrissimus Carolus Mauritius *Le Tellier*, Archiepiscopus & Dux Remensis, qui unà cum laudato Eminentissimo Cardinali Comitibus præfuit.

Probatur 4. ex Theologis, qui usque ad XVII. sæculum floruerunt.

S. Thomas libro 4. contra gentes cap. 72. *Mens nostra*, inquit, debite ad Deum converti non potest sine charitate: charitas autem sine gratia haberi non potest, 3. part. quæst. 85. art. 5. recenset actus, quibus peccator disponitur ad justificationem. Primus actus est motus fidei. Secundus, motus timoris fervilis. Tertius est, motus spei, quo quis spe veniæ consequendæ assumit propositum emendandi. Quartus est, motus charitatis, quo alicui peccatum displicet secundum seipsum, & non jam propter supplicia. Et artic. 3. ad quartum, pœnitentia est cum fide Passionis Christi, per quam justificamur à peccato, & cum spe

*spe veniæ; & cum odio vitiorum, quod pertinet ad charitatem.*

S. Bonaventura in quartum dist. 17. qu. 4. ad quartum: *Ad illud, inquit, quod objicitur de attritione, dicendum quod nemo recipit effectum, nisi charitatem habeat, saltem in principio confessionis, vel in medio, vel in fine.*

Sanctus Bernardinus Senensis sermon. in feria tertia post Dominicam primam Quadragesimæ? *Qui conteritur, inquit, principaliter propter timorem inferni, & non propter amorem Dei, non est in statu salutis, quia non dolet amore Dei, sed amore sui.*

S. Antoninus 4. parte tit. 14. cap. 5. *Quia, inquit, timor servilis non est in charitate, ideo non sufficit ad salutem; & ideo pœnitentes, præcipue in gravibus infirmitatibus oportet admonere, ne ad pœnitendum & confitendum propter hujusmodi principaliter moveantur; nam inutilis esset sibi talis pœnitentia.*

Cæteros Theologos longum esset dinumerare præ eorum multitudine. Alii, quos magno numero appellavimus pag. 148. requirunt contritionem perfectam: alii, de quibus pag. 169. contendunt attritionem non distingui à contritione perfecta nisi accidentaliter, sicut calorem remissum à calore intenso, adeò ut contritio includat perfectum charitatis motum, attritio verò imperfectum, & hanc sententiam Cardinalis Palavicinus supra laudatus refert communiter obtinuisse in Concilio Tridentino. Quia ipsimet parentes & primi Patroni oppositæ sententiæ, Sotum intelligo, Canum, Vegam, Suarem, Vasquesium, & alios supra laudatos, pagina 181. fatentur suam sententiam esse novam, nec in praxi tutam. Hinc S. Carolus Borromæus in Instructionibus de Sacramento



mento Pœnitentiæ, monet Confessarium: *Antequam pœnitentiam imponat, & absolutionem tribuat pœnitenti; videbit an propter Deum veram peccatorum suorum contritionem habeat . . . . si verò talem contritionem illum non habere intellexerit: illius desiderium accendere conabitur, hæc admonens, propter Deum ipsum usque adeo, quantum potest, eum peccata dolere oportere, &c.*

Laudatis Theologis adjungere liceat sanctum Franciscum Salesium, qui libro 2. de amore Dei, postquam multis probavit eum, qui sola spe Deum ut summam suam beatitudinem concupiscit, amore sui & proprii commodi cupiditate accendi, sic refert cap. 19. *La repentance, qui ne rejette pas l'amour de Dieu, quoiqu'elle soit encore sans lui, est une bonne & desirable repentance, mais imparfaite, & qui ne peut nous donner le salut jusqu'à ce qu'elle ait atteint à l'amour, & qu'elle se soit melee avec lui; de sorte que comme le grand Apotre a dit que s'il donnoit son corps à bruler, & tous ses biens aux pauvres sans avoir la charité, cela lui seroit inutile. Aussi pouvons nous dire en verité, que quand notre penitence seroit si grande, que sa douleur fit fendre nos yeux en larmes, & fendre nos cœurs de regret; si nous n'avons le saint amour de Dieu, tout cela ne nous serviroit de rien pour la vie eternelle.*

Probatur 5. nonnullis rationibus.

Prima. Qui mandata Dei imprimisque primum ac maximum non diligit, is certè dispositus non est ad effectum Sacramenti, nec debet absolvi: atqui mandata Dei non potest diligere absque initiali charitatis amore: Ergo sine initiali charitatis amore, dispositus non est ad effectum Sacramenti, nec proinde debet absolvi.

Majorem, ut opinor, non negabunt oppositæ sententiæ Patroni: nullum enim ex iis hætenus reperi in examine à Synodo Tridentina præscripto ad tentandam Confessariorum peritiam, qui ita admitteret sufficientiam attritionis ex pœnarum metu conceptæ, ut assereret absolvendum pœnitentem hætenus ebriosum, impudicum, proximo infensum, qui candidè fateretur se nullatenus amare sobrietatem, castitatem, charitatem in proximum, sibi que videri jugum grave præcepta quæ de illis virtutibus data sunt: fixum tamen esse in animo se deinceps talia crimina non perpetraturum, cùm alioquin æternam damnationem, quam summè exhorret, vitare nequeat.

Enimvero pœnitens dici non debet, qui non deposuit perversam voluntatem: atqui perversa est illa voluntas & malè affecta, quæ non amat justa honesta; & debita; sicut enim bona voluntas aliud non est, quàm voluntaria propensio in ea, quæ sunt rectæ rationi consentanea, ita mala voluntas intelligi debet, quæ in ea quæ fides & recta ratio præscribunt, proprio pondere non fertur, sed impellatur necesse est vel metu pœnarum, vel spe remunerationis. Bonus quidem est ille timor, honestus quoque & laudabilis ille concupiscentiæ amor, ut probavimus Tract. de Spe: sed malum est & sanandum illud voluntatis fastidium, utpotè animi ægritudo. Quapropter Tridentini Patres ex Palavicino supra laudato pagina 173. censuerunt pœnitentes satis ad Baptismum non disponi per actus fidei, timoris judiciorum Dei, spei in ejus misericordia, & per odium peccati: sed in Decreto ista inseruere verba: *Incipient Deum diligere tanquam omnis justitiæ fontem, quam* singu-

singularem loquendi rationem operæpretium est ponderare, uti à Spiritu Sancto inspiratam.

Patres itaque Deum diligendum proponunt initiandis sive pœnitentibus, non præcisè, ut misericordem & proum ad parcendum: neque ut omnipotentem ad sanandum animæ vulnera: neque ut bonorum omnium, ac præsertim æternæ felicitatis auctorem: sic enim eum diligit quilibet fidelis etiam nequissimus, vult enim esse beatus & fide Catholica instructus, aliam beatitudinem post mortem non exoptat, quàm Dei possessionem. Cum ergo ejusmodi spei amor per se solum perversam voluntatem non corrigit, Tridentini Patres à pœnitentibus exigunt, ut ante Baptismum Deum diligere incipiant, tanquam omnis justitiæ fontem, qui enim Deum sic diligit, proculdubio ejus quoque mandata, & omnem, quam præcipiunt justitiam diligat necesse est, sicut eo præcisè quis expetit lumen, quò noctis pertæsus expetit Solis ortum, tanquam omnis luminis principium.

Ex hac explicatione probata manet argumenti nostri minor propositio, nempe mandata Dei, imprimisque primum ac maximum non posse diligi absque initiali charitatis amore; quia tota ratio amandi præceptum est res ipsa quæ præcipitur; repugnat quippe eum v. grat. delectabiliter audire: *Diliges proximum sicut te ipsum*, qui erga proximum non est bene affectus nec benevolus: atqui mandata Dei sunt de omnibus actibus virtutum: ergo qui ea diligit, hoc ipso intelligitur diligere omnem, quam præcipiunt, virtutem & justitiam. Porro ejusmodi dilectio charitas est, ex sanctis Augustino & Thoma supra laudatis.

Respond. Adversarii ex hoc argumento evincunt dumtaxat insufficientiam timoris gehennæ, non verò amoris concupiscentiæ in beatitudinem; experientia enim constat homines ex efficaci finis desiderio incitari ad amanda, & cum delectatione amplectenda, quæ ad illum assequendum conducunt. Annon artifex v. g. & mercenarius delectabiliter & cum amore necessarias perficiunt operas ad captandum lucrum, quod ut finem intendunt? Ergo à fortiori, cum ad vitam æternam non pateat ingressus, nisi per mandata, quisquis illam ut ultimum finem ex spe ardentè concupiscit, mandata quoque ex eodem affectu necessitate consequentiæ amat & desiderat.

Contra : ex S. Augustino in aliis Tractatibus sæpius laudato : *Quod amatur propter aliud, non illud amatur ; sed aliud propter quod amatur.* Quamvis æger medicinam quantumcunque amaram desideret, & magno pretio sibi comparet ; inde tamen constat illam non amare, sed solam sanitatem, quod sæpè conqueratur de Medico quasi plura, quàm necesse sit, remedia præscribat, & ubi obtenta, vel desperata est salus, omnem medicinam aversetur, ac prorsus abjiciat. Eodem planè modo se habent, qui mandata Dei servare proponunt ex solo vel pœnarum metu, vel æternæ felicitatis desiderio ; timent ne Confessarius extra fines mandati excurrat, & nonnulla, licèt proficua, absolutè tamen non necessaria imponat, atque ea de re aliquando cum illo disceptant, ac austeriorem pronuntiare non verentur. Ex quibus conficitur pœnitentes sic affectos non amare mandata propter se, atque adeò propriè justitiam non amare : *Quod enim non propter se amatur, non amatur*, inquit S. August. lib. I. Soliloquiorum.

Ut

Ut autem ampliùs pateat quàm inordinata & perversa sit animi illa dispositio, consulenda sunt dicta Tract. de Actibus humanis pag. 33. & 77. & sequentibus, ubi fusè demonstravimus mandata & justitiam quam præcipiunt, non esse pura media, quibus uti liceat sicut molestis Medicorum præceptis, ex necessitate finis dumtaxat expendendis; sed habere rationem finis simul & medii: medii quidem, quia ad vitam æternam adipiscendam inserviunt: finis etiam, quia sunt proprium creaturæ rationalis bonum, eam per se perficiunt, & eò nos feliciores reddunt, quò plenius diliguntur, juxta illud Matth. 5. *Beati qui esuriunt & sitiunt justitiam, quoniam ipsi saturabuntur*, nimirum perfecta Dei possessione, quæ nihil est aliud quàm plena veritatis, sapientiæ, charitatis, & omnis justitiæ fruitio; quid est enim Deus, nisi ipsa veritas, sapientia, charitas & omnis justitia? Ergo mandata Dei & justitia, quam præcipiunt, non sunt pura media ex se gravia, injucunda, & aliquando, sine scilicet obtento, abjicienda, sicut Medici præcepta & remedia; sed habent rationem finis, ac proinde sunt propter se desiderabilia super aurum, & lapidem pretiosum, ac per se dulciora super mel & favum, inquit Regius Psàltes.

Ergo voluntas, quæ virtutem fastidit, est malè affecta, & minùs disposita ad fructum Sacramenti percipiendum, novamque vitam inchoandam, juxta Concilii doctrinam. Enimverò nisi præoccupata sit justitiæ delectationibus, quomodo resistet carnis illecebris, mundi terroribus & tuavitatibus, si nullus sit in ea affectus ejusmodi tentationibus repugnans? Intensus, inquires,

spei & beatitudinis amor illas propulsabit : atqui graves tentationes mentem perturbant , & ultimi finis cogitationem avocant : *Fascinatio enim nugacitatis obscurat bona , & inconstantia concupiscentiæ transvertit sensum sine malitia.* Sap. 4. vers. 12. unde voluntas, nisi justitiæ illecebris fuerit delinita, præceps tanquam avis prospecta esca, in peccati laqueum inducitur. Centies illud mihi iterandum fuit, benemultis mirantibus, quomodo tam temere & inconsultò tentationibus in peccatum laberentur, cùm obfirmato adeo animo rectè & piè vivere decrevissent, nimirum fortis ut mors dilectio cordi non dominatur, domum vacantem invenit Satanas facilèque dispellit memoriam æternæ damnationis & felicitatis, quæ posset ei obsistere; quin etiamsi sit præsentissima, novit illam eludere, objiciendo scilicet futurum spatium pœnitendi, & promissam pœnitentibus veniam; & ita spem salutis æternæ, & timorem gehennæ conciliat cum momentaneo peccato. Sed exitialem illam compositionem horret vera justitiæ dilectio, incenditurque nedum extinguatur hujusmodi tentationibus. Ergo ut efficax sit in pœnitentibus propositum non peccandi præter timorem gehennæ & amorem spei, requiritur initialis timor & inchoata charitas, per quam mandata dulcescunt, & suavis efficitur cultus justitiæ, ut propter se appetatur.

Altera ratio suadet hancce initialis amoris necessitatem, scilicet ad jungendam cum aliquo amicitiam, præire debet amor benevolentiae, juxta vulgare axioma, *si vis amari, ama*, hoc est, incipe amare simili amore, quo amari desideras; amicitia quippe est amor reciprocus : amori au-  
tem

tem benevolentia non respondet amor concupiscentia, dispares sunt ac dissimiles duo illi amores : amore enim benevolentia quis bene vult dilecto, ac de ejus bono delectatur ; amore vero concupiscentia cupit sibi, & proprium dumtaxat commodum intendit. Nihil hic reciprocum, nihil simile amori optato offertur ; ideoque nullus amicitiam instituet cum eo, quem certo novit suis tantum rebus consulere, & omnia erga ipsum obsequia, ad suum privatum referre commodum : atqui Sacramentum pœnitentia institutum est ad restituendam cum Deo laesam amicitiam, per absolutionem charitatis, qua ex dictis est vera amicitia, diffunditur in cordibus pœnitentium. Ergo pœnitentes ad illud se disponere debent per initialem charitatis amorem.

Respondent Adversarii ex nostro decursu, colligi quidem amorem charitatis esse dispositionem proximam ad nectendam cum Deo amicitiam, sed in Sacramento satis esse, si pœnitens sit remote dispositus, alioquin frustra institutum videtur Sacramentum, nisi suppleat ultimum dispositionis gradum ; è quo forma seu effectus divelli nequit.

Contra, solus perfecta charitatis amor ultimo disponit ad instituendam cum Deo amicitiam : non agitur autem hic de perfecto ullo amore, sed de initiali & inchoato, qui respondeat benevolentia, qua Deus pravenit & alicui peccatorem, ut in amicitiam suam redeat. Atqui amor spei, utpotè privato commodo amantis unice consulens, nullatenus respondet Dei benevolentia : ergo non est sufficiens dispositio etiam cum Sacramento ad restituendam cum Deo amicitiam.

Tertia ratio. Qui lethaliter peccat, proculdubio violat Dei amicitiam, ac in primum maximum mandatum offendit. Quòd si longo tempore in peccati fordibus volutatus est, ut contingit peccantibus ex habitu, qui etiam sacrilegis confessionibus non rarò suis peccatis cumulum addidere, is sanè præceptum charitatis sæpessapiùs transgressus est, cùm ex dictis Tract. de Charitate præceptum illud sit speciale, obligetque ad eliciendos identidem divini amoris actus; quos omisit inveteratus ille peccator. Si igitur ultionis cupidus, priusquam absolvatur, debet odium deponere, & amorem concipere: si ebriosus, libidinosus, & reialienæ detentor, non censentur ad Sacramentum dispositi per timorem gehennæ & concupiscentiam æternæ beatitudinis, nisi prævios habitus per actus temperantiæ & justitiæ depellere conati fuerint; & ut in iis virtutum actibus exercent sese (nisi Confessarium prævenierint) differtur absolutio; qua ratione nullam curam gerent primi ac maximi mandati, quod toties ac tandiu transgressi sunt? Cur Confessario satis fuerit inquirere, num ex quo conversionem meditantur, temperatè vixerint, illatum proximo damnum repararint, cum ipso reconciliati sint, eumque diligere incipiant, nulla mentione facta dilectionis Dei, licèt ejus præceptum, utpotè longo tempore neglectum, actu eos urgeat? si cum recentiore quodam respondere pudet, quòd ejusmodi dilectio obstet, quominus effectus Sacramenti sequatur: *Quemadmodum*, inquit ille, *absurde certè faceret Meditus; qui ægroto præciperet, ut non susciperet medicamentum, nisi prius conatus esset absque medicamento morbum depellere; ex absurda*  
tamen



tamen illa sententia videntur agere, qui inter dispositiones percipiendo pœnitentiæ Sacramento consentaneas initialem Dei amorem recensere cavent, quamvis primum locum obtinere debeat, sitque tutissima via ad percipiendum Sacramenti fructum, ut mox patebit.

Quarta igitur ratio petitur ex communi SS. Patrum, & Ecclesiæ doctrina, quàm latius exposuimus Tractatu de Conscientia pagina 320. nempe graviter peccare eum, qui in rebus ad salutem animæ pertinentibus certis incerta præponit: *In his rebus, inquit sanctus Bernardus. ferm. de voluntate nostra subjicienda divinæ, in quibus nihil certi possumus invenire, nihil certum voluntas nostra definiat. Et cap. Juvenis, de sponsalibus, in his quæ dubia sunt, quod certius existimamus, tenere debemus.* Generale quoque Concilium Viennense cap. *Exivi*, de verborum significatione, sic statuit: *in his quæ salutem animæ respiciunt ad vitandos graves remorsus conscientia, pars securior est tenenda.*

Addit Clerus Gallicanus anno 1700. *Neque id Consilii, sed præcepti loco habeamus.* Denique Innocentius XI. anno 1679. & Clerus Gallicanus anno 1700. damnarunt hancce quorundam Modernorum propositionem: *Non est illicitum in sacramentis conferendis sequi opinionem probabilem de valore Sacramenti, relicta tutiore.* Atqui ex omnibus opinionibus circa sufficientiam attritionis, sola, quam hîc propugnamus, in praxi est tuta: ergo sola practicè est tenenda.

Minor probatur 1. ex Theologis, qui oppositam opinionem in Scholas invexerunt, Sotum intelligo, Vegam, Canum, & qui eos proximè secuti sunt, ut Suarez, Vasquez, Gamachæus, qui

omnes uno ore pronuntiant hujusmodi opinionem, quantumcunque ipsis videretur probabilior, non esse tamen in praxi securam; *In hoc casu*, inquit Vasquez in 1. 2. qu. 19. art. 6. disp. 63. *existimo neminem satisfacere huic obligationi charitatis, si sequatur opinionem probabilem, imò etiam probabiliorē minus tutam, cū potest tutam eligere.*

Probatur 2. ex Decreto Alexandri VII. supra laudato, quo Summus Pontifex prohibet sub pœna excommunicationis sententiæ latæ, ne quis alterutram ex oppositis opinionibus circa sufficientiam attritionis censura Ecclesiastica, sive Theologica perstringat. Unde sic conficitur argumentum: ex duabus sententiis contradictoriè oppositis necessariò una est vera, altera falsa; ergo cū liberum relinquat Summus Pontifex utramque in Scholis propugnare uti probabilem, incertum planè est utra ex iis sit vera aut falsa, an negans inchoatum charitatis amorem in attritione esse necessarium, an vero affirmans; ac proinde quamdiu manebit illud dubium, nec judicium suum Sedes Apostolica protulerit, inquirendum est utra ex duabus illis opinionibus probabilibus secura sit in praxi.

Atqui prima negans practicè teneri non potest absque æternæ damnationis periculo; potest enim esse falsa, & quidem probabiliter, cū opposita sit probabilis: affirmans verò licet possit esse falsa, cū pugnet contra alteram probabilem, nulli tamen periculo exponit; certum quippe est & indubitatum eum, qui cum initiali charitatis amore ad Sacramentum accedit, veniam peccatorum accipere, cū contra id non constet de eo, qui accedit sine illo inchoato amore.

At,

At, inquires, opinio negans necessitatem hujusce amoris, probabilior est affirmante.

Transeat, etiamsi nobis aliter videatur, quid inde? nempe, inquires, licet sequi opinionem probabiliorē. At supra negabat Vasquesius, quando probabilior opinio non est in praxi tuta, & nos etiam negavimus ubi de Conscientia. Sed & illud etiam concedamus, utpotè non pertinens ad præsentem quæstionem: inde solum concludi potest operantem ex probabiliori opinione, minimè tamen secura, non peccare; sed bona ejus fides non reddit Sacramentum validum in hypothesis probabiliter vera, quòd attritio ex inchoato charitatis amore concepta, sit essentialis Sacramenti materia, desitque in pœnitente; quemadmodum Eucharistiam non conficit, qui bona fide adhibet aquam, quam existimat vinum album. Ergo nostra opinio in praxi sola est tuta.

Probatur 3. eadem minor ex Clero Gallicano, qui conceptis verbis loco sæpius laudato, docet monendos pœnitentes: *Ut in pœnitendo inchoatè salutem dilectionis Dei ineant viam, quæ sola secura sit, graviter peccaturi in hoc salutis discrimine, vel eo solo quòd certis incerta præponant.*

Adversarii declarationem tam clarè expressam obscurare nituntur, & in suam sententiam detorquere; contendunt enim Galliæ Antistites unum velle dumtaxat, nimirum satis non esse ad consequendum Sacramenti effectum, ut pœnitentes gehennæ metu ducantur, nisi simul amore spei Deum diligant tanquam suum ultimum finem.

Sed quàm absurdè illud dicatur, patet, vel ex ipso contextu. Ibi quippe Pastores nostri declarant in Sacramentis conferendis, non esse sequendam

dam opinionem probabilem de valore Sacramenti, relicta tutiore: solam verò, quæ requirit inchoatam Dei dilectionem esse securam. Quod autem de charitatis dilectione loquantur, ex enumeratione opinionum probabilium de valore Sacramenti evidenter colligitur. Duæ, vel ad summum tres circumferuntur opiniones, tanquam probabiles de valore Sacramenti. Prima asserit attritionem ex solo pœnarum metu conceptam, sufficere ad Sacramentum. Secunda requirit insuper dilectionem Dei ex spe, & amore concupiscentiæ in beatitudinem. Tertia contendit inchoatæ saltem charitatis amorem ad valorem Sacramenti, esse necessarium. Has opiniones Summus Pontifex Alexander Septimus probabiles supponere videtur eo ipso, quo prohibet, ne ulla ex iis nota censoria configatur. Jam verò indicent Adversarii quam ex illis opinionibus probabilibus Clerus Gallicanus solam asserat securam. Primam certè non indigitabunt; secunda enim videtur ipsis secura, quin & securior. Quam igitur? fortè secundam? pro illa enim decertant ac jurant. Sed si secunda opinio, quæ asserit ad valorem Sacramenti necessariam esse, & sufficere attritionem ex amore spei conceptam, in mente Cleri Gallicani sola est secura, videant in quod absurdum se conjiciunt: si enim hæc opinio sola sit tuta & secura: ergo secundum eundem Clerum tutum non est, nec securum cum inchoatæ charitatis amore ad Sacramentum accedere, quo nihil absurdius fingi potest, nec contumeliosius dici in Ecclesiæ Gallicanæ Antistites. Ergo certo certius est Clerum Gallicanum non aliam opinionem declarasse securam, quàm quæ in attritione

tione requirit inchoatæ saltem charitatis dilectionem.

Nec dicas Præsules voluisse dumtaxat nullam opinionem de attritione, esse in praxi securam, nisi timori gehennæ addatur inchoata Dei dilectio ex quacunque tandem virtute, sive spei, sive charitatis nascatur; namque 1. conceptis verbis, *præter fidei & spei actus*, requirunt initialem Dei attritionem, & in argumentum assumunt ista Concilii Tridentini verba: *Incipiunt diligere Deum tanquam omnis justitiæ fontem.* Quæ verba ex Pálavino supra laudato, incerta sunt Decreto ad votum eorum, qui contendebant aliquem charitatis actum prærequiri ad Sacramentum. 2. In sententia Adversariorum, attritio non est sufficiens, nisi includat perfectiorem spei dilectionem, quam attritio, quæ concipitur ex solo gehennæ metu; atqui Clerus Gallicanus præscribit ut pœnitentes *inchoatæ saltem dilectionis Dei ineant viam, quæ sola secura sit*: Ergo doctrina Adversariorum non concordat cum doctrina Cleri Gallicani: nam juxta eorum interpretationem fatis est in mente Cleri Gallicani, ut attritio includat inchoatam spei dilectionem, quæ necessariò includitur in attritione, ex solo pœnarum metu concepta; nullus enim damnationem ex fide timeret, nisi beatitudinem supernaturalem saltem imperfectè & inchoatè diligeret, cum timor mali non oriatur, nisi ex amore boni oppositi: Ergo admissa ejusmodi interpretatione, Clerus Gallicanus statuit attritionem ex pœnarum metu tanquam viam, quæ sola secura sit. Sed dum iis immoramur, faciem admovemus ad conspiciendum Solem in meridie lucentem.

Quæ

Quæ hucusque diximus , non eò tendunt , ut damnemus opinionem nostræ oppositam. Absit enim , ut præveniamus iudicium Ecclesiæ , apud quam pendet lis nostra , aut ulterius progrediamur , quàm Pastores nostri , quibus satis fuit viam tutam ovibus suis præmonstrare , illibata probabilitate , quæ vulgò tribuitur mox recensitis opinionibus.

Doceant ergo Adversarii suam opinionem , & pro ea publicè decertent , sed ea lege quam statuerunt Illustrissimi Præsules , nimirum probabile esse , aut , quemadmodum ipsi volunt , probabilius amorem spei sufficere ad Sacramentum ; in praxi tamen doctrinam illam minimè esse securam. Sic docebant qui eam reconciliationis viam Patribus ignotam aperuere ; eorum verba & sententias supra laudavimus. Enim verò si graviter peccaret Medicus , qui ex præjudicata sua opinione temporalem ægroti salutem periculo exponeret per remedia incerta , cùm alii suggererent indubitata & præsentissima , quantò magis vituperandus est Theologus , qui ita propugnat attritionem sine inchoatæ charitatis amore in Sacramento sufficere , ut simul non moneat Discipulos vel auditores ejusmodi opinionem in praxi non esse tutam , sed æternæ damnationis periculo exponere ?

## CAPUT IX.

### De Confessione.

Quæ Confessionem spectant , ad quatuor capita revocabimus. 1. Dicemus de ejus notatione seu definitione. 2. De utilitate. 3. De neces-

necessitate. 4. De proprietatibus, seu conditionibus; quarum duæ sunt præcipuæ, nimirum integritas, & secreti sigillum.

## §. I.

*De notione, seu definitione Confessionis.*

Q. 1.<sup>a</sup> *Quid est Confessio?*

R. Est accusatio facta à pœnitente peccatorum propriorum à Baptismo commissorum, ad illorum absolutionem obtinendam à Sacerdote.

Dicitur 1. *Accusatio*, non mera declaratio, aut narratio, multo minus excusatio, vel ostentatio, ut in iis contingit, qui gloriantur cum malè fecerint, & malum dicunt bonum; sed est humilis agnitio propriæ culpæ, propter quam dolens quis, sese reum & pœna dignum confitetur, juxta illud Psal. 31. *Dixi, confitebor adversum me injustitiam meam.*

Dicitur 2. *Facta à pœnitente*; Quia ex dictis pag. 146. vera confessio ex dolore procedit; cui enim non displicent peccata, v. grat. superbia, avaritia, pigritia, vulgo falsam causam fingit, quod Regius Psalter à se deprecatur Psal. 140. *Ne declines*, inquit, *cor meum in verba malitiæ ad excusandas excusationes in peccatis.*

Dicitur 3. *peccatorum*, non tentationum & defectuum, quos ex humana fragilitate sine nostra negligentia patimur; ista enim non sunt materia absolutionis, ad quam Confessio ordinatur; sed consilii.

Dicitur 4. *propriorum*, non alienorum, nisi nostra culpa patrata sint; sed in illa hypothesi eva-

evadunt propria, putà ratione dati scandali, vel negligentia nostræ erga eos præsertim, qui subsunt curæ nostræ. De hujusmodi peccatis intelligitur illud Ps. 18. *Ab alienis parce servo tuo.*

Dicitur 5. à Baptismo commissorum. Quia peccata Baptismum præcedentia clavibus Ecclesiæ subijci nequeunt, ut supra diximus pag. 85.

Dicitur 6. ad absolutionem illorum obtinendam; Quia Sacramentum Pœnitentiæ celebratur per modum iudicii reconciliativi, non vindicativi: *Dixi, confitebor adversum me iniquitatem meam*, inquit supra Regius Psalter . . . . . *& tu remisisti impietatem peccati mei.*

Dicitur 7. à Sacerdote, scil. tanquam Dei Vicario. Unde Confessio Sacramentalis à Patribus vulgò dicitur Deo fieri; quia solus Deus remittit peccata per Ministrum suum.

Q. 2. *Confessio estne actus virtutis?*

R. Affirmativè; Quia in Scriptura laudantur qui agnoscunt & confitentur peccata, ut David 2. Reg. 12. Publicanus Luc. 18. Filius prodigus, Luc. 15. vituperantur verò qui ea abscondunt, Prov. 28. vers. 13. *Qui abscondit scelera sua, non dirigetur: qui autem confessus fuerit, & reliquerit ea, misericordiam consequetur.*

Q. 3. *Cujusnam virtutis actus est Confessio?*

R. 1. Est actus pœnitentiæ, ut patet ex ejus definitione mox allata; qui enim peccatum contra se confitetur, illud improbat: detestatur, coram persona læsa se dejicit, & satisfactionem ei exhibet: *Confessio satisfactionis consilium est*, dissimulatio contumaciæ, inquit Tertullianus, capite 8. de pœnitentia. 2. Est etiam actus Religionis, tum quia Sacramenta sunt cæremoniæ religiosæ, per-

tinentque



tinentque ad Dei cultum: tum maximè, quia confessio peccatorum est laus Dei speciosa in ore peccatoris, ut observat sanctus Augustinus in Psalmum 94. ubi sic habet: *Nunquid & hoc non pertinet ad laudem Dei, quando confiteris peccata tua? imò verò maximè pertinet . . . . quia cum peccata nostra cognoscimus, Dei gloriam commendamus.* Enimverò cum peccat quis, insurgit adversus Deum, mandata ejus graviora queritur ac rejicit: & cum peccatum suum defendit, & vanis excusationibus prætexit, cum Deo rixatur: at ubi adversum se confitetur, Dei legem honorat, justum confitetur ejus auctorem, illi se subjicit, & pro ipso stat contra seipsum; *Qui confitetur peccata sua*; inquit sanctus Augustinus, Tractatu 12. in Joannem, *jam cum Deo facit. Accusat Deus peccata tua, si & tu accusas, conjungeris Deo.* Et in Psalm. 95. expendens illa verba: *Confessio & pulchritudo in conspectu ejus*; ait: *Confessio hostia est Deo.* Ergo, o gentes, si vultis intrare in atria ejus, nolite vacuæ intrare, tollite hostias. *Quas hostias nobiscum deportabimus? Sacrificium Deo spiritus contribulatus, cor contritum & humiliatum Deus non spernit.* Et sanctus Bernardus epistola 113. *Cum mala tua confiteris, sacrificium est Deo spiritus contribulatus.*

## §. II.

*De utilitate Confessionis.*

Q. 1. *Estne utilis confessio peccatorum?*

R. Affirmant Patres Tridentini sessiōi.

14. c. 4. his verbis: *Ipsa verò hujusmodi confessionis difficultas, ac peccata detegendi verecundia, gravis quidem videri posset, nisi tot tantisque commodis, & consolationibus levaretur, &c.* Et Catechismus Romanus

D. Habert Theolog. Tom. VI.

O

par-

parte 2. de Confessione, §. 49. sic habet : *Constat, si Sacramentalem Confessionem è Christiana disciplina ex-meris, plena omnia occultis & nefandis sceleribus futura esse, quæ postea & alia etiam multò graviora, homines peccati consuetudine depravati, palàm committere non verébuntur. Etenim confitendi verecundia, delinquendi cupiditati, & licentiæ tanquam frænos injicit, & improbitatem coercet. Nec inficiantur Hæretici; illam enim ut utilem commendant, solùmque ejus necessitatem impugnant; Hinc sequitur, inquit Calvinus, libro 3. Institutionum capite 4. §. 7. ejusmodi confessionem liberam esse oportere, ut non ab omnibus exigatur; sed iis tantùm commendetur, qui ea se opus habere intelligent. Deinde nè ii ipsi, qui illa utuntur pro sua necessitate, ad enumeranda omnia peccata, vel præcepto cogantur, vel arte inducantur, sed quoad interesse sua putabunt, solidum consolationis fructum referant.*

Q. 2. *Quid utilitatis percipitur ex Sacramentali Confessione?*

R. 1. Si sit accurata, & fiat ut oportet, annexam habet promissionem remissionis peccatorum, 1. Joan. 1. 9. *Si confiteamur peccata nostra, fidelis est & justus, ut remittat nobis peccata nostra, & emundet nos ab omni iniquitate. Unde Tertullianus, libro de Pœnitentia cap. 9. & 10. Cùm igitur provolvit hominem, magis relevat; cùm squallidum facit, magis mundatum reddit; cùm accusat, excusat: cùm condemnat, absolvit. In quantum non peperceris tibi, in tantum tibi Deus, crede, parceret. Plerosque tamen hoc opus ut publicationem sui aut suffugere, aut de die in diem differre præsumo, pudoris magis memores, quàm salutis, velut illi, qui in partibus verecundioribus corporis contracta vexatione, conscientiam medentium vitant, & ita cum erubescencia sua pereunt. Et infra: Adeone existimatio homi-*

hominum, & Dei conscientia comparantur? an melius est damnatum latere, quàm palàm absolvi? Et S. Augustinus in Psalm. 66. Te accusa, illum glorifica: tereprebende, illum lauda: ut & ipse veniens inveniatur te punitorem tuum, & exhibeat tibi salvatorem tuum. .... quia ista confessio non ad supplicium ducit, sequitur & dicit, lætentur & exultent gentes. Si plangunt ante hominem confessi latrones, lætentur ante Deum confessi fideles. Si homo iudicet, exigit à latrone confessionem: tortor, & timor; & si victus dolore fuerit, profert ad mortem vocem suam. Nusquàm ergo lætus nusquam exultans; antequam confiteatur, exarat ungula: cum confessus fuerit, damnatum carnifex ducit. Miser ubique. Sed lætentur & exultent gentes. Unde? per ipsam confessionem. Quare? quia bonus est, cui confitentur: ad hoc exigit confessionem, ut liberet humilem; ad hoc damnat non confitentem, ut puniat superbum.

2. Confessio magnum animæ tribuit solatium & levamen. Ita sanctus Augustinus citato loco in Psal. sexagesimum sextum: Tristis esto, inquit, antequam confitearis: confessus exulta, jam sanaberis. Conscientiâ suâ saniem collegit, aposteina tumuerat, cruciebat te, requiescere non sinebat; adhibet Medicus fomenta verborum, & aliquando secat, adhibet medicinale ferrum in corruptione tribulationis: tu cognosce Medici manum, confitere; exeat in confessione, & defluat omnis sanies: jam exulta, jam lætare; quod reliquum est facile sanabitur; advocatum misit tibi (Deus) propter illum & per illum confitere; æge causam tuam, & defensor est pœnitentis; & petitor ventæ confitentis, & Juxda innocentis. Et S. Gregorius hom. 20. in Evangel. Quid est, inquit, peccatorum confessio, nisi quædam vulnerum ruptio? qui peccati virus salubriter aperitur in confessione, quod pestiferè latebat in mente.

Sed frustra immoramur in aliorum testimoniis colligendis, cùm mos ipsi quotidie experiamur quanta ex confessione nascatur animæ quies, in Deum fiducia, & justitiæ suavitas.

3. Confessio est medium efficax ad excutendas mentis tenebras, quas offundere solent amor sui, cupiditas, & communis aliorum agendi ratio; homines quippe magis ad morem vivunt, quàm ad rationem, aiebat olim Seneca, crimenque fit licitum, cùm incipit esse publicum, ut notat sanctus Cyprianus, & nos alibi demonstravimus homines vix aliter in infernum prolabi; quàm per peccata ignorantiae vincibilis. Immane autem illud periculum misericordia divina avertit per Sacramentalem Confessionem, in qua Confessarius instar periti Medici, qui ex iis quæ audit ab ægroto, colligit pestiferum latere morbum, & pessimè affecta viscera; prudens quippe Confessarius ex peccatis, quorum se conscium confitetur pœnitens, sæpè sæpiùs plura graviora detegit, putà injustos contractus, quos ille arbitrabatur licitos, lethalem negligentiam, cum qua munere suo defungitur, aliorum exemplo ductus & deceptus, atque ideo iterandas præcedentes Confessiones, utpote sacrilegas. Porro tot ac tanta animæ vulnèra, plerique fideles sine confessione, & prudentis Confessarii ope nunquam deprehenderent, multò minùs de necessariis remediis cogitarent, sicque è vita exirent impœnitentes in suppliciis experturi quod scriptum est, Prov. 16. vers. 25. *Est via, quæ videtur homini recta, & novissima ejus ducunt ad mortem.*

4. Confessio Sacramentalis plurimùm confert ad sananda animæ vulnèra, evellendos pravos habi-

habitus, & superandam moralem illam peccandi necessitatem, quam longa consuetudo induxit; ad id enim opus est perita manu Confessarii, & mordacibus remediis, quæ pœnitentes aut ignorant, aut si noverint, adhibere formidant nimium sui amantes. Quare sicut ægroti, etiam illi, qui artem medendi callent, aliorum peritiæ se tradunt, ab iisque se ligari patiuntur, ubi sectio, vel adustio est adhibenda: similiter pœnitentes necessariam sibi vim inferre aliquando piget, sed præceptis Confessarii constringendi sunt, ut ablata restituant, inimicitias deponant, cum læso fratre reconcilientur, proximas peccandi occasiones amputent, & propriis cupiditatibus, quæ par est animi fortitudine, obsistant. Hancce Confessionis efficaciam agnoscunt non solum Catholici, qui salutem suam plerumque deferunt consiliis, & remediis in Sacramentali Confessione perceptis; sed & ipsimet Heterodoxi, qui ex Ecclesia Catholica potius quam ex sua secta domesticos assumunt, rati usum Confessionis esse præsentissimum remedium contra vitia, quibus famuli sunt obnoxii. Imprimis memorabile est, quod Dominicus Soto in quartum distinction. 18. quæst. 1. artic. 1. dum in aula Caroli V. verfaretur, sub oculis suis contigisse scribit: *Ex inchyta*, inquit, *Noremberga civitate missa est ad Cæsarem legatio, per quam Cives illi petebant, ut Cæsar imperatoria jure Confessionem auricularem indiceret; agebant enim . . . Rempublicam suam, postquam Confessio cessaverat, vitiis contra justitiam, & alias virtutes scaturire, quæ illis antea fuerant incognita. Rursum tamen eadem legatio movit, &c.*

Addit Catechismus Romanus, vel ipsam ver-  
recundiam, quæ Confessionem comitatur, mul-  
tos à peccato detertere; qui enim recogitat illud  
ipsum flagitium, quod sub oculis alterius patrare  
non auderet, Sacerdoti fore manifestandum, ab  
illius illecebris facilius abstinet. Quæ cum ita  
sint, nemo Confessionis difficultatem obtendat,  
cum eam tot ac tanta commoda omnino elevent;  
quin lætentur & exultent omnes, ut monet san-  
ctus Augustinus de Confessione differens enarra-  
tione in Psalm 66. quod Deus nos adversus in-  
festantes nostræ salutis hostes tam firmo præsidio  
munierit, & sanandis vulneribus, quæ in quoti-  
diana pugna declinari difficile queunt, præsentissi-  
mum nobis remedium providerit.

### §. III.

#### *De necessitate Confessionis.*

Q. *Confessio Sacramentalis estne à Christo instituta, ac præcepta?*

Negarunt 8. sæculo nonnulli, quos Hæreseos  
accusat Alcuinus eorum cœtaneus. 4. Wiclefus  
asseruit Confessionem esse tantum instituti Eccle-  
siastici. Eandem sententiam amplexus est XV.  
sæculo Petrus de Osma, & ideo à Sixto IV. dam-  
natus. Idem quoque sensit XVI. sæculo B. Re-  
nanus in Annotat. ad lib. Tertulliani de pœnit. &  
Erasmus ad cap. 19. Actuum Apostol.

Lutherani, licet in Confessione Augustana  
agnoscant pœnitentiam tanquam Sacramentum à  
Christo institutum, & Lutherus ipse in minori  
Catechismo velit, ut à pœnitente omnia quorum  
consciis est, peccata lethalia privatim apud Evan-  
gelii

gelii Ministrum exponantur ; vulgò tamen affirmant Confessionem non esse à Christo præceptam, nec debere esse omnium ac singulorum peccatorum.

Calvinus ulteriùs progressus, non solùm negat Confessionem instituti divini, sed insuper usum illius damnat ut noxium & pestiferum ; sic enim habet libro 3. Institutionum, cap. 4. §. 7. *Miror qua fronte ausi sint contendere Confessionem, de qua loquuntur, juris esse divini : cuius equidem vetustissimum esse usum fatemur (nota) sed quem facillè evincere possumus, olim fuisse liberum.* Et paragrapho 19. *Nihil mirum, inquit, si auricularem illam Confessionem, rem adeo postilentem, totque nominibus Ecclesiæ noxiam damnamus, ac sublatam è medio cupimus.*

Verùm æquiores ejus Discipuli hujusmodi Confessionem, ut utilem ad erudiendum, & consolandum pœnitentem laudant; sed uno ore negant à Christo institutam, & necessariam ad remissionem peccatorum, quæ, ut ajunt, sola fide obtinetur. Atque ut invidiam à se amoveant, quod nulla hætenus Hæreticorum secta ausa fuerit hancce novitatem inducere, sed nonnulli dumtaxat privati statim ab omnibus explosi, gloriantur se parentes habere Waldenses, qui 12. sæculo schisma fecerunt, & ab iis successione continua per Hussitas descendere. Sed frustra; nam Waldenses constanter septem Ecclesiæ Sacramenta retinere usque ad decimum sextum sæculum, quo defecerunt ad Calvinianos. In eo dumtaxat circa Confessionem errabant, quòd satius esse existimarent peccata confiteri probo laico, quàm malo Sacerdoti, ut fusè probat Bossuetus Meldensis Episcopus libro 2. Variationum, ubi

etiam demonstrat Hussitas de Confessione rectè sensisse.

Contra Novatorum errores Patres Tridentini sic decernunt sess. 14. can. 6. *Si quis negaverit Confessionem Sacramentalem vel institutam, vel ad salutem necessariam esse jure divino: aut dixerit modum secretè confitendi soli Sacerdoti, quem Ecclesia Catholica ab initio semper observavit, alienum esse ab institutione & mandato Christi, & inventum esse humanum; anathema sit.* Et can. 7. *Si quis dixerit in Sacramento Pœnitentiæ ad remissionem peccatorum necessarium non esse jure divino confiteri omnia & singula peccata mortalia, quorum memoria cum debita & diligenti præmeditatione habeatur etiam occulta, & quæ sunt contra duo ultima Decalogi præcepta; & circumstantias, quæ peccati speciem mutant, sed eam Confessionem tantum esse utilem ad erudiendum & consolandam pœnitentem, & olim observatam fuisse tantum ad satisfactionem canonicam imponendam; aut dixerit eos, qui omnia peccata confiteri student, nihil relinquere velle divinæ misericordiæ ignoscendum; aut demum non licere confiteri peccata venialia; anathema sit.* Quare ad propositam quæstionem,

R. De fide est confessionem omnium & singulorum peccatorum lethalium esse à Christo Domino præceptam iis, qui post Baptismum prolapsi sunt.

Probatur 1. ex Scriptura. Joan. 20. v. 22. & 23. ubi Christus Sacramentum Pœnitentiæ instituens, Discipulos sic alloquitur. *Accipite spiritum sanctum, quorum remisistis peccata, remittuntur eis.* Quæ verba Patres Tridentini sess. 14. c. 5. sic exponunt: *Ex institutione Sacramenti Pœnitentiæ jam explicata, universa Ecclesia semper intellexit institutam etiam esse à Domino integram peccatorum confessionem,*



nem, & omnibus post Baptifinum lapsis jure divino necessariam exiftere; quia Dominus noster Jefus Chriftus è terris afcenfurus in cœlos, Sacerdotes fui ipfius Vicarios reliquit tanquam Præfides & Judices, ad quos omnia mortalia crimina deferantur, in quæ Chrifti fideles ceciderint; quò pro potestate clavium remiffionis aut retentionis peccatorum fententiam pronuntient. Cùm autem ejufmodi fententia prudenter ferri nequeat, nifi constituti à Chrifto Judices auditis peccatorum varietatibus noverint quis folvendus fit, quisve ligandus, fic pergunt laudati Patres: *Conftat enim Sacerdotes judicium hoc, incognita caufa exercere non potuiffe, neque æquitatem quidem illos in pœnis injungendis fervare potuiffe, fi in genere dumtaxat, & non potiùs in fpecie, ac figillatim fua peccata declaraffent.*

Probatur 2. ex univerfali & conftanti Ecclefie Traditione, namque ex S. Auguftino lib. 4. contra Donatiftas cap. 24. quod in Conciliis non invenitur institutum, fed femper, & ubique, & ab omnibus retentum eft, nonnifi auctoritate Apostolica traditum rectiffimè creditur: atqui Confeflio Sacramentalis, qualis nunc obfervatur in Ecclefia Catholica, non invenitur ab ullo Concilio instituta, fed femper, & ubique, & ab omnibus retenta eft: Ergo.

Majorem admittunt Adverfarii; fed minorem pernegant. Quare accuratius probanda eft ex testimoniis cujusque sæculi.

## EX I. SÆCULO.

Hic præmonendi funt Lectoros i. præter Apostolorum fcripta, pauca illius ævi monimenta nobis fuppeterè, & ex illis alia ab aliis in dubium

revocari, ut Epistolam S. Barnabæ; 2. Apostolos & eorum Discipulos, cùm præsertim incumberent convertendis infidelibus, iisque jam Catechumenis factis ad Baptismum præparandis, præcipuam eorum curam fuisse, ut contra Paganos & Judæos assererent veritatem Religionis Christianæ, & Baptismi virtutem, cujus occasione nonnulla interseruerunt de Confirmatione & Eucharistia, quæ simul cum Baptismo conferebantur. Unde non mirum quòd pauca de ritu Pœnitentiæ, & aliorum Sacramentorum in eorum Scriptis legantur. 3. Traditionem primi sæculi potissimum repetendam ex sæculis proximè sequentibus, in quibus Patres ex professo vel Hæreticorum errores speciatim infectati sunt, vel lapsos docuerunt pœnitentiæ ritum ac disciplinam. Quid enim Sanctus Irenæus v. g. & alii ejus coævi docere potuerunt, nisi quod à suis Magistris Apostolorum Discipulis didicerant? Ergo si quæ occurrat obscuritas in testimoniis, quæ hic proferimus ex primo sæculo, vera interpretatio ab iis accipienda est, qui ab Apostolorum Discipulis edocti sunt. Quibus præmissis proferuntur ex primo sæculo,

I. Liber Actuum Apostolorum cap. 19. v. 18. & 19. ubi sic legitur: *Multiq̃ue credentium veniebant confitentes & annuntiantes actus suos, multi autem ex iis, qui fuerant curiosa sectati, contulerunt libros, & combusserunt coram omnibus.* Hic laudantur credentes & jam initiati, qui non solum reos se confitentur, sed declarant actus suos utique occultos, alioquin non expectanda eorum declaratio, sed exigenda erat dumtaxat debita satisfactio.

2. S. Jacobus c. 5. suæ Epistolæ, postquam v. 14. & 15. commendavit usum Sacramenti Extremæ Unctionis, statim meminit Confessionis Sacramentalis, quam lapsi præmittere debent uti dispositionem necessariam; *Confitemini ergo*, inquit, *alterutrum peccata vestra, & orate pro invicem*. Particula, *ergo*, est nexus hujusce propositionis cum præcedente, quasi dicat; cum oratio Presbyterorum qui ungunt infirmum, sit tantæ virtutis, modò infirmus obicem non ponat, *Confitemini ergo alterutrum peccata vestra*, hoc est, homines hominibus ad ministerium ordinatis, nempe Presbyteris, non verò Presbyteri infirmis, & *orate pro invicem*, id est, non pigeat orare pro alleviatione, & æterna salute fratris infirmi.

3. S. Barnabas in sua Epistola, quam plures Theologi multis argumentis genuinam demonstrant, scribit num. 12. *Confitemini peccata vestra*. Et Sanctus Clemens Apostoli Discipulus in sua Epistola ad Corinthios 2. sic habet: *Dum vivimus; ex toto corde nostro convertamur ad Dominum . . . postquam enim ex hoc mundo egressi fuerimus, nec confiteri peccata, nec pœnitentiam agere poterimus*.

Atqui post mortem Domino confiteri poterimus, Sacerdoti verò minimè: ergo S. Clemens, & alii primi sæculi Patres, necessariam peccatorum confessionem crediderunt.

## EX II. SÆCULO.

1. Sanctus Irenæus, qui Magistrum habuit Sanctum Polycarpum, beati Joannis Evangelistæ discipulum, lib. 1. cap. de Marco hæretico & præsti-

stigiatore, ac plurimis mulierculis ab eo corruptis, sic refert: *Hæ sapiissimè conversæ ad Ecclesiam Dei confesse sunt, & secundùm corpus exterminatas ab eo, & cupidine inflammatas valdè se illum dilexisse.* Hæc postrema verba denotant peccatum intus in corde latens. Et lib. 3. c. 4. de Cerdone modò latenter docente, modò exomologesim faciente, mentionem habet. Frustra opponit Dallæus hujusmodi confessionem factam coram Ecclesia, nec proinde S. Martyrem loqui de Confessione auriculari; quòd enim confessio à Christo instituta fiat publicè vel secretò, non pertinet ad substantiam præcepti, sed ad meram Ecclesiæ disciplinam, ut suo loco dicetur.

2. Montanistæ eodem sæculo exortì, licèt contumaciter contenderent Ecclesiam non habere potestatem remittendorum peccatorum, nisi levium, cum Catholicis tamen in eo consentiebant, quòd graviora æquè ac leviora peccata Confessionis essent obnoxia, ut lapsi debitæ satisfactionis modum à Sacerdotibus acciperent, veniam quidem pro gravioribus à solo Deo expectaturi: pro levioribus verò per clavium ministerium accepturi. Ex quo evidenter sequitur tunc temporis unam fuisse fidem, non solum apud Catholicos, sed etiam apud Hæreticos, confessionem omnium & singulorum peccatorum, æque necessariam esse ad pœnitentiam.

3. Tertullianus lib. de pœnitentia cap. 9. *Is actus, inquit, qui magis græco vocabulo exprimitur & frequentatur, exomologesis est, qua delictum Domino nostrum confitemur, non quidem ut ignaro, sed quatenus satisfactio confessione disponitur, confessione pœnitentia nascitur,*

*scitur, pœnitentia Deus mitigatur. Quodd autem Confessio Deo facta sit eadem, quæ sit Sacerdotibus vices Dei gerentibus, aperit cap. sequenti, ubi sic habet: Plerosque tamen hoc opus ut publicationem sui aut suffugere, aut de die in diem differre præsumo pudoris magis memores, quàm salutis, velut illi, qui in partibus verecundioribus corporis contracta vexatione conscientiam medentium vitant, & ita cum erubescencia sua pereunt. Nihil clarius pro necessaria peccatorum etiam occultorum confessione.*

## EX III. SÆCULO.

I. Origenes hom. 2. in Psal. 17. Oportet, inquit, peccatum non celare intrinsecus: fortasse enim sicut ii, qui habent intus inclusam escam indigestam, aut hianoris, aut phlegmatis stomacho graviter & molestè imminentia, si vomuerint, relevantur; ii ita qui peccaverunt, siquidem occultant & retinent intra se peccatum, intrinsecus urgentur, & propemodum suffocantur à phlegmate & humore peccati: si autem sui accusator fiat, dum accusat semetipsum, & confitetur, simul evomit & delictum, atque omnem morbi digerit causam. Tantummodo circumspice diligentius cui debeas peccatum confiteri, proba prius Medicum, cui debeas causam languoris exponere . . . ita ut demum si intellexerit, crediderit talem esse languorem tuum, qui in conventu totius Ecclesiæ exponi debeat & curari, ex quo fortassis & cæteri edificari poterunt, & tu ipse facile sanari, &c. Et hom. 2. in Leviticum: Si peccaverimus, debemus dicere: peccatum meum notum tibi feci, & iniquitatem meam non abscondi; Si enim hoc fecerimus, & revelaverimus peccata nostra non solum Deo, sed etiam his, qui possunt mederi peccatis debebuntur peccata nostra.

2. S. Cyprianus circa medium hoc sæculum sermone de lapsis, eos, qui nefandis sacrificiis contaminati fuerant, ad solemnem pœnitentiam urget illorum exemplo, *Qui quamvis nullo sacrificii aut libelli facinore constricti, quoniam tamen hoc cogitaverunt, hoc ipsum apud Sacerdotes Dei dolenter & suppliciter confitentes exomologesim conscientiae faciunt, animi sui pondus exponunt, salutarem medicinam parvis licet & modicis vulneribus exquirunt.* En usum Confessionis peccatorum occultorum: ejus autem necessitatem S. Martyr probat verbis sequentibus; *Scientes, inquit, scriptum esse, Deus non deridetur. Plus imò delinquit, qui secundum hominem Deum cogitans evadere se pœnam credit, si non palam crimen admisit.*

3. Ætate S. Cypriani eruperunt Novatiani, qui Montanistarum instar peccata duplicis generis distinguebant, quorum alia per Ecclesiam remitti possent: alia non ita, nempe graviora, ut idololatria, homicidium & mœchia; ea tamen omnia Præpositis Ecclesiæ exponenda præcipiebant, ut pro cujusque delicti gravitate pœnas decernerent. Sed prætereundum non est quod scribunt Socrates lib. 5. cap. 19. & Sozomenus lib. 7. cap. 16. occasione Novatianorum adversus Ecclesiam insurgentium, institutum Presbyterum Pœnitentiarium, cui omnes peccata sua etiam occulta confiteri tenerentur, ut ab eo acciperent satisfactionis modum, & discerent quænam publice, quæ verò occulte essent expianda.

## EX IV. SÆCULO.

1. Sanctus Basilius in regulis brevioribus interrogatione 228. *Necessario, inquit, peccata aperiri debent,*

debent, quibus credita est dispensatio mysteriorum Dei.

2. Sanctus Gregorius Nyssenus frater Sancti Basilii Epistola canonica ad Leotium, non tantum publicos, sed etiam occultos fures Sacerdotum judicio subjicit, nec aliter curari eos posse significat. *Qui enim clam alienum usurpat, inquit can. 6. si per confessionem peccatum Sacerdoti aperuerit, vitii studio in contrarium mutato, ægritudinem animi mutabit.* Nec obstat quòd Sanctus Doctor ibidem testetur avaritiæ crimina esse à Patribus prætermissa; vult enim dumtaxat pro ejusmodi criminibus pœnas non fuisse à Canonibus præfixas & determinatas; sed, ut ait, *id esse Præfulibus relinquendum, qui id publico doctrinæ sermonè suis in Ecclesiis definiant.* Et sermone adversus eos, qui alios acerbius judicant, sic loquitur: *Afflictionis socium sume Sacerdotem ut patrem. Quamobrem tibi in eo major fiducia sit, qui te in Deo genuit, quam in iis, à quibus corpore procreatus es; audacter ostende illi quæ sunt recondita, animi arcana tanquam occulta vulnera Medico detege.* Ne quis autem putet hoc esse consilium, non præceptum, sic pergit: *Incertus est terminus vitæ, discessum à vita diligentia prævertamus. Absurdum est enim cum illi, qui corporis valetudinis rationem habent, seipsos expurgent ante Caniculæ exortum, ne quod humoris in illis est, vehementi ipsius ardori corriamatur; eos qui animæ curam gerunt, incertam mortis diem non antevertere.*

3. S. Pacianus in Orat. paræn. ad pœnitentiam: *Rogo vos, fratres, inquit, etiam pro periculo meo per illum Dominum, quem occulta non fallunt, desinite vulneratam tegere conscientiam, prudentes ægri Medicos non verentur, ne in occultis quidem corporum parti-*  
bus

*bus seraturos . . . & peccator erubescet perpetuam vitam præteriti pudoris mercari? An sic illi melius est perire?*

4. Paulinus Diaconus in vita Sancti Ambrosii ad Sanctum Augustinum num. 39. *Quotiescunque, inquit, aliquis ex illis lapsus suos confessus erat, ita flebat, ut vel illum flere compelleret. Videbatur enim sibi cum jacente jacere: causas autem criminum, quas illi confitebantur, nulli nisi Domino soli, apud quem interdicebat, loquebatur. Quodd autem Paulinus crederet peccatori necessariam esse ejusmodi Confessionem, aperit his verbis: Ipse si accusator est, nec expectat accusatorem, sed prævenit; ut confitendo suum allevet ipse delictum, nec habeat quod adversarius criminetur, dans honorem Deo, cui nuda sunt omnia, & qui vult vitam magis peccatoris, quam mortem.*

5. Sozomenus lib. 7. Historiæ c. 16. sic habet: *Cum in nullo penitus peccare diviniore naturæ sit, & humana perfectioris . . . cùmque in petenda venia peccatum necessariò confiteri oporteat; grave & molestum ab initio jure & merito visum est Sacerdotibus tanquam in theatro, circumstante totius Ecclesiæ multitudine crimina sua evulgare. Itaque ex Presbyteris aliquem, qui vitæ integritate spectatissimus, & taciturnitate & prudentia polleret, huic officio præfecerunt, ad quem accedentes ii qui deliquerant, actus suos confitebantur: ille verò pro cujusque delicto quid aut facere singulos, aut luere oportet pœnæ loco indicens, absolvebat confitentes à se ipsis pœnas criminum exacturos. Verum Novatianis quidem, qui nullam rationem habent pœnitentiæ, nihil hac re opus fuit, apud reliquas autem sectas hic mos etiamnum perseverat, & in Occidentalibus Ecclesiis, ac præcipuè in Ecclesia Romana studiosè observatur. Similia refert Socrates Sozomeni coævus lib. 5. cap. 19.*



Calvinus l. 3. Institutionum cap. 4. fatetur usum Confessionis esse quidem in Ecclesia perantiquum, sed ex laudatis Historicis colligit eam non esse juris divini; sic enim pergit Sozomenus: *In Constantinopolitana Ecclesia certus Presbyter constitutus erat, qui pœnitentibus præesset, donec matrona quædam nobilis ob peccata quæ confessa erat, iussa à Presbytero jejungere, ac Deum suppliciter exorare: dum hujus rei causa in Ecclesia moraretur, à Diacono se stupratam esse prodidit, quo prodito, plebs omnis vehementer succensuit. Nectarius verò (Constantinopolitanus Episcopus) eum qui stuprum admiserat, Diaconatus extulit; cùmque nonnulli consilium ei dedissent, ut unicuique prout sibi conscius esset, ac fiduciam sibi haberet ad sacrorum Mysteriorum communionem accedendi potestatem faceret, Presbyterum, qui agende pœnitentiæ præpositus erat, abolevit, atque ex eo tempore id firmum ac stabile permansit, vetustate eique adjuncta gravitate & severitate jam tum, ut opinor in laxam ac dissolutam vivendi rationem paulatim delapsa. Nam antea, ut quidem existimo, minora erant peccata, tum ob verecundiam eorum, qui sua ipsi delicta enuntiabant, tum ob severitatem Judicum, qui ad id erant constituti; omnes enim ferè Episcopos Nectarii exemplum fuisse secutos scribit idem Historicus. Unde Calvinus citato loco adversus Theologos non confitenter modò, sed etiam contumeliosè insurgens, ait: *Hic hic aures asini isti arrigant.**

Sed Dallæus Magistro suo æquior in hac parte ab ipso discedit, negatque lib. 4. c. 24. & 32. Nectarium Confessionem auricularem sustulisse, quam ab Innocentio III. in Concilio Lateranensi octingentos post annos fingit inductam ac præscriptam. Quin multis probat nequidem pœni-

tentiam publicam tum fuisse abolitam, cum post Nectarium Constantinopoli & ubique obtinuerit.

Quid ergo Nectarius sustulit? Presbyterum pœnitentiarium tertio dumtaxat sæculo institutum; sic enim scribit Socrates: *Eudæmon Ecclesiæ Presbyter Episcopo Nectario suavit; ut pœnitentiarium quidem Presbyterum expungeret.* Et Sozomenus: *Nectarius, inquit, Constantinopolitanus Episcopus Presbyterum illum qui præpositus erat pœnitentibus, primus ex Ecclesia sustulit.* Nectarius igitur disciplinam Ecclesiæ in agenda pœnitentia ad eundem ordinem revocavit, quo ante Novatianorum schisma administrabatur, permisitque ut unusquisque sicut prius pro arbitrio, & pro animi sui conscientia, ut loquitur Socrates; ad Sacramentorum communionem accederet, hoc est, seipsum probaret; & si conscius se alicujus criminis agnosceret, quem mallet, Sacerdotem adiret, quemadmodum primis sæculis usque ad Novatiani ætatem factitatum fuerat, & nunc etiam observatur.

Merito autem conqueruntur Socrates & Sozomenus hocce Nectarii consilio labefactatam fuisse Ecclesiæ disciplinam; namque Pœnitentiarium ille non ea tantum peccata pœnitentiæ publicæ obnoxia, (pro iis quippe institutus erat, quemadmodum nunc in Ecclesiis Cathedralibus Pœnitentiarium pro peccatis reservatis) quæ sibi ultro deferebantur à pœnitentibus excipiebat, sed audiebat delationes, adversus obstinatos admovebat testes, urgebat desides, invigilabatque, ne indigni ad sacra Mysteria obreperent; ex peccatis quædam atrociora & publica secernebat, quæ palam ac publicè in solemnibus Ecclesiæ conventu ab ipso pœnitente evulgari imperabat. Quis verò

verò non intelligat amoto illo Pœnitentiarii Tribunali, elanguisse disciplinam, ac præsertim usum pœnitentiæ publicæ, cùm deinceps ei fortè non fuerint subiecti, nisi qui aut eam sponte expeterent, aut insigne aliud crimen cum aliorum offensione admisissent.

6. S. Chrysostomus Nectarii in Sede Constantinopolitana successor, cujus auctoritate potissimum gloriantur Novatores, pluribus in locis confirmat Nectarium non abrogasse confessionem secretam simul cum Presbytero Pœnitentiariorum; sic enim scribit lib. 2. de Sacerdotio cap. 3. *Nil eorum relinquendum est, quod probè non excutiat, atque examinet Episcopus, quin omnia studiosè perscrutatum, tum demum oportet illum sua remedia congruè accommodatèque asserre: quod autem ejusmodi examen coram Sacerdote necessarium sit necessitate medii & præcepti divini aperit lib. 2. Insania manifesta est, inquit, despiciere tantum principatum, sine quo nec salutis, nec promissorum bonorum compotes esse possumus.* Homil. de Muliere Samaritana tom. 6. *Imitetur, inquit, hanc mulierem Samaritanam, & ob propria peccata non erubescamus, sed Deum timeamus... qui enim homini detegere peccata erubescit, Deo verò cernente facere non erubescit, neque confiteri vult, neque pœnitentiam agere; in die illa non uno aut duobus, sed universo orbe spectante traducetur.* Et hom. 9. in epistola ad Hebræos sic loquitur: *Cujusmodi ergo est medicamentum pœnitentiæ, & quomodo conficitur? primò ex peccatorum suorum condemnatione & declaratione.* Declarationem autem illam debere fieri coram Sacerdote indicat, cum addit quod oporteat se in Sacerdotes ut convenit gerere. Et ne fortè generalem quandam confessionem tantum postulare vi-

deatur, districtè, ac sigillatim peccata esse exponenda præscribit : *Sin autem dicit, sum peccator, inquit, ea autem per species non cogitat ac supputat, & non dicit, hoc & illud peccatum admisit, nunquam cessabit, semper quidem confitens, nullam autem curam gerens correctionis.* Denique hom. 30. in Genesim, quam habuit in majori Hebdomada, *In magnam banc Hebdomadam pervenimus Deigratia, inquit, nunc maximè & jejunii cursus intendendus, & magis continuandæ sunt preces, faciendaque diligens & pura peccatorum Confessio.* Nihil omnino desideratur in hisce Sancti Chrysostomi testimoniis pro Confessione Sacramentali : testatur enim peccatorum confessionem, 1. faciendam esse Deo, & Sacerdoti. 2. eam debere esse singulorum peccatorum. 3. esse ad salutem necessariam.

Objicit tamen Dallæus, 1. homiliam 21. ad populum Antiochenum, in qua Sanctus Chrysostomus sic habet : *Nec cogit (Deus) in medium procedentes, quæ peccavimus enumerare, sed sibi soli rationem reddere jubet : & sibi confiteri.* Ad quem locum sic exclamat Dallæus : *Nihil disertius adversus necessariam istorum confessionem dici potuit.*

Distinguo, non cogit accedentes ad Baptismum, Concedo : accedentes ad Sacramentum pœnitentiæ, Nego. Quòd autem S. Doctor Catechumenos alloquatur, patet, tum ex ipso tit. qui huic homiliæ sic præfixus est *Catechesis ad illuminandos* : tum ex contextu sermonis : *prius dixi, inquit, & nunc dico, & dicere non desinam, si quis morum vitia non correxit . . . . ut baptizetur.* Unde vides quàm mala fide locus ille doctrinæ Catholicæ opponatur.

Objicit 2. S. Chrysostomus hom. 5. de incompre-

prehensibili Dei natura, negat necessum esse peccata post Baptismum commissa, Sacerdoti confiteri; sic enim habet: *Non enim in theatrum conservorum tuorum duco, non hominibus peccata tua confiteri cogo, expende coram Deo conscientiam tuam, ipsi ostende vulnera, & pete à Deo medicamentum; ostende ei qui non exprobet, sed humanissime curet; licet enim taceas, cuncta optime ille novit: dic, ut fructum capias: dic, ut depositis hic maculis tuis, abeas illuc mundus, & sine ulla dedecore, & intolerabili promulgatione illa delictorum tuorum libereris.* Et hom. 4. de Lazaro: *Cur igitur te quaeso, pudefcis, & erubescis dicere peccata tua; non enim homini dicis; ut te probro afficiat. Num enim conservo confiteris, ut in publicum proferat? . . . non inquam, cogo te in medium prodire theatrum, ac multos adhibere testes: mihi soli dic peccatum privatum, ut sanem ulcus, teque dolore liberem.* Ergo necessum non est confiteri peccata Sacerdoti.

Distinguo consequens, Sacerdoti confiteri publice, Concedo: privatim, Nego consequ. patet enim, tum ex dictis, tum ex dicendis, ejusmodi Confessionem secretam, dici à Patribus fieri Deo, & non homini. Suadent autem Sanctum Chrysostomum ea mente fuisse locutum, 1. ejus testimonia in confirmationem doctrinae Catholicae à nobis laudata: alioquin sibi ipsi contradiceret; 2. ipse contextus verborum, quæ hic nobis opponuntur: *Non theatrum conservorum tuorum duco: non hominibus peccata tua confiteri cogo; non enim homini dicis, ut te probro afficiat, ut in publicum proferat; non inquam, cogo te in medium prodire theatrum, ac multos adhibere testes.*

Instat Dallæus. Atqui Sanctus Chrysostomus negat pluribus in locis, necessum esse privatim

confiteri Sacerdotibus, ferm. 58. Tom. 5. *Neque necessarium est, inquit, testibus præsentibus confiteri, apud conscientie rationem fiat inquisitio delictorum, sine testibus sit judicium, Deus qui peccatum non exprobrat, sed confessione delet.* Hom. 9. de Pœnitentia, *Deo soli dic peccatum tuum, & dimittitur.* In Psalm. 50. *Peccata tua ipse commemora, ut deleas. At pudet te peccata tua confiteri? dic ea quotidie in oratione.* Num enim dico ut ea conservo exponas, qui te probris impetat? *Dic Deo, qui iis medetur.* Et infra. *Dic cordi tuo, atque animæ tuæ, exegimus hodiernam diem, o anima, quid boni fecimus, aut quid mali admisimus, ac gebennæ recordare, ut metu affectus bonum augeas, malum autem de medio tollas.* Si in lecto sis, atque tibi peccata tua in memoriam venerint, collacryma, atque hac ratione in lecto delere potes. *Deum tuum roga atque obsecra, sicque corpus somno trade posteaquam prius confessus peccata fueris.* Hom. 68. tom. 5. *Dic Deo peccavi. Quis hic labor est, quis circuitus, quæ fatigatio, quæ angustia verbum hoc proferre: peccavi? . . . nihil aliud abs te, nisi solam istud exigo.* Similia habet hom. 31. in epist. ad Heb. & alibi passim.

Distinguo subsumptum, negat necessum esse privatim Sacerdotibus confiteri ad peccata delenda, Concedo: ad præcepta Dei implenda, Nego subsumptum. Enimverò, an quia Pastor docet in Ecclesia Deum ita esse benignum, ut veniam statim concedat iis omnibus qui peccata sua corde perfectè contrito agnoverit; continuò eos absolvit ab omnibus præceptis, puta colendi parentes, eleemosynam pauperibus erogandi, peccata confitendi, &c.? Totus igitur est S. Chrysostomus ad extollendam Dei benignitatem, & pœnitentiæ efficaciam, nec attingit locis citatis quæ

quæ pœnitens obtenta venia præstare debeat, ac præsertim, quomodo pœnitentiæ publicæ leges, quæ suo tempore vigeat, teste Dallæo, servare debeat. Adde Sanctum Doctorem hortari ad examen conscientie nullo die prætermittendum, velleque ut auditores nunquam in lectulo quiescant, nisi præmissa humili confessione, quæ delicta abstergat, cum proposito tamen confitendi, si quis fortè in aliquod grave lapsus fuerit, & alia Dei & Ecclesiæ præcepta servandi.

Urget Dallæus, S. Chrysostomus homil. 8. de pœnitentia tom. I. expendens illud Apostoli, *Probet autem seipsum homo, & sic de pane illo edat*, scribit probationem non oportere fieri coram Sacerdote; quemadmodum docet Concilium Tridentinum sess. 13. cap. 7. sic enim loquitur Sanctus Doctor: *Non revelavit ulcus, non in commune theatrum accusationem produxit, non delictorum testes statuit, intus in conscientia astante nemine præter eum, qui cuncta videt, institue judicium, & peccatorum examen atque inquisitionem.* Et hom. 28. in primam ad Corinth. *Propterea, inquit, dicit Apostolus, probet seipsum unusquisque, & tunc accedat: neque jussit alteri probare, sed sibi seipsum faciens judicium, ad quod populo non pateat aditus, & probationem quæ careat testibus.* Ita Sanctus Chrysostomus. Concilium verò Tridentinum cit. cap. 7. sic definit: *Communicare volenti revocandum est in memoriam ejus (Apostoli) præceptum, probet seipsum homo. Ecclesiastica autem consuetudo declarat eam probationem necessariam esse, ut nullus sibi conscius mortalis peccati, quantumvis sibi contritus videatur, absque præmissa Sacramentali Confessione ad sacram Eucharistiam accedere debeat.*

Ergo Sanctus Chrysostomus adversatur Con-

cilio Tridentino, negatque necessitate Confessionis auricularis.

R. 1. Ex isto argumento non sequi Sanctum Chrysostomum absolutè negasse necessitatem Confessionis Sacramentalis, sed ad summum existimasse Confessionem non esse necessariò præmittendam Eucharistiæ perceptioni: cùm enim alia sit quæstio; utrum extet divinum præceptum confitendi peccata Sacerdoti? alia quandonam urgeat illud præceptum? potest quis admissio divino Confessionis præcepto, negare ad illud teneri Fideles quibusdam in circumstantiis. Hæc autem posterior quæstio non pertinet ad controversiam, in qua versamur, sed alibi expendenda est, nimirum ubi de dispositionibus præviis ad Eucharistiam.

R. 2. Negando conseq. nempe Sanctum Chrysostomum dissentire à Concilio Tridentino, neque enim aliud vult, quàm quod scribit Sozomenus loco supra citato, nempe post exauctoratum à Nectario Presbyterum Pœnitentiarium factam cuique potestatem, *Prout sibi conscius esset, ac fiduciam sui haberet, ad sacrorum Mysteriorum communionem accedendi.* Ex quo non sequitur, ut supra demonstravimus, abrogatum usum Confessionis, nisi publicæ. Atque ut ampliùs pateat Sancti Chrysostomi cum Patribus Tridentinis consensus

Advertes in probatione, quam Apostolus exigit à communicaturis, duo esse distinguenda. Primum est conscientiæ examen & iudicium, quod Fidelis de seipso ferre debet. Alterum est contritio & pœnitentia, ubi quis se peccati conscius agnoscit. Peccatum autem illud vel est veniale, vel lethale. Primum, & secundum quoad peccata



peccata venialia & quotidiana, ita coram Deo peraguntur, ut alius testis non requiratur. Sed si quis in perscrutanda sua conscientia, se gravioris delicti reum deprehenderit, satisfactionis suæ modum à Sacerdotibus accipiat necesse est. Rem totam clarè & dilucidè explicat S. Augustinus ferm. 351. aliàs 50. ex libro 50. hom. num. 7. *Tertia actio est pœnitentiæ, inquit, quæ pro illis peccatis subeunda est, quæ legis Decalogus continet, & de quibus Apostolus ait, quoniam qui talia agunt, regnum Dei non possidebunt. In hac ergo pœnitentia majorem quisque in se severitatem debet exercere, ut à seipso judicatus, non judicetur à Domino, sicut idem Apostolus ait; si enim nos judicaremus, à Domino non judicaremur. Ascendat itaque homo adversum se tribunal mentis suæ, constituat se ante faciem suam, ne hoc ei postea fiat; nam minatur hoc Deus peccatori, dicens: arguam te, & statuam te ante faciem tuam. Atque ita constituto in corde judicio, adsit accusatrix cogitatio, testis conscientia, carnis timor. Inde quidam sanguis animi contentis per lacrymas profluat. Probatio illa ac judicium, & animi contritio nullum habent testem præter Deum. Sed de pœnitente, qui gravioris delicti conscientiam gerit, pergit sanctus Doctor, Postremam ab ipsa mente talis sententia proferatur, ut se indignum homo judicet participatione Corporis & Sanguinis Domini, ut, qui separari à regno cœlorum timet per ultimam sententiam Summi Judicis, per Ecclesiasticam disciplinam à Sacramento cœlestis Panis interim separetur. Et num. 9. Cum ipse in se protulerit severissimæ medicinæ, sed tamen medicinæ sententiam, veniat ad Antistites, per quos illi in Ecclesia claves ministrantur, & tanquam bonus jam incipiens esse filius, maternorum membrorum ordine custodito, à*

*Præpositis Sacramentorum accipiat satisfactionis suæ modum, ut in offerendo sacrificio cordis contribulati, devotus & supplex id tamen agat, quod non solum ipsi proficit ad recipiendam salutem, sed etiam cæteris ad exemplum. Ut si peccatum ejus non solum in gravi ejus malo, sed etiam in tanto scandalo aliorum est, atque hoc expedire utilitati Ecclesiæ videtur Antistiti, in notitia multorum, vel etiam totius plebis agere pœnitentiam non recuset, non resistat, non lethali & mortiferæ plagæ per pudorem addat tumorem. Porro probationis, quam Sanctus Augustinus hîc integrè exponit, Patres Tridentini postremam dumtaxat partem attingunt. Sanctus vero Chrysostomus priorem; & ita omnes Patres faciliè conciliantur.*

## EX V. SÆCULO.

**I.** Sanctus Hieronymus in cap. 7. Ecclesiast. *Si quem serpens diabolus occultè momorderit, & nullo conscio tum peccati veneno infecerit: si tacuerit qui percussus est, & non egerit pœnitentiam, nec vulnus suum fratri & magistro voluerit confiteri, magister qui linguam habet ad curandum, facile ei prodesse non poterit. Si enim erubescat ægrotus vulnus Medico confiteri, quod ignorat medicina non curat. Et in caput 16. Matthæi, Alligat, inquit, vel solvit Episcopus & Presbyter non eos, qui insontes sunt vel noxii, sed pro officio suo cum peccatorum audierit varietates, scit quis ligandus sit, vel solvendus.*

**I.** Sanctus Augustinus ferm. 35. aliàs hom. 27. ex libro 50. *Elevatus est Lazarus, inquit, processit de tumulo ? ligatus erat, sicut sunt homines in confessione pœnitentiam; jam processerunt à morte;*

morte; nam non confiterentur, nisi procederent. Ipsum confiteri, ab occulto & tenebroso procedere est. Sed quid Dominus Ecclesiæ suæ? Quæ solveritis in terra, soluta erunt in cœlo. Similia habet concione secunda in Psalm. 101. nec minùs clara sunt quæ supra ex sermone 351. ejusdem Sancti Doct̃oris protulimus. Cùm autem hoc sæculo fenēs obierint Sanctus Hieronymus & Sanctus Augustinus ille anno 420. iste 430. testes sunt disciplinæ, quæ in Ecclesia servabatur quarto & quinto sæculo.

3. Innocentius I. epistola ad Decentium, scripta anno 416. *De pondere æstimando delictorum*, inquit, *Sacerdotis est judicare, ut attendat ad confessionem pœnitentis & ad fletus, atque lacrymas corrigentis, at tunc jubere dimitti, cùm viderit congruam satisfactionem.*

4. Sanctus Leo epist. 82. *Mediator Dei & bonum homo Christus Jesus*, inquit, *banc Præpositis Ecclesiæ tradidit potestatem, ut & confitentibus actionem pœnitentiæ darent, & eosdem salubri confessione purgatos, ad communionem Sacramentorum per januam reconciliationis admitterent.* Et epistola 80. capite 3. reprehendit quorundam Sacerdotum præsumptionem, qua pœnitentes peccata sua publicè confiteri imperabant; Cùm, inquit, *reatus conscientiarum sufficiat solis Sacerdotibus indicari confessione secreta.*

5. Julianus Pomerus libro 2. de Vita contemplativa. Illi, inquit, quorum peccata notitiam humanam latent, nec ab ipsis confessa, nec ab aliis publicata, si ea confiteri aut emendare noluerint, Deum, quem habent testem, habituri sunt & ultorem. Et quid eis proderit humanum vitare judicium, cum si in malo suo permanserint, ituri sunt in æternum, Deo retribuente,

*supplicium?* Nec cavilletur Dallæus propter particulam disjunctivam, *aut emendare*; quasi emendatio sine confessione sufficiat: tum quia sequeretur etiam confessionem sine emendatione sufficere: tum quia particula, *aut*, conjunctivè, hic sumitur propter eos, qui peccata sua accuratè confitentur, sed non emendant.

6. Ex Græcis jam laudavimus Socratem & Sozomenum, quibus adjungendus est Theodoretus, qui lib. 4. hæreticarum fabularum cap. 10. Audianos arguit, quòd vera scelera celarent, & parva quædam risu digna dicerent, quod supponit morem cōfitendi peccata.

## EX VI. SÆCULO.

1. S. Joannes Climacus Scalæ quarto gradu inter plura, quæ de Confessione differit, hæc habet, *sine qua nullus remissione peccatorum potietur*; docetque peccata simpliciter esse Medico spiritali aperienda, uti animæ vulnera, idque tanquam ipsi Deo, Sacerdotisque pedes lacrymis rigandos, quemadmodum Christi pedes suis lacrymis rigavit mulier peccatrix.

2. Fulgentius, sive sit ille Ruspenfis Episcopus, insignis Augustini Discipulus, sive Astigitanus in Hispania Præsul, Sancti Isidori frater, formulam Confessionis generalis edidit, quam refert Menardus ad Sacramentarium Sancti Gregorii: in ea autem formula pœnitens ait: *Confiteor tibi, Pater, Domine cæli & terræ*; & tamen Confessio fieri dicitur coram Sacerdote, pergitque pœnitens, *Multa, inquit, mala cogitavi . . . ego corpus Domini indignus accepi, &c.*

3. Joan-

3. Joannes Jejunator Patriarcha Constantino-  
politanus, pœnitentialem librum scripsit ad usum  
Ecclesiæ Orientalis. Qui peccata sua confessu-  
rus est, sic orditur : *Confiteor tibi, Pater, Domi-  
ne, cæli & terræ factor, omnia occulta cordis mei.* Tum  
Sacerdos eum interrogat super singulis, quæ ad-  
mittere potuit, peccatorum generibus. Hunc  
autem libellum refert Morinus in Appendice ope-  
ris de Pœnitentia.

## EX VII. SÆCULO.

1. Sanctus Gregorius hom. 26. in c. 20. Joan.  
expendens illa Christi verba, *Lazare, veni foras,*  
sic loquitur, *mortuus venit foras, cum peccator nequi-  
tias suas sponte confitetur. Lazaro ergo dicitur; veni  
foras, ac si aperte cuilibet mortuo in culpa diceretur, cur  
reatum tuum intra conscientiam abscondis? foras jam per  
Confessionem egredere, qui apud te interiùs per negatio-  
nem lates, (non lateret autem, nisi peccata ejus  
essent occulta.) Veniat itaque foras mortuus, id est,  
culpam confiteatur peccator; venientem verò foras solvant  
Discipuli, ut Pastores Ecclesiæ ei pœnam debeant amove-  
re, quam meruit qui non erubuit confiteri quod fecit. Et  
hom. 40. Quid est, inquit, peccatorum confessio, nisi  
quedam vulnerum ruptio; quia peccati virus salubriter  
aperitur, in confessione, quod pestiferè latebat in mente?  
Confitendo peccata quid aliud agimus, nisi makam, quod  
in nobis latebat, aperimus? Doctores sancti, dum in Con-  
fessione peccati nostri nos instruunt, quasi vulnus mentis  
per linguam tangunt; & quia nos loquendo à peccatis eri-  
piunt, quasi tangendo vulnera, ad salutem reducunt.*

2. S. Eligius (quem S. Audoenus ipsi coævus,  
scribit in ejus vita omnia peccata ab adolescen-  
tia sua coram Sacerdote fuisse confessum) homi-  
lia

lia 4. sic loquitur : Cum tanta est plaga peccati , atque impetus morbi ; ut medicamenta Corporis & Sanguinis Domini differenda sint , auctoritate Antistitis debet se quisque ab altari removere ad agendam pœnitentiam , & eadem auctoritate reconciliari ; lectum enim modò est ; Qui manducat & bibit indignè , iudicium sibi manducat & bibit ; hoc est enim indignè illud accipere , qui accipit eo tempore , quo debet pœnitentiam agere . Tum enumeratis peccatis , quæ à regno Dei excludunt , sic pergit : Qui ergo ex vobis talibus , & his similibus involuti sceleribus fuerint , & per confessionem ac pœnitentiam nequaquam condignam satisfactionem egerint , non se à nobis reconciliari posse existiment . Et hom. 11. Confessio , inquit , pœnitentiam monstrat , pœnitentia satisfactionem ostendit , satisfactio veniam sibi divina pietate conciliat ; nec enim poterit indulgentia tribui , nisi ira Dei possit confessione placari .

3. Synodus Quinisexta seu Trullana , in qua federunt 200. Episcopi & amplius , inter quos numerantur omnes Patriarchæ Orientalis Ecclesiæ , an. 692. sic decernit can. 102. Oportet . . . . . eos , qui solvendi & ligandi potestatem à Deo accepere , peccati qualitatem considerare , & ejus qui peccavit ad conversionem promptum studium & sic morbo convenientem asferre medicinam . . . . non enim simplex est morbus peccati , sed varius & multiformis . En testimonium totius Ecclesiæ Orientalis pro necessitate confessionis singulorum peccatorum ; quo enim pacto Sacerdos conveniens remedium variis peccatorum morbis asferret , nisi ea cognoverit ; quis autem ea cognoscat , nisi confessione ?

Fateor equidem illud Concilium non esse universale , cum ab Ecclesia Latina non fuerit receptum ,

ptum, imò nonnullos ejus canones ab ea fuisse reprobatos, utpote qui contineant errores jam pridem extinctos. Nihilominus plura statuit disciplinæ Ecclesiasticæ admodum utilia, & à Veteribus tradita; quæ si non ab ipsa Synodo, saltem ab eorum auctoribus auctoritatem habent, ut communiter advertunt Theologi. Ideo autem vocatur 1. Quinisexta, quasi sit quoddam supplementum Concilii quinti & sexti, in quibus cum nulli essent conditi Canones, Episcopi illi plures edere præsumperunt, tanquam accessiones ad duo Concilia generalia. 2. Trullana; quia habita est in aula Palatii Constantinopolitani, quæ dicebatur Trullum.

## EX VIII. SÆCULO.

1. Egbertus Archiepiscopus Eboracensis in Anglia, in suo Libro pœnitentiali apud Morinum, in appendice 1. hortatur pœnitentem ad aperienda crimina, quorum se conscium agnoscit. *Quando volueris, inquit, confessionem facere tuorum peccatorum, viriliter age, & noli erubescere, quia sine confessione non est indulgentia.* 2. Confessionis formulam exhibet his verbis: *Confiteor coram Deo omnipotente ..... & coram te Sacerdote, quia nimis peccavi in cogitationibus nefandissimis: confiteor odia cordis mei.... Corpus & Sanguinem Domini polluto corde & corpore sine confessione & pœnitentia scienter indignè accepi.*

2. Venerabilis Beda in caput 5. Epistolæ Jacobi sic scribit: *Neque enim sine confessione emendationis peccata queunt diimitti; unde rectè subjungitur, confitemini ergo alterutrum peccata vestra. In hac autem sententia illa debet esse discretio, ut quotidiana le-*  
viaque

*viæque peccata alterutrum cœqualibus confiteamur. Porro gravioris lepræ immunditiam juxta legem Sacerdoti pandamus, atque ad ejus arbitrium qualiter & quanto tempore jufferit, purificari curemus.*

Objicit Dallæus Bedam loqui dumtaxat de gravioribus quibusdam peccatis, quæ subdita erant pœnitentiæ publicæ; lib. enim in Luc. c. 17. expressè docet confitendam esse hæreticam pravitatem, superstitionem Gentilem, Judaicam perfidiam, & schisma fraternum cætera verò vitia, inquit, *tanquam valetudinis & quasi membrorum animæ, atque sensuum, per seipsum interius in conscientia Dominus sanat & corrigit.*

Respondeo Bedam eo loci loqui de peccatis extra Ecclesiam commissis, quæ palàm & publicè ejurare debet Hæreticus, Schismaticus, & qui superstitiones Paganorum vel Judæorum secutus est, si in gremium Ecclesiæ voluerit admitti: hoc autem non habere locum in cæteris peccatis, quæ secreta confessione expiari possunt. Sic Bedam olim ex professio interpretatus est Godefrius Vindocinensis, de quo postea.

Confirmaturque hæc interpretatio ex lib. 5. Historiæ Ecclesiasticæ cap. 14. in quo refert quemdam militem Christianum & Catholicum, ob dilatam ac neglectam confessionem, etiam dum gravi & periculoso morbo laboraret, ad infernos cruciatus raptum fuisse.

3. Alcuinus olim Caroli Magni Magister gravissimis verbis quendam insectatur, qui confessionis necessitatem enervare conabatur: *Dicitur, inquit, neminem ex Laicis suam velle confessionem Sacerdotibus dare, quos à Deo Christo cum sanctis Apostolis ligandi solvendique potestatem accepisse credimus.*

*Quid*



Quid solvit Sacerdotatis potestas, si vincula non considerat ligati? Cur ipse Christus Leprosum, quem mundavit, ad Sacerdotes misit? Cur Lazarum resuscitatum alios solvere iussit? Spernet Apostolicum præceptum dicentis, confitemini alterutrum peccata vestra, reus Iudici, ægrotus Medico? Nunquid Deo abscondi possunt scelera nostra? Ab homine possumus abscondere quæ agimus, at non Deo. Nonne in sacro Baptismate Sacerdotibus Christi nostræ fidei confessionem dare debemus? Cur etiam in secundo pœnitentiæ Baptismate per confessionem humilitatis nostræ ab omnibus post Baptisma peractis, eadem divina operante gratia, Sacerdotali similiter auxilio non debemus absolvi peccatis? Hæc cogitate, fratres, sequimini vestigia sanctorum Patrum, & nolite in Catholica fidei religionem novas inducere sectas.

4. Godegrandus Episcopus Metensis in sua Regula præscribit cap. 28. ordinem pœnitentiæ publicæ. Tum capite 30. de Pœnitentia privatim agenda, sic statuit: *Hæc est ratio pœnitentiæ & confessionis nostræ, quæ coram Deo & Sacerdotibus ejus à nobis pariter agendæ sunt, id est, in unoquoque anno tribus vicibus populus fidelis suam confessionem suo Sacerdoti faciat, & qui plus fecerit, melius facit. Monachi unoquoque Sabbato confessionem faciant cum bona voluntate Episcopo, aut Priori suo.*

5. Theodulphus Episcopus Aurelianensis, labente sæculo octavo, sic habet cap. 31. Capitularis: *Quando quis ad confessionem venit, diligenter debet inquiri quomodo, aut qua occasione peccatum perpetraverit, quod peregrisse se confitetur, & juxta modum facti debet pœnitentia indicari. Debet ei persuadere, ut & de perversis cogitationibus faciat confessionem. Debet etiam injungi, ut de octo principalibus vitiis faciat suam confessionem, & nominatim debet ei Sacerdos unum-*

quodque vitium dicere, & suam de eo confessionem accipere.

## EX IX. & X. SÆCULO.

1. E Græcis Nicephorus Cartophylax in Epistola ad Theodosium, cujus fragmentum extat in tomo primo Bibliothecæ Patrum, sic scribit: *Olim omnes oportebat ad ipsos Pontifices accedere, suaque illis occulta prodere, & sic vel reconciliationem, vel repudium ferre. Ignoro autem qui factum sit, ut hæc minus observentur, quamvis existiment Pontifices negotii tædio defatigati id operis ad Monachos transinisse ad eos scilicet, qui verè probati sunt, aliisque valeant esse utiles. Et infra. Porro si quis (ex Monachis) expertus sit & frugi, & cum hoc Sacerdotio fungatur, ad illum imprimis accedendum.*

Cùm autem nono sæculo Ecclesia Orientalis, agente Photio, cœperit disjungi à Latina, procul dubio doctrinam, quam deinceps illibatam servavit, atque etiam nunc servat, non à Latinis, sed ab antiquioribus Patribus accepisset credendum est. Atqui Ecclesia Orientalis ab initio Schismatis usque ad nostram ætatem usum Confessionis Sacramentalis retinuit, ut constat. 1. Ex ejus libris pœnitentialibus. 2. Ex Cabasila, qui licet Schismaticus, in expositione tamen Liturgiæ cap. 19. agnoscit necessitatem Confessionis Sacramentalis. Scripsit autem auctor ille decimo quarto mediante sæculo. 3. Ex Jeremia Patriarcha Constantinopolitano, ad quem Lutherani Confessionem Augustanam transmiserant; eam enim sua censura perstrinxit, quòd docerent  
necef-

neceſſum non eſſe omnia peccata per ſingulas ſpecies in Confeſſione enumerare. 4. Ex Conc Constantinopolitano , quod Parthenius Patriarcha convocavit anno 1642. ad reſcindenda quæ prædeceſſor ejus Cyrillus homo nequiſſimus, & à Calvinianis corruptus , contra fidem evulgaverat, ac imprimis contra *Confeſſionem & Pœnitentiam*. Refertur illud Concilium tomo ult. Conciliorum, quæ edidit Labbæus Societatis Jeſu. 5. Ex Concilio Bethlehemitico , celebrato anno 1672. in quo aſſeritur eadem Græcorum fides. 6. Denique ex eo quodd Latinos inter & Græcos nulla unquam extiterit controverſia circa Confeſſionem Sacramentalem , neque in Concilio Lugdunenſi II. neque in Florentino, in quibus utraque Eccleſia congregata eſt. Legitur ſolummodo in actis Concilii Florentini , Latinos poſt celebratam Synodum , à Græcis quæſiviſſe cur eorum Sacerdotes peccata ſua non priùs ſacramentaliter confiterentur , quàm ad ſacra myſteria celebranda accederent? Ergo ſicut ad nonum ſæculum , ita à nono ſæculo uſque ad noſtram ætatem , conſtans fuit traditio in Eccleſia Orientali, Confeſſionem Sacramentalem eſſe neceſſariam ad veniam peccatorum impetrandam. Veniamus jam ad Latinos, qui floruerunt nono & decimo ſæculo.

2. Itaque Concilium Cabillonenſe II. can. 32. ſic ſtatuit anno 813. *Sed & hoc emendatione indigere perſpicimus, quodd quidam, cum confitentur peccata ſua Sacerdotibus, non plenè id faciunt. Quia ergo conſtat hominem ex duabus eſſe ſubſtantiis, anima videlicet & corpore, & interdum animi motu, interdum carnis fragilitate peccatur, ſolerti indagazione debent inquiri ipſa peccata, ut ex utriſque plena ſit confeſſio;*

fessio ; scilicet , ut ea confiteantur , quæ per corpus gesta sunt , & ea quibus in sola cogitatione delinquitur . Instruendus est itaque peccatorum suorum confessor , ut de octo principalibus vitiis , sine quibus in vita hac difficile vivitur , confessionem faciat ; quia aut cogitatione , aut , quod gravius est , opere eorum instinctu peccavit . Odium etenim , invidia , superbia , vel ceteræ hujusmodi animi pestes , tantò periculosius lædunt , quantò subtilius serpunt .

Quamvis Concilium doctrinam Catholicam clarius exponere non potuerit , Dallæus tamen ex can. 33. probare conatur confessionem in mente Patrum Cabillonensium , esse dumtaxat confilii , adeò ut liberum sit peccata sua confiteri ; vel Deo soli , vel Sacerdoti ; sic enim loquuntur cit. canones : *Quidam Deo solummodo confiteri debere dicunt peccata (ad veniam obtinendam) quidam verò Sacerdotibus confitenda esse percensent : quod utrumque non sine magno fructu intra sanctam Ecclesiam , ita dumtaxat , ut & Deo , qui remissor est peccatorum , confiteamur peccata nostra , & secundum constitutionem Apostoli , confiteamur alterutrum peccata nostra . Confessio itaque quæ Deo fit , purgat peccata : ea vero quæ Sacerdoti fit , docet qualiter ipsa purgentur peccata . Deus namque salutis & sanitatis auctor & largitor , plerumque hanc præbet suæ potentiae invisibili administratione , plerumque ministrorum operatione .*

R. 1. Si canon iste , obscurus quidem , in sensu Dallæi accipiendus sit , Concilium hîc destruit , quod firmiter ædificaverat canone 32. nimirum peccata omnia , etiam cogitatione admissa , Sacerdotibus esse exponenda , emendandosque qui contra factitant ; quæ sanè verba non consilium , sed peccatum sonant . 2. Igitur Concilium , canone 32. stabilita necessitate Confessionis Sacramentalis

lis, attingit hîc quæstionem, quæ tunc temporis movebatur, quæque multùm postea inter Scholasticos agitata est, ut constât ex pag. 74. & 75. num, scilicet, sola contritione peccata deleantur, cum onere tamen ea clavibus Ecclesiæ subjiciendi: *Confessio itaque . . . . . quæ Sacerdoti fit*, inquiunt Patres, *docet qualiter ipsa purgentur peccata. Et secundum constitutionem Apostoli*, confiteamur alterutrum peccata nostra. Licet autem Patres non proscribant hancce opinionem, oppositam tamen amplectuntur sequentibus verbis: *Deus*, inquiunt, *salutis & sanitatis auctor & largitor*, plerumque hanc præbet suæ potentiae invisibili administratione, plerumque ministrorum operatione. Primum præstat in perfectè contritis, secundum in attritis.

3. Regino Prumiensis Abbas in Germania, qui floruit nono & decimo sæculo, de Confessione Sacramentali, sic scribit libro 2. de Ecclesiastica disciplina capite 268. *Omnis homo quicumque se recognoscit immaculatam Christi Tunicam, quam in Baptismo accepit, peccati macula polluisse, ad primum Sacerdotem venire festinet, & cum purificatione mentis omnes transgressiones, omniaque peccata quibus Dei offensam se incurrisse meminit, humiliter confiteatur, & quidquid ei à Sacerdote fuerit injunctum, ac se ab ipso omnipotentis Dei ore esset prolatum, ita diligenter intendat, & cautissimè observet.* Hîc Regino non privatam suam sententiam, sed communem Ecclesiæ disciplinam exponit.

4. Pro restituenda disciplina in Anglia, plures editi sunt canones sub Rege Eduardo, & ut verisimile est, agente sancto Dunstano Cantuariensi Episcopo, extanque tomo nono Conciliorum ad annum 976. Titulo autem de Confessione canonis 1. sic habet: *Quando aliquis voluerit confessionem*

*facere omnium scelerum suorum, viriliter agat, & non erubescat confiteri omnia sua scelera; quia inde venit indulgentia; & quia sine confessione nulla est venia. Et canone 5. Pœnitens sic confessionem instituere præcipitur: Confiteor Deo omnipotenti, & Confessario meo spirituali Medico omnia peccata mea, quæ unquam perpetravi, sive in factò, sive in cogitatione.*

## EX XI. & XII. SÆCULO.

1. Burchardus lib. 19. de Pœnitentia, inter plures quos collegit canones pro necessitate Confessionis, laudat canones Reginonis, & Concilii II. Cabillonensis, supra à nobis citatos. Idem præstat Ivo Carnotensis, Decreti integra part. 15. & ferm. in capite jejunii sic loquitur: *Effundite coram illo corda vestra, id est omnem immunditiam cordis vestri per confessionem evomite: quia tali confessione cuncta levantur.*

2. Petrus Damiani ferm. 2. de S. Andrea, de Confessione ex professo differens, ait: *Via est sine qua nemo venit ad Patrem . . . . cum igitur ex vitiorum abyssò disponis emergere, ad illum sit refugium tuum, cui anima tua commissa est, nec te moveat si illiteratus sit, memento quia non est potestas, nisi à Deo. Tum distinctis multis pœnitentiæ gradibus, sic pergit: Quartus itaque gradus est pœnitentia oris, hæc purè facienda est: quia non est pars peccatorum dicenda, & altera retinenda.*

3. Godefridus Abbas Vindocinensis, auctor XI. & XII. sæculi lib. 5. epistol. 16. fortiter insurgit adversus quendam Guillelmum, quo olim Præceptore usus fuerat, ex eo quòd asseruisset juxta Bedam, quatuor tantum crimina in confessione esse

esse exponenda: Omnes, inquit, qui in fide non fîcta vivere cernimur, ut fidei nostræ veritas non destruat. . . . laborare debemus. Igitur de proposita nobis quæstione magna ex parte, imò secundum tuam intelligentiam obviare fidei Catholicæ videtur. Proposuisti quòd quatuor tantum peccata confessione indigebant, cætera autem à Domino sanabuntur sine confessione, quod te invenisse asseris in expositione Bedæ . . . sed hoc ita intelligendum minime censemus, & juxta fidem Christianam sic intelligere nec possumus, nec debemus. Determinanda enim est ista sententia sapienter, ut illa quatuor peccata (de quibus Beda) non jam soli Sacerdoti, sicut in cæteris agitur, sed universæ Ecclesiæ confiteamur; cætera verò vitia per semetipsum Dominus sanat & corrigit, videlicet, quæ sibi privata in confessione revelantur ut sanentur. Sibi dico; quia illi, qui in ejus loco esse dignoscitur. Certum est, nihil hoc certius, omnia peccata vel crimina confessione indigere & pœnitentia.

4. Sanctus Bernardus ferm. ad milites Templi cap. 12. Quid, inquit, Bethphage dicam, ubi & confessionis Sacramentum, & Sacerdotalis ministerii mysterium continetur? Et infra, Et quidem verbum in corde peccatoris operatur salutiferam contritionem; verbum verò in ore noxiam tollit confusionem, ne impediat necessariam confessionem. Tum de Sacerdotibus subjicit: Non absolvant etiam compunctum, nisi viderint & confessum.

5. Magister sentent. lib. 4. dist. 17. Sicut, inquit, præcepta est nobis interior pœnitentia: ita & oris confessio, & exterior satisfactio, si adsit facultas. Unde nec verè pœnitens est, qui confessionis votum non habet.

Ecclesiæ Traditionem pro Confessione Sacramentali tandem deduximus usque ad Concilium Lateranense IV. sub Innocentio III. celebratum

XIII. sæculo, anno scilicet 1215. ut quivis miretur frontem, qua Novatores ausi sunt asserere confessionem auricularem in illo Concilio primum fuisse imperatam. Imò advertunt Patres Tridentini sess. 14. cap. 5. Concilium Lateranense non tam Confessionem præcepisse, quàm illius faciendæ tempus determinasse (ne desides Catholici peccata sua confiteri ulterius differant) famoso enim Canone, *omnis utriusque sexus*, sic habet Concilium: *Omnis utriusque sexus fidelis postquam ad annos discretionis pervenerit, omnia sua solus peccata confiteatur fideliter, saltem semel in anno, proprio Sacerdoti . . . alioquin, & vivens ab ingressu Ecclesiæ arceatur, & moriens Christiana careat sepultura.* In quæ verba sic differunt Patres Tridentini loco mox laudato. *Neque enim per Lateranense Concilium Ecclesia statuit, ut Christi fideles confiterentur, quod jure divino necessarium & institutum esse intellexerat; sed ut præceptum confessionis, saltem semel in anno ab omnibus & singulis, cum ad annos discretionis pervenissent, impleretur.*

Objicit Dallæus Gratianum, qui secunda Decreti parte, causa 33. quæst. 3. dist. 1. de pœnitentia, expendit an sola confessione cordis crimen deleri possit. Cum autem hæc de re duæ tunc essent opiniones, plures Veterum auctoritates pro affirmante congerit, similiter & pro negante: ac tandem ad calcem capitis 89. in hæc verba concludit; *Quibus auctoritatibus, vel quibus rationum firmamenti utraque sententia satisfactionis & confessionis initatur, in medium breviter exposuimus. Cui autem harum potius adhærendum sit, Lectoris judicio reservatur. Utraque enim fautores habet sapientes & religiosos viros. Unde Theodorus Cantuariensis Archiepiscopus (septimo sæculo) ait in Pœnitentiali suo, quidam Deo solummodò confi-*



*confiteri debere peccata dicunt, ut Græci; quidam verò Sacerdotibus confitenda esse percensent, ut tota ferè sancta Ecclesia; Quod utrumque non sine magno fructu intra sanctam sit Ecclesiam; ita dumtaxat, ut Deo, qui remissor est peccatorum, peccata nostra confiteamur. Sed tamen Apostoli institutio nobis sequenda est, ut confiteamur alterutrum peccata nostra.* Quæ posteriora verba, & alia quæ prætermitto, Gratianus deprompsit ex canone 33. Concilii Cabillonensis, & assuit Pœnitentiali Theodori. Ergo, inquit Dallæus, ante Concilium Lateranense IV. nullum extabat Confessionis præceptum.

Nego consequen. Ad antecedens verò alii aliter respondent.

Sanctus Thomas in quartum, sanctus Bonaventura, & sanctus Antoninus respondent, mirum non esse Scriptores illorum temporum in oppositas abiisse sententias circa confessionis præceptum, cum nondum haberent expressam Ecclesiæ definitionem.

Alii dicunt Gratianum nullius esse auctoritatis; namque 1. sine delectu multa compilavit spuria ac supposititia. 2. Mentem SS. Patrum, & aliorum Scriptorum, quorum testimonia profert, minimè est affecutum, cum eosdem aliquando laudet pro opinione affirmante & negante, sanctum Ambrosium v. gr. in sua Collectione profert pro necessitate & contra necessitatem confessionis. 3. Turpiter hallucinatur, dum scribit plures sapientes & religiosos viros sua ætate negare necessitatem Confessionis Sacramentalis; cum omnes illius ævi Auctores, quorum scripta ad nos pervenere, ut Godefridus, Petrus Damiani, S. Bernardus, Petrus Cluniacensis, Hugo & Richardus

dus Victorini, Magister Sententiarum, &c. necessitatem Confessionis Sacramentalis constanter asseruerint.

Alii, quibus astipulamur, censent Gratianum exponendum quomodo supra exposuimus canonem 33. Concilii Cabillonensis, nempe Gratianum attingere dumtaxat quæstionem, an peccata deleri possint contritione, & sola cordis confessione, priusquam Sacerdotes ministerium suum exhibeant. Suadetur hæc responsio, ex eo quod ejusmodi quæstio tunc temporis inter sapientes multum agigaretur. Quin ipse Magister Sententiarum lib. 4. dist. 17. Gratiano æqualis eam in utramque partem versat, & non secus ac Gratianus Veterum testimonia colligit, tam pro affirmante sententia, quam pro negante, ac tandem pro necessitate Confessionis Sacramentalis sic concludit: *Ex aliisque pluribus indubitanter ostenditur oportere Deo primum, deinde Sacerdoti offerri confessionem, nec aliter posse perveniri ad ingressum Paradisi.* Tum explicat loca S. Chrysostomi & S. Ambrosii difficiliora, in quibus videntur negare necessitatem Confessionis Sacramentalis: *Non est ita intelligendum, inquit, ut liceat alicui, si tempus habeat, Sacerdoti non confiteri, sed quia sufficit ubi crimen occultum est, soli Deo per Sacerdotem dicere . . . . ita enim illud Ambrosii, lacrymæ lavant delictum, quod voce pudor est confiteri, ad publicam pœnitentiam referendum est.*

Quod verò spectat Librum Pœnitentialem Theodori Cantuariensis, Gratianus illum profert ita interpolatum & adulteratum, ut ex eo nihil colligi possit. Burchardus & Ivo Carnotensis Capitulare Theodori ante Gratianum sic exscripserunt,

ferunt, *quidam Deo solummodo confiteri debere dicunt peccata: quidam verò Sacerdotibus confitenda percensent.*

Beda etiam ejusdem Capitularis meminit, nullamque mentionem facit de Græcis, sicut nec Burhardus, aut Ivo Carnotensis. Enimverò Theodorus homo Græcus, à Vitalliano Summo Pontifice in Angliam missus septimo sæculo, non potuit ignorare disciplinam Ecclesiæ Orientalis, quam Synodus Trullana ex omnibus Patriarchis Orientis, & 200. Episcopis conflata, eodem sæculo asseruit. A Sciolo itaque insertæ sunt in Capitulari illæ voces, *ut Græci. Tota ferè Ecclesia.* Qui autem dicebant Confessionem soli Deo esse faciendam, erant privati homines & exiguæ auctoritatis, contra quos scripserunt Alcuinus, Godefridus Vindocinensis, & Patres Cabillonenses can. 32. supra laudato.

Objicit 2. Dallæus, si confessio auricularis esset præcepti divini, in usu sanè fuisset primis Ecclesiæ sæculis, maximè apud viros sanctitate conspicuos: atqui nulla historia commendat Veteres, puta Ignatium, Justinum, Irenæum, Cyprianum; &c. quòd peccata sua Sacerdoti sedulò ac frequenter exponerent, quemadmodum legitur in vita sanctorum, qui posterioribus sæculis clarruere, quorum alii qualibet hebdomada, alii singulis diebus, ut sanctus Carolus Borromæus, Sacramentum pœnitentiæ frequentasse referuntur: Ergo.

Concessa majore, respondeo ad minorem, 1. Ex argumento negativo nihil concludi potest: quis enim Catholicos in Anglia, Dania, & aliis regionibus, ubi Sacerdotibus, qui ibi sunt admodum

dùm rari, liberum non est palàm & publicè obire munia Sacerdotalia, nunc sacramentaliter non confiteri concluderet, ex eo quòd ea de re nihil audiamus.

Atqui pejor erat Christianorum status sub Imperatoribus ethnicis; tunc enim Sacerdotes, qui pauci admodum erant, latitare cogebantur, propter persecutionem, quæ in eos præsertim sæviebat. 2. Christiani illis temporibus Baptisma diu differebant, plures etiam usque ad mortem. Sanct. Ambrosius in Episcopum electus est, cùm esset adhuc Catechumenus. Sanctus Gregorius Nazianz. & Sanct. Augustinus baptizati sunt circa trigessimum ætatis annum. 3. Qui citiùs baptizabantur, haustum è sacro fonte gratiam acriori cura servabant; & si qui ex illis ab ea publicè excidissent pœnitentia publica, de qua est frequens mentio in Ecclesiastica Historia, purgabantur. 4. Confessio Sacramentalis primis temporibus potiùs habebatur necessitatis officium, quàm mera pietatis exercitatio. Quotidianam quidem pœnitentiam agebant viri sancti pro quotidianis peccatis, sed ut plurimum sine Sacramentali Confessione, quæ tunc temporibus non ita erat frequens pro peccatis venialibus. 5. Non desunt in scriptis Veterum plura monimenta, quibus supra probavimus confessionem auricularem à primis sæculis fuisse in usu; Sanct. Ambrosius, teste Paulino in ejus vita, vacabat excipiendis secretò confessionibus, nec dubitandum est, quin alii Episcopi eodem munere defuncti sint pari diligentia.

## §. IV.

*De Confessionis proprietatibus , sive conditionibus  
in genere.*Q. I. *Quæ sunt Confessionis conditiones ?*

R. Sexdecim vulgò numerantur à Pastoribus sedulò explicandæ , continenturque sequentibus versibus.

*Sit simplex , humilis confessio ; pura , fidelis ,  
Necnon nuda , frequens , discreta , libens , vere-*  
*cunda ,**Integra , secreta , & lacrymabilis , accelerata ,  
Fortis , & accusans , & sit parere parata.*1. *Sit simplex*, id est , verbis non fucata , nec ad historicam narrationem , magis quàm ad peccatorum coram Judice accusationem accommodata.2. *Humilis* , ex intimo propriæ indignitatis sensu , deposito omni fastu sæculari , oculis in terram demissis , flexis genibus , sicut reum decet , qui veniam deprecatur.3. *Pura* , quæ nihil extraneum habeat admixtum , nullumque finem sibi proponat præter honestum , & pœnitenti consentaneum.4. *Fidelis* , idest , vera & sincera , peccata nec augeat , nec minuat.5. *Nuda* , non intricata , nec circuitu verborum implexa.6. *Frequens* , ne scilicet ex infrequenti usu Sacramenti pœnitentiæ contrahatur habitus peccandi , cor induretur , ac finalis sequatur impœnitentia.7. *Discreta* , idest , prudens & cauta , ne pœnitens

nitens aliorum peccata pandat sine necessitate nec propria temerè, & absque serio examine enuntiet.

8. *Libens*, idest, non extorta à Confessario, qualis in judicio sæculari solet à reis extorqueri. Unde qui certa crimina non declarant, nisi industria Confessarii convicti, & quodammodo coacti, non censentur dispositi ad Sacramentalem absolutionem, cùm fictè accesserint, & animo reticendi quæ ex præcepto divino aperire tenebantur.

9. *Verecunda*, idest, cum quodam pudore conjuncta, nec impudenter & verbis obscœnis turpia & obscœna exprimat.

10. *Integra*, idest, quæ peccata specie diversa & numero distincta cum suis circumstantiis aperiat.

11. *Secreta*, idest, in aurem Sacerdotis demissa voce facienda.

12. *Lacrimabilis*, idest, cum intimo animi dolore; confessio enim ex dictis debet esse contritionis effectus, & signum ejus sensibile.

12. *Accelarat*, idest, de die in diem non dilata, ut ab iis differri solet, qui ad Octavam Paschatis Confessionem annuam remittunt.

14. *Fortis*, idest, non timidè, sed generosè peccata detegat.

15. *Accusans*, idest, quæ peccata non imminuat, nec excuset, sed ea qualia sunt candidè aperiat.

16. *Parereparata*, idest, non contentiosa qualis eorum esse solet, qui Sacerdoti contradicunt, & adversus illum disputant; cùm ad hoc judicium reconciliativum reus accedere debeat supplex, & animo paratus ut faciat quidquid prudens

dens Sacerdos, tanquam Judex vice Dei præceperit.

Q. 2. *Cujus peccati reum se constituit, qui in Confessione mentitur?*

R. Lethaliter peccat, quando ejus mendacium est obex effectui Sacramenti, ipsumque Sacramentum reddit irritum; quia gravis est illa irreverentia contra Religionem. Mendacium autem in Confessione tum irritat Sacramentum. 1. Cum est in materia Confessionis necessaria, ut si pœnitens falsò neget, aut affirmet se conscium esse peccati mortalis, aut alicujus circumstantiæ ex præcepto clavibus Ecclesiæ subjiciendæ. 2. Cum falsò & contra mentem confitetur se reum alicujus peccati venialis, nec ullum aliud declarat, quia nullum peccatum clavibus Ecclesiæ subjicit; & nulla sequitur absolutio defectu materiæ.

Dixi, *nec ullum aliud declarat*; Qui enim falsò & contra mentem negat, aut affirmat se reum esse peccati venialis, & alia simul vera confitetur, non videtur peccare, nisi venialiter; quia mendacium illud est in materia levi, & ad Sacramentum minimè necessaria.

Dices contra postremam hanc responsionis nostræ partem; mendacium illud est longè gravius, quàm in aliis circumstantiis; habet enim rationem sacrilegii, utpotè contra reverentiam Sacramento debitam: ergo lethale censeretur debet.

Concesso anteced. Nego consequent. Quamvis enim mendacium in re levi sit gravius ex circumstantia Confessionis Sacramentalis, habeatque rationem sacrilegii, non sequitur quòd ex ejusmodi circumstantia contrahat malitiam lethalem: sunt enim peccata venialia alia aliis graviora.

ra. Sacrilegium quidem est ex natura sua mortale; sed ex levitate materiæ potest esse veniale, ut alibi diximus: atqui levis videtur contra Sacramentum isthæc irreverentia: ergo non est nisi leve sacrilegium.

Timendum tamen est, ne pœnitens, qui sic mentitur, vera contritione sine attritione careat; difficilè enim intelligitur eum gerere cor contritum & humiliatum, divinam justiciam placare, & ad veniam impetrandam esse dispositum, qui actu Deum offendit, voluntati ejus contradicit, & novum peccati reatum incurrit.

Atque hæc de Confessionis conditionibus summam dicta sufficiant, duobus dumtaxat exceptis, integritate scil. & secreto, quæ pleniorẽ à nobis postulant expositionem. Quare sit

## §. V.

### *De integritate Confessionis.*

Q. 1. *Quotuplex est Confessionis integritas?*

R. Duplicem vulgò distinguunt Theologi, unam materialem, alteram formalem.

Materialis est, adæquata omnium planè peccatorum Confessio: formalis verò est accusatio eorum dumtaxat peccatorum quæ post diligens conscientiæ examen in memoriam redeunt, & Ecclesiæ clavibus subicere tenetur pœnitens, etiam in circumstantiis, in quibus repetitur.

Q. 2. *Utraque integritas estne necessaria?*

Materialis non requiritur, 1. quia penes hominem non est omnium peccatorum recordari, multa enim aut fugiunt ex animo, aut incautis, & satis non attendentibus obrepunt, quæ in integritate



tegritate formali inclusa intelliguntur, ut docent Tridentini Patres session. 14. cap. 5. modò tamen ad ea contritio sese extendat; nisi enim voluntas ab omnibus peccatis lethalibus, five cognitis, five incognitis planè sit averfa, confessio caret, fructu suo, & est prorsus invalida. 2. Quia certi sunt casus, in quibus pœnitens omnia peccata mortalia, quorum conscius est sigillatim confiteri non tenetur. Frequentiores autem illi casus sunt, si pœnitens periculoso morbo laborans, integrè confiteri nequeat absque evidenti corporalis salutis periculo: si urgens malum ex quorundam peccatorum confessione immineat, nec ad alium Sacerdotem accedere sit liberum, ut notat sanctus Thomas in supplem. qu. 3. art. 4. ad 5. si peregrinus in regionibus diversetur, ubi à Sacerdotibus intelligi non potest. Adde surdos & mutos, milites jamjam conflicturos, naufragantes, &c. hi omnes præcepto confessionis satisfaciunt, quamvis omnia peccata, quæ in memoriam recurrunt, sigillatim non exponant; Deus enim impossibilia non jubet: ergo integritas materialis non requiritur, sed formalis sufficit: ac proinde juxta Tridentinos Patres cit. cap. 5. *Impium est confessionem, quæ hac ratione præcipitur, impossibilem dicere, aut carnificinam illam conscientiarum appellare.*

Q. 3. *Quid ad formalem Confessionis integritatem requiritur?*

R. De fide requiri, ut omnia peccata mortalia, quorum memoria cum debita, & diligentí præmeditatione habetur, sigillatim quantum moraliter fieri potest, secundum speciem & numerum exponantur. Ita enim definiit Concilium Tridentinum sess. 14. can. 7. in quo sic habet: *Si*

*quis dixerit in Sacramento Pœnitentiæ, ad remissionem peccatorum necessarium non esse jure divino confiteri omnia & singula peccata mortalia . . . anathema sit.* Definitionis veritas probata manet ex dictis de necessitate Confessionis. §. 3. Ergo præcepto Confessionis non satisfaciunt, qui cum enuntiare possint quoties præcisè idem peccatum lethale iterarint, ita mentem exponere solent, *bis aut ter septies, aut decies illud commisi*, quasi dubitent de numero, cum de eo certi sint, aut esse possint; hic enim loquendi modus adhibendus est dumtaxat, cum post diligens examen definiri non potest numerus peccatorum. Unde verò reperienda sit numerica peccatorum distinctio, diximus Tract. de Actibus humanis hic consulendo p. 172. 173. Cum autem ad officium Sacerdotis pertineat juvare pœnitentes, maximè eos qui peccarunt ex habitu, ut integrè peccatorum numerum exponant, aptam methodum edidimus in praxi nostra Pœnitentia, Tract. 2. de Confessione.

Q. 4. *Peccatorum circumstantiæ suntne ex præcepto divino aperiendæ?*

Nota duplicis generis esse circumstantias; aliæ enim novam addunt peccati speciem, aliæ non addunt sed peccatum intra eandem speciem insigniter aggravant, aut minuunt.

Circumstantia novam addit peccati speciem, cum pugnat contra distinctam virtutem; sic injusta percussio Clerici propter circumstantiam personæ Deo dicatæ, & furtum in loco sacro ratione loci sunt peccata, non solum contra justitiam, sed etiam contra Religionem. Circumstantia verò tum aggravat, aut minuit solum peccati speciem, cum magis vel minus pugnat adversus ean-

eandem virtutem, ut injusta percussio Clerici gravior, aut levior; furtum in loco sacro majoris, aut minoris quantitatis, non differunt inter se, nisi secundum magis & minus, intra eandem speciem; quia injusta percussio, sive gravior, sive levior easdem lædit virtutes, similiter & furtum, sive majus, sive minus. Sed hæc fusiùs explicata habentur Tractatu de Actibus humanis cap. 5. de circumstantiis. His præsuppositis,

Ad quæstionem

R. 1. Circumstantiæ; quæ peccati speciem mutant, ex præcepto divino sunt aperiendæ; sic enim Concilium Tridentinum adversus Novatores definiit cit. can. 7.

Probatur 1. iis momentis, quæ citato Paragrapho adduximus, tum ex Scriptura, tum ex traditione ad necessitatem Confessionis contra Novatores asserendam; ex laudatis quippe Conciliorum & Patrum testimoniis, peccata sunt sigillatim aperienda, exponendæ causæ, personæ, locus, tempus, &c. quæ ad circumstantias pertinent.

Probatur 2. ratione, quàm Tridentini Patres ejusdem sessionis cap. 5. suppeditant his verbis: *Colligitur præterea etiam eas circumstantias in Confessione explicandas esse, quæ speciem peccati mutant; quòd sine illis peccata ipsa neque à pœnitentibus integrè exponantur, nec Judicibus innotescant: & fieri nequeat, ut de gravitate criminum rectè censere possint; & pœnam, quam oportet, pro illis pœnitentibus imponere. Unde alienum à ratione est, docere circumstantias has ab hominibus otiosis excogitatas fuisse.*

R. Etsi Concilium Tridentinum non attigerit quæstionem in Scholis agitatam circa circumstan-

tias, quæ speciem non mutant, sed insignitet aggravant aut minuunt, cum unum sibi proposuerint, scil. Novatorum refellere errores, ut sæpè diximus: Theologi tamen communiter docent, paucis exceptis, ut Vasquesio, & aliis, quos appellat, ejusmodi circumstantias ex necessitate præcepti divini esse aperiendas.

Probatur 1. ex Traditione.

Joannes Jejinator in Pœnitentia laudato, Paragrapho 3. ad sextum sæculum: *Oportet, inquit, eum, qui Confessionem suscipit, videre & adolescentiam, & vires, senectutis imbecilitatem, & loci differentiam & modi, per quam malum factum est.*

Concilium Wormatiense can. 25. nono sæculo: *Debet Sacerdos in pœna danda singulorum causas singulatim considerare, originem quoque, modumque culparum, temporum etiam & locorum, personarum quoque & ætatum qualitates considerare & inspicere.*

Concilium Londinense anno 1200. can. 4. *Ut Sacerdotes in pœnitentiis imponendis diligenter attendant circumstantias, qualitatem personæ, qualitatem delicti, tempus, locum, causam, moram in peccato factam. Atqui mora in eodem peccato speciem evidenter non mutat.*

Catechismus Romanus par. 2. de Confessione n. 63. *Furtum etiam in peccatis numerandum est: verum si quis aureum nummum furetur, levius omnino peccat, quam is qui centum vel ducentos, vel ingentem aliquam auri vim, præsertim verò qui sacram pecuniam abstulit.* Ubi Catechismus vult exprimendum quanta fuerit pecuniæ summa furto ablata, quamvis major, vel minor peccati speciem non mutet.

Innocentius XI. anno 1679. & Clerus Gallicanus anno 1700. duas Modernorum propositiones dam-

damnarunt; alteram, qua asserebant præcepto Confessionis eum satisfacere, qui enuntiat simpliciter se furto abstulisse eam pecuniæ quantitatem, quæ ad peccatum lethale sufficit: alteram qua contendebant pœnitentem non teneri respondere quærenti Confessario, an ex consuetudine peccaverit, cùm consuetudo speciem peccati non mutat.

Possent proferri Libri Rituales, qui expressè præscribunt circumstantias insigniter aggravantes esse inquirendas.

Probatur 2. eadem ratione, qua ex Concilio Tridentino evicimus declarandas esse circumstantias, quæ speciem mutant. Namque circumstantiæ insigniter aggravantes addunt specialem malitiam, eamque gravem, quin aliquando etiam graviolem & majori pœna dignam, quàm si speciem mutarent: ergo qui eas reticeret, nec peccata sua integrè confiteretur, nec Confessarius tanquam Judex æquum judicium ferre posset, nec convenientem satisfactionem imponere.

Antecedens probatur nonnullis exemplis. 1. Pecuniæ quantitas non mutat furti speciem, sicut circumstantia loci sacri: attamen longè gravius est furari centum nummos in loco profano, quàm unicum nummum in templo. Ergo si fur unius nummi tenetur exprimere circumstantiam loci sacri, à fortiori fur centum nummorum debet enuntiare quantitatem furti. 2. Incestus in primo gradu est ejusdem speciei cum incestu in secundo: atqui primus præsertim in linea recta, monstrum est in moribus, quod ipsi etiam Ethnici exhorrent, teste Apostolo 1. Corinth. 5. *Omniò, inquit, auditur inter vos fornicatio, & talis forni-*

*fornicatio, qualis nec inter gentes, ita ut uxorem patris sui aliquis habeat.* Hic incestus morte plectitur legibus civilibus, non secundus. Ejus absolutio- nem speciatim Episcopi sibi reservant. 3. Juxta veterem Ecclesiæ disciplinam gravior imponebatur pœnitentia idololatriæ voluntariæ, quàm si cruciatuum vi fuisset extorta. Simile discrimen in pœnitentiis injungendis observandum præscribit Concilium Ancyranum cap. 16. circa eos, qui spontè in fornicationem lapsi sunt, & eos, qui ex infirmitate & quodammodo decepti in illam consenserunt: Cùm ergo Sacerdos hujusmodi circumstantias ponderare debeat, ut consentanea pœnitentiæ opera decernat, eædem ipsi innotescant necesse est.

Dixi circumstantias, quæ insigniter aggravant; quia certum est leviores non esse ex necessitate præcepti aperiendas, utpotè quæ nonnisi levem & venialem malitiam contineant.

Dices 1. circumstantiæ, quæ insigniter minuunt peccati gravitatem, non sunt necessariò exponendæ: ergo nec illæ, quæ similiter augment.

Nego antecedens; Alioquin Sacerdos uti Jux- dex, & Medicus nec congruam satisfactionem im- poneret, nec idoneum sanandis vulneribus adhi- beret remedium.

Dices 2. Non licet jure naturali detegere oc- cultum proximi crimen: atqui circumstantiæ ali- quando apèriri nequeunt, quin simul detegatur alterius crimen: mulier v.g. confiteatur concu- buisse se cum fratre, qui est ei unicus, vel cum Confessario, Sacerdos, qui utrumque novit, fratrem scilicet, & Confessarium, quos hætenùs viros

viros frugi habuerat, eos statim infandi criminis reos intelliget: Ergo.

R. 1. Mulierem in illa hypothefi teneri accedere, fi poffit, ad alium Sacerdotem, cui tam ipfa, quam focius criminis fint ignoti. Quodd fi id nequeat, nec fit locus differendæ Confef-  
fionis,

R. 2. Diftinguendo major. Non licet detegere occultum alterius crimen fine caufa: Conc. Cum caufa: Nego maj. Namque reus juftè torquetur, ut detegat criminis focios, Fideles cenfuris Ecclefie coguntur revelare occultos furti, vel homicidii auctores; tenetur civis deferre quem novit perniciem moliri adverfùs Rempubli-  
cam; domesticus monere herum, fi quis ex familia bona ejus diripiat; denique quoties no-  
ftra intereft, puta cum neceffarium captandum eft confilium, licet crimen alterius prudenti viro manifeftare. Ergo à fortiori fas eft in negotio falutis æternæ plenè & integrè confcientiam no-  
ftram exponere Sacerdoti, quem Chriftus no-  
ftrum constituit Confiliarium, Judicem, & Medi-  
cum, quamvis inde fama proximi aliquatenus læ-  
datur, ficut & noftra; neque enim tenemur dili-  
gere proximum plusquam nos ipfos, & famæ ejus magis confulere, quam noftræ.

Dices 3. Sanctus Thomas in quartum diff. 16. quæft. 3. artic. 2. docet circumftantias, quæ fpeciem non mutant, non effe declarandas ex præcepto: Ergo.

Nego confequent. S. enim Doctor ifta fcripfit cum effet junior, fententiamque fuam revocaffet, communemque fuiffet amplexus, fi senior factus ultimam manum fuæ Summæ appofuiffet.

Q. 5. *Qui recordatur peccati mortalis, quod ex oblivione non exposuit in præcedenti Confessione, teneturne illud confiteri?*

Negarunt quidem recentiores; sed eorum opinio proscrip̃ta est ab Alexandro VII. anno 1665. & à Clero Gallicano anno 1700. Quare

Respondeo teneri; Quia peccata mortalia ex dictis sunt necessaria Confessionis materia: ergo cum illud peccatum clavibus Ecclesiæ non fuerit subiectum, absque dubio subjici debet. Nec refert, quod per absolutionem deletum fuerit saltem indirectè; quia, ex Tridentino sess. 13. can. 11. quantumcunque contritus quis sibi videatur, ac proinde veniam consecutus, nihilominus sacramentaliter confiteri tenetur.

Q. 6. *Peccata dubia suntne in Confessione aperienda?*

R. Ita est, si dubium sit cum fundamento. Tripliciter autem quis potest esse dubius. 1. An actum lege prohibitum vel præceptum elicuerit, vel omiserit. 2. Cum ipsi constat de actu, sed dubitat an liberè & cum sufficiente deliberatione consenserit. 3. Cum incertus est, num in Confessione deposuerit crimen, quod certo scit se admisisse: atqui in triplici illo dubio tenetur quis peccatum aperire, tum quia in dubio via tuta & secura, qualis Confessio, est eligenda: tum quia baptizandus est, qui cum fundamento dubitat an fuerit baptizatus.

Dixi, *si dubium sit cum fundamento*; Qui enim dubitat absque ratione probabili, dubium suum deponere debet. Unde qui scrupulis anguntur, vulgò prohibendi sunt, ne peccata dubia exponant.



## §. VI.

*Utrum Confessio Sacramentalis fieri possit  
per internuntios?*

R. Prohibuit Clemens VIII. Decreto suo anni 1602. quod sic se habet : *Auditis votis plurimum Theologorum , & re cum Illustrissimis ac Reverendissimis Cardinalibus contra hæreticam pravitatem Inquisitoribus maturè ac diligenter considerata , hanc propositionem , scilicet licere per litteras , seu internuntium Confessario absenti , peccata sacramentaliter confiteri , & ab eodem absente absolutionem obtinere , ad minus uti falsam , temerariam , & scandalosam damnavit ac prohibuit ; præcepitque ne deinceps ista propositio publicis privatisque lectionibus , concionibus , & congressibus , doceatur , neve unquam tanquam aliquo casu probabilis defendatur , imprimatur , aut ad praxim quovis modo deducatur.*

Cùm autem Suarez tom. 4. in 3. part. Sancti Thomæ sect. 4. docuisset Decretum Clementis VIII. collectivè , non verò divisivè esse accipiendum ; ita ut Summus Pontifex non prohibeat præcisè Confessionem fieri per litteras aut internuntium in ordine ad absolutionem accipiendam , cùm Sacerdos præsens adfuerit ; sed utramque simul , nempe confessionem & absolutionem , per litteras , aut internuntium exhibitam Paulus V. anno 1605. jussit hancce Suaris expositionem ex scriptis ejus expungi.

Q. 2. *Ante prohibitionem Clementis VIII. fuitne licitum aliquando absenti Confessario confiteri per litteras , & ab illo absolvi ?*

R 5

R. Di-

## R. Dissentiunt Theologi.

Alii affirmant, probantque variis exemplis Sacramentum Pœnitentiæ ita fuisse collatum. 1. Apostolus 2. Cor. cap. 2. absens Corinthium incestum absolvit. 2. Eusebius libro 6. historiæ cap. 36. refert Presbyterum quemdam vi morbi in lecto detentum, per puerum misisse Eucharistiam ad Serapionem pœnitentem, quod supponit per illum internuntium fuisse absolutum. 3. Patres Concilii Duziacensis anno 872. absolverunt Robertum Cenomanensem Episcopum, ut ipse periculosè decumbens ab illis per literas exposcaverat. 4. Hincmarus Archiepiscopus Remensis nono sæculo Hildeboldum Sueffionensem Episcopum ægrotantem per literas absolvit. 5. Potamius Braccarensis Archiepiscopus, per litteras absolutionem obtinuit à Patribus Concilii Tolletani X. 6. Sanct. Thomas Cantuariensis eandem gratiam ab Alexandro III. scripto consecutus est.

Confirmatur hæc sententia exemplo matrimonii, quod licitè ac validè celebratur per internuntium.

Alii Theologi contra contendunt Sacramentum Pœnitentiæ nunquam nisi à præsentente Sacerdote fuisse collatum, probantque ex Veterum testimoniis. 1. Auctor de vera & falsa Pœnitentia apud sanctum Augustinum, cujus verba referuntur cap. *Quem pœnitet*, de Pœnitentia distinct. 1. *præcepit Christus*, inquit, *mundandis Leprosis*, *ut ostenderent ora sua Sacerdotibus*, *docens præsentia sua confitendum peccata.* *Non aliud teneatis modum; qui per vos peccastis; per vos erubescatis.* 2. Synodus Ne-  
mau-

maufensis anno 1284. *Non debent confiteri per nuntium, vel per scripturam, sed viva voce, ore proprio, & præsentialiter, ut qui per se peccavit, per seipsum confiteatur, & erubescat.* 3. Sanctus Thomas quodlibeto 1. articulo 10. ex professo probat non licere confiteri scripto, aut alio signo, quàm voce, nisi in casu necessitatis: tum quia oris confessio majori pudore pœnitentem suffundit: tum quia in Sacramentis adhibenda est materia in usu communior, ut aqua naturalis in Baptismo, panis triticeus in Eucharistia: atqui voces sunt signa quibus homines intimos cordis sensus vulgò manifestant: Ergo.

Ad exempla pro opposita opinione laudata, respondent Patroni hujusce posterioris sententiæ; in iis non agi de absolutione Sacramentali; sed vel de absolutione à censuris, qua pœnitentes restituebantur communioni Ecclesiæ: vel de relaxatione pœnarum canonicarum, & concessione Indulgentiarum, quas Summi Pontifices largiri solent infirmis in mortis periculo constitutis: vel de absolutione cæremoniali, qualem Episcopi feria quinta in majori Hebdomada, & Parochi die Sancto Paschæ publicè impertiunt Christi auctoritate, cujus verba in hujusmodi cæremonia expressè commemorant, *quæcumque solveritis super terram, &c.* Multa autem in allatis exemplis hancce expositionem suadent. Namque 1. Sanctus Paulus absens incesto Corinthio, sed Pœnitenti, donavit quod obsecrat donari à præsentibus ejus contribulibus: *Obsecro vos, inquit cit. capite 2. ut confirmetis in illum charitatem.... cui autem aliquid donastis, & ego; nam & ego quod donavi, si quid donavi, propter vos in persona Christi.* Atqui

Atqui ab omnibus non est collata absolutio sacramentalis. Quid igitur Apostolus hic concessit, & a Corinthiis concedendum rogat : pœnarum relaxationem, & cum Fidelibus communionem, qua incēstus fuerat interdictus.

2. Eusebius narrat quidem Eucharistiam ad Serapionem pœnitentem, & in extremis positum, delatam fuisse per Presbyteri puerum ut per eam Communioni Ecclesiasticæ restitueretur, & sic in pace ad Dominum proficisceretur; sed mera fictio est, puerum illum absolutionem sacramentalem detulisse, cum Eusebius ne verbum quidem faciat de confessione & absolutione.

3. Hincmarus, ex Sirmundo in notis ad tertium tomum Conciliorum Galliæ, hortatur Hildeboldum, ut Sacerdoti specialiter peccata sua confiteatur.

4. Alexander III. Sanctum Thomam Cantuariensem admonet, ut si quid commisit, de quo propria conscientia debeat remordere, illud Sacerdoti, qui discretus sit & providus, confiteatur: ergo nec Hildeboldus ab Hincmaro, nec S. Thomas ab Alexandro III. fuerunt sacramentaliter absoluti; confessio enim absolutionem sacramentalem necessario præcedit.

5. Potamius, qui scripto Confessionem suam ad Concilium miserat, crimen postea præsens in eodem Concilio confessus est, & statum depositus, ac perpetuæ pœnitentiæ addictus, altero in ejus Sedem suffecto.

Q. 2. *Post decretum Clementis VIII. Confessio per literas aut internuntium, foretne non solum illicita*

*licita, sed etiam prorsus nulla, & Sacramentum irritum?*

R. Dissentiunt Theologi. In hac autem controversia illud nobis videtur verius,

1. Absolutionem per literas aut internuntium ante Decretum Clementis non potuisse valere, multò minùs posse post idem Decretum, nec Summus Pontifex in hac parte novam sanxit legem: sed Apostolicam Traditionem vindicasse: Quia Sacramenta novæ legis rebus & verbis constant ex Decreto Eugenii IV. pro Armenis: verba autem illa in sensu metaphorico interpretari non licet sine auctoritate Ecclesiæ, quæ nunquam declaravit formam Sacramenti pœnitentiæ scripto esse validam.

Frustrà Patroni prioris sententiæ opponunt matrimonium, quod per literas, aut internuntium valet; in his enim, quæ ex libera Christi voluntate pendent, non admittitur argumentatio à pari. Quanquam, si admittatur ista discurrendi ratio, quinque Sacramenta opponimus, nempe Baptismum, Confirmationem, Eucharistiam, Ordinationem, & Extremam Unctionem, quæ non nisi proprio Ministri ore confici queunt. Ut ergo excipiat Sacramentum Pœnitentiæ, proferri debet indubitata Ecclesiæ auctoritas, quemadmodum ipse Eugenius expressis verbis Sacramentum matrimonii à communi regula exceptit.

2. Rata & valida est absolutio ore Ministri collata præsentì pœnitenti, qui per literas aut internuntium confessus est, cùm aliter non potuerit, ut muti, quorum aliquando peccata scripto excepimus; & moribundi, quorum præcedens

dens Confessio, seu confitendi desiderium Sacerdoti non innotescit, nisi per testes sive internuntios, & ita Clementem VIII. declarasse testatur Armacanus.

## §. VII.

*De secreto Confessionis.*

Q. 1. *Modus confitendi secretò ejus à Christo institutus ac præceptus?*

R. Christus, ex Concilio Tridentino sess. 14. cap. 5. ita instituit Confessionem secretam, ut non vetuerit, quominus justis de causis aliquando publicè fieri possit: *Quoad modum confitendi secretò apud solum Sacerdotem*, inquit S. Synodus, *etsi Christus non vetuerit, quin aliquis in vindictam suorum scelerum, & sui humiliationem, cum ob aliorum exemplum, tum ob Ecclesiæ offensæ ædificationem, delicta sua publicè confiteri possit: non est tamen hoc divino præcepto mandatum, nec satis consultè humana aliqua lege præciperetur, ut delicta, præsertim secreta, publica essent confessione aperienda.* Quibus verbis tria docent Tridentini Patres:

1. Christum non mandasse ut omnia peccata publicè aperiuntur. 2. Probandum esse si quis aliquando in sui humiliationem, & aliorum ædificationem peccata sua publicè declaret & ejuret. 3. Non sine gravioris incommodi periculo eam fore legem, qua præciperetur, ut omnia peccata, etiam secreta, publicè aperiuntur.

Q. 3. *Unde probantur tres illæ Concilii propositiones?*

R. Ex constanti Ecclesiæ Traditione & disciplina, cujus locupletes testes sunt Socrates, Sozomenus; Sanctus Chrysostomus; S. Leo, &  
alii,

alii, quos appellavimus pro necessitate Confessionis.

Socrates lib. 5. historiæ cap. 19. *Ecclesiarum Episcopi, inquit, canoni adjunxerunt, ut in singulis Ecclesiis Presbyter quidam pœnitentiæ præesset: quod, qui post Baptisimum lapsi fuissent coram Presbytero ad eam rem designato, peccata sua confiterentur. Et infra: Mulier quædam nobilis ad Presbyterum Pœnitentiarium accedit, peccata, quæ post Baptisimum commiserat, particulatim confitetur.*

Sozomenus l. 7. c. 16. *Cum prorsus, inquit, non peccare naturæ sit humana diviniore; pœnitentibus autem, quamvis frequenter deliquissent veniam dare Deus jusserit, ad impetrandam denique veniam confiteri necessarium sit; odiosam, ut credibile est, Sacerdotibus ab initio visum fuit tanquam in theatro audiente Ecclesiæ multitudine delicta pronuntiare.*

S. Chrysostomus hom. 6. de incomprehensibili Dei natura, sic habet: *Non te in theatrum conservorum tuorum duco, non hominibus peccata tua detegere cogo.*

S. Leo epist. 80. c. 3. ad Episcopos Campaniæ: *Illam, inquit, contra Apostolicam regulam præsumptionem, quam nuper agnovi à quibusdam illicita usurpatione committi, modis omnibus constituo submoveri; ne videlicet de singulorum peccatorum genere libello scripta professio publicetur, cum reatus conscientiarum sufficiat solis Sacerdotibus indicare Confessione secreta. Quamvis enim plenitudo fidei videatur esse laudabilis, quæ propter Dei timorem apud homines erubescere, non veretur; tamen quia non omnium ejusmodi sunt peccata, ut ea, quæ pœnitentiam poscunt, publicare non vereantur, removeatur tam improbabilis consuetudo. Ex his verbis constat alicubi præceptam fuisse publicam peccatorum etiam*

etiam occultorum confessionem; sed S. Leo morem illum reprobat uti contrarium Traditioni Apostolicæ, & Ecclesiæ universalis disciplinæ.

Dices: lex publicæ pœnitentiæ pro omnibus peccatis, tam publicis, quàm occultis ubique in Ecclesia per plura sæcula obtinuit: atqui pœnitentes publicè confitebantur ea peccata, pro quibus pœnitentiæ stadium decurrebant: ergo secundum priscam universalis Ecclesiæ disciplinam omnia peccata etiam occulta publicè exponebantur.

Minor probatur variis Antiquorum testimoniis. S. Irenæus suprà laudatus narrat mulieres à Marco præstigiatore corruptas, crimen suum palàm confessas. Atqui ejusmodi crimen præcæteris secretò & absque testibus committitur. Origenes hom. 3. in Levit. sic scribit: *Si quid in occulto egerimus, si quid in sermone solo, vel etiam intra cogitationum secreta admisimus, cuncta necesse est publicari, cuncta proferri.* Enimverò cur pœnitentia publica, quam multi, ex Tertulliano, refugiebant ut publicationem sui, dicebatur exomologesis seu accusatio, nisi quia publica peccatorum confessio ab ea erat indivulsa?

Transeat major, quam confutabimus ubi de Satisfactione, Nego minorem; contrarium enim constat ex Socrate, Sozomeno, S. Chrysostomo, & S. Leone mox laudatis.

Ad confirmationis autem singula capita respondeo:

Ad primum. Mulieres illæ, de quibus S. Irenæus, vel spontè, sive ex consilio Sacerdotis crimen suum palàm confessæ sunt, vel, quod verisimilius est, ex circumstantiis convictæ sunt; vix enim dubium esse potest, quin per inquisitionem  
in



in Marci præstigias & opera magica detectæ sint ejus spurcitæ, & infanda crimina. Unde non mirum est quodd mulieres illæ, quæ ipsi adhæserant, facinus suum in publico conventu confessæ sint; certum quippe est eos, qui palàm sive per hæresim, sive per schisma ab Ecclesia defecerant, & alios insignes ac publicos peccatores Communioni Ecclesiæ non fuisse restitutos, quin prius publicè errores suos ac flagitia ejurassent.

Ad secundum ex Origene petatum, respondeo distinguendo, si quid sermone, vel etiam intra cogitationum secreta commisimus, necesse est cuncta publicari, cuncta proferri prudenti & discreto Sacerdoti, Concedo: in publico conventu, Nego, & quidem ad mentem Origenis; nam in Psalm. 35 postquam admonuit cautè seligendum esse Sacerdotem, apud quem deponamus peccata nostra, hæc addit: *Si quid ille dixerit . . . si quid consilii dederit ut facias & sequaris: si intellexerit & præviderit talem esse languorem tuum, qui in conventu totius Ecclesiæ exponi debeat & curari, ex quo fortassis & cæteri ædificari poterunt, & tu ipse facile sanari: multa hoc deliberatione & satis periti Medici illius consilio procurandum est.* Ergo juxta Originem ex peccatis ad aurem Sacerdotis expositis, alia claudi debent secreti sigillo: alia secundum antiquum morem erant publicè referenda. Idem innuere videtur Sanctus Augustinus serm. 351. aliàs hom. 50. ubi de peccatore, qui ad Antistites Ecclesiæ venire debet, & ab ipsis satisfactionis modum accipere, sic loquitur: *Id agat, quodd non solum illi proffit ad recipiendam salutem, sed etiam cæteris ad exemplum: ut si peccatum ejus non solum in gravi ejus malo, sed etiam in tanto scandalo est aliorum, atque etiam hoc expedire utilitati*

*Ecclesiæ videatur Antistiti, in notitiam multorum, vel etiam totius plebis agere pœnitentiam non recuset.*

Ad tertium. Cum publici pœnitentes solemniter profiterentur se graviter deliquisse, & idcirco non solum durioribus pœnitentiæ operibus se subjicerent, sed etiam sacco induti ad Fidelium pedes se prosternerent, &, ut loquitur Tertullianus, adgenicularentur, non mirum quod multi illud stadium decurrere erubescerent, præsertim si conscii essent eorum peccatorum, quæ Sacerdos palàm declare imperabat. Exomologesis ergo, seu confessio indivulsa erat pœnitentia publica, 1. quia pœnitentes Sacerdoti privatim omnia peccata sua aperiebant. 2. quia graviora ex iis palàm confiteri cogebantur, si essent publica, vel testibus probari possent. 3. quia reos se coram omnibus generatim pronuntiabant.

Q. 3. *Quo jure necessarium est Confessionis sigillum?*

R. Triplici; naturali, divino & Ecclesiastico. Sacerdos igitur, qui revelat secretum Confessionis,

1. Peccat contra legem naturalem, qua tenemur clausum servare, quod sub secreto nobis committitur.

2. Peccat contra legem divinam, qua præcipitur Sacramentalis Confessio; quia si Sacerdoti licitum esset aliquando revelare quod sacramentaliter excepit, de medio tolleretur usus Confessionis; quis enim vellet arcana conscientiae suæ detegere cum famæ, aliquando etiam vitæ periculo?

3. Denique peccat contra legem Ecclesiasticam in Concilio Lateranensi IV. latam can. *Omnis utrius-*

utriusque sexus, his verbis: *Caveat omnino Sacerdos, ne verbo, aut signo, aut alio quovis modo aliquatenus prodatur peccatorem . . . qui peccatum in pœnitentiali iudicio sibi detectum præsumpserit revelare, non solum à sacerdotali officio deponendum decernimus, verum etiam ad agendam perpetuam pœnitentiam, in arctum monasterium detrudendum.*

Q. 4. *Quàm arcta est obligatio sigilli Confessionis?*

R.. Ex laudato Concilio Lateranensi, tanta est hujus secreti religio, ut nullo prorsus casu violari debeat.

Q. 5. *Unde repetitur tam arcta obligatio?*

R. Repetitur præsertim ex præcepto divino, seu ex institutione Sacramenti; namque ex Sancto Thoma 2. 2. quæst. 10. artic. 1. ad secundum, fides secreti (si spectetur solum jus naturale) non obligat in grave præjudicium boni communis: at secretum Confessionis nunquam violare licet, etiam si gravia ex silentio imminerent Reipublicæ incommoda, aut ipse Sacerdos gravissima quæque tormenta, & mortem aliter declinare non posset. *Dicendum, inquit Angelicus Doctor, quodd de illis, quæ homini sunt commissæ in secreto per Confessionem, nullo modo debet testimonium ferre; quia huiusmodi non scit ut homo, sed tanquam Dei Minister, & majus est vinculum Sacramenti quolibet hominis præcepto. Circa ea verò, quæ aliter homini sub secreto committuntur, distinguendum est. Quandoque enim sunt talia, quæ statim cum ad notitiam hominis venerint, homo ea manifestare tenetur; puta si pertinent ad corruptionem multitudinis spiritualem; vel corporalem, vel in grave damnum alicujus personæ, vel si quid aliud est huiusmodi, quod quis propalare tenetur vel testificando, vel denuntiando,*

*Et contra hoc debitum obligari non potest per secreti commissum.*

*Q. 6. Quid respondere debet Sacerdos à Judice interrogatus de crimine, quod sola Confessione didicit?*

R. Sacerdos absque periculo mendacii, aut æquivocationis, & perjurii simpliciter respondebit se id nescire, quia responsio est ad mentem interrogantis, juxta omnium Catholicorum judicium, qui prudenter præsumunt Judicem fidelem non interrogare de iis peccatis, quæ sola Confessione Sacramentali innotuerunt. Imò si Sacerdos sit Pastor, & eo titulo Parochianorum suorum Consiliarius, voceturque ad ferendum testimonium adversus unum ex illis, opponet Judici suum officium Pastorale, quo gaudere debet privilegio Advocatorum; qui immunes sunt à testimonio ferendo adversus eos, qui illorum utuntur consiliis, alioquin non staret humana societas, si privati in negotiis difficilioribus consilium à peritis tutò capere nequirent. In casibus tamen extraordinariis, in quibus constaret Pastorem non ex iis, quæ fidei suæ commissæ sunt, sed ex visu fortuito testari, non eximeretur à testimonio ferendo contra Parochianum si necessum foret ad comprimendum malum.

*Quid si pœnitens Sacerdotem provocet ad Superiorem ob denegatam absolutionem, ipsique licentiam concedat exponendi causas repulsæ?*

R. Non licet Superiori discutere ejusmodi controversiam; forum enim, internum Dei est, non hominum. Ad summum poterit delegare alium prudentem Sacerdotem, qui excipiat hujusce pœnitentis confessionem: nec Confessarius uti potest ejusmodi licentia ad respondendum  
conces-

concessa; pugnat enim contra reverentiam Sacramenti, quod nunquam ad forum externum & contentiosum transferre licet.

Q. 7. *Quale est peccatum sigilli infractio?*

R. Sæpe est mortale in genere sacrilegii, quia minima infractio gravem infert Sacramento injuriam, utpote quæ Fideles ab eo revocet, & confessionem odiosam reddat.

Q. 8. *Quotuplici modo violari potest secretum Confessionis?*

R. Duplici, scilicet directè, & indirectè.

Violatur directè, cum verbis conceptis panduntur quæ in Confessione sunt exposita, etiam si illa ipso facto sint publica, Sacerdos v. gr. directè violaret sigillum, si diceret publicum Clerici percussorem crimen esse confessum, vel non confessum: indirectè verò cum ex dictis, vel factis Confessarii colligitur quod ipsi in confessione fuit declaratum.

Ergo Sacerdos reus est violati sigilli. 1. Si dicat se non eum absolvisse cujus confessionem excepit. Quando igitur scripto testatur apud Pastorem se confessionem Parochiani, quem ad se miserat, audivisse, de absolutione sive data, sive dilata, semper fileat. 2. Si unum præ aliis, quos audivit, laudans dicat illum nonnisi levia admodum peccata declarasse; inde enim faciliè colligitur alios gravioris culpæ esse conscios. Caveant igitur qui præficiuntur eorum audiendis confessionibus, qui ad mortem damnantur, ne quovis modo significant Ministris Justitiæ hunc, vel illum esse innocentem; quia de aliis silendo indirectè significarent eos se probasse reos. 3. Si propter nonnullas difficultates in Confessione

occurrentes ita consilium petat, ut ex circumstantiis incautè expositis, pœnitens in illius notitiam venire possit, quem consulit. Exemplum affero: Sacerdos consulens sic exponat: *heri ad me accessit, vel, ad ægrotum vocatus sum. & ejusmodi crimen confessus est.* In hac hypothese contingere potest: & revera contigisse scio, ut qui consulitur, deprehendat quis tali die peccata sua apud consulentem deposuerit. In consiliis ergo captandis omittendæ sunt circumstantiæ temporis & loci prorsus inutiles, & si quæ sint necessariò exponendæ cum secreti periculo: non licet Sacerdoti consulere sine libero pœnitentis consensu. Denique ad vitanda omnia infractionis pericula, Sacerdotes in confabulationibus nunquam de Confessionibus, quas exceperunt, loquantur præsertim coram Laicis, qui inde vulgò patiuntur scandalum.

Q. 9. *Duo Sacerdotes, qui unius & ejusdem pœnitentis Confessionem identidem excipiunt, possuntne consilii captandi causa inter se colloqui de peccatis, quorum pœnitens ille se consciam sæpè sæpius confitetur absque emendatione?*

R. Non possunt sine infractione sigilli, nisi pœnitens in id liberè consenserit.

Q. 10. *Licetne Sacerdoti sermonem habere cum ipsomet pœnitente de iis, quæ in Confessione aperuit?*

R. Quàmvis non violet secreti sigillum; extra confessionem tamen non licet, nisi prius ab ipsa obtenta venia: Si Sacerdos, inquit S. Carolus parte 2. cap. 20. Instruct. *necessitate coactus cum ipsomet pœnitente de peccatis loqui debeat, id nonnisi præfata venia faciat.* Quia isthæc agendi ratio pœnitentibus

tibus molesta est, & odium in confessionem concitat.

Limitat tamen Suarez disp. 33. sect. 5. *Nisi Confessor commisit defectum in Confessione, ex quo obligatur ad pœnitentem monendum, quia tunc jam verè non loquitur extra confessionem, sed supplet & perficit eam, quæ inchoata & imperfecta manserat, & pœnitens tunc est irrationabiliter invitus.*

Dixi, *extra confessionem*; nam in Confessione Sacerdos debet, quando necessitas postulat, obijcere pœnitenti, quòd satis sibi non caveat, cum idem peccatum sæpius sit confessus: nam ex dictis peccandi consuetudo pertinet ad integritatem confessionis, exigit à Sacerdote specialia monita, ac fortiora remedia, & alio modo curanda est lepra perseverans, alio modo lepra volatilis, ut dicitur Levitici c. 13.

Q. 11. *Quenam sigilli secreto clauduntur?*

R. Ea omnia, quæ per confessionem deteguntur, scilicet peccata sive gravia, sive levia, focii criminis, tentationes, rustici mores, & alii naturales defectus, ac denique quidquid revelatum pœnitenti molestiam faceretur, & Confessionem odiosam redderet.

Q. 12. *Potestne Sacerdos de consensu pœnitentis reserare Confessionis sigillum?*

Respondet auctor Supplementi ad tertiam partem Summæ S. Thomæ, posse, modò consensus non sit extortus, & secundum quid involuntarius; quia qui potest aliquid facere per se, potest & per alium. Atqui pœnitens potest peccatum suum alteri revelare: ergo potest per Sacerdotem. Monet tamen cavendum scandalum, ne fractor sigilli prædicti reputetur. Et in responsione

ad tertium docet, Sacerdoti, si accusetur, incumbere probandum, quodd de licentia pœnitentis revelaverit. Est & aliud periculum Sacerdoti timendum, ne scilicet fictus pœnitens ex appetitu vindictæ, aut alio pravo affectu falso accuset innocentem, ut qui per se fidem facere nequit, per Confessarium criminationem probabilem reddat. Quamobrem Confessarius monendi onus in se non suscipiat, nisi grave malum aliter vitari nequeat, & prudenti consilio quæ sequi possint incommoda præcaveat.

Dixi, *modo consensus non sit extortus*: quia minis, v.g. denegandæ absolutionis extorqueri non debet, nec sic obtento uti licet.

Dicens: pœnitens tenetur detegere socios criminis, quando sunt Rei publicè noxii: civem, qui adversus civitatem, aut Principem cum hoste init consilia; Pastorem, qui clanculum disseminat errores, vel subditorum mores corrumpit, & alias Reipublicæ pestes. Refert Eusebius Hist. lib. 7. c. 6. Heraclam Alexandrinum Episcopum non admisisse eos, qui ab hæresi veniebant, *quoad omnia, quæ ab adversariis audivissent, palàm apud omnes essent elocuti.*

S. Augustinus serm. 392 aliàs hom. 49. inter 50. *Ego moneo, inquit, ego præcipio, ego jubeo, Episcopus jubet, Christus in me jubet, nolite viros vestros permittere fornicari, interpellare contra illos Ecclesiam.* Et epist. 236. aliàs 74. ad Deuterium, non vult Subdiaconum ex hæresi Manichæorum ad pœnitentiam admitti, nisi prius manifestaverit quos novit in eadem impietate versari. Ergo in iis & similibus casibus Sacerdos consensum à pœnitente



te extorquere potest, ut eos revelet, à quibus proximus vel Respublica cavere debet.

Nego consequentiam; ex eo enim quòd pœnitens teneatur avertere, cùm possit, grave malum Reipublicæ vel proximo impendens, non sequitur Sacerdoti licere minis denegandæ absolutionis extorquere à pœnitente, ut fontes quos novit, ipsi declaret, multò minùs, ut licentiam concedat illos manifestandi iis quorum interest: hæc enim agendi ratio pugnat contra reverentiam Sacramenti, & solvit omninò Confessionis sigillum.

Hoc igitur unum ex antecedente concludere licet, nempe sine absolutione dimittendum pœnitentem, qui in allatis circumstantiis non vult sive per se, sive per alium avertere malum proximo vel Reipublicæ imminens. Quò in casu non tam opponitur onus pœnitenti, quò Confessio in odium veniat, quàm declaratur obligatio implendæ legis naturalis & divinæ, cui nisi parere velit, absolvendus non est quemadmodum injustus rei alienæ detentor, qui restituere detrectat.

Q. 13. *Potestne Sacerdos prodere quod aliunde novit, quàm ex Confessione Sacramentali?*

Respondet idem auctor Supplementi q. 11. art. 4. posse, quando testimonii ferendi imminet necessitas; alioquin posset impediri justitia Ecclesiæ, si aliquis ut evaderet sententiam excommunicationis, quæ in ipsum ferenda esset propter aliquod peccatum, de quo convictus est, confitetur ei, qui sententiam ferre debuisse.

Nec dicas ejusmodi revelationem injicere suspicionem violati sigilli. Namque ex eodem au-

ctore, 1. amovebitur illa suspicio, si dicat Sacerdos, *ego vidi*, vel, Titus & Cajus duo probati testes se vidisse retulerunt. 2. quia veritas non est propter scandalum deferenda: *Et ideo*, inquit, *quando imminet periculum justitiæ & veritatis, non debet dimitti revelatio ejus, quod audivit quis in confessione, si aliter sciat, propter scandalum, verumtamen scandalum, quantum in se est, evitare tenetur, nempe cum loquendi nulla existit necessitas: ut expressè docet in eo corpore articuli.*

Q. 14. *Licetne uti notitia in Confessione comparata?*

R. 1. Clemens VIII. anno 1594. prohibuit omnibus Regularibus, ne hacce notitia uterentur ad gubernationem exteriorem; sic enim in suo Decreto statuit, *tam Superiores pro tempore existentes, quàm Confessarii, qui postea ad Superioritatis gradum fuerint promoti, caveant diligentissimè ne ea notitia, quam de aliorum peccatis habuerunt, ad exteriorem gubernationem utantur.*

R. 2. Non licet uti ea notitia cum gravamine pœnitentis, aut qualibet læsione sigilli Confessionis. Responsio probata manet ex dictis ad tertiam & quintam quæstionem, sed elucidatur quibusdam exemplis.

Non licet Sacerdoti 1. fugere, aut à Sacrificio abstinere; quia ex Confessione didicit sibi parari insidias, aut venenum in vino Sacrificii fuisse immissum, si reus præconcepti criminis inde colligat pœnitentem nefandum consilium detexisse, ac propterea iram in illum convertat. 2. denegare Sacramenta, puta Eucharistiæ, Matrimonii, pœnitenti coram vel uno teste postulandi, etiam si sine absolutione illum dimiserit, noveritque, se ex sola Confessione Sacramentali, ligatum im-

impedimento dirimente. 3. Sacris interdicere Sacerdotem subditum, vel rejicere canonicè electum seu præsentatum propter crimina sola confessione detecta. 4. vitare excommunicatum qui confessus est se Clericum interfecisse.

R. 3. ex communi Theologorum sententia, licet uti notitia per Confessionem acquisita, si duo concurrant, nempe illibatum maneat secreti sigillum, & nullum inde pœnitens gravamen patiatur. Potest v.g. Confessarius frequentius orare pro pœnitente, quem ex Confessione novit versari in gravi salutis periculo, cautior esse in re familiari, quam à confitente didicit malè administrari; diligentius invigilare gregi suo, si sit Pastor; in concionibus generatim invehi in vitia, quæ occultè grassantur; fugere locum, ubi insidias sibi parari, & abstinere à Sacro faciendo, in quo enecandum se veneno à pœnitente præmonitus est, quando habet ad manum occasiones, & prætextus, quibus omnem infracti sigilli suspicionem amoveat, & pœnitentem in tuto collocet. Et ratio est, quia in hac hypothese nec Sacramento, nec pœnitenti ulla fit injuria.

Dissemulandum tamen non est circa tertiam hancce responsionem occurrere nonnullos casus difficiles, qui dividunt Theologos.

1. Pœnitens, qui sine absolutione dimissus est ob pravam animi affectionem, nihilominus Eucharistiam petit à Confessario sine ullo teste, denegabitne Confessarius? quamvis enim sigillum Confessionis non infringat, nec ullum nocumentum pœnitenti inferat, quodammodo tamen ipsi exprobrat, & odiosam Confessionem reddit.

2. Episcopus statuerat apud se conferre Beneficium

ficiū Sacerdoti optimæ famæ; sed ex ejus Confessione didicit esse flagitiosissimū, ambigitur an possit aut debeat mutare consiliū?

3. Cū non deessent Episcopo rationes removendi à sacro Officio Sacerdotem subditum, apud se decreverat illum dumtaxat commonere; sed audita ejus confessione, cognovit illum perditissimis esse moribus, & occasione sui officii alios corrumpere, ac propterea quamprimum removendum; difficultas est, an Episcopus debeat à prima sententia recedere, cū possit absque suspicionis periculo?

Affirmavit S. Thomas quodlib. 5. q. 7. art. 13. Si ergo, inquit, *amotio subditi ab administratione possit inducere ad manifestandum peccatum in Confessione auditum, vel ad aliquam probabilem suspensionem habendam de ipso, nullo modo Prælati debet ab administratione amovere . . . . Si verò per admonitionem ab administratione peccatum nullatenus manifestaretur, deberet hoc facere cum debita cautela.* Eadem habentur in Supplem. qu. 11. art. 1. ad tertium. S. Bonaventura in 4. dist. 21. qu. 1. art. 2. eandem amplectitur sententiam: *Dicendum, inquit, quòd Presbyter debet dissuadere ei qui confessus est, & similiter Decanus Clerico; & si ille petat, debet differre: & nisi ille cogatur per Superiorem, (vel per scandalum populi) non debet nec matrimonium tale benedicere.* Similia docent Alexander de Hales parte 4. quæst. 74. artic. 1. ad 9. Gabriel in 4. dist. 21. quæst. unica. Paludanus in quartum, qu. 21. art. 3. Adrianus in 4. de Sacra Confessione, & alii quos appellat Suarez disp. 33. sect. 7. ubi scribit hanc sententiam esse communem. Et quamvis in oppositam magis inclinet, utpote securiorem; sectionem tamen in hæc verba concludit

dit, quòd verò teneatur quis non uti illa scientia, affirmare non audeo propter dictorum auctorum sententiam, quæ intelligenda est ubi prohibitio humana non intervenerit. Enimverò cum timendum sit, ne Sacerdos, non ita se cautè gerat, quin pœnitentes alicui suspicioni exponat; Episcopi ad removendum omne periculum, Sacerdotibus subditis idem absolute prohibere possunt, quod Clemens VIII. Superioribus Regularibus, ne scilicet notitia per Confessionem comparata utantur ad exteriorem gubernationem. Sanbovius tamen Tomo 3. casu 18. existimat sigillum Confessionis ita esse in tuto in allatis tribus exemplis, ut Confessarius non solum possit, sed etiam sub gravi peccato teneatur uti illa notitia: quin Natalis Alexander in sua Theologia de sigillo Confessionis regula 56. prohibitionem Clementis VIII. non extendit ad illos singulares casus; quia ex Sancto Antonino, quem laudat, *negotium geritur inter ipsum (Confessarium) & Deum; unde potest ex iis, quæ scit ut Deus, judicare in proposito.*

## §. VIII.

*De Præcepto Ecclesiastico Confessionis.*

**H**ucusque egimus de præcepto divino Confessionis Sacramentalis, & de iis, quæ illud spectant: nunc pauca dicenda sunt de præcepto Ecclesiastico.

Neminem latet extare ejusmodi præceptum, cum omnes adhuc pueri inter prima Religionis Christianæ rudimenta à parentibus didicerimus hanc esse Ecclesiæ legem; *Tous tes pechez confesseras à tout le moins une fois l'an.* Lata autem est illa lex  
in

in Concilio generali Lateranensi IV. an. 1215. canone *omnis utriusque sexus*, & confirmata à Synodo Tridentina sess. 14. c. 5. & can. 8. Verba Concilii Lateranensis sunt : *Omnis utriusque sexus fidelis, postquam ad annos discretionis pervenerit, omnia sua solus peccata confiteatur fideliter, saltem semel in anno, proprio Sacerdoti, & injunctam sibi pœnitentiam studeat pro viribus adimplere . . . alioquin & vivens ab Ecclesiæ ingressu arceatur ; & moriens Christiana careat sepultura.* Plura in hac Canone continentur, sequentibus quæstionibus enucleanda. Itaque

Q. I. *Quinam huic Ecclesiæ præcepto subjiciuntur ?*

R. Omnes Fideles, sive masculi, sive fœminæ postquam ad annos discretionis pervenerint, hoc est, bonum à malo secernere cœperint, huic præcepto subjiciuntur. Prudens verò illa ætas accedit aliis citius, puta sexto vel septimo anno aliis tardius, scilicet octavo anno. Quapropter S. Carolus in Instruct. Confess. monet Sacerdotes, ut pueros, & puellas etiam sex tantum annorum doceant hujus Sacramenti virtutem & usum; *observent tamen, inquit, Sacramentalem eis absolutionem non largiri, in quibus materia non solet reperiri, nec talis rationis usus, unde eos ad hoc Sacramentum suscipiendum capaces judicent.* Modus autem eos probandi semper mihi visus est idoneus, si, ubi deliquisse se agnoscunt, salutaria illis pro modulò dentur monita differanturque ad breve tempus explorandi causa, num ratione, an sensu dumtaxat ducantur; si enim quæ sibi dicta sunt secum revolverint & observarint saltem ex parte, dubium non est, quin honestum ab iniquo secernant, capacesque sint præcepti, & transgressionis ac proinde præcepto Confessionis astricti quamvis ad per-

percipiendam Eucharistiam nondum idonei, cùm juxta præsentem Ecclesiæ disciplinam major ad eam requiratur consideratio.

Q. 2. Quando obligat illud præceptum?

R. Quolibet anno semel. Qua autem anni parte usus, non lex ipsa determinavit, scilicet tempus Quadragesimæ: quem morem, inquit Patres Tridentini sess. 14. c. 5. hæc sancta Synodus maxime probat, & amplectitur tanquam pium & ... retinendum. Sed in Ecclesia Gallicana Libri Rituales assignant tempus Paschale à Dominica Palmarum, ad Dominicam in Albis inclusivè, & Cle- rus Gallicanus ann. 1625. 1635. & 1646. declaravit omnes teneri tunc temporis confiteri proprio Sacerdoti, aut alteri de ejus consensu.

Q. 3. Qui conscii non sunt nisi peccati venialis, tenenturne illa lege?

Certum est non teneri lege divina, cùm ex institutione Christi peccata venialia non sint necessariò clavibus Ecclesiæ subjicienda. Videtur quoque extra controversiam, Ecclesiam posse præcipere, ut omnes tempore Paschali confiteantur, etiam ii, qui conscientiam non gerunt, nisi peccati venialis: nam Clementina, in agro Domini, Monachi jubentur confiteri quolibet mense, & Godegrandus Episcopus Metensis octavo sæculo statuit in sua Regula, ut *Monachi in unoquoque Sabbato confessionem suam faciant cum bona voluntate Episcopo, aut Priori suo.* Quis autem crediderit leges illas supponere viros religiosos singulis mensibus, aut hebdomadibus conscientiam suam peccatis lethalibus commaculare?

Quæstio igitur esse potest dumtaxat, an Concilium Lateranense legi annuæ Confessionis actu  
&

& de facto subjecerit eos, qui nonnisi peccati venialis sunt conscii?

R. Dissentiunt Theologi.

Negant non pauci; quia ex Tridentina Synodo sæpius cit. cap. 5. sess. 14. Concilium Lateranense novam legem non sanxit, sed solum statuit ut divinum præceptum Confessionis, saltem semel in anno, ab omnibus & singulis impleretur. Atqui præceptum divinum non obligat ad confitenda peccata venialia. Ergo.

Affirmant verò S. Bonaventura in 4. dist. 17. pag. 2. art. 1. q. 2. & S. Thomas eadem dist. q. 3. art. 1. quæstiunc. 3. ad tertium, ubi sic habet: *ex vi Sacramenti non tenetur aliquis venialia confiteri, sed ex institutione Ecclesiæ, quando non habet alia, quæ confiteatur.* Cui sententiæ plures è recentioribus astipulantur. Et ratio est, quia si lex Ecclesiastica nonnisi reos peccati mortalis ligaret, fideles cogi non possent ad Confessionem Sacramentalem, non solum tempore Paschali, sed etiam in toto vitæ decursu; quivis enim, exceptis qui in iudicio convicti sunt, opponere posset nullius criminis se esse conscium, ac proinde frustra minæ interdicti, & excommunicationis contra eos, qui tempore Paschali præcepto Ecclesiæ non obtemperaverint. Ergo ut præceptum divinum Confessionis religiosè servetur, & illius contemtores Communione Ecclesiastica privari possint, necessum fuit, ut Ecclesia omnes & singulos etiam solius venialis culpæ conscios lege sua constringeret; & ita corrui fundamentum negantis sententiæ.

Q. 4. *Satisfitne præcepto annua Confessionis per sacrilegam Confessionem?*

R. Mi.



R. Minimè : tum quia contraria opinio proscripta est ab Alexandro VII. anno 1665. & à Clero Gallicano anno 1700. tum quia Confessio sacrilega est nulla ; debitor autem non satisfacit per nummum adulterinum ; tum denique quia lex Ecclesiastica est determinatio divini præcepti implendi certo tempore : atqui præceptum divinum non impletur per Confessionem sacrilegam, Christus enim præcepit Confessionem sacramentalem ut medium necessarium ad salutem : porro Confessio sacrilega est salutis obstaculum, nedum medium.

Ergo reus est duplicis peccati, qui sistè confitetur tempore Paschali, quo diximus urgere præceptum annuæ Confessionis : 1. reus est sacrilegii propter irréverentiam erga Sacramentum : 2. inobedientiæ propter Ecclesiæ præceptum, quod non implevit. Unde qui se accusat accessisse ad tribunal pœnitentiæ sine necessariis dispositionibus, tenetur exponere circumstantiam violati præcepti Ecclesiastici.

Q. 5. *Qui toto anni cursu non est confessus, teneturne quamprimum satisfacere Ecclesiæ præcepto?*

R. Tenetur ; quia Ecclesia istam sanxit legem, ne ultra annum protraheretur divini mandati executio : atqui debitor, qui non solvit debitum tempore præscripto, liber non est à debito, sed tenetur quantociùs solvere : ergo qui præceptum Confessionis annuæ non implevit tempore ab Ecclesia determinato, tamdiu peccat, quamdiu causa procrastinat.

Dices : qui die Dominica sacro ex culpa non interfuit, non tenetur Sacrum audire die sequenti : ergo à pari.

D. Habert Theolog. Tom. VI.

T

Nego

Nego consequentiam & paritatem. Ratio disparitatis est, quòd præsentia Missæ Sacrificio sicut & vocatio ab operibus servilibus non præcipiantur, nisi ob diem sacram, sintque religiosi ritus, & veluti circumstantiæ ipsi indivulsè effixæ. Contra vero, præceptum Confessionis annuæ propter se primariò imponitur, licèt tempus illius implendi designetur festum Paschæ. Unde qui præceptum illud omisit tempore præfixo, illud postmodum implere tenetur, quemadmodum qui non jejunavit die Veneris ex mandato Confessarii; postea jejunare tenetur, quia jejunium primariò fuit impositum in expiationem peccati, secundariò tantùm in diei reverentiam.

Q. 6. *Pœna interdicti, de qua Canon, estne lata sententiæ, aut ferendæ?*

R. Est ferendæ dumtaxat, ut patet ex verbis Canonis. Quare Parochus non potest arcere ab ingressu Ecclesiæ, nec privare Ecclesiastica sepultura Parochianum, qui in Paschate non est confessus, nisi priùs intervenierit sententia Superioris.

Q. 7. *Quis est proprius Sacerdos in mente Concilii Lateranensis?*

R. Celebris est ista quæstio, cujus occasione diu multumque agitata est Ecclesia gravibus Theologorum variè opinantium discordiis & dissidiis.

Prima sententia fuit eorum, qui volebant proprium Sacerdotem ita strictè & rigorosè intelligi Parochum, ut excludantur Episcopi, & ipse Summus Pontifex, nec posse fieri; ne divinitus quidem, ut stante illo Concilii Decreto, validè quis confiteatur suo Episcopo, aut Summo Pontifici; quia

quia (inquirebant illi) manifesta esset contraditio non posse quempiam alteri confiteri, quàm proprio Pastori, seu alteri Sacerdoti de ejus consensu, & simul posse confiteri seu Episcopo, aut Summo Pontifici, vel aliis Sacerdotibus de eorum consensu.

Refellitur hæc sententia. 1. Sæpius damnata est, ac 1. quidem in Guillelmo de Sancto amore, & nonnullis Theologis Parisiensibus ab Alexandro IV. anno 1255. 2. in Joanne de Poliacò etiam Theologo Parisiensi, à Joanne XXII. anno 1321. 3. à Clero Gallicano anno 1655. occasione cujusdam Libri anonymi, in quo suscitabatur error Guillelmi de Sancto amore, & Joannis de Poliacò.

Refellitur 2. ex absurdo; quia si Parochianus haberet casus reservatos Episcopo vel Summo Pontifici, non posset absolvi à Parocho propter casus reservatos, nec etiam ab Episcopo aut Summo Pontifice, nisi prius uterque potestatem accepisset à Paracho absolvendi à casibus communibus, quo longè est absurdissimum.

Refellitur 3. quia Canon ille conditus est à Summo Pontifice, & Episcopis simul congregatis. Atqui nec Summus Pontifex, nec Episcopi voluerunt, quin nec potuerunt sibi adimere jus à Deo indivulsè annexum suæ dignitati.

Secunda Sententia extremè opposita est quorundam Regularium, qui contendunt per proprium Sacerdotem, intelligendum eum omnem, qui habet jurisdictionem ordinariam, qualem habent Summus Pontifex, Episcopi, & Parochi, qui eam delegare possunt quibus voluerint, opponique à Concilio Sacerdotem proprio Sacerdoti

alieno , qui nec ordinariam ; nec delegatam habet jurisdictionem. Ex qua interpretatione sequitur Regulares posse excipere Fidelium Confessiones , etiam tempore Paschali, invitis Parochis & Episcopis , modò habeant consensum Summi Pontificis ; namque ex Concilio Lateranensi omnes Fideles tenentur , saltem semel in anno , confiteri proprio Sacerdoti, vel alteri de ejus consensu : atqui Summus Pontifex est proprius Sacerdos omnium Fidelium , cùm jurisdictionem habeat ordinariam in tota Ecclesia ; & Regulares ab ipso licentiam acceperunt excipiendi Confessiones omnium Fidelium quovis tempore ; id enim ipsis concesserunt Alexander IV. anno 1256. Clemens IV. anno 1265. Bonifacius VIII. anno 1295. Benedictus XI. anno 1304. Eugenius IV. anno 1446. Leo X. anno 1516. & plures alii ante Concilium Tridentinum : post Concilium verò Tridentinum Clemens VIII. anno 1592. Innocentius X. in Brevis ad Archiepiscopum Burdigalensem anno 1645. in quo sic scribit : *Non potest Archiepiscopus Burdigalensis prohibere Regularibus habentibus Regularia Apostolica, ne à Dominica Palmarum usque ad Dominicam in Albis inclusivè administrare valeant personis sæcularibus Sacramentum Confessionis.* Clemens X. in sua Constitutione, *Superna*, anno 1670. in qua sic decernit, eos, qui dictis Religiosis simpliciter approbatis Paschali tempore confessi fuerint , *Constitutioni, quæ incipit. Omnis utriusque sexus , quoad Confessionem dumtaxat , satisfecisse censendos.* Quodnam autem judicium ferendum sit de hac sententia, & cujus ponderis sint momenta , quibus nititur , patebit ex dicendis, in confirmationem tertiæ sententiæ.

Tertia igitur sententia, cui subscribimus, sed de qua iudicium Sanctæ Sedis auctoritati deferimus, media incedit inter duas recensitas, asseritque per proprium Sacerdotem ita designari Parochum, ut non excludantur Summus Pontifex & Episcopi, quemadmodum Rex, dum constituit Iudices in Provinciis & Urbibus, apud quos incolæ jura sua prosequi tenentur, non adimit sibi potestatem adsciscendi ad suum supremum tribunal controversias ibidem nascentes, quoties expedire judicaverit.

Probatur 1. quia proprius Sacerdos eodem sensu cit. Canone usurpatur, quo Canone 32. ejusdem Concilii Lateranensis: atqui Canone 32. proprius Sacerdos est ipse Parochus, sicut enim habet: *Illud autem penitus interdicimus, ne quis in fraudem, de proventibus Ecclesiæ, quæ curam proprii Sacerdotis debet habere, pensionem alii quasi pro Beneficio conferre præsumat.* Hic proprius Sacerdos non potest intelligi, nisi Parochus; in eo quippe Decreto Patres occurrunt abusui quorundam Parochorum, qui lucri desiderio alienos Parochianos ad se pertrahebant, iisque communionem Paschalem impertiebant, & eo titulo jus decimas ab illis percipiendi sibi arrogabant. Istum abusum jam pridem compresserat Theodulphus Aurelianensis Episcopus in suo Capitulari 15. *Nullus Presbyter fidelibus de alterius Presbyteri Parochia persuadeat, ut ad suam Ecclesiam concurrant, relicta propria Ecclesia, & suas decimas sibi dent.*

Probatur 2. ex Summis Pontificibus, qui nomine proprii Sacerdotis Parochum intellexerunt, ut Innocentius Quartus anno 1250. Martinus IV. anno 1281 Constitutione, quæ incipit, *Ad ube-*

res : *Volumus. inquit, ut qui Fratribus confitebuntur, suis Presbyteris Parochialibus confiteri saltem semel in anno, prout Generale Concilium statuit, teneantur.* Benedictus XI. anno 1340. in Extravagante, *inter cunctas* ; Sixtus IV. anno 1478. Constitutione, *vices illius, de jure tenetur Parochianus saltem in Paschate proprio confiteri Sacerdoti.* Innocentius VIII. anno 1490. in Epist. ad Officialem Tornacensem mandat, ne Mendicantes de cetero Parochianos à confitendo sua peccata Rectoribus Parochialibus abstrahere, & eosdem ad id non teneri prædicare præsumant.

Probatur 3. ex Conciliis Provincialibus à Synodo Lateranensi usque ad hanc diem celebratis, quæ nomine proprii Sacerdotis Parochum intellexerunt, ut Tolosanum anno 1228. c. 13. Arelatense anno 1260. cap. 10. Senonense anno 1269. c. 4. Colonienſe anno 1282. cap. 8. Rothomagenſe anno 1299. cap. 6. Cameracense anno 1551. Mediolanense I. sub S. Carolo anno 1565. Remense anno 1583. Burdigalense anno 1629. & plura alia.

Dices : tertia hæc sententia est planè eadem cum secunda, nec videtur ab ea differre, nisi in modo loquendi. Ergo non est cur pro ea pugnetur adversus secundam.

Probatur antecedens. In utraque sententia Fideles satisfaciunt præcepto Confessionis annuæ, si peccata sua confiteantur sive Summo Pontifici, sive Episcopo, sive Parocho, sive alteri Sacerdoti de eorum consensu. Ergo perinde est, si in Canone : *Omnis utriusque sexus, proprius Sacerdos sit Summus Pontifex, vel Episcopus, vel Parochus, cum in utraque sententia Fideles præceptum*  
Con.

Confessionis annuæ impleant, si ex consensu Summi Pontificis, vel Episcopi, confiteantur alteri Sacerdoti, quàm Parocho, ac proinde nulla debet esse controversia inter Parochos secundæ & tertiæ sententiæ.

Nego antec. Quia si proprius Sacerdos non est ipse Parochus, ut contendit secunda sententia, Regulares ex generali delegatione sive Pontificis, sive Episcopi, possunt, sive consensu Parocho, excipere annuas Parochianorum Confessiones; secus, si in laudato canone Parochus designetur, quia juxta hanc posteriorem interpretationem Fidelibus præcipitur non simpliciter ut semel in anno confiteantur, sed speciatim, ut confiteantur proprio Parocho, vel alteri Sacerdoti de ejus consensu. Ergo cùm ista Confessio sit Parocho reservata, Regulares eam excipere non possunt ex generali facultate à Summo Pontifice, vel ab Episcopo sibi concessa audiendi Confessiones Fidelium; quia ex Regula 81. Juris in sexto, *in generali Concessione non veniunt ea, quæ quis non esset verisimiliter in specie concessurus.* Episcopus v.g. qui Sacerdoti facultatem generatim concedit sacramentaliter absolvendi per totam suam Diœcesim, non censetur tribuere facultatem absolvendi quascunque personas etiam Moniales, nec à quibuscunque casibus etiam ipsi reservatis, nec in quavis Confessione etiam Parochis reservata; gratia enim non præsumitur facta contra legem specialem, nisi superior expressè declaret velle se in hac parte legi derogare.

Instabis: Ex concessis Regulares ex speciali gratia Episcopi possunt excipere Confessiones annuas Parochianorum non consentientibus, renitentibus

tentibus etiam Parochis : Ergo cùm nonnulli Episcopi specialem illam gratiam faciant omnibus Regularibus, quos approbant ad Confessiones excipiendas, non est cur ipsi reclament, si quando Summus Pontifex iisdem Regularibus similem gratiam concedat, cùm ampliorem habet potestatem quàm Episcopi.

Respondeo 1. Retorquendo argumentum. Summus Pontifex ampliorem habet potestatem quàm Episcopi : Ergo æquè, imo magis ipsi competit, quàm Episcopis approbare Regulares, & alios quosvis Sacerdotes ad Confessiones excipiendas, quod ne ipsi Regulares asserere auderent contra tam multiplices Summorum Pontificum declarationes.

Respondeo itaque 2. Negando consequent. Quia non agitur hic de potestate Summi Pontificis, quam agnoscimus jure divino superiorem & ampliorem esse in ipso, quàm in Episcopis, sed de competente usu ejusdem potestatis; illam enim, quantacunque sit, non accepit Summus Pontifex, nisi in ædificationem : ad ejusmodi autem usum requiritur examen personarum, variarum circumstantiarum, & rerum singularium notitia, quam Summus Pontifex habere non potest uni loco affixus, & generalibus totius Ecclesiæ negotiis distentus. Sicut igitur non tam ex potestatis, quàm notitiæ defectu sua Rescripta in causis matrimonialibus & beneficiariis, ac cæteras ejusmodi gratias ad judicium Episcopi, aut ejus Officialis remittit; ita nec Concilium Tridentinum Episcopos supra Summum Pontificem erexit; dum decrevit nullum Sacerdotem sine cura animarum idoneum esse ad excipiendas Confessiones sæcularium,



larium, etiamſi Privilegiis Sedis Apoſtolicæ gaudeat, niſi in examine Epifcopi fuerit approbatus; Sed hocce Decreto ſignificavit dumtaxat penes ſolus Epifcopos eſſe expendere dotes ſingulorum Sacerdotum, quando, & ubi eorum minifteria plebi ſibi commiſſæ poſſunt eſſe utilia.

Non eſt igitur cur querantur Parochi, quòd Epifcopi, qui in Comitiiſ generalibus anni 1655. honorificum iſtud teſtimonium Summiſ Pontificiſ reddunt: *Depuis le Concile de Trente il n'y a point d'occafion où le Pape ne renvoye tous les Reguliers aux Eveques, pour recevoir d'eux le pouvoir de confeſſer; & ils ne l'ont point, s'ils n'obtiennent eſſectivement leur approbation;* Ipſi tamen eandem agendi rationem erga Parochos non ſemper obſervent; ſed quandoque Regulares delegent ad excipiendas annuas Confeſſiones Parochianorum, etiam non requiſito conſenſu Parochorum. Sicut enim alius eſt ordo Epifcopi ad Summum Pontificem, & Parochi ad Epifcopum; ita debet eſſe alia agendi ratio. Chriſtus in Eccleſia poſuit Epifcopos, qui, ſervato ordine ad Summum Pontificem, Diœceſes ſuas propria auctoritate adminiſtrarent, curas ſuas in omnes & ſingulos Fideles ſibi ſubditos conferrent, & proficua quæque eorum ſaluti providerent. Ad opus autem tam arduum ac varium cooperatores illis dedit Parochos. Cooperatores de induſtria dico, ne Parochi videantur tanquam mediſ Parochianos inter & Epifcopos, quemadmodum Epifcopi inter plebem ſibi ſubditam, & Summum Pontificem. Epifcopi quippe jure ordinario & immediato æquè Parochianis præſunt ac Parochis, poſſuntque Parochiani omiſſo Parochò, ad Epifcopum immediatè recur,

rere; non verò ad Summum Pontificem, omisso Episcopo, nisi in casibus Sedi Apostolicæ reservatis. Illud agnoverunt Parochi Parisienses in sua publica declaratione oblata Clero Gallicano anno 1656. Illud semper docuit Sacra Facultas Parisiensis, confirmavitque in Censura lata anno 1664. in Librum Jacobi de Vernant, in qua agnoscit potestatem jurisdictionis Curatorum esse immediatè à Christo, quantum ad primariam institutionem, *salva semper immediata Episcoporum in Prælatos minores seu Curatos, & plebem subditam auctoritate.*

Quæ cum ita sint, non mirum si Summus Pontifex Sacerdotes etiam Regulares ad examen Episcoporum semper remittat, an spectatis omnibus circumstantiis deputandi sint ad Confessiones excipiendas; Episcopi vero eos, inconsultis Parochis deputent, ubi, vel necesse est, puta, cum Parochus injustè Parochiano denegat facultatem confitendi extra Parochiam, vel saltem expedit propter rationes ipsis notas.

Q. 8. *Faciuntne satis præcepto Confessionis annuæ, qui sine licentia Parochi extra Parochiam confitentur Sacerdotibus generatim tantum approbatis?*

R. Si adsit consensus tacitus Episcopi, ut in Diœcesibus, ubi non urgetur executio Canonis *Omnis utriusque sexus*, satisfaciunt: secus, si eam Episcopus urgeat, ut in Diœcesi Remensi, Sueffionensi, Catalaunensi, & Virdunensi, in quibus ejusmodi Confessio declaratur irrita & iteranda.

Q. 9. *Parochi debentne faciles se exhibere Parochianis petentibus licentiam confitendi extra Parochiam?*

R. Debent: Tum quia id præscribunt Concilia ut Burdigalense anno 1624. S. Carolus in unde-

undecima Synodo Diœcesana : tum quia experientia docet Curatos in spirituale Parochianorum detrimentum , & æternæ damnationis periculum austeriores hîc se præbere ; gravia enim inde sequuntur peccata , & plura sacrilegia , quæ si perspecta haberent Curati , non ita sibi indulgerent , quòd Parochianos eò adduxerint , ut omnes peccata sua apud ipsos deponant. Optandum quidem est , ut ubi laudabilis viget disciplina , & Pastor sincero salutis Parochianorum studio ardet , singuli arcana suæ conscientiæ ipsi exponant ; sed timendum magis ne noxius pudor ora occludat , & sacrilegia usu Sacramentorum usque ad mortem multiplicet. Quapropter operæ pretium fuerit Parochum identidem extraneos Sacerdotes asciscere , maximè si solus in Parochia Confessiones excipiat , hortari ac urgere Parochianos , ut illis se sistant ; si enim Ecclesia solatium illud ac levamen Monialibus ter singulis annis providit , quantò minùs denegandum est rudioribus & rusticis ? *Peccaret Sacerdos* , inquit S. Thomas in 4. sent. & in supplem. quæst. 8. art. 4. *si non esset facilis ad præbendam licentiam alteri confitendo ; quia multi sunt adeò infirmi , quòd potius sine Confessione morerentur , quàm tali Sacerdoti confiterentur. Unde illi qui sunt nimis solliciti ; ut conscientias subditorum per Confessionem sciant , multis laqueum damnationis injiciunt , & per consequens sibi ipsis.*

Q. 10. *Licetne Parochis copiam facere petentibus Parochianis adeundi quos voluerint ex Sacerdotibus ab Episcopo approbatis ?*

R. Licet , si bene sint morati : secùs si malè , videanturque petere in fraudem disciplinæ ; rationem enim

enim Deo redditurus est Pastor de ovibus ; quas curæ ipsius commisit ; & si una ex iis perierit, ejus sanguinem de manibus ipsius requireret.

Dices : In tuto est illius conscientia, qui prudenter agit : atqui prudenter agit pastor, qui oves sibi creditas iis committit, quos Prælatus peritos & idoneos probavit, & judicavit : Ergo.

Vim potissimum in hoc argumento faciunt, hinc Parochi, qui vultum potentiorum verentur, & propriæ quieti magis consulunt, quàm subditorum salutem : inde ficti pœnitentes qui minùs animæ suæ vulnera curare, quàm occultare ac fovere sunt solliciti, sed quàm sit infirmum ac futile statim patebit. Itaque

Respondeo 1. Distinguendo minor. Si aliunde non constet obreptitiè obtentam esse approbationem, Conc. Si constet, Nego minor. Quia Prælatus ipse suam sententiam rescindit, ubi sibi obreptum comperit : aut enim imperitos judicavit peritos falso aliorum testimonio deceptus : aut cùm essent periti, imo peritissimi, ad nutum ejus in examine responderunt, cùm in praxi laxiores & perniciosas sequantur opiniones, aut sanæ sunt doctrinæ, sed mollioris indolis, & ad omnem auram mobilis. Ejusmodi autem vitia non in examine, sed sola experientia, & usu deprehendi queunt. Denique Parochus in propria causa non staret judicio sui Prælati per obreptionem contra se lato : quis ergo in causa Christi, in qua agitur de æterna salute ovium, quas proprio sanguine redemit, non timet illud opponere contra notam veritatem ?

Resp. 2. Esto extranei Confessarii sint omnes peritissimi, sanæ doctrinæ, & acerrimi legis tum  
divi-

divinæ, tum Ecclesiasticæ vindices, adhuc timendum est ex parte ficti pœnitentis, nisi mittatur ad probatos Confessarios, qui ex publica fama illum noverint; is quippe, cum religio illi non sit usuræ exercere, contractus injustos inire, officio suo etiam in gravioribus deesse, certò certius Confessario prudentissimo obrepet ignotus.

## CAPUT X.

### De Satisfactione.

**I**sta pœnitentiæ pars tertia videri posset non admodum necessaria, cum ex dictis sit tantum pars integrans, sine qua Sacramentum exire potest. Sed immeritò; quamvis enim satisfactio in actu non sit essentialis pœnitentiæ, sicut nec homini actuale judicium, nec arbori fructus; ad illam tamen pœnitentia necessariò ex natura sua tendit, non secus ac radix ad fructum, ad quem inserta est, & natura humana ad ratiocinandum; adeò ut quemadmodum homo non est, qui rationalis non fuerit; ita nec verè pœnitens dicendus sit, qui in votis non habet plenam exhibere satisfactionem, quam exigit divina justitia. Hoc præstructo fundamento

Circa satisfactionem quatuor elucidanda occurrunt. Primum, ejus nomen & definitio: Secundum, utilitas: Tertium, necessitas: Quartum, conditiones, nempe an satisfactio debeat esse supernaturaliter bona: an ab homine justo & viatore: quæ quantitas ipsi competat: an possit relaxari per indulgentias: an secreta aut publica esse debeat?

*De nomine & definitione Satisfactionis.*

Q. 1. *Unde Satisfactionis nomen?*

R. A verbo, *facio*, & voce, *satis*: ita ut satisfacere Deo, idem sit ac tantum præstare, quantum ad ulciscendam injuriam ipsi per peccatum illatam satis esse possit, quia, ut habet Catechismus Romanus numer. 85. de Satisfactione, *quod satis est, ei nihil videtur deesse*. Hinc satisfacere Deo, apud S. Anselmum, est Deo debitum honorem impendere; & apud alios est injuriam per peccatum illatam compensare.

Q. 2. *Potestne quis Deo facere satis pro injuria ipsi illata, & læsum honorem ipsi restituere?*

R. Cum plena & cumulata satisfactio pro offensa infinita debeat esse infiniti valoris, solus Christus verus Deus & homo illam exhibere potuit: *Ipse est propitiatio pro peccatis nostris*, inquit S. Joannes 1. epistol. cap. 2. Sed qui ex nobis tanquam ex nobis nihil possumus, eo cooperante, omnia possumus; ipsum quippe dedit Deus caput Ecclesiæ, *quæ est corpus ipsius, & plenitudo ejus*, Ephes. 1. v. 23. ut ipso & per ipsum nos tanquam ejus membra debitam Deo satisfactionem pendamus; omnisque gloriatio nostra sit in Christo, inquit Patres Tridentini sess. 14. c. 8. *in quo vivimus, in quo meremur, in quo satisfacimus facientes fructus dignos pœnitentiæ, qui ex illo vim habent, ab illo offeruntur Patri & per illum acceptantur à Patre*. Ex quibus satis intelligitur nostris satisfactionibus vim meriti & satisfactionis Christi non modò non obscurari, aut ex aliqua parte minui, ut garriunt  
Nova-

Novatores; sed contra ampliùs demonstrari ac commendari, quemadmodum in ordine naturali ex efficacia, qnam Deus indidit causis secundis, colligitur infinita ejus virtus & potentia.

Q. 3. *Quare satisfactio præ omnibus Sacramenti partibus simpliciter & absolute vocatur pœnitentia?*

R. 1. Quia pœnitentia dicitur à pœna, quæ maxime in satisfactione elucet; satisfit enim Deo piis afflictationibus & laboriosis operibus: *Hoc pretio*, inquit Tertull. lib. de pœnit. c. 6. *Dominus veniam addicere instituit; hac pœnitentiæ compensatione redimendam proponit impunitatem.* 2. Quia piæ illæ exercitationes sunt fructus pœnitentiæ, propter quos Deus virtutem ipsam in cordibus inserit: cum igitur arbor ex fructibus non solum dignoscatur, sed etiam denominetur, æstimeturque, verbi gratia, arbor oleagina ex oleis quas producit, semen vineaticum ex vino ad quod feritur, consequens est ut fructus ipse magis sibi vindicet nomen quod radici communicat.

Q. 4. *Quomodo definitur Satisfactio?*

R. Definiri potest, pœnæ acceptatio, & voluntaria permissio à Confessario injuncta, tum ad redintegrandam amicitiam cum Deo per peccatum violatam, tum ad compensandam injuriam ipsi illatam.

Dicitur 1. *Pœnæ*, hoc est, operis molesti; satisfactio enim fit in vindictam, ac proinde debet habere aliquod incommodi. In hoc autem statu naturæ corruptæ, in quo corpus aggravat animam, omnia virtutis officia, etiam Religionis ut oratio, non perficiuntur sine aliqua defatigatione & molestia, ideoque possunt esse satisfactionis materia. Laus Dei in cœlo habet rationem præmii:

in terris verò laboris & meriti, si sit diuturna, nam momentanea oratio vix ullam parit molestiam. Sacerdos igitur (ne unam oratiunculam, verbi gr. Psalmi versiculum præscribat in satisfactionem) meminerit satisfactionem esse pœnam, quo nomine differt à restitutione, quæ non est pœna, cum in rebus versetur, non verò in actionibus sicut satisfactio.

Dicitur 2. *Acceptatio & voluntaria permissio*; invita enim & coacta non foret Deo accepta, nec virtutis opus.

Dicitur 3. *A Confessario injuncta*; ut distingatur Satisfactio sacramentalis ab iis, quas spontè eligimus, vel Deus morbis, & aliis adversis casibus nobis imponit in peccatorum nostrorum vindictam; ut enim satisfactio sit pars Sacramenti, auctoritate clavium iungatur necesse est.

Dicitur 4. *Ad redintegrandam cum Deo amicitiam*; Qui enim in Deum peccat, amicitiam simul & justitiam violat, ac proinde utramque reparare debet. Et quamvis una & eadem actione amicitia simul & justitiæ satisfieri possit, sæpè tamen contingit, ut una actio solam justitiam restauret, ut videre est in reo, qui à Judice plectitur; hic quippe juxta Justitiæ legem, tantum satisfactionis alteri pendit supplicio suo, quantum injuriæ ipsi intulerat, sed solutam amicitiam non redintegrat. Atqui nullus pro illata Deo injuria satisfacere potest, nisi prius sit sollicitus in gratiam ejus redire, & violatam amicitiam restituere. Ergo satisfactio tendere debet ad reformandam læsam Dei amicitiam.

Dices: Satisfactio supponit culpam contritione, vel absolutione deletam, ac consequenter restitu-



stitutam amicitiam ; non enim deletur culpa sine charitate , quæ est vera cum Deo amicitia : Ergo satisfactione non redintegratur Dei amicitia.

Distinguo anteced. Satisfactio culpam deletam supponit aliquando, Conc. Semper, subdistinguo ; satisfactio ex condigno, & ex opere operantis, Conc. Satisfactio ex congruo, & ex opere operato, Nego anteced. Verum quidem est opus ex se de condigno meritorium & satisfactorium præsupponere gratiam sanctificantem seu charitatem, per quam fit remissio peccatorum, & restituitur cum Deo amicitia ; sed ut tam excellens beneficium obtineatur , læsa per peccatum divina Majestas prius lachrymis & laboriosis operibus placanda est : *Constat Deum*, inquit S. Augustinus libro de dono perseverantiæ cap. 16. *alia danda etiam non orantibus, sicut initium fidei, alia non nisi orantibus præparasse.* Atqui de fide est Deum peccatoribus non reconciliari, nisi fuerint rite dispositi. Illos quidem consopitos, ac veluti mortuos, nedum orantes gratia sua prævenit, excitatque ; sed ut dignis pœnitentiæ fructibus cum ipso reconciliari mereantur : *Volo reus veniam speret*, inquit S. Ambrosius libro de pœnit. c. 16. *petat lacrymis, petat totius Ecclesiæ precibus.* Et Tertullian. lib. de pœnitentia cap. 6. *Quàm porro ineptum, quàm pœnitentiam non adimplere, & veniam delictorum sustinere, hoc est, pretium non exhibere & ad mercedem manum emittere ? . . . . . Peccator ante veniam deflere se debet, quia tempus pœnitendi, idem quod periculi & timoris. Neque ego renuo divinum beneficium, id est, abolitionem delictorum, ininitur aquam (Baptismi) omni modo salvum esse ; sed ut eo pervenire contingat, elaborandum est.* Et cap. 9. de Sacramento

Pœnitentiæ, *satisfactio confessione disponitur, confessione pœnitentia nascitur, pœnitentia Deus mitigatur.* Porro laboriosa illa pœnitentiæ opera sunt meritoria & satisfactoria, non quidem de condigno, & ex opere operantis, cùm præcedant gratiam sanctificantem; sed de congruo, & ex opere operato, hoc est, virtute clavium; quatenus enim injuncta sunt à Sacerdote, evadunt partes Sacramenti, & signa efficacia reconciliationis cum Deo, & remissionis pœnæ peccatis debitæ, *in quantum non peperceris tibi*, inquit Tertullianus cit. cap. 9. *in tantum tibi Deus parcat.* Et Sacerdos confitenti, eò levio-rem imponet satisfactionem post absolutionem peragendam, quò graviore ille à se ipso pœnas jam repetierit.

Instabis: Atqui satisfactio secundum præsentem Ecclesiæ disciplinam, non peragitur nisi restituta per absolutionem cum Deo amicitia: Ergo satisfactio non est ad redintegrandam amicitiam.

Nego consequent. Namque x. salva hodierna Ecclesiæ disciplina, quam improbare nefas, absolvi nec debent, nec possunt qui non fecerunt satis ad reformandam cum Deo amicitiam, nec omnem penitus obicem è corde eraserint, atqui ex S. Thoma, gratia secundum consuetum agendi modum naturam imitatur, ab imperfectis ad perfectiora progreditur, nec uno temporis puncto corda integrè immutare solet, sed multis precibus, vigiliis, & laboriosis exercitationibus ad justificationem disponit. Consule, quæ in hanc rem diximus Tractatu de Gratia pag. 441. & Tertullianum lib. de pœnitentia cap. 6. Ergo Confessarius, cùm pœnitentem mala consuetudine fœtentem, necdum manum moribus emendandis admovisse, sed

fed faucibus ſcelus adhuc exhalantibus , ut loquitur S. Cyprianus ſer. de lapſis , cum vana attritionis ſpecie , quam in animo finxit , ad tribunal accedere animadvertet , eum ad tempus dimittat oportet , precibus injunctis , & piis operibus , quibus Dei amicitiam promereatur. 2. Satisfactio, quæ à Sacerdote vices Dei gerente , poſt abſolutionem implenda decernitur , ſpectanda eſt, ut genuinus pœnitentiæ fructus , ad quem contritio , ſive perfectæ , ſive imperfectæ ex natura ſua tendit : atqui contritio ex natura ſua tendit ad faciendum Deo ſatis pro violatâ amicitia & juſtitia : Ergo pœnitens ſatisfacere debet ob violatam Dei amicitiam & juſtitiam.

Ergo venia aliter impetratur à Deo , aliter ab hominibus. Læſi homines hoc unum à reo repetunt , ut ſcilicet violatam juſtitiam reſtauret , tantùmque ſe coram eis dejiciat , quantum ſe adverſus eos contumaciter erexerat ; nec laborant quo animo id præſtat , modò æqualitatem quam juſtitia præſcribit , reponat. Contra verò Deus veniam non indulget , niſi iis , qui prævia præſtiterint ad amicitiam cum eo conjungendam , Patrem ſe meminit , amorem à filiis exigit , nec peccatori ignoſcit qui ſine pietatis ſenſu , ſed ſolo exhæredationis timore coactus veniam petit. Denique de fide eſt peccata non dimitti , niſi per charitatis inſuſionem , hoc eſt , Deum veniam petenti non concedere , quin illum ſimul conſtituat ſibi amicum , ejusdem ſecus ſpiritus ac voluntatis , proindeque prius diſpoſitum ad inchoandam novam vitam , & animo præparatum ad exequendum primum ac maximum mandatum , quo Deus toto corde diligitur. Iſtud Catholicum dogma minus

quàm par sit auribus Fidelium inculcatur; peccatores enim plerique non alia ratione veniam petunt à Deo, quàm ab homine, nullatenus solliciti de reformanda cum eo amicitia, modò iratum illum non sustineant. Hinc veniæ conditiones, nempe satisfactionem à Confessario injunctam accipiunt ex necessitate, & secundùm quid inviti, utpotè sibi ingratas, easque cum tædio, ac perfunctoriè exequuntur. At verè pœnitentes non veniam modò à Deo quærunt, sed ejus præcipuè amicitiam, ad quam anhelantibus omnis pœnitentiæ labor suavis efficitur, maximè obtento absolutionis beneficio, cùm jam perfectè contriti ducantur spiritu adoptionis filiorum; *nam in eo quod amatur, aut non laboratur, aut & labor amatur*, inquit Sanctus Augustinus lib. de bono viduit. cap. 21.

Dicitur 5. *Ad compensandam injuriam ipsi illatam*; quia pœnitentia non solum mores mutat in melius; sed insuper in peccatorem ipsa pronuntians, inquit Tertullianus, pro Dei indignatione fungitur, & læsæ ejus Majestati rependit, si non quantum pro illata injuria peccator meretur, saltem secundùm pœnarum modum, quem divina clementia pro singulis peccatis præscripsit; illam enim decebat, inquiunt Patres Tridentini sess. 15. cap. 8. ut qui accepto per Baptismum Spiritus sancti dono, scienter templum Dei violare & Spiritum sanctum contristare non formidarunt, eos non sine debita castigatione in gratiam reciperet. Unde S. Augustinus serm. 351. aliàs hom. 50. ait: *Non sufficit mores in melius commutare, & à factis malis recedere, nisi etiam de iis, quæ facta sunt, satisfiat Deo per pœnitentiæ dolorem.* Et in Psalm. 118. serm. 8. *in ipsa Ecclesia, ubi maximè misereri decet, teneri*  
*quam*

quam maxime debet forma justitiæ, ne quis à communionis consortio abstentus, brevi lacrymula atque ad tempus parata, vel etiam uberioribus fletibus communionem, quam pluribus debet postulare temporibus, facilitate Sacerdotis extorqueat.

Quæ generatim hîc exponit S. Augustinus, ea singulatim prosequuntur sancti Ambrosius. & Gregorius: Ille lib. 2. de pœnitentia cap. 10. in quo sic habet: *An quisquam illam pœnitentiam putat, ubi acquirendæ ambitio dignitatis, ubi vini effusio, ubi ipsius copulæ conjugalis usus? Renuntiandum sæculo est, somno ipsi minus indulgendum, quàm natura postulat, interpellandus est gemitibus, interrumpendus suspiriis, sequestrandus orationibus, vivendum ita, ut vitali huius moriamur usui, seipsum homo abneget, & totus immutetur.* Et S. Gregorius hom. 20. in Evangel. Sciendum est, inquit, quia quisquis illicita nulla commisit, huic jure conceditur, ut licitis utatur; sicque pietatis opera faciat, ut tamen si noluerit, ea quæ mundi sunt, non relinquat. At si quis in fornicationis culpam, vel fortassè, quod est gravius, in adulterium lapsus est, tantò à se licita debet abscindere, quantò se meminit & illicita perpetrasse. Et ratio est, quam affert S. Thomas in quartum, si-ve supplement. quæst. 15. art. 1. quia justum est, ut qui plus sibi tribuit auferendo alteri, eidem aliquid reddat subtrahendo sibi: Quamvis autem Deo, inquit, quantum est ex ejus parte, nihil subtrahi possit; tamen peccator, quantum in ipso est, aliquid ei subtrahit peccando. Unde oportet ad hoc, quod recompensatio fiat quòd aliquid subtrahatur a peccante per satisfactionem, quod in honorem Dei cedat. Opus autem bonum, ex hoc quòd est hujusmodi, non subtrahit aliquid ab operante, sed magis perficit ipsam. Unde subtractio non potest fieri per opus bonum, nisi pœnale sit: & ideo ad hoc,

quoddam aliquod opus sit satisfactorium, oportet quoddam sit bonum, & in honorem Dei sit, & pœnale; ut per hoc aliquid peccatori subtrahatur. Quamobrem Tertullianus lib. de pœnit. cap. 11. eos facetè ridet, qui cum nihil è vitæ commodis sibi subtrahant, nihilominus dicere non verentur se agere pœnitentiam: Num ergo, inquit, in coccino & tyrio pro delictis supplicare nos condecet? . . . . exquirito balnea lætiora . . . . adjcito ad sumptum: conquirito altitium enormem saginam . . . . cumque quis interrogarit, cur animæ largiaris, deliqui dicito, in Deum, & periclitor in æternum perire. Quibus cavillis nemo non videt mundanos perstringi, qui exomologesim delictorum suorum ita faciunt, ut de victu, ornatu, & aliis licitis vitæ commodis nihil quidquam detrahant, cum tamen vera pœnitentia tanquam arbor bona non ex confessione, sed ex fructibus æstimanda sit, inquit S. Gregorius, vel qui sit auctor lib. 6. in 1. Regum: Confessionis verba quid sunt aliud nisi folia? Non ergo nobis folia propter seipsa, sed propter fructum expetenda sunt: quia idcirco omnis confessio peccatorum expetitur, ut fructus pœnitentiæ subsequatur. Unde & Dominus arborem foliis decoram, fructu sterilem maledixit; quia Confessionis ornatum non recipit sine fructu afflictionis. Opponet fortè splendidiorē illam vivendi rationem pertinere ad decorem sui status & dignitatis; sed imitetur piam Reginam, quæ Deum sic compellabat: Tu scis necessitatem meam, quoddam abominer signum superbiæ & gloriæ meæ, quoddam est super caput meum in diebus offensionis meæ, & detester illud quasi pannum menstruatum . . . . & nunquam læta sit ancilla tua . . . . nisi in te Domine Deus Abraham, Esther 14.

## §. II.

*Quot modis satisficit Deo?*

**R**espondent Patres Tridentini sess. 14. c. 9. *Tantum esse divinæ munificentiae largitatem, ut non solum pœnis sponte à nobis pro vindicando peccato susceptis, aut Sacerdotis arbitrio pro mensura delicti impositis; sed etiam (quod maximum amoris argumentum est) temporali- bus flagellis à Deo inflictis, & à nobis patienter toleratis apud Deum Patrem per Christum Jesum satisfacere valeamus. Ergo tribus modis Deo satisfacimus.*

1. Laboriosis operibus à Sacerdote injunctis: *Dum mens, inquit S. Gregorius, vel alius auctor lib. 3. in 1. Reg. flendo compungitur, necesse est ut etiam caro, quæ delectationibus subjacuit, affligatur . . . quæ tamen afflictio pœnitentiæ ad delenda peccata tum demum idonea est, cum Sacerdotis fuerit judicio imperata, cum ab eo, confitentium actibus discussit, pro modo criminis onus eis decernitur afflictionis.*

2. Piis operibus sponte susceptis. Ita S. Augustinus in Psal. 50. ubi expendens isthæc Davidis verba, & à delicto meo munda me, sic loquitur: *Quo merito? Medicus est, affer mercedem: Deus est, affer sacrificium. Quid dabis ut munderis? vide enim quem invoces: justum invocas; odit peccata si justus est, vindicat peccata si justus est: non poteris auferre à Domino Deo justitiam ejus, implora misericordiam, sed attende justitiam: misericordia est, ut ignoscat peccanti: justitia est ut puniat peccatum. Quid ergo quæris misericordiam? peccatum impunitum remanebit? responderit David, responderint lapsi, responderint cum Davide, ut misericordiam mereantur sicut David, ut dicant: non, Domine non erit impunitum peccatum meum: novi justitiam ejus, cujus quæro misericordiam: non impunitum*

*erit ; sed ideo nolo ut tu me punias , quia ego peccatum meum puniam ; ideo peto ut ignoscas , quia ego agnosco.*

3. Satisfacimus Deo per voluntariam acceptationem , & perpeffionem ærurnarum , quibus cœlestis Pater nos erudit & castigat , quandiu hanc mortalem vitam vivimus ; scriptum enim est Amos 3. v. 6. *Si erit malum (pœnæ) in civitate quod Dominus non fecerit , nempe alia positivè immittit , ut aeris intemperiem , egestatem , morbos , mōrtes propignorum : alia ordinat dumtaxat , aliis quidem , nimirum justis , ad virtutis profectum & meritum : aliis , puta peccatoribus , in vindictam ; ut persecutiones , hostium vastationes , bonorum direptiones , calumnias ; quamvis enim mali habeant ex se nocendi voluntatem , potestatem tamen non accipiunt nisi à Deo , quibus tanquam flagellis castigat omnem filium , quem recipit Hebr. 12. tum quia aut Sacerdotes leviores pœnas , quàm peccata mereantur , injungunt , aut pœnites , per spontaneas afflictationes , quod deest debitæ satisfactioni implere negligunt , si nos ipsos dijudicaremus , inquit Apostolus , 1. Cor. 11. vers. 31. non utique judicaremur. Dum judicamur autem à Domino , corripimur , ut non cum hoc mundo damnemur ; hoc est si debitas justitiæ divinæ pœnas à nobis exigeremus , non puniremur à Domino. Dum punimur autem per morbos & alias miseras , hac paterna castigatione peccata nostra expiamus , & gravioribus suppliciis subducimur : tum quia Deus pro sua infinita sapientia , quorundam peccatorum vindictam ita sibi reservat , ut eam pœnites suis lacrymis & spontaneis afflictationibus avertere nequeant. Sic Moyses Num. 20. quia aliquid humani passus est , dum percuissit petram*

ad



ad eliciendas aquas, in pœnam peccati non potuit obtinere à Deo, ut ingrederetur terram promissam. Sic David 2. Reg. 12. orationibus, jeuniis, humiliationibus filium ex adulterio susceptum morti, quam Deus minatus fuerat, eripere non valuit.

Quæ cùm ita sint, perspicuum est peccatorem ferid pœnitentem, & paratum ad compensandam injuriam Deo illatam, ita affectum esse debere, ut verè dicere possit cum Davide Psal. 37. *Quoniam ego in flagella paratus sum*: nullum pro peccatis meis flagelli genus recuso. Quin eo libentiùs iis se subjiciet, quò certior est ejusmodi molestias dispensari ab optimo Patre, qui omnia sapienter & suaviter disponit in numero, pondere, & mensura: *Ipsi nos committamus*, inquit Sanctus Ambrosius, laudata Psalmi verba expendens, *parati ad curandum quo velit curari medicamento. Nemo dicit Medico corporis sui quemadmodum sit curandus. Novit Medicus quæ singulis vulneribus medicamenta conveniant, cujus ulceris putredo ferro sit amputanda, ne in totius corporis serpat exitium. Si dixerit Medicus medicinæ genus, quo curari æger debeat, & ille fastidiat; discedit Medicus, & ægrum derelinquit.... Medicina Christi correptio est, corripit enim Dominus quem vult convertere.*

Accedit altera ratio, cur corde contrito & humili hujus vitæ misérias sustinere debeamus, quia, scil. ineluctabiles sunt: velimus, nolimus, nos invadent: nostra solùm interest, ut eas levius feramus, & in commodum nostrum, quantum fieri potest, convertamus. Atqui si æquamente illas ferimus, & leviores evadent, & in magnum nostrum commodum cedent.

Ac 1. quidem leviores evadent; qui enim erecta in Deum mente colluctatur in mediis tribulationum fluctibus, non immeritò eum dixeris similem naufrago, qui natando cavet ne caput obruatur aquis: laborat quidem ille, sed libere spirat, spe evadendi reficitur, nec suo tantum, sed & omnium judicio felix est præ aliis, qui in profundum demersi suffocantur. Talem cogita eum, qui amore Dei & desiderio illi faciendi fati miseras vitæ hujus sustinet, iis quippe innatat, mente superior; infirmitatem carnis, qua sola premitur, animi robore sustentat, & pro ratione sui in Deum amoris sensum doloris temperat: *Nulla modo enim onerosi sunt labores amantium, sed ipsi delectant*, S. Augustinus lib. de bono viduit. C. 21.

2. Adversos casus magno lucro quis patienter sustinet; iis quippe reatum pœnæ expungit, & levi tribulatione gravia supplicia redimit; quin non debito solum apud Deum se liberat, sed, quod stupendum magis, illum sibi constituit debitorem: afflictationes enim patienti animo toleratæ, sunt simul satisfactoriæ & meritoriæ, æternumque gloriæ pondus operantur.

Contra verò si quis invitus ineluctabiles illas miseras ferat, eas acerbiores experietur, & inde pejor evadet; quia animi ægritudo, seu tristitia, in qua sese immergit impatiens, est pœna longè gravior & intolerabilior ipsa calamitate, quæ illum exterius premit: *Omnis plaga*, inquit Sapiens Eccli. 25. vers. 17. *tristitia cordis est . . . . & omnem plagam & non plagam videbit cordis*; hoc est, summa, maxima, & acerbissima plaga est cordis tristitia, & omnem plagam videbit ac feret homo, dum-

dummodò non sit cordis tristitia; hæc enim animum dejicit depravatque, viam aperit iræ, blasphemiae, desperationi, & cuilibet tentationi, corporis vires frangit, juxta illud Prov. 17. vers. 22. *spiritus tristis exsiccat ossa*; sicque tribulatio, quam paterna Dei clementia ordinaverat in expiationem scelerum, fit reprobi pœnale tormentum: *Tantum interest*, inquit sanctus Augustinus libro 2. de Civitate Dei cap. 8. *non qualia, sed qualis quisque patiatur*; nam pari motu exagitatum & exhalat horribiliter cœnum, & suaviter fragrat unguentum: sub uno igne aurum rutilat, palea fumat: sub eadem tribula stipulae comminuantur, frumenta purgantur . . . . ita una eademque vis irruens bonos probat, purificat, eliquat; malos damnat, vastat, exterminat. Quàm porro detestandus est miles, qui proprio ense se ipsum confodit, quo victoriam & ingentem prædam sibi asseruisset?

Q. I. *Quotuplex est genus bonorum operum quibus fit Deo satis?*

R. Triplex, nempe oratio, eleemosyna, & jejunium. Ita Concilium Tridentinum sess. 14. can. 13.

Probatur divisio; quia ex S. Thoma in 4. & in Supplem. quæst. 15. artic. 3. Deo facimus satis, quando in honorem illius, ex iis bonis, in quibus nimium nobis indulgimus, aliquid cum dolore subtrahimus: atqui tria sunt bona, scilicet. animæ corporis, & fortunæ, nec aliter in Deum peccatur, quàm inordinato illorum amore seu cupiditate, juxta illud 1. Joan. 2. vers. 16. *Omne quod est in mundo, concupiscentia carnis est, & concupiscentia oculorum* (hoc est avaritia) *& superbia vitæ*: Ergo non potest aliter Deo satisfieri, quam aliqua

qua illorum bonorum detractiōe & circuncisiōe, quod non exequimur sine labore & dolore.

Porro oratio, in qua intelligitur quidquid ad cultum Dei pertinet, superbiam deprimit, elatam mentem Deo subjicit, in ea quippe confitemur Deum esse omnium bonorum auctorem, nos verò peccatores, imbecilles, & ad nullum bonum sine ejus auxilio idoneos. Jejunium, & aliæ corporis afflictationes concupiscentiam carnis expurgant, nec sine doloris sensu multa corporis commoda subtrahunt. Eleemosyna concupiscentiam oculorum, seu avaritiam comprimit, & in gratiam pauperum solitam impensam circuncidit, cogitque nos parcius vivere non sine aliquo incommodo.

Dices: Oratio delectat, nedum pœnam habeat, *tristatur aliquis vestrum?* oret, inquit sanctus Jacobus cap. 5. Ergo non est opus, satisfactorium.

Distinguo antec. Delectat secundum mentem, Conc. Secundum eamem, Nego antec. *Quamvis non habeat suavitatem spiritus*, inquit Sanctus Thomas cit. art. 3. qu. 15. Supplem. ad 1. *babet tamen afflictionem carnis; quia, ut dicit Gregorius super Ezechielem, dum crescit in nobis fortitudo amoris intimi, infirmatur procul dubio fortitudo carnis, unde & nervus femoris Jacob ex lucta Angeli emarcuisse legitur, Gen. 32.*

Q. 2. *Potestne fieri satisfactio per bona opera alicui debita?*

R. Potest; quia ex dictis Tract. de Actibus humanis pag. 149. Justus implendo præceptum meretur, juxta illud 2. Tim. 4. *Fidem servavi, in reliquo reposita est mihi corona justitiæ.* Ergo & pro peccatis satisfacit: sicut enim implere præceptum est

est meritorium, quia laudabile; ita satisfactorium, quia laboriosum.

Dices: Qui duo contraxit debita, per unius solutionem non satisfacit creditori, mutuo v. g. accepit quinque aureos, & totidem debet ex contractu emptionis, non liberatur utroque debito, si solvat quinque. Ergo à pari, qui ex præcepto tenetur adesse Sacro, jejunare, eleemosynam erogare, pro peccatis non satisfacit implendo illa præcepta.

Distinguo anteced. Si duo illa debita sint ex stricta justitia, ut in allato exemplo, Conc. Si ex alia virtute, Nego anteced. Nam filius, qui ex contractu debet centum patri indigenti, solvendo centum satisfacit duplici præcepto, pietatis scilicet & justitiæ, si per ejusmodi solutionem patrem in totum levet ex inopia. Similiter gratum simul & misericordem se præbet erga beneficium, qui ei ad inopiam redacto, largam erogat eleemosynam. Ratio autem discriminis justitiam inter & alias virtutes ea est, quòd justitia modum & qualitatem ponat in rebus, scilicet, ut tantum restituatur, quantum debetur, nihilque retineatur ex iis, quæ ad proximum pertinent: retineretur autem in allato exemplo illius, qui quinque debet ex mutuo: & alia quinque ex emptione, si solveret quinque tantum pro utroque debito. Contra vero cæteræ virtutes directè & primariò modum ponunt in actionibus, nempe ut fiat ex ea honestate & motivo, quæ decent operantem. Unde cum eadem actio fieri possit variis modis, & ex diversis motivis, v. g. actus temperantiæ ex motivo charitatis, religionis, pœnitentiæ, &c. per unum & eundem temperantiæ actum, puta  
per

per jejunium quadragesimale, satisfieri potest præceptis omnium virtutum.

Ergo Confessarius potest injungere in satisfactionem actus aliunde præceptos. Alios tamen non præceptos debet adjungere pro facultate pœnitentis; quia Deus in Scripturis, & Ecclesia in Conciliis, præter mandatorum observationem pœnas exigunt à peccatoribus, ut patet in Davide, Corinthio incesto, & variis Canonibus.

Q. 3. *Potestne quis satisfacere pro alio?*

R. Etsi unus pro altero conteri non possit, quia contritio est mutatio consilii cum dolore de proprio peccato; potest tamen pro illo satisfacere, dummodò sit in charitate; quia satisfactio præcisè sumpta est pœnæ solutio. Cum igitur apud homines unus debitum alterius solvere possit, multò magis id in divino judicio fieri potest. Ita sanctus Thomas in 4. & in Supplem. qu. 13. art. 2.

Ergo, inquires, unus pro altero injunctam à Confessario pœnitentiam implere potest.

Negat Angelicus Doctor cit. art. *Nisi*, inquit, *defectus aliquis appareat in pœnitente, vel corporalis, per quem fit impotens ad sustinendum*; quia satisfactio injungitur non solum in pœnam, sed etiam in remedium & virtutis exercitationem. Contrariam doctrinam Alexander VII. anno 1665. damnavit ut scandalosam saltem, & in praxi perniciosam.

### §. III.

#### *De utilitate Satisfactionis.*

**E**tiam si quæ circa Satisfactionem hætenus disputata sunt, generatim utilitatem ejus commendent, operæ pretium tamen est commoda illius  
figil-

figillatim exponere, tum ut in majori à nobis habeatur pretio: tum ut aperiatur quis sit controversiæ status Orthodoxos inter & Heterodoxos; hi quippe circa fructus satisfactionis nobiscum de re una solum dissident. Itaque

Q. *Quot sunt satisfactionis fructus & commoda?*

R. Septem, ut colligitur tum ex Conc. Tridentino cit. cap. 8. tum ex Catechismo Romano 2. part. num. 91. & seq.

Primò, per satisfactionem reliquæ peccatorum purgantur, & vitiosi habitus eradicantur: *Non satis habet*, inquit S. Chrysostomus de Davide hom. 2. in Psal. 50. *curatum esse vulnus, etiam cicatricem sanari, pristinum etiam decorem restitui petit.* Et hom. 40. in Acta Apostol. *sicut enim qui febre laborat, non in hoc solum læditur quòd ægrotat, sed etiam quòd post morbum infirmior sit, licet à morbo diutino ad bonam valetudinem redeat: ita sane & de peccato dicendum; licet sanemur, adhuc tamen egemus magna fortitudine . . . . Nam unumquodque peccatum, ubi patratum fuerit, & ad finem pervenerit, relinquit in anima venenum. Non audis, quando à morbo confirmati fuerint: non austin aquam bibere? Quamvis sanus sit, sed ita morbus læsit.*

Secundò, satisfactoriæ pœnæ magnopere à peccato revocant, & quasi fræno quodam homines coercent, cautioresque & vigilantiores efficiunt; nam *si citò rediret homo ad pristinam beatitudinem, ludus illi esset peccando cadere in mortem*, inquit Sanctus Augustinus serm. 278. aliàs 34. de diversis. Et ante eum Sanctus Pacianus respondens Novatianis objicientibus, quòd Deus ansam peccandi præbere videretur, si lapsis post Baptismum & pœnitentibus veniam promitteret, sic habet epist.

epist. 3. Fortasse paterer hoc credi, si pœnitentia delicta putarentur, cui labor tantus imponitur, cui carnis interitus imperatur, cui juges lacrymæ aut gemitus sempiterni. Volet ergo ille sanatus iterum se secari, rursus exuri? volet peccare iterum, & iterum pœnitere.

Tertio, cum profundum sit cor hominis, & inscrutabile, ipseque pœnitens, multo magis Confessarius aliquando dubitare possit, aut etiam debeat, num peccatum ex animo detestetur, ac novam vitam instituere efficaciter proponat: laboriosæ exercitationes sunt signa moraliter certa sinceræ pœnitentiæ; ex fructibus enim arbor cognoscitur. Unde Sanctus Augustinus Enchyr. cap. 65. In actione pœnitentiæ, inquit, non tam consideranda est mensura temporis, quàm doloris; cor enim contritum & humilitatum Deus non spernit. Verum quia plerumque dolor alterius cordis occultus est alteri, neque in aliorum notitiam per verba aut quæcunque signa procedit . . . . . rectè constituuntur ab iis, qui Ecclesiis præsent, tempora pœnitentiæ, ut fiat satis etiam Ecclesiæ, in qua remittuntur ipsa peccata; extra eam quippe non remittuntur.

Quarto, per satisfactionem sponte susceptam, Dei animadversionem, pœnasque graviores avertimus; nam ex Apostolo 1. Corinth. 11. si nosmetipsos dijudicarem, non utique judicaremur. In quem locum sic loquitur Sanctus Bernardus serm. 55. in Cantic. bonum judicium, quod me illi districto divinoque judicio subducit & abscondit. Prorsus borreo incidere in manus Dei viventis: volo vultui iræ judicatus præsentari, non judicandus. Spiritualis homo omnia dijudicat, & ipse à nemine judicatur (1. Cor. 2.) Judicabo proinde mala mea, judicabo & bona: mala melioribus curabo corrigere actibus, diluere lacrymis, punire jejuniis,



*jejuniis, cæterisque sanctæ laboribus disciplinæ: in bonis de me humiliter sentiam . . . . . dabo operam, nec lilia pro granis, nec paleas cum granis offerre: scrutabor vias meas & studia mea, quod is qui scrutaturus est Jerusalem in lucernis, nihil inscrutatum in me sive indiscussam inveniat; neque enim judicaturus est bis in idipsum. Et Sanctus Augustinus laudato serm. 278. Si tu te punire volueris, inquit, parcat ille. Qui autem agit bene pœnitentiam, suus ipse punitor est. Sit oportet ipse severus in se, ut in eum sit misericors Deus.*

Quintò, ejusmodi pœnarum perpessione consequimur, ut capitis nostri Jesu-Christi similitudinem geramus; nam teste Apostolo Rom. 8. sumus cohæredes Christi, si tamen compatimur ut & glorificemur. Hinc Sanct. Leo serm. 14. de Passione ait, corpus regenerati fiat caro crucifixi. Et Sanct. Bernardus serm. 5. in festo omnium Sanctorum, non sicut est, sed sicut pro nobis factum caput nostrum; nobis repræsentatur, non coronatum gloria, sed peccatorum nostrorum circumdatum spinis. Pudeat sub spinato capite membrum fieri delicatum.

Sextò, satisfactoriis operibus Ecclesiæ fit satisfactio, quæ peccatis filiorum, præsertim publicis, graviter offensa est; & alii exempla sumunt, quomodo ipsi vitam instituere, & pietatem sequi debeant. Unde S. Augustinus serm. 351. aliàs hom. 50. de pœnitente sic habet: Tanquam bonus jam incipiens esse filius, maternorum membrorum ordine custodito, à Præpositis Sacramentorum accipiat satisfactionis suæ modum; ut in offerendo sacrificio cordis contribulati devotus & supplex, id tamen agat quod non solum ipsi prosit ad recipiendam salutem, sed etiam cæteris ad exemplum. Ut si peccatum ejus non solum

*in gravi ejus malo, sed etiam in tanto scandalo aliorum est, atque hoc expedire utilitati Ecclesiæ videtur Antistiti, in notitia multorum, vel etiam totius plebis agere pœnitentiam non recuset, non resistat, non lethali & mortiferæ plagæ per pudorem addat tumorem. Meminerit semper quod superbis Deus resistat, humilibus autem dat gratiam. (Jacobi 4.) Quidenim est infelicius, quid perversius, quam de ipso vulnere, quod latere non potest, non erubescere, & de ligatura ejus erubescere? Quibus verbis carpuntur benemulti, qui in sæculo agentes ita volunt pœnitentiam agere, ut sollicitè caveant, ne aliis, quibus etiam fuerunt offensionibus, emendati videantur.*

Septimò, laboriosis operibus reatus pœnæ temporalis, qui sæpè dimissa culpa remanet, expungitur, & Deo propriè fit satisfactio. Hic Pseudo-Reformati, quos in præcedentibus articulis habebamus concordantes, magna contentione adversum nos insurgunt.

Lutherus initio suæ defectionis, scilicet anno 1518. in sermone de Indulgentiis, negavit ullam pœnam a Deo exigi post culpam remissam. Postmodum verò, nempe in assertione articulorum suorum art. 5. admisit remanere interdum reatum pœnæ temporalis, & pœnis sponte assumptis flagella divina anteverti, ac denique jejunium, orationem, & eleemosynam esse opera Deo grata: sed minimè tulit, ut ejusmodi opera dicantur satisfactoria, & per ea pœnas debitas compensari; quia juxta palmarem ejus errorem, pœnitentia nihil est aliud, quàm fides, qua apprehendimus Christum pro nobis satisfecisse; *vehementer odi, inquit, cit. art. 5. & sublatum vellem hoc vocabulum* (satis-

(satisfactio) quod non modò in Scripturis non invenitur : sed & periculofum habet sensum , quasi Deo quifquam possit pro ullo peccato satisfacere cùm gratis ille ignoscat omnia.

Melancthon in apologia Confessionis Augustanæ vestigiis sui Magistri insistens , hæc etiam habet : Scholastici viderunt in Ecclesia esse satisfactiones , sed non advertabant illa spectacula instituta esse , tum exempli causa , tum ad probandos hos , qui petebant recipi ab Ecclesia : in summa non viderunt esse disciplinam , & rem prorsus politicam. Idèd superstitiosè finxerunt eas , non ad disciplinam coram Ecclesia , sed ad placandum Deum valere.

Calvinus lib. 3. Institut. cap. 3. priorem Lutheri sententiam amplexus , docet Deum à Justis nullas expetere pœnas in vindictam peccati præteriti ; sed eos tantùm paternè castigare ad perfectum & emendationem in posterum ; sic enim scribit §. 39. Vocarunt (Veteres) ut plurimum satisfactionem , non compensationem , quæ Deo redderetur , sed publicam testificationem , qua qui excommunicatione mulctati fuerant , cùm in communionem recipi vellent , Ecclesiam reddebant de sua pœnitentia certiores ; indicebantur enim illis pœnitentibus certa jejunia , & alia , quibus se prioris vitæ verè & ex animo pertæsos esse approbarent , vel potiùs priorum memoriam oblitterarent : atque ita dicebantur , non Deo , sed Ecclesiæ satisfacere.

Quid autem in præsentì controversia doceat Ecclesia Catholica , exponendum & probandum §. sequenti.

## §. IV.

*De necessitate Satisfactionis.*

**N**ecessaria est satisfactio : si Deus à Justis post remissam culpam laboriosa opera exigit in satisfactionem. Itaque

Q. 1. *Remanetne pœna luenda post culpam dimissam?*

R. 1. Non semper remanet ; certum quippe est culpam simul & omnem pœnam elui per Baptismum & martyrium , ut latè prosecuti sumus Tractatu de Baptismo cap. 10.

R. 2. De fide est aliquando , deleta culpa , expiandam superesse temporalem aliquam pœnam ; ita enim definiit Concilium Tridentinum sess. 14. can. 12. his verbis : *Si quis dixerit totam pœnam simul cum culpa remitti semper à Deo , satisfactionemque pœnitentium non esse aliam quàm fidem , qua apprehendunt Christum pro eis satisfecisse , anathema sit.*

Probatur 1. ex Scriptura 1. Cor. 11. scribit Apostolus multos ob indignam Communionem ægrotudinibus & morte fuisse punitos. *Ideo , inquit , inter vos multi infirmi & imbecilles , & dormiunt multi.* Quod autem ejusmodi homines ante mortem Deo reconciliati fuerint , indicat Apostolus sequentibus verbis , *à Domino corripimur , ne cum hoc mundo damnemur.* Nu. 20. Moyses & Aaron non ingressi sunt terram promissam , ex eo quòd aliquid humani passii fuissent ad aquas contradictionis , *pergat Aaron ad populos suos , ait Dominus ; non enim intrabit terram , quam dedi filiis Israel , eò quòd incredulus fuerit ori meo ad aquas contradictionis.* Eadem pœna damnatur Moyses cap. 32. Deuteron. 2. Regum cap. 12. David post impetratam veniam punitus est morte filii , & graves deinde perpessus est calamitates.

Re-

Respondent Adversarii, pœnas illas non fuisse Judicis ultionem, sed paternam correptionem, ut de cætero cautiores essent qui peccaverant.

Contra 1. gratis & absque fundamento illud dicitur 2. mors illata cautiores non reddidit Moysen & Aaron. 3. dum pater filium flagellat, illum simul corrigere & punire intendit. 4. David certior factus per Prophetam, Deum à se transtulisse peccatum, quoad reatum culpæ & damnationis æternæ, nihilominus obnixè rogat, ut ejus deleantur iniquitates, à peccato meo munda me, inquit Psal. 50. *Averte faciem tuam à peccatis meis, & omnes iniquitates meas dele*: Ergo intelligebat pœnitens Propheta reatum pœnæ temporalis non fuisse deletum.

Probatur 2. ex Sanctis Patribus.

Sanctus Augustinus in Psalm. 50. *impunita peccata eorum*, inquit, *etiam quibus ignoscis, non dimissisti; sic prærogasti misericordiam, ut servares & veritatem; ignoscis confitenti, ignoscis, sed ipsum punienti: sic servatur misericordia & veritas.*

Sanctus Gregorius lib. 9. Moral. cap. 27. sic scribit: *procul dubio Dominus delictum sine ultione non deserit: aut enim ipse hoc homo in se pœnitens punit, aut hoc Deus cum homine vindicans percutit.*

Plura Patrum testimonia statim proferemus ad demonstrandum per laboriosa opera, vel sponte suscepta, vel à Sacerdote injuncta Deo satisfieri; quæ necessariò supponunt post dimissam culpam, remanere exsolvendam pœnam.

Objiciunt 1. Adversarii plures Scripturæ textus, Ezechielis 18. de peccatore ad Deum converso ait Dominus v. 22. *omnium iniquitatum ejus, quas operatus est, non recordabor.* Et cap. 33. vers. 15.

& 16. *vita vivet, & non morietur, omnia peccata ejus, quæ peccavit, non imputabuntur ei*, Rom. 3. vers. 27. *justificati gratis per gratiam ipsius*. Et cap. 8. vers. 1. *nihil ergo nunc damnationis est iis, qui sunt in Christo Jesu*. Matth. 6. in Oratione, quam præscribit Christus, postulamus à Deo, ut debita nostra nobis dimittat, *sicut & nos dimittimus debitoribus nostris*: ita autem debemus remittere proximo illatas injurias, ut nihil omninò ab eo repetamus in vindictam. Ergo Deus pœnitenti sic peccata condonat, ut nullam ab eo pœnam exigat.

Distinguo conseq. nullam pœnam exigat ex odio, & in malum pœnitentis, Concedo: ex misericordia secundum justitiæ leges, & in commodum pœnitentis, Nego conseq. Namque charitas patris in filium, præpositi in subditum, & focii in focium, à quo læsus est, aliquando piè sævit, nempe ubi justitia & rectus ordo id exigunt.

Itaque Deus eodem planè modo non recordatur iniquitatum peccatoris, qui ad ipsum ex toto corde convertitur, quo obliviscitur omnium bonorum operum Justi, qui in peccatum prolabitur: atqui bona opera, licèt post lapsum non profint Justo ad vitam æternam, non fraudantur tamen aliqua mercede temporali, ut docent S. Chrysostomus hom. 67. ad populum, S. Hieronymus in caput 29. Ezechielis, S. Augustinus lib. 15. de Civit. Dei cap. 15. S. Gregorius hom. 40. in Evangelia. Similiter impietas post veram conversionem, quamvis non noceat in iis, quæ spectant æternam salutem, nec excludat à Dei amicitia & spiritualibus donis, pœnitentem tamen obnoxium reddit quibusdam pœnis temporalibus

libus, quæ si æquo animo perferantur, cedent in ejus commodum & utilitatem. Unde meritò dixit Apostolus, nihil esse damnationis iis, qui sunt in Christo Jesu; reatus enim pœnæ temporalis, qui remanet post restitutam Dei amicitiam, eum non reddit damnatione dignum, qui paratus est debitam satisfactionem exhibere: nec hactenus in cujusquam, etiam Adversariorum, mentem venit, non solum deponendum odium, & omnem vindictæ affectum, sed insuper debitam pecuniam proximo remittendam, ut in Oratione Dominica cum fructu possimus dicere, *dimitte nobis debita nostra, sicut & nos dimittimus debitoribus nostris.*

Objiciunt 2. nonnullos ex Sanctis Patribus. Sanctus Ambrosius lib. 10. in Lucam sic scribit: *lacrymas Petri lego, satisfactionem non lego.* Sanctus Chrysostomus hom. de Pœnitentia & Confessione, ait: *propter hoc imponit nobis pœnam, non de peccatis sumens supplicium, sed ad futura nos corrigens.* Sanctus Augustinus lib. 2. de peccatorum meritis cap. 34. *respondemus dicentes, inquit, ante remissionem illa esse supplicia peccatorum; post remissionem autem certamina, exercitationesque Justorum.* Et in Psal. 84. ad illud, *operuisti omnia peccata eorum*, sic habet, *Quid est, operuisti? ut non illa videres. Quid est, ut illa non videres? ut illa non vindicares.* Ergo.

Nego conseq. mala enim fide opponuntur laudati textus, ut vel ex ipso contextu legenti patebit. Namque

1. Sanctus Ambrosius eo loci Satisfactionis nomen usurpat pro peccati excusatione seu defensione, vultque dumtaxat S. Petrum crimen non excusasse, sed ultro agnovisse, lacrymas

fudisse; quia quod defendi non potest, inquit, abluere potest.

2. Sanctus Chrysostomus laudata homilia, doctrinam Catholicam luculenter confirmat, nimirum Deum à nobis peccati pœnas exigere in nostram utilitatem, *Ne peccantes, inquit, & inulti manentes, nos efficeremur deteriores, non remisit nobis supplicium, sed vidit hoc manifestè quoddam peccatis ipsis non minus damnosum sit non puniri; propter hoc imponit pœnam.* Quid clarius?

3. S. Augustinus cit. lib. de peccatorum meritis, docet hujus vitæ miseras in Justis esse certamina & exercitationes virtutis, quod ultro agnoscimus; sed non negat quod alibi affirmat, scilicet in Psal. 50. esse etiam ultiones præteritorum peccatorum: *Veritatem, inquit, dilexisti, hoc est, impunita peccata eorum etiam, quibus ignoscis, non dimisisti, sic prorogasti misericordiam, ut servares & veritatem.* In Psal. verò 84. hoc unum intendit S. Doctor, nimirum peccata, quæ Deus operit, æterno supplicio non puniri.

Q. 2. *Reatus pœnæ temporalis, quem diximus interdum remanere post dimissam culpam, potestne redimi bonis operibus?*

R. Potest; idque definitum est à Concilio Trid. sess. 14. can. 13. *Si quis dixerit, pro peccatis quoad pœnam temporalem, minimè Deo per Christi merita satisfieri pœnis ab eo influctis, & patienter toleratis, vel à Sacerdote injunctis, sed neque sponte susceptis . . . atque ided optimam pœnitentiam esse tantum novam vitam; anathema sit.* Et cap. 14. *Si quis dixerit satisfactiones, quibus pœnitentes per Christum Jesum peccata redimunt, non esse cultus Dei, sed traditiones hominum, doctrinam de gratia, & verum Dei cultum, atque ipsum*



*ipsum beneficium mortis Christi obscurantes ; anathema fit.*

Probatur 1. ex Scriptura Prov. 16. *miser cordia & veritate redimitur iniquitas.* Danielis 4. *peccata tua eleemosynis redime , & iniquitates tuas misericordiis pauperum.* Tobiaë 4. *Eleemosyna ab omni peccato , & à morte liberat.*

Probatur 2. ex Traditione. Tertullianus lib. de pœnit. cap. 6. *Quàm porro ineptum , inquit , quàm pœnitentiam non adimplere , & veniam delictorum sustinere ! hoc est , pretium non exhibere , ad mercem manum emittere ; hoc enim pretio Dominus veniam addicere instituit , hac pœnitentiæ compensatione redimendam proponit impunitatem.*

Origenes hom. 15. in Levit. definiens peccata posse redimi in hac vita , sic habet : *Si tamen invenerit manus tua pretium , quid restituat. Quale pretium ? pœnitentiæ sine dubio lacrymis congregatum , & manibus , id est , labore boni operis inventum.* Et hom. 3. in Librum Judicum , *quanto tempore errasse te nosti , quanto tempore deliquisti , tanto nihilominus tempore humilia te ipsum Deo , & satisfacito ei confessione pœnitentiæ.*

S. Cyprianus epist. 55. invehitur in eos , qui pacem pœnitentibus dabant , non exhibita ab ipsis plena satisfactione ; *elaborant , inquit , ne Deo indignanti satisfiat . . . . . datur opera , ne satisfactionibus & lamentationibus justis debita redimantur.* Et serm. de opere & eleemosynis , *nec haberet , inquit , quid fragilitatis humanæ infirmitas atque imbecillitas faceret , nisi iterum pietas divina subveniens justitiæ & misericordiæ operibus ostensis , viam quandam tuendæ salutis aperiret , ut sordes postmodum quasque contrahimus , eleemosynis abluamus.* Loquitur in

*Scripturis Spiritus Sanctus, & dicit: eleemofynis & fide delicta purgantur; non utique illa delicta, quæ fuerant ante contracta; nam illa Christi sanguine & satisfatione purgantur.*

Sanctus Ambrosius lib. 2. de pœnitentia c. 5. *utrumque, ait, beatum dixit, & cujus iniquitas remittitur per lavacrum, & cujus peccatum tegitur operibus bonis; qui enim agit pœnitentiam, non solum diluere lacrymis debet peccatum suum, sed etiam emendatioribus factis operire, & tegere delicta superiora, ut non ei imputetur peccatum. Et lib. de Helia & jejunio cap. 20. redime peccatum tuum. Non venalis est Dominus: sed tu ipse venalis es: peccatis tuis venundatus est; redime te operibus tuis; redime te pecunia tua.*

Sanctus Chrysostomus homil. 41. ad populum: *à nobis ultionem sumamus, ita placabimus Judicem.*

Sanctus Augustinus serm. 351. aliàs hom. 50. *Non sufficit mores in melius mutare, & à factis malis recedere, nisi etiam de his quæ facta sunt, satisfiat Deo.*

Quid autem Pseudo-reformati ad tantam nubem testium respondeant, discemus à Calvino lib. 3. Institut. cap. 4. §. 38. ubi sic loquitur; *Parum me movent quæ in Veterum scriptis de Satisfatione passim occurrunt. Video quidem eorum nonnullos, dicam simpliciter, omnes ferè, quorum libri extant, aut hac in parte lapsos esse, aut nimis asperè & durè locutos. Tantam arrogantiam & impietatem prodiisse, confutasse est.*

Dallæus erga Sanctos Patres Calvino paulò æquior, respondet voluntarias illas carnis macerationes in Scriptis sanctorum Patrum commendari tanquam necessarias ad vitia extirpanda, mores corrigendos, & ut pœnitentes gratiæ Dei recipien-

ciendi paratiores essent, assuescerentque jugo Christi, idque probat ex eo, quòd pœnitentes ejusmodi afflictationibus æquè subjicerentur ante Baptismum, ac ante Sacramentum Pœnitentiæ, & priusquam remissa esset culpa. Unde concludit pia illa opera ideo dici satisfactiones; quia Deum peccatoribus propitium reddunt, quemadmodum famulus, qui præcepta heri observat, illi satisfacere dicitur.

Contra 1. Dallæus non advertit sua interpretatione deferere se communem Ecclesiæ causam, in qua constanter asserimus contra Socinos, Christum verè ac propriè Deo satisfacisse; quæ enim Socinianis opponimus ad vindicandam Christi satisfactionem, ea sicut Dallæus hîc detorquere possunt. Vide quæ in hanc rem disputata sunt Tractatu de Incarnatione cap. 11. pag. 179.

Contra 2. Perinde est sive ante, sive post remissam culpam satisfactio peragatur. Ex eo autem constat laboriosa opera, quæ juxta veterem Ecclesiæ disciplinam præscribebantur peragenda ante absolutionem, fuisse satisfactoria; quòd si quis præ mortis periculo absolutus fuisset ante expletum pœnitentiæ cursum, remitteretur ad eundem pœnitentiæ gradum, in quo fuerat morbo correptus, ut expressè definiunt Concilium Nicænum I. can. 13. Carthaginense IV. canon. 76. Arausicanum I. can. 3. Catechumeni verò non remittebantur ad Catechumenatum, si fortè urgente morbo priùs baptizati fuissent, quàm illum absolvisent. Ergo laboriosa opera erant ad gratiam Baptismi præparatoria dumtaxat; ad Sacramentum verò pœnitentiæ erant simul præparatoria & satisfactoria.

Ex

Ex dictis duo certa sunt. Primum post dimissam culpam interdum remanere reatum pœnæ temporalis: alterum, bonis operibus reatum illum posse expungi. Tertium superest discutendum, num scilicet Sacerdotes contra institutionem Christi sacramentaliter confessis imponant opera satisfactoria, quemadmodum garriunt Novatores. Quare

Q. 3. *Sacerdotes acceperuntne à Christo potestatem injungendi pœnitentibus congruas satisfactiones?*

R. Acceperunt, tenenturque eas injungere, & pœnitentes illas acceptare. Tres responsionis sunt partes.

Primam fide divina credendam definiit Concilium Tridentinum sess. 14. can. 15. & ultimo, his verbis; *Si quis dixerit claves Ecclesiæ esse datas tantum ad solvendum, non etiam ad ligandum, & propterea Sacerdotes, dum imponunt pœnas confitentibus, agere contra finem clavium, & contra institutionem Christi, & fictionem esse, quod virtute clavium, sublata pœna æterna, pœna temporalis plerumque exsolvenda remaneat; anathema sit.*

Secundam tradit eadem Synodus capite 8. ejusdem sessionis, in quo sic loquitur; *Debent ergo Sacerdotes Domini, quantum spiritus & prudentia suggererit, pro qualitate criminum, & pœnitentium facultate salutare & convenientes satisfactiones injungere; ne si forte peccatis conniveant, & indulgentius cum pœnitentibus agant, lævissima quædam opera pro gravissimis delictis injungendo, alienorum peccatorum participes efficiantur. Habeant autem præ oculis, ut satisfactio, quam imponunt, non sit tantum ad novæ vitæ custodiam, & infirmitatis medicamentum; sed etiam ad præteritorum peccatorum vindictam & castigationem.*

Ter-

Tertia pars; nempe quòd pœnitentes teneantur acceptare convenientes satisfactiones, evidenter sequitur ex duabus præcedentibus, si enim Sacerdotes ex Christi præcepto tenentur congruas satisfactiones à pœnitentibus exigere, certò certius iisdem pœnitentibus necessitatem præcepti imponunt acceptandi & peragendi illas satisfactiones; *Is veram pœnitentiam agit*, inquit S. Cyprianus, *qui Dei & Sacerdotis præceptis obediens, operibus justis Dominum promeretur.* Et Concilium IV. Lateranense laudato can. *Omnis utriusque sexus, injunctam sibi pœnitentiam studeant implere.* Tota igitur difficultas versatur circa primam & secundam responsionis partem. Quapropter

Probatur utraque pars, nempe Sacerdotes ex institutione Christi, posse & debere injungere convenientes satisfactiones. 1. ex Scriptura, Matth. 18. *quæcunque alligaveritis super terram, erunt ligata & in cælo*, Joann. 2. *quorum retinueritis (peccata) retenta sunt.* Ubi Christus Dominus Apostolis confert potestatem non solum solvendi & remittendi peccata, sed etiam ligandi & retinendi; ligant autem, cum pœnitentibus imponunt opera satisfactoria, quemadmodum hæc tenus interpretati sunt Sancti Patres, quorum verba jamjam prolaturi sumus.

Probatur itaque 2. ex Patribus.

Tertullianus factus Montanista lib. de pudicitia cap. 13. arguit Catholicos, quòd verba Apostoli, 1. Cor. 5. de Corinthio incesto, quem dicit se cum virtute Domini nostri Jesu tradidisse Sathanæ in interitum carnis, interpretarentur de operibus laboriosis, quæ lapsis post Baptismum imponebant; *Hic*, inquit, *jam carnis interitum in officium pœnitentiæ interpretantur, quòd videatur jejuniis & sordibus,*

dibus, & incuria omni, & dedita opera malæ tentationis carnem exterminando, satis Deo facere, ut ex hoc argumententur, fornicatorem, imò incestum illum non in perditionem Satanae ab Apostolo traditum, sed in emendationem, quasi postea veniam ad interitum, id est, afflictionem carnis, consecuturum.

Origines hom. 24. in Leviticum: Quod dicit, tradidi in interitum carnis, hoc est, in afflictionem corporis, quæ solet à pœnitentibus expendi, eumque carnis interitum nominavit, qui tamen carnis interitus vitam spiritui conferat.

S. Cyprianus serm. de lapsis, Contra Evangelii vigorem, inquit, contra Domini ac Dei legem temeritate quorundam laxatur incautis communicatio; irrita & falsa pax, periculosa dantibus, & nihil accipientibus profutura, non quærunt sanitatis patientiam, nec veram de satisfactione medicinam.

Sanctus Augustinus serm. 351. à Præpositis Sacramentorum accipiat satisfactionis suæ modum.

S. Leo epist. 91. Mediator Dei & hominum hanc Præpositis Ecclesiæ tradidit potestatem, ut & confitentibus actionem pœnitentiæ darent, & eosdem salubri satisfactione purgatos ad communionem Sacramentorum per januam reconciliationis admitterent.

S. Gregorius, aut quivis auctor lib. 3. in primum Regum: actio pœnitentiæ, inquit, ad delenda peccata idonea est, cum ab eo confitentium actibus discussis pro modo criminis, onus eis decernitur afflictionis.

Probatur 3. ratione Theologica: quod semper, ubique, & ab omnibus observatum est, illud Traditionis divinæ censendum est: atqui mos imponendi lapsis post Baptismum opera satisfactoria, in nullo Concilio est institutus, sed semper, ubique, & ab omnibus servatus est, viguit, & etiam-

nunc

nunc viget in Ecclesia tum Orientali, tum Occidentali, ut patet ex omnibus Euchologiis, & libris Sacramentariis, seu Ritualibus. Ergo.

Dices contra tertiam responsionis partem, Sacerdos non est Judex necessarius, sed arbitrarius: ergo pœnitens potest se ei subicere quoad remissionem culpæ tantum, nullatenus verò quoad præceptum pœnæ temporalis solvendæ. Ita nonnulli ex veteribus Theologis.

Nego consequ. licet enim sit in arbitrio pœnitentis eligere quem ex Sacerdotibus delegatis & approbatis maluerit conscientiæ suæ judicem, ritus tamen Sacramentalis judicii est à Christo præscriptus, nefasque est illum mutare, & nisi pœnitens debitam judicio Sacerdotis offerat satisfactionem, quæ est tertia pars Sacramenti, veniam non consequetur.

Instabis; cum Purgatorium sit à Deo destinatum ad expungendum in altero sæculo, quod supererit reatus pœnæ temporalis peccatis debitæ, quidni pœnitens viam illam eligeret præ alia quacunque satisfactione ad reliquias peccatorum suorum expurgandas?

Respondeo mirum videri quomodo hæc cogitatio in mentem venerit quorundam Theologorum, etiam antiquiorum, ausique fuerint obtrudere sterilem & infructuosam pœnitentiam contra expressa Scripturæ verba, Matth. 3. *facite fructus dignos pœnitentiæ*: contra Christi institutionem, qui voluit satisfactionem esse partem integrantem Sacramenti à Sacerdotibus injungendam pro peccatorum gravitate: contra Apostolicam Traditionem, semper & ubique servatam. Annon debitor venit in odium creditoris, qui cum inpræsentia-

sentiarum solvere possit, renuit tamen solvere donec conjiciatur in carcerem? Purgatorium quippe est carcer justitiæ divinæ, è quo nullus egreditur, (nisi pia mater Ecclesia suis suffragiis intercesserit) donec reddat usque ad novissimum quadrantem. Quàm autem isthæc agendi ratio displiceat Deo in infructuosis pœnitentibus, quamque severè ab eo puniatur, clamat Apostolus 1. Cor. 11. *Ideo inter vos multi infirmi & imbecilles, & dormiunt multi*, scilicet mortis sopore: *Quòd si nosmetipsos dijudicaremus* (pœnas à nobismetipsis repetendo) *non utique judicaremur* (gravioribus pœnis.) *Dum judicamur autem à Domino, corripimur, ut non cum hoc mundo damnemur.* Hinc est quòd ipse Apostolus, ut spiritus incesti Corinthii salvus fieret, tradiderit illum in interitum carnis, 1. Cor. 5. quo exemplo S. Pacianus in parænesi ad pœnitentiam urget delicatos & desides pœnitentes, *admovebo*, inquit, *ad huc ignes de cauterio Apostolico.* *Videamus, an ferre possitis?* *Judicavi, inquit, congregatis vobis & spiritu meo in virtute Domini Jesu Christi tradere hujusmodi hominem Satanæ in interitum carnis: Quid dicitis, pœnitentes? Ubi est vestræ carnis interitus? An quòd in ipsa pœnitentia lautiores semper inceditis, convivio farti, balneis expoliti, veste compositi.*

Q. 4. *Confessarius potestne mutare pœnitentiam ab alio impositam?*

Negant nonnulli Theologi; sed distinguendum videtur. Quare

R. 1. Si pœnitentia sit salutaris & conveniens, non potest ab alio mutari: tum quia nulla est illius mutandæ causa: tum quia præceptum est divinum, ut quæ Confessarius præceperit clave non erran-



errante, ea à pœnitentibus observentur: *Amen dico vobis*, ait Christus Matthæi 18. *quæcumque alligaveritis super terram, erunt ligata & in cœlo.*

R. 2. Si pœnitentia non sit conveniens, contingatque ex superveniente circumstantia, ut salutem sive corporis, sive animæ morali periculo exponat, mutari potest ab alio Sacerdote: sed in Sacramentali tantum Confessione, auditis peccatis, propter quæ imposita est.

Probatur; quia sicut Christus in Ecclesia constituit auctoritatem interpretandi & relaxandi leges in foro exteriori, quando necessitas aut urgens ratio id postulat; ita dubium non est, quin similem potestatem dederit pro foro interiori; æquè enim necessarium est relaxare vel mutare pœnitentiam, quæ ex occurrente circumstantia evasit difficilior & periculosa; ac dispensare in voto castitatis, vel in lege prohibente matrimonium inter consanguineos tertii & quarti gradus. Atqui hæc pœnitentiæ relaxatio sive mutatio fieri nequit, nisi virtute clavium, quæ extra Confessionem Sacramentalem non exercetur, nec prudenter fieri potest illa mutatio, nisi cognita causa, propter quam pœnitentia mutanda imposita est. Ergo.

Dixi, *auditis peccatis*; non quod necesse sit integram Confessionem iterare, & singula peccata exponere quoad speciem & numerum; sed satis est si summatim declarentur graviora, & peccandi consuetudo, propter quæ verisimilius gravior pœnitentia injuncta est.

Dices, par in parem non habet potestatem: atqui omnes Sacerdotes in foro conscientiæ sunt pares, nec agnoscunt Superiorem, ad quem ab

eorum iudicio provocare liceat, ut supra diximus. Ergo.

Distinguo majorem: non habet potestatem directè in paria personam, Concedo; in materiam, de qua iudicavit, subdistinguo: non habet potestatem ex proprio officio, Concedo: ex electione pœnitentium, qui eandem materiam iterum ejus iudicio subjiunt, Nego majorem, qui enim electus est in Judicem arbitrum ex consensu litigantium, nonnunquam mutat, irritatque non solum iudicium alterius arbitri sibi æqualis, sed etiam Præsidis, à quo provocatum est: ergo non repugnat quo minus pœnitens, qui se nimis gravatum arbitratur pœnitentia ab uno Confessario injecta, alium eligat, ejusque iudicio eandem materiam subjiat.

Deinde in casu necessitatis Episcopus dispensat circa Ecclesiæ præcepta. Quidni & Confessarius circa præceptum alterius Confessarii?

Instabis; Quæ ligavit unus Sacerdos, sunt ligata & in cœlis, ergo non possunt solvi in terris ab alio Sacerdote.

Distinguo conseq. si non sit locus interpretationi & epichîæ, Concedo: si sit locus: Nego conseq. Nam castitatis votum est ligatum in cœlis, sacri Canones Ecclesiæ disciplinam spectantes, ligant tum in terris, tum in cœlis, ad ea enim extenduntur laudata verba, *quæcunque alligaveritis: nihilominus exigente causa per interpretationem & dispensationem, quam Deus admittit in cœlis, solvuntur.*

Q. 5. Si pœnitentia fuerit injecta propter casus reservatos, Sacerdos, qui non habet facultatem absolvendi à casibus reservatis, potestne illam mutare?

R. Pot.

R. Poteſt; quia reſervatio cadit duntaxat in ipſum peccatum, quod ſupponitur directe remiſſum. Sic voto perpetuæ caſtitaſis per Summum Pontificem in aliam materiam commutato, Epiſcopus commutare poteſt eandem materiam, ſi difficilius evaſerit, ut diximus Tractatu de Religione cap. 5. §. 6.

## §. V.

*De tempore, quo imponenda & implenda eſt Satisfactio.*

Q. 1. *Quo tempore imponenda eſt Satisfactio?*

R. Poſt exceptam confeſſionem; quia confeſſione ſatisfactio diſponitur, ex Tertulliano, & priuſquam impertiatur abſolutionis beneficium; quia Sacerdos abſolvere non debet; niſi quem novit diſpoſitum ad dignos pœnitentiæ fructus: atqui piam illam pœnitentis affectionem non deprehendit, cùm pœnitens conſentaneas pœnas accepit. Ergo. Præterea Sacerdos ex dictis pœnitentem ligare debet imponendo condignam ſatisfactionem: ſi autem imponeret poſt abſolutionem, quomodo ligaret eum, quem jam ſolvit, & liberum dimittit? ſi fortè tamen Sacerdos oblitus eſſet ante abſolutionem injungere pœnitentiam, poſſet & deberet illam injungere data abſolutione.

Q. 2. *Quando implenda eſt pœnitentia?*

R. Tempore à Sacerdote præſcripto, peccaretque pœnitens, ſi abſque neceſſitate eam ad aliud tempus differret; quia circumſtantia temporis includitur in præcepto. Si tamen pœnitens diſtuliffet, quamprimùm illam implere teneretur; quia determinatio temporis non eſt ad finiendam

obligationem, sed ad non differendam, quemadmodum solutionis terminus à creditore debitori præfixus.

Q. 3. *Estne necesse ut pœnitentia impleatur ante absolutionem?*

R. Sequenda est Ecclesiæ disciplina: nec enim ratio Sacramenti postulat, ut satisfactio impleatur, sive ante, sive post absolutionem, nec hac de re ullum in Scriptura extat præceptum. Unde meritò Sixtus IV. hanc Petri Oxoniensis propositionem proscripsit an. 1478. *non sunt absolvendi pœnitentes, nisi peracta prius pœnitentia eis imposita.* Idipsum postea proscripsit sacra Facultas Parisiensis ann. 1644. in censura libri Theophyli Brachet. Ac demum Alexander VIII. in Generali Congregatione Inquisitionis anno 1690. inter plures propositiones ad ipsum delatas, damnavit sequentes, quæ sunt ordine 16. & 18.

*Ordinem præmittendi satisfactionem absolutionis induxit, non politia aut institutio Ecclesiæ, sed ipsa Christi lex & præscriptio, natura rei idipsum quodammodo dictante.*

*Consuetudo moderna quoad administrationem Sacramenti Pœnitentiæ, etiamsi eam plurimorum hominum sustineat auctoritas, & multi temporis diuturnitas confirmet, nihilominus ab Ecclesia non habetur pro usu, sed abusu.*

Dices. Constans est veterum Patrum doctrina, Deum veniam non concedere nisi pœnitentia functis. Tertullianus lib. de Pœnitentia cap. 6. sic habet: *quàm porro ineptum, pœnitentiam non adimplere, & veniam delictorum sustinere! hoc est, pretium non exhibere, ad mercem manum mittere. Hoc enim pretio Dominus veniam addicere instituit.* Similia habet Sanctus Ambrosius lib. 7. in Lucam. Et Sanctus Cyprianus serm. de lapsis adversus molliores Sacerdo-

cerdotes, qui lapsis prius pacem concedebant, quàm debitam satisfactionem exolvissent, ait: *contra Evangelii rigorem, contra Domini ac Dei legem temeritate quorundam laxatur incautis communicatio. Irrita & falsa pax, periculosa dantibus, & nihil accipientibus profutura.* Ergo contra Dei præceptum & rationem Sacramenti absolutio impertitur ante expletam satisfactionem.

Distinguo antecedens: & hæc dicuntur ratione virtutis pœnitentiæ, quæ secundum Dei legem, & Sacramenti rationem præcedere debet peccatorum remissionem seu absolutionem, Concedo: & hæc præcisè dicuntur ratione laboriosorum operum, quæ sunt fructus veræ pœnitentiæ, Nego antecedens. Namque primis illis temporibus pœnitentes nonnunquam ante expletum pœnitentiæ stadium reconciliabantur. 1. propter libellos supplices Martyrum. 2. quando imminabat persecutio. 3. cùm erant constituti in mortis periculo. 4. quoties ex hæresi aut schismate alios secum ad Ecclesiam reducebant. Ergo apud Veteres constabat non esse de ratione Sacramenti, nec extare ullum Dei præceptum, ut satisfactio absolutionem præcedat. Quare textus nobis oppositi, & alii similes carpunt duntaxat eos, qui sine vera pœnitentia, in qua necessariò includitur votum faciendi Deo satis, veniam peccatorum confidentius sperabant per Sacramentum sive Baptismi, sive Pœnitentiæ. Et illud vel ex eo patet, quòd Tertullianus loco in objectione laudato infectetur Catechumenos, à quibus certè non exigebatur satisfactio, de qua hìc est sermo; sed vera duntaxat pœnitentia, quàm Veteres duris laboribus probandam ducebant.

Q. 4. *Quenam hætenus fuit Ecclesiæ disciplina circa tempus implendæ satisfactionis?*

Dissentiunt Theologi. Alii opinantur semper impertitam fuisse prius absolutionem, quàm pœnitentia impleretur, contenduntque reconciliationem, quæ fiebat post exantlatos duos pœnitentiæ publicæ labores, fuisse merè cæremonialem, qua pœnitentes privatim absoluti, palam & solemniter restituebantur communioni Ecclesiæ. Alii contra existimant, cum quibus

R. Quo tempore fuit in usu pœnitentia publica, Sacramentalis absolutio lege communi & ordinaria, non dabatur ante expletam pœnitentiam. Dico, *lege communi & ordinaria*; nam, ut mox observavimus, in casibus extraordinariis impertiebatur, nondum absoluto pœnitentiæ stadio.

Probatur variis antiquorum Patrum testimoniis.

Tertullianus lib. de Pudicitia cap. i. cùm jam stare à patre Montani, negaretque, juxta hujus sectæ placita, Ecclesiam accepisse potestatem remittendi graviora peccata post Baptismum commissa, sic insurgit adversus Sanctum Zephyrinum Summum Pontificem: *odio etiam edictum esse propositum, & quidem peremptorium. Pontifex scilicet Maximus, Episcopus Episcoporum dicit, ego & mœchiæ & fornicationis debita pœnitentia functis dimitto.* Ubi advertes controversiam non fuisse Catholicos inter & Montanistas de reconciliatione cæremoniali, sed de ipsa remissione peccatorum, quam Tertullianus agnoscit mœchis à Zephyrino concedi: Sed quibus mœchis? pœnitentia functis: ergo mœchi à peccatis non absolvebantur, nisi post expletam pœnitentiam.

S. Am-

S. Ambrosius lib. 2. de pœnitentia cap. 9. *Nonnulli, inquit, idèd poscunt pœnitentiam, ut statim sibi reddi communionem velint. Hi non tam se solvi cupiunt, quàm Sacerdotem ligare, suam conscientiam culpa non exuant, & Sacerdotis induunt. Porro culpa non tollitur per cæremonialem reconciliationem, sed per sacramentalem absolutionem, quam negat S. Doctor statim impertiendam.*

S. Pacianus epist. 1. ad Sympronianum Novatianum: Scio, inquit, *frater, hanc ipsam pœnitentiæ veniam non passim omnibus dari . . . . . post multos gemitus, effusionemque lacrymarum, post Ecclesiæ totius preces venia veræ pœnitentiæ non negatur.* Quæ verba necessario intelligi debent de reconciliatione cum Deo; de hac enim solummodo agebatur Catholicos inter, & Novatianos.

Innocentius I. epist. ad Decentium c. 7. *Ceterum, inquit, de pondere æstimando delictorum Sacerdotis est judicare, ut attendat ad confessionem pœnitentis, & ad fletus atque lacrymas corrigentis, ac tunc debere dimitti, cum viderit congruam satisfactionem.*

S. Léo epist. 82. aliàs 91. *Mediator Dei & hominum homo Christus Jesus, inquit, hanc præpositis Ecclesiæ tradidit potestatem, ut & confitentibus actionem pœnitentiæ darent, & eosdem salubri satisfactione purgatos, ad communionem Sacramentorum per januam reconciliationis admitterent.*

Mitto innumeros alios, ut S. Cyprianum ser. de lapsis, & epist. 55. S. Gregorium Magnum hom. 26. in Evangelia, S. Eligium hom. 8. in Cœna Domini, qui eo modo loquuntur, quo supra laudati Patres.

Dices. Reconciliatio quæ fit à toto Clero, non est Sacramentalis, sed merè cæremonialis, atqui

pœnitentes post peractam pœnitentiam, non reconciliabantur à solo Episcopo & Presbyteris, sed etiam à Clero inferiori, ut constat ex epist. 10. S. Cypriani. Ergo.

Nego majorem; cùm enim pœnitentes reconciliarentur Deo, & Ecclesiæ, reconciliatio eorum erat simul Sacramentalis & cæremonialis, quemadmodum in ordinatione Presbyteri manus imponuntur tum ab Episcopo, tum à Presbyteris assistentibus, sed in diversa significatione; namque manuum impositio, quæ fit per Episcopum, est consecratoria & Sacramentalis: quæ autem fit per Clerum, est cæremonialis & mera testificatio, quòd Clerus recens inauguratum lubenter in suum ordinem recipiat. Similiter Episcopus & Clerus per manus impositionem reconciliatoriam pœnitentia functum reconciliabant, sed longè dispari ratione: Episcopus quippe ex potestate sibi divinitus concessa, pœnitentem à peccatis absolvebat, reconciliabatque Deo: Clerus verò gratulabundus ob reditum fratris, qui perierat, in suam communionem admittebat.

Q. 4. *Nunquamne licet Sacerdoti per bodiarnam Ecclesiæ disciplinam injungere pœnitentiam ex parte saltem, implendam ante absolutionem?*

R. Non solum licet aliquando, sed omnino necessarium est, quoties pœnitens non dat sufficientia conversionis seu contritionis signa. Exemplum esto, hætenus jejunium quadragesimale integrè non observavit, cùm possit & debeat, longas inimicitias gessit, necdum reconciliatus est, aliosque vitiosos habitus malè vivendo comparavit, quos contrariis virtutum actibus tollere ne quidem adorsus est, nec Confessioni Sacramentali



tali quiddam præmisit præter examen conscientiaë, & conceptum momento temporis, ut fingit, contritionis actum, cum ex dictis ubi de Contritione, & de Justificatione, Tract. de Gratia pag. 430. & seq. Deus non solet tantum donum concedere, nisi orantibus, pulsantibus, & laborantibus. Ligandi sunt ergo ejusmodi pœnitentes & dimittendi, donec operibus à Sacerdote injungendis, probata sit eorum conversio. Sed de hoc argumento iterum ubi de Absolutione.

## §. VI.

*De conditionibus Satisfactionis.*

Q. *Quot sunt conditiones Satisfactionis?*

R. Sex. 1. Debet esse actio moraliter bona. 2. Supernaturalis. 3. Laboriosa & pœnalis. 4. Ab homine justo; saltem ut sit de condigno. 5. Æqualis reatui, seu debito pœnæ temporalis: nisi justa de causa relaxanda sit. 6. Secreta pro peccatis occultis, publica pro publicis. De duabus posterioribus conditionibus seorsim differemus, plura quippe circa eas discutienda occurrunt. Hic paucis dicemus quæ spectant priores quatuor conditiones, utpote quæ faciliè colligantur ex jam dictis.

Primò itaque satisfactio debet esse actio moraliter bona. Actio quidem, non passio; satisfactio enim est actus virtutis pœnitentiaë, quo pœnitens voluntariè, ac liberè injunctis pœnis se subjicit ad compensandam illatam per peccatum Deo injuriam: actio autem illa debet esse moraliter bona; quia actio mala est nova Dei offensa, propter quam homo novum contrahit reatum,

nedom exolvat jam contractum. Unde longè absurdissima est quorundam Modernorum sententia, qua docuerunt pœnitentem adimplere pœnitentiam à Sacerdote injunctam per actum, puta jejunium, aut eleemosynam, ex fine, vel ex circumstantiis malum.

Secundo, satisfactio debet esse supernaturalis, hoc est, ex fide per pœnitentiam operante; quia opera nostra nec meritoria, nec satisfactoria sunt, nisi per Christum, sine quo nihil possumus facere, Joan. 15.

Tertio, debet esse laboriosa & pœnalis; quia cum supponatur Pœnitens obnoxius pœnæ temporali, justitia exigit, ut pœnam illam evolvat piis ac laboriosis afflictationibus, quemadmodum superius fusè probavimus.

Quarto, ut opus sit satisfactorium de condigno, fiat necesse est ab homine justo, probaturque 1. iisdem momentis, quibus demonstravimus Tractatu de Actibus humanis ad meritum de condigno requiri statum gratiæ sanctificantis. 2. Quia ex dictis Deus veniam non concedit, nisi iis, quos recepit in suam amicitiam. Quare pœnitens prius conari debet promereri Dei amicitiam, quàm liberari à pœna peccatis debita: *Sine charitate opera facta non sunt satisfactoria*, inquit Sanct. Thomas in Suppl. quæst. 14. artic. 2. Et in responsione ad secundum: *dicendum*, inquit, *quod sicut homo nescit pro certo utrum charitatem habuerit in satisfaciendo, vel habeat: ita etiam nescit pro certo utrum plenè satisfecerit: & idèd dicitur Eccli. 5. de propitiato peccato noli esse sine metu.*

Dices, lib. 3. Reg. cap. 21. Achab quamvis impius, per animi dejectionem, & carnis afflictatio-

stationem avertit pœnas, quas Deus per Eliam Prophetam comminatus fuerat: ergo peccator per opera laboriosa, præsertim si ex gratia fiant, potest satisfacere.

Distinguo anteced. Avertit ad tempus pœnas, in hac vita subeundas, Nego anteced. Achab itaque, ex S. Thoma cit. quæst. art. 5. ad tempus dumtaxat avertit pœnas à Propheta intentatas; illas enim tandem exolvit cit. cap. vers. 29. quia ab impietate sua non recessit. Unde colligere licet illum pœnitentiam egisse ex motivo dumtaxat merè naturali, nempe ut declinaret gravissimas pœnas, quas Elias comminatus fuerat. Porro Deus illas ad tempus suspendit propter exteriorum Regis dejectionem, & voluntariam afflictationem, non quòd esset apud Deum illius meriti; nam ex Apostolo I. Coriuth. 13. *Si tradidero corpus meum, ita ut ardeam, charitatem autem non habuero: nihil mihi prodest.* Suspendit igitur, ut tam ipse Achab, quàm subditi, vel hoc solo divinæ clementiæ exemplo, discerent Deum, quem prædicabat Elias, solum esse timendum & colendum, utpotè omnium bonorum & pœnarum auctorem; contemnenda verò idola, quæ nec benè nec malè possunt facere.

Distinguo etiam consequ. Peccator per opera laboriosa & supernaturalia potest satisfacere de congruo, vel ex opere operato, & virtute clavium, Conc. De condigno, & ex opere operantis. Nego consequ. Itaque peccator, qui ad obtinendam peccatorum remissionem seipsum dejicit, castigatque, & impensius orat cum lacrymis, vel ista suscepit propria sponte, vel ex præcepto Confessarii. Si primum, meretur de congruo, &  
ex

ex opere operantis perfectam contritionem; quæ simul cum culpa plus, vel minus de reatu pœnæ temporalis remittit, quò perfectior fuerit. Eo autem perfectiorem obtinebit, quò magis ad eam sese disposuerit. Si secundum, laboriosa illa opera; utpotè partes Sacramenti ex opere operato expungunt reatum pœnæ temporalis, vel totum, vel partem ejus, prout plura & majora fuerint. Unde Confessarius in injungenda satisfactione eorum rationem habere debet, & leviozem pœnitentiam imponere ei, qui prius majores pœnas de seipso sumpsit. Hinc solvitur quæstio, utrùm qui post absolutionem in peccatum mortale lapsus est, nondum impleta satisfactione à Sacerdote sibi injuncta, reatum, qui superest, pœnæ expungat per subsequentiâ bona opera; dicendum enim est non expungere, quamdiu remanebit reatus culpæ mortalis, sed ad summum novum pœnæ reatum non incurrere, in hypothefi quòd per ejusmodi opera præcepto Sacerdotis satisfaciât.

In Scholis autem controvertitur, num iteranda si pœnitentia à Sacerdote injuncta, quam pœnitens post absolutionem relapsus, perficit in statu peccati mortalis?

Nonnulli Theologi affirmant, quia pœnitentia illa nullatenus exolvit reatum pœnæ temporalis, & nulla habetur solutio, quæ fit nummo adulterino.

Alii Theologi distinguunt. Vel satisfactio injuncta est actio transiens, quæ nullum producit effectum, ut oratio: vel habet adjunctum opus externum, puta jejunium, aut eleemosynam, ex quo caro debilitatur, vel substantia minuitur. Si primum, pœnitentia est iteranda. Si secundum,

dum, non est iteranda. Ita S. Thomas in Supplem. qu. 14 art. 3. ad 3. *Dicendum, inquit, quòd aliquæ satisfactiões sũt, ex quibus manat aliquis effectus in satisfaciẽtibus, etiam postquam actus satisfactiõis transiit, sicut ex jejuniis manet corporis debilitatio, & eleemosynarum largitiõne substantiæ diminutio, & sic de similibus. Et tales satisfactiões in peccatis factæ, non oportet ut iterentur; quia quantum ad hoc, quod de eis manet, per pœnitentiam Deo acceptæ sũt. Satisfactiões autem; quæ non relinquunt aliquem effectum in satisfaciẽte, postquam actus transiit, oportet ut iterentur, sicut orationes, & alia hujusmodi. Actus autem interior, quia totaliter transiit, nullo modo vivificatur, sed oportet ut iteretur.*

Alii Theologi absolutè negant pœnitentem teneri iterare pœnitentiam cum recta intentione impletam, licèt in statu peccati mortalis: tum quia bonum opus ex gratia elicitum ab homine in statu peccati mortalis, est meritorium & satisfactorium de congruo, quatenus disponit ad Sacramentum, quod cum remissione culpæ plus, vel minùs minuit reatum pœnæ temporalis, quò pœnitens fuerit magis, vel minùs dispositus: tum quia sicut injunctæ pœnæ ante absolutionem implendæ virtute clavium, & ex opere operato reatum pœnæ temporalis excludunt; ita pœnæ in Sacramento injunctæ, & post absolutionem exolvendæ, etiamsi superveniat peccatum mortale, priusquam expletæ fuerint: attamen cum illud peccatum in proxima Confessione clavibus subjiçietur, satisfactoriæ evadent, sublato impedimento, nimirum peccato mortali.

## §. VII.

*De quantitate Satisfactionis.*

Q. I. *Quanta debet esse Satisfactio?*

R. Tanta, ut pro pœnitentis facultate æqualis sit debito, seu reatui pœnæ temporalis, qui major, vel minor est pro criminum qualitate. Id sonat Satisfactionis nomen, & exigit ipsa iustitiæ ratio; nam, ut observavimus ex Catechismo Romano, tum fit fatis cùm nihil eorum deest quæ fieri debent: & iustitiæ officium est, æquare, quantum fieri potest, satisfactionem illatæ injuriæ. Sed Theologica eaque firmiora nobis suppetunt argumenta ad stabiliendam nostram responsionem. Quare

Probatur I. ex sanctis Patribus.

S. Cyprianus serm. de lapsis; *Pœnitentia, inquit, crimine minor non sit.*

S. Basilii in Psalm. 39. *Attende tibi, ut pro delicti proportionem hinc quoque mutueris ex admota tibi medela, valetudinis instaurandæ subsidium. Magnum est & grave peccatum? Multa opus habet confessio, lacrymis amarulentis, peracri contentione vigiliarum indivulso & continenti jejunio. Levis est, nec intoleranda offensio? huic quoque exæquetur pœnitentia.*

S. Ambros. ad virginem lapsam, c. 8. *Grandi plagæ, inquit, alta & prolixa opus est medicina: grande scelus grandem necessariam habet satisfactionem.*

Beda in Psalm. 4. ad illud, *sacrificate sacrificium iustitiæ*, sic scribit, quasi dicat: ita dico, ut irascimini præteritis peccatis, ut sacrificetis sacrificium, id est, mortificetis propria vitia vestra, faciendo dignos fructus pœnitentiæ, tantum scilicet pro singulis vos affligentes, quantum digna expetit pœnitentia, quod erit sacrificium iustitiæ.

Ne

Ne cui autem videatur hæc à Patribus fuisse scripta, non secundum Dei præceptum, sed juxta ætatis suæ disciplinam, & veteres canones, qui à pluribus sæculis non sunt in usu,

Probatur 2. ex Concilio Tridentino sess. 14. cap. 8. in quo sic habet : *Debent ergo Sacerdotes Domini, quantum spiritus & prudentia suggererit, pro qualitate criminum & pœnitentium facultate salutare & convenientes satisfactiones injungere; ne, si fortè peccatis conniveant, & indulgentius cum pœnitentibus agant, levissima quædam opera pro gravissimis delictis injungendo, alienorum peccatorum participes efficiantur. Habeant autem præ oculis, ut satisfactio, quam imponunt, non sit tantum ad novæ vitæ custodiam & infirmitatis medicamentum, sed etiam ad præteritorum peccatorum vindictam & castigationem; nam claves Sacerdotum non ad solvendum dumtaxat, sed & ad ligandum concessas, etiam antiqui Patres credunt & docent; nec propterea existimarent Sacramentum Pœnitentiæ esse forum iræ, vel pœnærum.*

Q. 2. *Quot sint observanda circa illam Concilii doctrinam?*

R. Quinque apprimè necessaria.

Primum, hæc Concilii doctrina non ad disciplinam dumtaxat pertinet, sed est sincera ac authentica præcepti divini interpretatio, nec proinde hic opponere licet Concilium in hac parte, non esse receptum. Laudata enim verba, *debent ergo Sacerdotes, &c.* rationem habent conclusionis, quam Patres inferunt ex institutione Sacramenti, & Dei ordinatione, quam in præcedentibus probaverant, ut legenti patebit.

Secundum, quantitas satisfactionis juxta hodiernam Ecclesiæ disciplinam arbitrio Sacerdotis æstiman-

æstimanda ita relinquitur, ut eam decernat, non pro libitu, & ad nutum, sed secundum prudentiæ regulas tanquam fidelis Minister perpenſa peccatorum gravitate, ac multitudine & pœnitentis facultate, *quantiam spiritus & prudentia suggerit*, inquit Patres. Et S. Thomas in Supplem. quæſt. 18. art. 4. ad 1. dicendum, inquit, *quòd arbitrium illud debet eſſe divino inſtinctu regulatum.*

Eodem igitur modo eſt in arbitrio Sacerdotis determinare quantitatem ſatiſfactionis, quo remittere, aut retinere peccata, & diſpenſare in votis. Unde ſicut nulla & irrita eſt abſolutio à peccatis, & diſpenſatio in votis, niſi concedatur ſecundum judicium ſupremi Judicis; ita illicitè imponeretur ſatiſfactio ad legem Chriſti non exacta: Sacerdos, inquit S. Thomas citato art. 4. *operatur in uſu clavium, ſicut inſtrumentum & Miniſter Dei, nulum autem inſtrumentum habet efficacem actum, niſi ſecundum quod movetur à principali agente, & ideo dicit Dionyſius in fine Eccleſ. Hierarc. quòd Sacerdotibus utendum eſt Virtutibus Hierarchicis, quomodo divinitas eos moverit, in cujus ſignum . . . . . Joan. 20. præmittitur poteſtati remiſſionis Apoſtoliſ datæ Spiritus Sancti donum, quo filii Dei aguntur. Unde ſi quis præter illum motum divinum uti ſua poteſtate præſumpſerit, non conſequetur effectum, ut Dionyſius dicit. Et præter hoc à divino ordine averteretur, & ſic culpam incurreret.*

Tertium: Sacerdos in imponenda pœnitentia, duo intendere debet. Primum, ut illa ſit in novæ vitæ cuſtodiam, & infirmitatis medicamentum. Secundum, ut ſit pœna & caſtigatio ob præterita delicta.

Differt ergo pœnitentia in Sacramento pœnitentiæ injungenda ab ea, quæ à Catechumenis ante Baptiſ-



Baptismus exigitur. Iſtis quippe pœnitentia injungitur dumtaxat ad promerendam Dei gratiam, qua verum dolorem de peccatis, & efficax propositum non peccandi de cætero concipiant, viciosos habitus ex malâ consuetudine contractos eradicent, jugo Christi assueſcant, & custodiendo sanctificationis dono idonei reddantur. In Sacramento verò pœnitentiæ Sacerdotes habeant.....præ oculis, ut satisfactio, quam imponunt, non sit tantum ad novæ vitæ custodiam, & infirmitatis medicamentum, sed etiam ad præteritum peccatorum vindictam.

Quartum: Pœnitentia debet imponi quantum spiritus & prudentia suggererit pro qualitate criminum, & pœnitentium facultate. Quamvis enim constare non possit quantam pro unoquoque peccato satisfactionem Deus exigit, certum tamen est majorem exigere pro graviore peccato, quam pro leviori; pro pluribus, quam pro uno delicto. Unde meritò docent Tridentini Patres in imponenda pœnitentia attendendam peccatorum qualitatem, nec propterea existimandum Sacramentum Pœnitentiæ forum iræ, vel pœnarum, quemadmodum calumniantur Novatores.

Addunt spectandam quoque pœnitentium facultatem; quia ex S. Thoma in Supplem. cit. qu. 18. art. 4. *Pœnæ satisfactoriæ infligendæ medicina sunt: sicut autem medicinæ in arte determinata non omnibus competunt, sed variandæ sunt secundum arbitrium Medici, non propriam voluntatem sequentis, sed scientiam medicinæ: ita pœnæ satisfactoriæ in Canone determinatæ non competunt omnibus, sed variandæ sunt secundum arbitrium Sacerdotis divino instinctu regulatum. Sicut ergo*

*Medicus aliquando prudenter non dat medicinam ita efficacem, quæ ad morbi curationem sufficiat, ne propter debilitatem naturæ magis periculum oriatur: ita Sacerdos divino distinctu motus non semper totam pœnam, quæ uni peccato debetur, injungit, ne infirmus aliquis ex magnitudine pœnæ desperet, & à pœnitentia totaliter recedat.*

Quintum: Sacerdos gravis peccati fit reus, si ab expositis per Concilium regulis timore, favore, aut negligentia notabiliter recedat; grave enim peccatum denotant laudata Concilii verba: *Ne, si fortè peccatis conniveant, & indulgentiùs cum pœnitentibus agant, levissima quædam opera pro gravissimis delictis injungendo, alienorum peccatorum participes efficiantur.*

Dicēs cum S. Thoma cit. art. omnis Christi actio nostra est instructio: atqui ipse Christus quibusdam nullam pœnam imposuit, sed solum morum emendationem, ut patet de adultera; Joan. 8. Ergo.

Respondet Angelicus Doctor, quodd Christus habuit potestatem excellentiæ in Sacramentis: unde ipse ex auctoritate pœnam totam, vel partem poterat dimittere sicut volebat: non est ergo simile de his, qui operantur tantum ut Ministri.

Q. 3. Teneturne Sacerdos injungere pro qualitate criminum pœnas canonibus Ecclesiæ determinatas & præscriptas?

R. 1. Non tenetur; quia cùm Ecclesia, saltem Latina, à pluribus sæculis eorum observationem non urgeat, censetur tacitè relaxasse veterem disciplinam, habita ratione infirmitatis Fidelium, ne scilicet, sicut suprà docebat Angelicus Doctor, infirmus aliquis ex magnitudine pœnæ desperet, & à pœnitentia totaliter recedat.

Dixi

Dixi, *saltem in Ecclesia Latina* ; nam in Græca adhuc vigent.

Dices, Ecclesia non potest relaxare quæ sunt juris divini : atqui ex præcepto divino & institutione Christi, satisfactio debet respondere gravitati culpæ. Ergo

Distinguo maj. Non potest relaxare sine causa, Conc. Cum causa, nimirum exigente pœnitentium infirmitate, Nego maj. Namque vota ex præcepto divino sunt implenda ; & tamen Ecclesia, propter graves causas auctoritate sibi concessa, Matth. 18. *quæcumque solveritis*, &c. illa commutat, aut relaxat.

R. 2. Licet Canones Pœnitentiales hodie non habeant vim legis, S. tamen Carolus in Instructione Confessariorum à Clero Gallicano approbata anno 1655. & plures Synodi post Concilium Tridentinum celebratæ, ut Bituricensis anno 1584. can. 9. de Pœnitentia, docent eorum notitiam Sacerdotibus etiamnunc esse necessariam, tum ut peccati gravitatem ad pondus Sanctuarii æstiment : tum ut oculis pœnitentium exponant quibus obnoxii sint pœnis, etiam dimissa culpa, quas proculdubio non effugient, nisi voluntariis castigationibus judicium Dei præveniant. Enimverò justitia Dei, apud quem non est transmutatio, nec vicissitudinis obumbratio, Jacobi 1. eadem semper permanet, pœnasque easdem etiam nunc, quas priscis temporibus pro peccatis exigit, nec fas est credere Ecclesiam fidelem ejus interpretem graviore olim injunxisse, quam peccata mererentur. Quapropter Canones Pœnitentiales, quamvis ex condescensu quodammodo necessario vim legis hodie non habeant, certò tamen

docent quantus remaneat reatus pœnæ temporali exolvendæ. Operæ pretium ergo fuerit ex pluribus Canonibus Pœnitentialibus eos hîc colligere, quorum notitia Sacerdotibus hujus temporis sit utilior.

### §. VIII.

#### *Referuntur Canones Pœnitentiales juxta ordinem Decalogi.*

Sequentes Canones ex variis Conciliis, & Libris Pœnitentiariis collecti sunt à Gratiano, Ivone, & aliis.

#### CIRCA I. DECALOGI PRÆCEPTUM.

Qui à fide desciverit, pœnitentiam aget annis decem.

Qui alicui Gentilium superstitioni operam dederit, pœnitens erit duos annos.

Qui auguriis & divinationibus servierit, quive Incantationes Diabolicas fecerit, in pœnitentia erit annos septem.

Qui Magos consuluerit, pœniteat annos quinque.

Qui herbas medicinales cum incantationibus collegerit, pœnitentiam aget dies viginti.

Si quis ligaturas, aut fascinationes fecerit, pœnitens erit annos duos.

#### CIRCA II. PRÆCEPTUM.

Quicumque sciens pejeraverit, quadraginta dies in pane & aqua, & septem sequentes annos pœniteat; & nunquam sit sine pœnitentia, & nunquam

quam in testimonium recipiatur , & post hæc Communionem percipiat.

Qui perjurium in Ecclesia fecerit , pœnitentiam aget annos decem.

Si quis se jurejurando obstrinxerit , ut cum aliquo litiget , nec pacem cum eo reconciliet , in pœnitentia erit diebus quadraginta in pane & aqua , per annum à sacra Communionem segregatus ; ad charitatem verò celeriter redeat.

Si quis Deum , vel beatam Virginem , vel aliquem Sanctum publicè blasphemaverit , præ foribus Ecclesiæ diebus Dominicis septem in manifesto , dum Missarum solemnità aguntur , stet ; ultimoque ex illis die sine pallio & calceamentis , ligatus corrigia circa collum : septemque præcedentibus feriis sextis , in pane & aqua jejundet , Ecclesiam nullo modo tunc ingressurus. Singulis autem septem illis diebus Dominicis tres , aut duos , aut unum pauperem pascat , si potest ; alioquin alia pœnitentia afficiatur. Recusans , Ecclesiæ ingressu interdicatur , in obitu Ecclesiastica careat Sepultura. Dives à Magistratu mulctetur pœna solidorum quadraginta , alioqui triginta , seu viginti.

### CIRCA III. PRÆCEPTUM.

Qui opus aliquod servile die Dominico festo fecerit , pœnitentiam aget tres dies in pane & aqua.

Qui die Dominico vectaverit , dies septem pœnitentiam aget.

Si quis ante Ecclesias , vel die festo saltationes

nes fecerit, pollicitus emendationem pœnitentiam aget annis tribus.

Si quis pransus Missæ interfuerit, pœnitens erit dies tres in pane & aqua.

Si quis in Ecclesiâ confabuletur, cum Divina fiunt, pœnitens erit dies decem in pane & aqua.

Si quis jejunia S. Ecclesiæ violaverit, pœnitentiam aget dies viginti in pane & aqua.

Qui in Quadragesima jejunium violaverit, pro uno die pœnitentiam aget dies septem.

In Quadragesima, carne sine inevitabili necessitate vescens, in Pascha non communicet, ac præterea à carne absteineat.

#### CIRCA IV. PRÆCEPTUM.

Qui parentibus maledixerit, quadraginta dies pœnitens sit in pane & aqua.

Qui parentes injuria affecerit, tres annos.

Qui percusserit, annos septem.

Si quis contra Episcopum, Pastorem, & patrem suum insurrexerit, in Monasterio omnibus diebus vitæ suæ pœnitentiam aget.

Si quis Episcopi sui, aut Ministrorum ejus, vel Parochi sui præcepta contempserit, vel irriserit, pœnitentiam aget quadraginta dies in pane & aqua.

#### CIRCA V. PRÆCEPTUM.

Si quis Presbyterum occiderit, quinque annis ab ingressu Ecclesiæ arcebitur, decem annis non communicabit, & nunquam erit sine pœnitentia,

Si

Si quis patrem, aut matrem, fratrem, aut sororem occiderit, toto vitæ suæ tempore non fuscipiat Corpus Domini, nisi in obitu: abstineat à carne & vino dum vixerit, jejundet secunda, & quarta, & sexta feria.

Qui sceleris occultandi causa filium necarit, pœnitentiam aget annos decem.

Si qua mulier spontè abortum fecerit, pœnitentiam aget annos tres: si nolens, Quadragesimas tres.

Qui nolens filium oppresserit, pœnitentiam aget dies quadraginta in pane & aqua, oleribus, & leguminibus, abstinebit ab uxore dies totidem. Deinde pœnitens erit tres annos per legitimas ferias: tres præterea Quadragesimas in anno observabit.

Cujus filius sine Confirmationis Sacramento moritur, parentes, quorum negligentia id factum est, pœnitentiam agent annos tres.

Si mulier maritum suum causa fornicationis interfecerit, sæculum relinquat, & in Monasterio pœniteat.

Si quis hominem occiderit, ad januam Ecclesiæ semper erit, & in obitu Communionem recipiet.

Qui homicidii auctor fuit, ob consilium quod dedit, erit in pœnitentia quadraginta dies in pane & aqua, cum septem sequentibus annis.

Si quis per iram subitam, aut per rixam hominem necarit, pœnitentiam aget annos tres.

Si quis casu homicidium fecerit, pœnitens erit quadraginta dies in pane & aqua: quinquennio Communionem privabitur: à cibis abstinebit arbitrio Sacerdotis.

Si quis aliquem vulneraverit, vel ei aliquod membrum præciderit, pœnitentiam aget uno anno per legitimas ferias.

Si quis ictum proximo dederit, nec nocuerit, tridui pœnitentiam aget in pane & aqua.

Si quis fratri suo, quem oderit, reconciliari non vult, tandiu in pane & aqua pœnitentiam aget, quoad reconcilietur.

### CIRCA VI. PRÆCEPTUM.

Si Laicus solutus cum fœmina soluta concubuerit, pœnitens erit annos tres.

*Adulterium modò quinquenni, modò septenni, vel etiam decenni pœnitentia pro variis circumstantiis expiabitur.*

Qui cum uxore sua turpiter concubuerit, pœnitens erit quadraginta dies.

Qui cum duabus fororibus fornicatus fuerit, aut filiam spiritualem violaverit, perpetuam pœnitentiam aget.

Qui incestum alium non ita enormem fecerit, duodecim annis pœnitebit.

Si quæ mulier cerussa, aliove pigmento se oblinat, ut aliis viris placeat, pœnitentia afficietur annorum trium.

Qui turpiloquio, aspectuque polluitur negligens, pœnitentiam aget dies viginti.

### CIRCA VII. PRÆCEPTUM.

Qui furatus est aliquid de Ecclesiæ suppellectili, vel thesauro, tres carenas cum septem sequentibus annis pœnitebit.

Pe-



Pecuniam Ecclesiasticam, oblationesve, quæ Ecclesiæ factæ sunt, furatus, pœnitens erit annos septem.

Qui decimam sibi retinuerit, aut dare neglexerit, quadruplum restituet, & pœnitentiam aget dies viginti in pane & aqua.

Qui Hospitalis Domus Administrator aliquid de administratione subtraxerit, restituet quod abstulit, pœnitensque erit annos tres.

Qui pauperem oppresserit, pœnitens erit dies triginta in pane & aqua.

Si quis furtum de re minori fecerit, pœnitentiam aget annum unum.

Qui rem inventam non reddit, tanquam de furto pœnitentiam aget.

Si quis ufuras accipit, rapinam facit, pœnitentiam aget annis tribus, uno in pane & aqua.

#### CIRCA VIII. PRÆCEPTUM.

Qui affirmaverit verum esse quod falsum est, pœnitentiam aget ut adulter.

Qui falso testimonio consenserit, pœnitens erit annos quinque.

Qui proximo detraxerit, pœnitens erit dies septem in pane & aqua.

Falsarius in pane & aqua pœnitentiam aget quandiu vivet.

#### CIRCA IX. & X. PRÆCEPTUM.

Rem alienam nefariè concupiscens, pœnitens erit annis tribus.

Qui rem aliquam proximi invenire cupit, ut illam sibi retineat; pœnitentiam aget, ut supra dictum est de furto.

Si quis concupiscit fornicari, si Episcopus, pœnitens erit annos septem: si Presbyter, quinque: si Diaconus, vel Monachus, tres: si Clericus, aut Laicus, annos duos.

Si quis in somnis ex immundo desiderio polluitur, triginta dies sit in pœnitentia.

### §. IX.

*Quid observandum est Sacerdoti, ut salutares & convenientes satisfactiones injungat, juxta Præceptum Concilii Tridentini.*

Priusquàm propositæ quæstioni fiat satis, nonnulla præmittenda sunt.

1. Meminisse oportet, ex Tridentino sessione 14. cap. 8. satisfactionem injungi Primò, ad novæ vitæ custodiam, & infirmitatis medicamentum. Secundò, ad præteritorum peccatorum vindictam & castigationem: satisfactionem priori modo spectatam appellabimus medicinalem: posteriori verò pœnalem & vindicativam.

Medicinalem satisfactionem convenienter præscribere est periti Medici, & pœnalem Judicis integerrimi, qui tamen sciat compati infirmitatibus; Sacramentum enim pœnitentiæ non est forum iræ, sed misericordiæ, & in pœnitentium salutem institutum. Cum ergo Confessarius in hocce Tribunali personam gerat Medici simul & Judicis: *quærat ante omnia, inquit S. Bernardus serm. 2. de Resurrectione, compassionis affectum, debinc rectitudinis zelum, & inter hæc discretionis spiritum non amittat. Quoties peccantem videris fratrem, continuò præcedere debet compassionis affectus tanquam cognatus humanitati, quippe quem concipis ex teipso . . . . . Sed quid*

quid agimus quodd nonnulli dura cervice, & attrita sunt fronte, ut quo eis magis compatimur, tantò magis nostra compassione & patientia abutantur? Nonne sicut compatiebamur fratri, ita ipsi justitiæ compatiendum est, quam videmus tam impudenter abjici, tam impudenter provocari? Scio quia, si quæ est in nobis charitas, contemptum hunc Dei ferre æquanimiter non possumus: hic est zelus justitiæ . . . . . veruntamen oportet ut priora sibi vindicet compassionis affectus; alioquin conterimus quassatum calamus, extinguimus lignum fumigans: Nam ut infra monet sanctus Doctor, volat irrevocabile verbum, & quod sanare debuerat; quia mordacius fortè videtur, exasperat, & exulcerat magis. Legendus est sermo integer.

2. Monendum imprimis est, scientiam Confessarii, & artem medicinæ spiritualis in eo positam esse maximè, ut nihil nisi aptum, accommodatumque personæ imperetur, ut præscribantur remedia, ita propria atque congrua, ut solvatur à vitiis anima, & sanitatem (quæ nihil aliud est, præter amorem exercitiumque virtutis) recuperet, ac semel adeptam custodiat.

Non enim bonus dicendus ille Medicus est, qui de omni morborum genere differere calleat, eosque apprimè detegere, nisi eosdem sanare possit. Neque etiam ille Medicus erit, qui omne remediorum genus adversus morbos omnes penes se habeat, instar nescio cujus Pharmacopolæ. Sed ille, inquit sanctus Basilus, verè Medicus est, qui novit remedia eligere maximè opportuna, & sic ægrotantem comparat, ut electis remediis commodè & salutariter uti possit. Verbo dicam, ille optimus longè Medicus est, qui plures sanat ægrotos, quamvis fortasse nec doctior

etior sit, nec majorem copiam adhibeat remedium.

Sic certè non ille bonus dicendus omninò Confessarius est, qui accuratiùs novit dijudicare inter lepram & lepram; nec ille, qui pœnitentis conscientiam penitus perscrutetur, & excutiat; aut etiam ille, qui omnes conscientie casus facilè expediat; nec ille denique, qui remedium præferat maximè per se efficax; aliàs nemo non esset Confessarius optimus; quoniam absolutio; quam quisque potest impertire, habet in se vim virtutemque omnia peccata delendi.

Bonus igitur Confessarius ille est, qui salutaribus præscriptis removet, quidquid absolutioni obstare possit, qui pœnitentes infirmos confirmet, illosque ita adjuvet, ut perversam indolem suam tandem emendent & corrigant, comparatamque ex longo peccandi consuetudinem deponant, ac virtutis iter validiùs insistant.

Hoc tamen discrimen interest Medicum inter animarum, & Medicum corporum, quòd hic morbos sæpè insanabiles reperiatur, quibus curandis defunt remedia: ille autem ope absolutionis, omnes omninò morbos sanare possit, dummodò se pœnitens docilem obsequentemque monitis salutaribus præbeat.

3. Notandum est, quòd quemadmodum ars sanandi corpora continet in se perfectam Anatomie cognitionem, totiusque conformationis corporum humanorum, necnon & partium, quibus admirabilis illa machina compacta est, in quarum quidem partium inter se consensu, & quasi temperamento sanitas consistit, in illarum autem diffensione, morbus; ita, ut malum, quod sese exterius

terius prodit, sanari non queat, nisi radix & causa mali tollatur, omnesque machinæ partes in pristinum naturalemque statum restituantur:

Sicque sanandos animæ morbos suscipit, qui- que bonus Confessarius esse cupit, cognoscat penitus necesse est cordis humani affectiones, & secretos recessus, qua potissimum re, vel huc vel illuc impellatur, & qua ratione fiat, ut ex tam diversis affectibus aliquando extra prodeant eadem scelerum facies. Nam execrationes, inimitiæ, injustitiæ, atque officii tum erga Deum, tum erga proximum damnosa neglectio oriuntur in his quidem ex dominantis superbiæ vitio, in illis ex zelotypiæ, in aliis ex avaritiæ, in aliis denique ex insito rerum spiritualium fastidio, quod vitium appellant Theologi acediam. Jam verò si Confessarius nequeat in has humani pectoris latebras penetrare, aget cum pœnitentibus instar Empyrici illius Medici, qui frustra corpori remedia exterius applicat; quia, ut ipsius mali radices non discernit, ita nec refecare valet.

Porro ex una nostri ipsorum cordis investigatione cognoscere possumus, qui sint affectus, quæ sensa eorum hominum, qui peccata nobis sua detegunt, Medici quidem corporum facile discunt ex alieno corpore varias in partes dissecto, atque attentius explorato, quibus inter se nexibus compactum sit corpus humanum; atque hac experientia vident, unde morbi qui se promunt extrà, nascantur, quibus cognitis, facilè remedia comparantur.

Verùm Medici animorum, quæ sunt alterius non nisi ex seipsis intelligere queunt, sua ipsorum corda primùm excutiant necesse est; ut in illa  
spiri-

spirituali anatome, seu dissectione agnoscant, quàm occultè & subtiliter radices superbiæ & inordinati amoris sui ex peccato originali relictæ serpant in omnium hominum consilia, nisi coerceantur assiduis castigationibus; & frequenti meditatione divini sermonis, qui ex Apostolo, Hebr. 4. *Est penetrabilior omni gladio ancipiti, & pertingens usque ad divisionem animæ & spiritus, compagum quoque ac medullarum, & discretor cogitationum & intentionum cordis.* Loco verbi *discretor*, græcè legitur κριτικός, scilicet. pius ille vir, qui cæterorum mores ad virtutem informat, quidquid in seipso est, censor severus explorat, omnes pectoris sui motus exagitat, quid sit animale, quid spiritale, quid ad animam, quid ad spiritum pertineat, abunde discernit, experiturque, inesse sibi semina omnium penè vitiorum, in quæ abriperetur miser; nisi Dei gratia orationis beneficio, & vigilantī affectuum coercionē ab ejusmodi corruptela liberaretur.

Sic apprimè animadvertens, quæ sit cordis sui ex originis peccato orta depravatio, & investigans sedulò, quibus possit illa curari remediis, simili arte tractare cæteros discit & emendare, quemadmodum scriptum est Prov. 18. vers. 17. *Iustus prius est accusator sui, venit amicus ejus, & investigabit eum.* His præmissis, ad propositam questionem

R. 1. Quod ad pœnitentiam medicinalem pertineat, ut illa conveniens sit, ac salutaris. 1. Confessarius præ oculis habeat, quod de ea scribunt Tridentini Patres sæpius laudato cap. 8. *Magnopere, inquit, à peccato revocant, & quasi fræno quodam coercent hæ satisfactoriæ pœnæ, cautioreque & vigilantiores*

*lantiores in futurum pœnitentes efficiunt : medentur quoque peccatorum reliquiis , & vitiosos habitus male vivendo comparatos contrariis virtutum actionibus tollunt . . . . accedit ad hæc , quòd dum satisfaciendo patimur pro peccatis , Christo Jesu , qui pro peccatis nostris satisfecit , ex quo omnis nostra sufficientia est , conformes efficimur , certissimam quoque inde arrham habentes , quòd si compati-  
timur & conglorificabimur.*

Viderint ergo Confessarii , qui unum , aut alterum Psalmum , vel Litanias , sive Rosarium B. Virginis , adde , si velis , aliquod jejunium omnibus animæ morbis indiscriminatim imponunt , quàm longè recedant à conditionibus medicinalis pœnitentiæ in Concilio Trid. præscriptis ; nemo quippe non videt , ejusmodi satisfactionibus nec concupiscentiam coerceri , nec vitiosos habitus tolli , nec pœnitentes cautiores reddi , aut Christo effici conformes. Aliæ ergo sunt quærendæ spirituales medicinæ , quæ enumeratis effectibus producendis sint comparatæ. Ut autem illud assequatur Confessarius ,

2. Observabit , quodnam capitale vitium dominetur pœnitenti , an superbia , seu inanis gloriæ appetitus , an avaritia , an acedia , &c. Illud autem colliget , si inquirat à pœnitente , cur lapsus sit in gravia illa peccata , quorum se reum confitetur , puta execrationis , odii in proximum , furti , violati jejunii , &c. Alter fortè dicet , quia contemptui est habitus , vel læsa ejus fama , & superbus est : alter , quia damnum fuit ipsi illatum , & hic avarus ; alter , quia obturbata est ejus quies , & voluptas , & hic voluptuosus : alter denique , quia res spirituales & divinas fastidit , & hic est impius. Ergo quamvis in omnibus  
illis

illis pœnitentibus eadem crimina se promant extra, propter quæ similem merentur pœnam, singuli tamen intestinis morbis laborant longè diversis, quibus non eodem modo, sed variè curationem adhibere necesse est, alioquin Confessarius pœnitentes Empyricorum more tractaret, nec satisfactiones medicinales convenienter imponderet: *Imperitus est Medicus*, inquit sanctus Cyprianus serm. de lapsis, *qui tumentes vulnerum sinus manu parcente contrectat, & in altis recessibus viscerum virus inclusum* (puta spiritum superbiæ, aut avaritiæ, aut acediæ) *dum servat, exaggerat*; nisi enim sentes, & gramina radicitus evellantur, validiùs repullulant.

Cùm igitur ex bonis actibus sæpiùs repetitis nascantur virtutes, tollanturque vitia opposita, Confessarius imperabit humilitatis exercitia contra superbiam & inanis gloriæ appetitum, liberalitatis contra avaritiam, pietatis contra acediam, &c. orationes præscribit, in quibus pœnitens suam superbiam, avaritiam, impietatem confitebitur Domino, ejurabitque, & gratiam impensius postulabit, qua sibi injuncta virtutis exercitia sedulo & cum fervore decurrat; nam deprecatio, juxta sanctum Chrysostomum libro 1. de orando Deo, est caput omnium bonorum, basis, ac radix vitæ frugiferæ: *Nil est, quod non obtineat oratio*, inquit, hom. 23. in Matth. *etiamsi mille peccatis obnoxius sis, sed vehemens, sed assidua*. Et auctor libro de Eccles. dogmat. cap. 56. inter opera sancti Augustini: *Nullum credimus ad salutem, nisi Deo invitante, venire; nullum invitatum salutem suam, nisi Deo auxiliante, operari: nullum, nisi orantem auxilium promereri*.

Ad



Ad sanitatem securius & citius veniet curatio, si pœnitens ex præscripto Confessarii addat pias lectiones, & in fine cujusque diei seipsum diligentius expendat, ac castiget ubi se deliquisse deprehenderit.

Dicet fortè aliquis, certam quidem esse hancce medendi rationem, & ad vitæ novæ custodiam apprimè accommodatam; sed rigidiorē videri, ac infirmitati pœnitentium minimè consentaneam.

Sed qui illud objicit, aut Patres Tridentinos contumeliosè vocet Rigoristas; aut, si male eorum doctrinam nos exponere arbitretur, asserat, si audet contra communem hominum sensum, habitus vitiosos tolli posse sine contrariis actibus, vera pœnitentia peccatorum causas non rescindi, pœnitentes sine ejusmodi exercitationibus cautiores, ac vigilantiores effici, & Christo fieri conformes; his enim characteribus Patres Tridentini satisfactionem præcepto divino pœnitentibus injungendam describunt: *Vociferetur & clamet licet, & conqueratur æger impatiens per dolorem, gratias agat postmodum, cum senserit sanitatem*, S. Cyprianus cit. serm. de lapsis. Sed ad obrectatores illos non pertinet sanare, aut emendare pœnitentes, satisque est ipsis si plures absolvant, & quàm citissimè Confessionibus finem imponant.

At, inquires, Sacerdos ex Tridentino salutare & convenientes satisfactiones debet injungere, non solum pro qualitate criminum, sed etiam pro pœnitentium facultate: Ergo non omnibus pœnitentibus imponendæ sunt medicinales satisfactiones, quæ peccatorum causas rescindant, vitiosos habitus tollant, pœnitentes tanquam fræno

coerceant, eosque efficiant vigilantiores ac Christo conformes, id enim non fert omnium pœnitentium infirmitas.

Concesso antecedente, Nego consequ. Nunquid enim Medicus, quia explorare debet vires infirmi, & secundum illas curare, subtrahet remedia, sine quibus decumbens mortem non effugiet, & quibus adhibitis, levabitur, vires recuperabit, ac tandem sanitatem consequetur quamvis non sine aliquo dolore? Itaque,

Concilium præsertim spectat satisfactiones vindicativas & pœnales, quæ ut dicitur infrà, temperandæ sunt, & minuendæ pro pœnitentium infirmitate, quamvis gravissimè deliquerint: tum quia non sunt necessariae necessitate medii, sed præcepti dumtaxat, quod relaxari potest & debet, quando sine ejusmodi indulgentia infirmorum salus morali exponeretur periculo; Nam, ex Tertulliano, honos Dei est salus hominis: tum quia in satisfactione vindicativa, est labor & pœna, quam si Confessarius semper commetiatur cum gravitate, & multitudine criminum, infirmiores aliquando sub onere conciderent.

Medicinalis verò satisfactio. 1. *Necessaria est*, non solum necessitate præcepti, sed etiam medii; ad ultimum quippe finem consequendum, necesse est ut peccator mores emendet, cupiditates coerceat, & Christo conformet se, quod non assequetur nisi assumat media consentanea. Hinc Confessarii virtute Jubilæi de pœnis sive injunctis, sive injungendis, remittere possunt, nihil verò de satisfactionibus medicinalibus, utpotè quæ sint ad salutem pœnitentium necessariae. 2. *Nec onera dici debent, sed levamina; imbecilitatem enim*

nostram sustentant ac roborant, ut quisque ex proprio usu discere potest; si seipsum circumspicere velit; quis enim, ubi sensit se animo dejectum, rerum divinarum sapore non capi sicut prius, tentationibus commoveri, & quodammodo labescere, non expertus est se orationis auxilio fuisse erectum, sacra lectione recreatum, & piis exercitationibus in bono proposito confirmatum? Ergo Confessarius ex seipso intelligat quæ sunt pœnitentium, & quo illos infirmiores advertit, eò magis medicinalibus satisfactionibus illos exerceat, etiamsi minùs peccaverint, ut docet S. Thomas in 4. dist. 20. quæst. 1. art. 1. *Quia, inquit, peccato unius difficilius potest resisti, quàm peccato alterius; sicut juveni pro fornicatione imponitur major pœnitentia quam seni, quamvis minus peccet: vel quia in uno peccatum est periculosius, sicut in Sacerdote, quàm in alio: vel quia multitudo magis prona est ad illud peccatum.*

Nec dicas ejusmodi spiritualia exercitia esse quidem ad novæ vitæ custodiam accommodata, & justis ad virtutem exercitatis perjucunda, sed rudioribus, & iis, qui tritas seculi vias ambulant admodum laboriosa, & moraliter impossibilia; namque 1. si rudiores & vitam in seculo agentes, non capiunt verbum istud, *post concupiscentias tuas non eas, & à voluntate tua avertere.* Eccli. 18. & ad obtinendum Dei auxilium & spiritum bonum, petere ac pulsare non valent, verè Christiani non sunt, *qui enim sient Christi*, sive rudes, sive spirituales, sive in seculo, sive in claustro, degentes, *carnem suam crucifixerunt cum vitis & concupiscentiis.* Gal. 5. & omnibus dicitur, *vigilate, & orate, ut non intretis in tentationem,* Matth. 26. v. 2. amanti

justitiam, & diligenti Deum super omnia, jugum Christi est leve & suave: atqui per absolutionem, quivis pœnitens, etiam rudior, cum remissione peccatorum recipit cor novum, Spiritum Sanctum, per quem diffunditur charitas: Ergo suave debet ei fieri, quod hætenus fuerat ipsi ingratum & intolerabile, alioquin absolutio fuit irrita & nulla, adhuc totus est in peccatis suis. Consule quæ in hanc rem dicta sunt Tractatu de Gratia, ubi de Justificatione.

3. Multum juvat ad fugam peccati<sup>1</sup>, & novæ vitæ custodiam Sacramentalis Confessio, quam Confessarius eo frequentiore imperabit, quo infirmior agnoscit pœnitentem; æger quippe ardenti & continua febre laborans, sæpius invisendus est à Medico, & frequentioribus levandus est remediis, quàm si tertiana tantum aut quartana febris eum occuparet.

4. S. Carolus Borromæus in Instruct. sacram. pœnit. docet salutarem admodum fore pœnitentiam, si pœnitentes vota Baptismi in memoriam revocent, & ex præcepto Confessarii ea identidem in orationibus perpendant, nixique Dei auxilio seipsos concitent ad illa religiosè servanda: *Eam pœnitentiam imponet, inquit, ut in hebdomada manè certis diebus (id quod in singulos dies etiam faciendum esse gravissimè beatus Chrysostomus monet) sancta meditatione proposita, solemnem illam sponsonem, quam per compartes in Baptismo sancte fecerunt; redintegrent, intimè Deum precando, in qua precatione firmiter stabilique animo proposito statuant se Christo Domino adhærere, renuntiareque iterum atque iterum, sæculi pompis, operibus tenebrarum, & diabolo imprimis, cui se adversarios esse, & professi sunt & profitentur perpetuò.*

Enim-

Enimverò Sacramentum Pœnitentiæ dicitur à SS. Patribus, Baptismus laboriosus; quia pœnitens ad novitatem & integritatem, quam in Baptismo consecutus fuerat, & per peccata subsequētia miserè perdidit, magnis fletibus & laboribus pervenire contendit, dolet perfidiam, qua sacrosanctum fœdus cum Deo sancitum sacrilegè fregit, illud solemniter innovat, servaturumque se sollicitus profitetur. Quomodo verò servabit, si de eo non cogitet? si illius condiciones aut ignoret, aut obliviscatur? Ergo Confessarius pœnitenti imprimis injunget, ut vota Baptismi identidem meditetur, quin officii esset cujusvis Pastoris curare ut singuli Parochiani, ne fœdifragi apud Deum existant, ea in cubiculis descripta haberent, & oculis exposita. Habentur fusè explicata Tract. de Baptismo, c. 12. circa finem.

Atque hæc de Medicinali pœnitentia, necessitate medii necessaria non solum lapsis, sed & Justis, etiam iis, qui à gratia Baptismatis nunquam excidere; natura quippe humana per peccatum originale vulnerata est, & plaga ipsi inflicta (concupiscentiam intelligo) nondum est obducta, quin exasperatur, & mortem animæ consciscit, nisi continuis pœnitentiæ medicamentibus curetur, adè ut Confessarius in hac parte novum onus pœnitentibus non imponat, sed eos ad officium temere intermissum revocet. Quod verò attinet ad pœnitentiam vindicativam & pœnalem

R. 2. Confessarius metietur pœnam cum gravitate & multitudine peccatorum: tum facultate & dispositionibus pœnitentium,

Mensuram pœnæ peccatis debitæ exhibent Canones pœnitentiales, qui etsi ab aliquot sæculis

non vigeant in Ecclesia Latina, ex his tamen Confessarius intelligit quanta debeatur pœna singulis peccatis quoad culpam jam remissis; *Quamvis*, inquit S. Antoninus 3. parte tit. 17. cap. 21. *pœnitentiæ injungendæ à Confessore pœnitentibus bodie sunt arbitrariæ, & ad arbitrium Judicis, id est, Confessoris imponendæ . . . . tamen ut Sacerdos circa hujusmodi dispensationem cautius arbitretur, notandi sunt casus, in quibus per Canones certæ pœnitentiæ imponuntur. Nam & Canones pœnitentiales tenetur scire Sacerdos, aliàs vix in eo nomen Sacerdotis constabit. Et Catechismus Romanus, parte 2. num. 113. & 114. In irroganda satisfactionis pœna Sacerdotes nihil sibi suo arbitrato statuendum esse, sed omnia justitia, prudentia, & pietate dirigenda existimabunt. Atque ut hac regula peccata metiri videantur, & pœnitentes scelerum suorum gravitatem magis agnoscant, operæ pretium erit interdum eis significare quæ pœnæ quibusdam delictis ex veterum Canonum præscripto, qui pœnitentiales vocantur, constitutæ sunt. Igitur universæ satisfactionis modum culpæ ratio implebit.*

Cum gravitate autem peccatorum Confessarius perpendeat 1. eorum multitudinem, & quoties commissa fuerint; nam si quis in eodem peccati genere sæpius offenderit, dignus est, qui graviore pœna afficiatur, ut monet S. Carolus in Instruct. pœnitentiæ. 2. peccati speciem, ut pœna contra illud directè pugnet, conferat ad pœnitentis emendationem, ac vitiosos ejus habitus tanquam malas radices, evellat; *Faciat*, inquit S. Carolus in Instruct. Confess. *ut imposita pœnitentia peccatis respondeat. Ita pro peccatis luxuriæ injungantur jejunia, vigiliæ, peregrinationes, cilicii usus, aliaque hujusmodi corpori macerando propria. Pro avaritiæ peccato, præter debi-*

*debitas restitutiones, eleemosynæ pro cuiusque facultatibus imponantur. Sanandæ superbæ aliisque peccatis spiritibus oratio adhibeatur, qua coram Deo vires & vigor acquiruntur, quibus his peccatis obsistatur . . . . in devotiis & tepidis juvabit imponere, ut Ecclesias, divinaque officia oraturi sæpius adeant.*

Habenda quoque est ratio facultatis & fragilitatis pœnitentium in injungenda pœnitentia vindicativa; sed aliter quam in imponenda medicinali; medicinalis enim ex dictis pro majori infirmitate pœnitentis major & frequentior esse debet; vindicativa vero minor: *Canonum pœnitentias, inquit S. Carolus in Instruât. pœnit. ut tempora ferunt, pro charitate & prudentia sua minuet, prout peccati & peccatoris circumstantiæ requirent, in quibus rationem etiam habebit contritionis ejus, qui peccavit. Demonstrabit tamen iis, qui gravius peccarint (quo magis scelerum suorum magnitudinem agnoscant) quanta ipsis pœnitentia ex Canonum regulis imponenda esset. Nec verò putent sua peccata levia esse, quia parva illis pœnitentia data est, sed hoc factum esse, ne eam, quæ pro culparum ratione injungenda erat, deferant cum periculo salutis suæ. Proinde pœnitentes idè hortandi erunt, ut præter pœnitentiæ opera imposita, plura etiam alia præstare contentur; nam, ut supra observavimus, peccatis hodie non minus læditur Divina Majestas, quam prioribus sæculis; nec pro iis justitia minores nunc pœnas exigit, quàm antiquitus, ac proinde si peccator sibi parcat, Deus ipse vindicabit: horrendum autem est, inquit Apostolus Heb. 10. incidere in manus Dei viventis: & I. Cor. 11. si nosmetipsos judicaremus, non utique judicaremur.*

Ex pœnitentibus verò alii ægro sunt corpore: alii gravibus occupantur operibus, ut agricolæ,

artifices : alii viribus corporis pollent , sed levis ac instabilis sunt voluntatis , ac imbecilli consilii , proptereaque iis omnibus indulgendum , & de pœnis remittendum. Graviter decumbentibus præscribenda est pœnitentia , quam percurrent , ex Concilio Nicæno & Carthaginensi IV. suprâ laudatis , postquam convaluerint. Interim Confessarius exponet morbum hunc esse paternam Dei castigationem. Nam ex Apostolo I. Cor. II. corripimur à Domino , ne cum hoc mundo damnemur , ac proinde sustinendum in spiritu humilitatis , & in animo contrito ; pluresque actus patientiæ & contritionis injunget singulis diebus eliciendos , qui dolorem lenient , nedum intendant , ut supra diximus pag. 306. & seq.

Qui duris , ac laboriosis operibus vacant ; perplexos & incertos habent Confessarios , si quando in graviora & enormia peccata prolapsi sint ; illi quippe tenuiter vivunt , desudantque die ac nocte ad alendam familiam ; quid ultra in satisfactionem vindicativam exiget Confessarius.

Vel illi peccatum agnoscunt , & acri dolore percelluntur , vel illud parvi faciunt , & nullatenus aut vix inde commoventur , ut sæpè contingit.

Si primum , Confessarius I. commonebit in pœnam peccati originalis hanc fuisse Dei sententiam Genes. 3. *maledicta terra in opere tuo . . . . in sudore vultus tui vesceris pane tuo , donec revertaris in terram , de qua sumptus es.* Quare hortabitur pœnitentem , ut toto corde ejusmodi pœnam amplectatur uti jam leviozem propter horrenda quæ superaddidit crimina. Atque ut isto pœnitentiæ  
motivo



motivo feratur ad solita opera, Confessarius injunget preces matutinis & ferotinis horis quotidie persolvendas, adjunget & istas, aut alias hujusmodi brevissimas per diem ter aut quater iterandas, aliquando etiam flexis genibus, si opportunum sit: *ego in flagella paratus sum, & dolor meus in conspectu meo semper.* Item, *hic ure, hic seca, dum in æternum parcas.* Item, *Domine, non sunt condignæ passiones hujus temporis ad præteritam meam culpam.* 2. imperabit, ut ardentiori studio curet Deum coli in sua familia, frequenter de ejus lege loquatur; justum enim est, ut qui honorem Dei tam graviter læsit, satagat tum per se, tum per alios reparari. 3. præscribet ut diebus Dominicis & Festis integro officio Ecclesiæ Parochialis intersit, oblationibus valedicat, aliorum confortium fugiat, lectionibus piis domi vacet; vel si literas nesciat, piam aliquam peregrinationem ad locum vicinum suscipiat.

Si secundum, nempe si pœnitens graviorum peccatorum conscius iis non tangatur, & ad quotidianas operas licet duras alimentorum desiderio alliciatur tanquam *vincula Ephraim docta diligere trituram*, Osee 10. Confessarius præter mox recensitas satisfactiones imperabit, ut de cibo aliquid detrahat, saltem diebus festis; quandoque somno minus indulgeat, & de nocte confurgat ad orandum nunc prostratus; nunc brachiis extensis in modum crucis; nam per noctis quietem & silentium facilius audiet objurgantem conscientiam, & circumfusæ tenebræ horrorem criminis solent injicere, & ita disponere peccatorem ad consuetum laborem pœnitenti animo sustinendum. Si enim hujusmodi operarii aliquando noctes ducunt

infomnes , ubi urget opus , & spes est mājoris lucrī , quidni idem præstiterint saltem ex parte , causa salutis æternæ ?

Quod verò spectat valentes pœnitentes laboriosis operibus minimè impeditos , Confessarius imprimis explorabit , quæ sint in eis animi affectiones & dispositiones , an in votis habeant exhibere Deo satisfactionem , quam ab ipsis exigit ; alioquin non sunt absolvendi , utpote qui vera pœnitentia careant ; pœnitentia quippe ex sæpè dictis essentialiter includit propositum faciendi satis divinæ justitiæ. Ubi autem eos ad omnia Dei flagella paratos intellexerit , ultra expendet quæ in eis sit animi constantia , aut fragilitas , num pœna secundum gravitatem & multitudinem criminum imposita , spectatis circumstantiis personæ & rerum ; eorum saluti conducatur , aut obstat , num scilicet morale sit periculum , ne pœnitens injuncta pœnitentia non defungatur , & ita remedium in venenum convertatur , inveniaturque mandatum , *quod erat ad vitam , hoc esse ad mortem* , ut loquitur Apostolus Rom. 7. Quare in ejusmodi circumstantiis Confessarius pœnam imponet levio-rem , quàm peccata mereantur : Deus enim , ex dictis , pœnas à pœnitentibus reposcit in eorum commodum & salutem , non vult lignum fumigans extinguī ; nec calamum quassatum confringi ; ejus honor , ex Tertulliano , est hominum salus. Ipse Apostolus incesti Corinthii pœnitentiam brevavit , ne fortè abundantiori tristitia absorberetur , 2. Cor. 2. in quem locum sic habet S. Chrysostomus hom. 4. in 2. Cor. *Non enim quòd dignus sit , neque quòd sufficientem exhibuerit pœnitentiam ; sed quòd infirmus sit , ideo dignor illum veniam.*

S. Cy-

S. Cyprianus exemplum Apostoli secutus, scribit epist. 54. ad Cornelium Summum Pontificem, se cum Collegis in unum congregatis censuisse contrahendam lapsorum pœnitentiam propter imminentem persecutionem; *Quod si, inquit, de Collegis aliquis extiterit, qui urgente certamine, pacem fratribus & sororibus non putat dandam, reddet ille rationem in die iudicii Domino vel importunæ censuræ, vel inhumane duritiæ suæ.* Sanctus Thomas quolibet 3. qu. 13. art. 1. *Videtur, inquit, satis conveniens, quod Sacerdos non oneret pœnitentem gravi pondere satisfactionis; quia sicut parvus ignis à multis lignis superpositis de facili extinguitur, ita posset contingere quod parvus affectus contritionis in pœnitente nuper excitatus propter grave onus satisfactionis extingueretur.* Unde melius est quod Sacerdos pœnitenti indicet quanta pœnitentia esset ipsi injungenda, & injungat nihilominus aliquid, quod tolerabiliter ferat, ex cuius impletione assuefiat, ut majora impleat. Et Synodus Lingonensis anno 1404. *Caveant Sacerdotes, ne gravent pœnitentes per difficiles, vel onerosas pœnitentias, sed eas imponant, quas putant posse & velle pœnitentem portare, ne deterius contingat peccare, pœnitentiam non adimplendo; quia, ut ait Sanctus Raymundus, lib. 3. §. 49. si non potest gaudere Sacerdos de omnimoda ejus purgatione, gaudeat saltem, quia ipsum liberatum à gebenna ad Purgatorium possit transmittere.*

Nec dicas condignam satisfactionem esse juris divini, nec proinde à Confessario posse relaxari; jam enim demonstravimus Ecclesiam accepisse à Christo potestatem interpretandi legem divinam, commutandi, vel relaxandi vota & pœnitentias, quoties urgens aliqua ratio id postulat. Sic identidem gratiarum thesaurum aperit, ut proposita indul-

indulgentia, fidelium focordiam excutiat, eòsque alacriores reddat ad ferendum jugum Domini, quemadmodum infrà dicetur. Hæc igitur sit Confessariis regula, quam Innocentius III. præscribit Cap. *Deus qui*, tit. de pœnit. & remiss. *Competentem*, inquit, *pœnitentiam delinquentibus imponatis, prout saluti eorum videritis expedire.* Et S. Thomas in 4. dist. 20. qu. 1. art. 2. quæst. 2. ad 3. *Sacerdos minorem condigno pœnitentiam injungens, non semper peccat... quia quandoque etiam ex industria minorem pœnitentiam imponens, plus prodest pœnitenti, quàm noceat, qui fortè magnitudine pœnæ posset à pœnitentia peragenda impediri, propter debilitatem virtutis adhuc in eo de novo recuperatæ: & ideo negligit minus damnum, ut majus evitet: & iterum paulatim confortatus in eo divinus amor ad plura pœnitentiæ opera peragenda, ipsum incitabit propria sponte, quàm Sacerdos eidem secundum quantitatem peccatorum injungere potuisset.*

Sed sicut voti dispensatio absque sufficienti causa, subreptitia est & irrita; ita pœnitentiæ relaxatio. *Non concedit pacem facilitas ista*, inquit Sanctus Cyprianus sermone de lapsis, *sed tollit: nec communicationem tribuit; sed impedit ad salutem.* Et iterum: *irrita & falsa pax, periculosa dantibus, & nihil accipientibus profutura.*

Quare Confessarius incedit hic inter scopulos cum magno sui & pœnitentium periculo; si enim in partem dextera declinet, & inconsiderato zelo austeriorem quàm par sit, pœnitentibus se præbeat, concidunt animis, & injunctam pœnitentiam deferunt cum perieulo animarum suarum. Si verò ad sinistram desleat, & inordinato commiserationis affectu modum pœnitentiæ ad libitum pœnitentium indicat, eos pœnæ contemptu, inquit

quit Concilium Remense anno 1583. rursus ad peccandum potius invitat, quàm ad novæ vitæ genus ineundum, inciditque in illud propheticum, Ezechielis 13. *Væ qui consuunt pulvillos sub omni cubito manus, & faciunt cervicalia ad capiendas animas.* Confessarius igitur Samaritanus sit, inquit Sanctus Bernardus cit. serm. 2. de Resurrect. *custodiens & observans quando oleum misericordiæ, quando vinum fervoris exhibeat.* Sed quam difficile ista in uno & eodem corde copulentur, nimirum compassionis affectus, rectitudinis zelus, & discretionis spiritus, insinuat Christus, cum ait Luc. 12. *Quis putas, est fidelis dispensator & prudens, quem constituit Dominus supra familiam suam, ut det illis in tempore pœnitentiæ mensuram, non quod illud impossibile sit, inquit Glossa in c. 24. Matth. sed quod admodum rarum.*

Duo insuper observanda sunt Confessario. 1. semper definiendum tempus ad quod ligat pœnitentem, puta ad mensem; qui enim non definite imperat pœnitenti, v. g. ut jejundet qualibet feria 6. sacramentaliter confiteatur singulis diebus Dominicis, suspensum ac incertum detinet tum pœnitentem, tum eos, à quibus quærit consilium quamdiu ducenda sit illa pœnitentia, an usque ad mortem, quod vix aut nunquam injunget Confessarius, propter voluntatis humanæ instabilitatem. 2. depellendus est error, in quo versantur plerique pœnitentes, qui, si deseruerint pœnitentiam sibi prius injectam, eo ipso immunes se putant ab illa peragenda, quo hanc suam prævaricationem confessi sunt. Monendi sunt, inquam, illi ut quamprimum satisfaciant; nonnunquam etiam ad satisfaciendum dimittendi prius.

priusquam absolvantur, nempe cùm in eis deprehenditur negligentia crassior ac supinior, ut vocant. Quin negligentia illa in dubitationem abducere debet Confessarium, num præcedens absolutio irrita fuerit defectu veræ pœnitentiæ; verissimum enim est, ac notatu dignissimum, quod supra docebat Sanct. Thomas, scilicet divinum amorem, qui per validam absolutionem infunditur, ad plura pœnitentiæ opera peragenda incitare quàm Sacerdos injungere potuisset. Quis v. g. exegisset à Davide illam lacrymarum copiam, quæ redintegrata charitate ex oculis ejus eruperunt? *Laboravi in gemitu meo*, inquit jam reconciliatus Ps. 6. *lavabo per singulas noctes lectum meum, lacrymis meis stratum meum rigabo.*

Enimverò tum maximè urit boni jactura, cùm ipsius boni excellentiæ æstimari incipit; atqui satis non æstimatur justitia, cùm ejus suavitas non sapit depravato animæ palato, nec Deum novit ut oportet, qui illum nondum propter se diligit, nec proinde sentit quàm malum & amarum sit dereliquisse Dominum. At per veram & validam absolutionem charitas in corde diffunditur, timori gehennæ, qui præcesserat, succedit amor, per quem dulcescit justitia, & gustatur quàm suavis est Dominus; & ita qui cum sustineret iratum patrem, solo metu amittendæ hæreditatis urgebatur, jam tanquam bonus filius dolore seipsum cruciat quod læserit Patrem tam pium, tam singulari bonitate in se affluentem, leviora ei videntur à Confessario præscripta, plenam offert satisfactionem, nec quiescit donec injuriam illatam compenset. Ergo ne minima charitatis scintilla in iis elucet, qui pœnitentiam, quamvis peccatis longè

longè inferiorem, ægrè suscipiunt, eam perfuntoriè & quodammodo inviti percurrunt, & identidem tanquam intolerandum onus abjiciunt. Si ad ista attenderent Confessarii, uti pro officio tenentur, plures reperirent ex iis, qui ad eorum tribunal accedere solent, manere in morte, utpote qui Deum non diligant, nec justitiam ejus, sed sicut ante Confessionem, ita & post, solo ducantur pœnarum timore.

## §. X.

*Utrum Pœnitentia debeat esse secreta, an publica?*

R. Servanda est Ecclesiæ consuetudo, quæ in communi Theologorum sententia à 7. saltem seculo invaluit, ut de occultis peccatis, occultè, de publicis publicè pœnitentia agatur; cavendumque est Sacerdoti, ne satisfactionem injungat, quæ occultum pœnitentis peccatum aliquo modo prodatur.

Cum autem à sæculo 13. multum se remisisset vetus Ecclesiæ disciplina quoad pœnitentiam publicam, Legati Caroli IX. Francorum Regis ad Concilium Tridentinum, inter cætera in mandatis acceperant, ut à Patribus postularent Decretum, quo graviorum criminum notoriè rei subicerentur pœnitentiæ publicæ, quorum postulatis, & aliorum votis annuens Concilium, sic statuit sess. 24. cap. 8. de reformat. *Apostolus monet publicè peccantes palàm esse corripiendos. Quando igitur ab aliquo publicè, & in multorum conspectu crimen commissum fuerit, unde alios scandalo offensos commotosque fuisset*

*se non sit dubitandum ; huic condignam pro modo culpæ pœnitentiam publicè injungi oportet ut quos exemplo suo ad malos mores provocavit, suæ emendationis testimonio ad rectam revocet vitam. Episcopus tamen publicæ hoc pœnitentiæ genus in aliud secretum poterit commutare, quando ita magis judicaverit expedire.*

Dixi, à 7. *saltem sæculo*; quia non levis est in Scholis controversia, utrum prioribus sæculis aliqua peccata omnino occulta, æquè ac publica obnoxia essent pœnitentiæ publicæ.

*Q. Cujus est pœnitentiam publicam imponere ?*

R. Pœnitentia publicè peragenda cum aliqua solemnitate, puta stando ad fores Ecclesiæ cum cereo accenso, sine consilio & auctoritate Episcopi imponi non debet, ex Concilio Rothomagensi anno 1704. cap. 8. & ex Sancto Thoma in Supplem. quæst. 28. art. 3. sed quilibet Confessarius pro peccatis, quæ publicè & cum aliorum offensione commissa sunt, potest & debet injungere satisfactiones, quibus absque cæremoniæ apparatu fiat satis Ecclesiæ, & Fideles, qui scandalum passi fuerant, videntes pœnitentis opera bona præcedentibus peccatis contraria, glorificent Patrem qui in cœlis est, si v. g. à sacris Ecclesiæ conventibus abesse, aut iis irreverenter interesse solebat, iis deinceps & devotus adsit: si in Quadragesima non jejunavit, aut publicè cibis vetitis usus est, post Quadragesimam jejunet, & à carnibus abstineat, & sic de cæteris.



## §. XI.

*De veteri Ecclesiæ disciplina circa Pœnitentiam publicam.*

Q. 1. *Pœnitentia publica fuitne in usu à primis Ecclesiæ sæculis?*

R. Fuit. Pro primo sæculo profertur exemplum Corinthii incesti, quem Apostolus 1. Cor. 5. tradidit Satanæ in interitum carnis, hoc est pœnitentiæ publicæ subjecit, ut veteres communiter interpretantur. Pro secundo sæculo testem habemus S. Irenæum, qui lib. 2. cap. 9. scribit mulieres à Marco corruptas, per pœnitentiam publicam communioni Fidelium fuisse redditas. Pro tertio extant opera Tertulliani, & S. Cypriani; prior quippe lib. de pœnit. cap. 9. graphicè pingit exteriorem pœnitentium habitum & actum: posterior vero ejusdem pœnitentiæ leges sanxit in frequenti Episcoporum conventu, ut scribit epist. 52. ad Adtonianum. De sequentibus autem sæculis mox proferemus testimonia.

Q. 2. *Fuitne semper eadem pœnitentiæ publicæ disciplina?*

R. Minimè; namque à tempore Apostolorum usque ad Montani hæresim II. sæculo natam, breve fuit pœnitentiæ stadium; namque Apostolus incestum pœnitentem intra unius anni spatium Ecclesiæ reconciliari voluit, 2. Corinth. 2. Eusebius, lib. 6. Historiæ, cap. ultimo, narrat Nathalium Episcopum, qui ab Hæreticis deceptus fuerat, ad pedes Zephirini Summi Pontificis provolutum, sacco indutum, & cinere fordidatum, Communioni Ecclesiæ statim fuisse restitutum.

A Montano ad Novatianum, hoc est, ad medium circiter tertii sæculi severior & prolixior cœpit esse pœnitentia, ut patet ex laudata Sancti Cypriani epistola 52. in qua sic scribit: *Cum data esset facultas in unum conveniendi, Scripturis diu ex utraque parte prolatis temperamentum salubri moderatione liberavimus, ut nec in totum spes communicationis & pacis lapsis denegaretur . . . . . sed traberetur diu pœnitentia, & rogaretur dolenter paterna clementia*: volebant enim Patres Montanistis & Novatianis eripere locum incusandi, ut solebant nimiam Cartholicorum in concedenda lapsis venia facilitatem. A Novatianis severissima fuit Ecclesiæ circa pœnitentes disciplina; cùm enim hætenus nullum fuisset tempus pœnitentiæ agendæ præscriptum, sed totum Episcoporum arbitrio ac prudentiæ permitteretur; creditur tunc institutas solemnes pœnitentium stationes, scilicet fletum, auditionem, substationem, & consistentiam.

Earum enim primus meminit Sanctus Gregorius Thaumaturgus in sua Epistola canonica, can. 7. 8. 9. 10. & 11. & deinceps alii Patres, ut Ancyranus anno 314. Basilius in Epistola ad Amphil. & Gregorius Nyssenus epistola ad Letojum, pœnitentes qui erant in primo gradu dicebantur fletentes, qui in secundo, audientes; qui in tertio, substrati, quia substernebantur manuum impositioni; qui in quarto, consistentes.

Q. 3. *Quanto tempore pœnitentes in unaquaque statione hærebant?*

R. Pro qualitate criminum brevius, vel diutius detinebantur, alii uno anno: alii duobus. S. Basilius, can. 76. laudatæ Epistolæ ad Amphilo-  
chium

hium de homicida sic statuit: *Qui sua sponte interfecit, & post pœnitentia ductus est, 20. annis Sacramento non communicabit. 20. autem anni sic in eo dispensabuntur. Debet quatuor annis deflere, stans extra fores Oratorii, & Fideles ingredientibus rogans, ut pro eo precentur, suam iniquitatem pronuntians. Post quatuor autem annos inter auditores recipietur, & quinque annis cum ipsis egredietur. Septem annis cum iis, qui in substatione orant, egredietur. In quatuor autem annis solium stabit cum Fidelibus, sed non erit oblationis particeps: tum demum iis expletis, erit Sacramentorum particeps.*

Q. 4. *Quis erat pœnitentium actus in qualibet statione?*

In prima statione, quæ est fletus pœnitentis extra portam templi, & sub dio, ex citatis epist. Sanctorum Gregorii Thaumaturgi & Basilii, lugubri veste & cilicio induti, cinere conspersi, reos se palam ac publice flentes profitebantur, & ad Fidelium in Ecclesiam ingredientium genua advolvebantur, ut pro se apud Episcopum intercederent, ipsisque ab eo obtinerent copiam agendæ pœnitentiæ. Ita Fabiolam nobilem Romanam in hoc flentium gradu consistentem pingit Sanct. Hieronymus epist. ad Oceanum, in qua sic habet: *Quis crederet ut post mortem secundi viri in semetipsam reversa . . . . .saccum indueret, ut errorem publice fateretur, & tota urbe spectante Romana . . . . .staret in ordine pœnitentium; Episcopo, Presbyteris, & omni populo collacrymantibus, sparsam crinem, ora livida, sparsas manus, sordida colla submitteret? Quæ peccata fletus iste non purget? . . . . .non est ingressa Ecclesiam Domini, sed extra castra cum Maria sorore Moysis separata confedit . . . . .faciem, per quam secundo viro placuerat,*

*cuerat, verberabat: oderat gemmas, ornamenta fugiebat, sic dolebat quasi adulterium commisisset.*

In secunda statione, quæ est auditio, pœnitentes, qui post crebras preces, & diuturnas lacrymas adeam tandem admissi fuerant, in narthece seu vestibulo Ecclesiæ cum Catechumenis & infidelibus, psalmorum cantus, sacræ Scripturæ lectiones, & Episcopi conciones audiebant, usque ad Missam Catechumenorum, cui cum ipsis interesse non sinebantur, *intra portam*, inquit Sanctus Gregorius Thaumaturgus citata epistola *in porticu*, *ubi oportet eum qui peccavit, stare usque ad Catechumenos, & illinc egredi; audiens enim Scripturas & doctrinam ejiciatur, & præfatione indignus censeatur.* Audientes igitur in hac statione; ad pœnitentiam parabantur per lectiones Scripturæ, & frequentes conciones; persuasum enim erat in Ecclesia mentis cæcitate laborasse eum, qui peccando sanguinem Testamenti, in quo sanctificatus est; pollutum duxit, ideoque quantumcunque aliunde eruditus haberetur, ad Catecheses cum Catechumenis, infidelibus, & rudioribus ablegandum esse; donec satis perpenderit peccati sui gravitatem, injuriam qua Christum affecit, quas mereatur pœnas, & ita toto corde ad illas exolvendas gradum substratorum conscendat.

In tertia statione, quæ est substratio, pœnitentes intra Templi ambitum; ab ejus porta usque ad ambonem flexis genibus, facie lurida, & lacrymis perfusi nudis pedibus, subiciebantur crebris manuum impositionibus, ex Concilio Laodicensi can. 19. simulque pro iis fundebantur preces; nam ut ait S. August. lib. 3. de Baptismo cap. 16. *quid est aliud impositio manuum, quam oratio*  
*super*

*super hominem?* Ex cit. autem Canone manus imponebantur cum precibus super pœnites, expleta Missa Catechumenorum, iisque jam egressis, sed priusquam inchoaretur Missa Fidelium, cui interessè fas non erat pœnitentibus.

Porro in hac statione, in qua pœnites diutius detinebantur, præter manus impositionem, ipsis injungebantur laboriosa opera, & variae afflictationes. In Ecclesia etiam Latina vetitum erat ejusmodi pœnitentibus, ne conjugio uterentur; ne matrimonium deinceps inirent; ne militarent; ne se implicarent negotiis sæcularibus: ne epulis interessent aliorum, ut colligitur ex Concilio Aurelianensi III. can. 24. & 25. Hinc est quòd Concilium Arelatense & Agathense decernant pœnitentiam uni conjugum non esse imponendam absque alterius consortio, nec juvenibus pœnitentiam passim ac temerè debere concedi.

In quarta statione, quæ est consistentia, pœnites post emensum cum laude pœnitentiæ stadium, cum Fidelibus intra ambonem & cancellos consistentes integro Missæ Sacrificio, & aliis orationibus intererant; ita tamen ut participatione Eucharistiæ privarentur, aliquando etiam per biennium: *Placuit eos, inquit Concilium Ancyranum, can. 4. inter audientes uno anno constitui, succumbere tribus, in oratione autem communicare biennio.*

Hanc porrò Canonum severitatem interdum Episcopi pro pœnitentium fervore temperabant, eosque ab una statione ad aliam, prætermissa media, transferebant, ex Concilio Ancyrano, canone 6. Nicæno, canone 12. SS. Gregorius Thaumaturgo & Basilio citatis epistolis. Quin non-

nunquam pœnitescentes certis de causis in sola consistencia totam pœnitentiam explebant, quemadmodum statuit Sanctus Basilius citata epist. de mulieribus adulteris, ne scilicet in suspensionem adulterii, capitis periculum venirent, si substrationi & gravioribus pœnis publice subicerentur.

Q. 5. *Omnia peccata lethalia erantne obnoxia pœnitentiæ publicæ?*

Quæstio est de pœnitentia canonica dumtaxat; nam ex dictis, omnia peccata commissa cum aliorum scandalo, pœnitentia aliquo modo publica semper sunt expiata.

Affirmant nonnulli Theologi, omnia peccata lethalia obnoxia fuisse pœnitentiæ canonicæ: sed alii communiter negant, cum quibus ad propositam quæstionem.

R. Non omnia peccata mortalia fuerunt pœnitentiæ publicæ obnoxia.

Probatur variis Patrum & Conciliorum testimoniis. Concilium Neocæsariense anno 314. sic habet can. 4. *Si quis proposuerit concupiscere mulierem ad dormiendum cum ea (en peccatum mortale) & ejus desiderium ad opus non venerit, videtur esse gratia liberatus.* A quo liberatus? certè non ab omni pœnitentia: ergo à canonica & luctuosa. Concilium Nicænum, can. 8. vult Catharos, seu Novatianos redeuntes cum manuum impositione admitti ad gradus sui honorem: ergo sine luctuosa pœnitentia admittebantur; nam qui ea semel defuncti fuerant, ad Communionem Laicam rejiciebantur.

S. Basilius epist. canonica ad Amphilochem canone 14. usurarium eximit à pœnitentia publica; & S. Gregorius Nyssenus epistola ad Letojum can.

can. 6. furem , qui spontè restituit , nec violentè rapuit.

S. Augustinus lib. de fide & operibus c. 26. tria peccatorum genera distinguit ; alia excommunicatione plectenda ; alia quotidiana , quæ Oratione Dominica eluuntur ; alia media , quæ severiori pœnitentia expiari debent , non tamen pœnitentia canonica. *Nisi essent* , inquit , *quædam ita gravia* , ut etiam excommunicatione plectenda sint , non diceret Apostolus , congregatis vobis , & meo spiritu judicavi tradere hujusmodi hominem Satanæ in interitum carnis , &c. *Item nisi essent non ea humilitate pœnitentiæ sananda* , qualis in Ecclesia datur eis , qui propriè pœnitentes dicuntur , sed quibusdam correptionum medicamentis , non diceret Dominus : corripe illum inter te & ipsum solum , & si te audierit , lucratus es fratrem tuum. Postremò , *nisi essent quædam* , sine quibus hæc vita non agitur , non quotidianam veniam peteres in Oratione , quam docuit Dominus.

Probatur 2. ratione ; quia ex dicendis , post peractam luctuosam pœnitentiam , nullus deinceps erat locus alteri pœnitentiæ , nisi forte in extremo mortis periculo ; ergo si pro quolibet peccato mortali agenda fuisset pœnitentia publica , quotquot postea vel verbo , vel cogitatione lethaliter peccassent , Sacris fuissent per totam vitam interdicti , & ita immanis fuisset in Templis solitudo , cùm pauci sint admodum qui totam vitam agant immunem ab omni prorsus culpa lethali.

Q. 6. *Quæ ergo peccata pœnitentiæ canonice erant obnoxia.*

R. Tria dumtaxat , quæ idcirco canonica appellari solent , nempe idololatria , homicidium ,

& adulterium, eorumque species, quibus successu temporis ob morum depravationem alia nonnulla addita sunt.

Probatur ex S. Paciano, qui in oratione pœnetica ad pœnitentiam ex professo docet non omnia peccata pœnitentiæ Inctuosæ fuisse addicta, sed tria solum quæ retulimus. *Ne quis existimet*, inquit, *propter innumera delicta, quorum fraudibus nullus immunis, nos omne hominum genus indiscreta pœnitendi lege constringere.* Deinde exponit quænam peccata publicè castigari oportet, ea scilicet; quæ Apostoli in suo Concilio Jerosolymitano assignarunt, nempe idololatriam, homicidium, & adulterium; cætera verò contrariis bonis operibus sananda sunt.

Q. 7. *Peccata canonica omnino occulta erantne antiquitus pœnitentiæ publicæ addicta?*

Non levis est ea de re in Scholis controversia; quia Scriptores Ecclesiastici propter varias circumstantias rerum, personarum, & temporum ita diversimode scripserunt, ut locum dederint Theologis opposita opinandi.

Plures igitur Theologi insignes affirmant peccata canonica, etiam occulta, eluenda fuisse pœnitentia solemni & canonica, ducunturque iis potissimum momentis.

1. Origines hom. 2. in Psal. 37. postquam monuit cautè seligendum esse Sacerdotem, apud quem peccata deponantur, sic habet, *Quidquid ille dixerit, facias. Si intellexerit talem esse languorem tuum, qui in conventu totius Ecclesiæ exponi debeat & curari, ex quo fortassis & cæteri ædificari poterunt, & tu ipse facile sanari, hoc procurandum est.*

2. S. Cyprianus de occultè lapsis in idololatriam, ait, *plus imo delinquit, qui secundum hominem Deum*



*Deum cogitans , evadere se pœnam criminis credit , si non palam crimen admisit.*

3. S. Basilus sæpius laudata epist. ad Amphilo-  
 chium uxorem occultè adulteram , excipit à  
 lege communi ; ergo maritus & quivis alias occul-  
 tus adulter subijciebantur pœnitentiæ publicæ :  
 nam exceptio firmat regulam.

4. Concilium Eliberitanum can. 76. sic statuit  
 de eo , qui cùm fornicatus esset , Diaconum se  
 permisit ordinari. Si, inquit , *postea fuerit dete-*  
*ctus in crimine mortis , quod aliquando commiserit , si*  
*spontè fuerit confessus , placuit eum acta legitima pœniten-*  
*tia accipere communionem : quod si aliquis eum detexerit ,*  
*post quinquennium , acta pœnitentia , accipere laicam com-*  
*munionem ?*

Denique si ante septimum sæculum occulti  
 peccatores immunes fuissent à pœnitentia publica,  
 Canones distinxissent inter peccatum publicum &  
 occultum , quemadmodum post sæculum septi-  
 mum , quo diximus obtinuisse effatum , peccata  
 publica publicè mulcentur , secreta autem secre-  
 tò , ut legere est in Concilio Arelatenfi VI. anno  
 813. can. 26. Remensi eodem anno can. 31. Ca-  
 billonenfi II. can. 25. eodem anno ; Moguntino  
 anno 843. can. 31. & apud Burchardum lib. 16.  
 collect. cap. 30. Atqui veteres Canones absolu-  
 te & indiscriminatim idololatrias , homicidas , &  
 mæchos addicunt pœnitentiæ publicæ . Ergo.

Qui contra negant , & quidem magno nume-  
 ro peccata omninò occulta addicta fuisse pœni-  
 tentiæ publicæ , hæc pro sua opinione proferunt  
 momenta.

1. Veteres non aliam solent afferre rationem ,  
 & causam publice pœnitendi , quam quòd pec-

catum cum scandalo aliorum fuerit patratum. Si peccatum ejus, inquit Sanct. Augustinus, ferm. 351. aliàs hom. 50. non solum in gravi ejus malo, sed etiam in tanto scandalo est aliorum, atque hoc expedire utilitati Ecclesiæ videatur Antistiti, in notitia multorum, vel etiam totius plebis agere pœnitentiam non recuset. Et S. Cæsarius, homil. 1. in Quadragesimam: Hæc & ejusmodi commissæ, inquit, expiari penitus communi & mediocri satisfactione non possunt; sed graves causæ graviores, acriores & publicas curas requirunt, ut qui cum plurimorum afflictione se perdidit, simili modo cum plurimorum ædificatione se redimat.

2. Concilium Neocæsariense à pœnitentia publica disertè eximit eum, qui mulierem inhoneste concupivit; & S. Gregorius supra laudatus, furem occultum.

3. Quia occulti peccatores non sine evidenti famæ, aliquando etiam vitæ periculo, addicti fuissent pœnitentiæ publicæ, utpote quæ non imponeretur nisi pro gravioribus capitalibusque peccatis, verb. gr. homicidio, quorum reus per suam confessionem & pœnitentiam convictus gladium Magistratus non effugisset. Ita illi Theologi.

Verum momenta illa, tam primæ quàm secundæ sententiæ, non admodum urgere videntur.

Non primum; namque 1. fatentibus illis Theologis, crimen quod uno & altero testimonio probari poterat, quamvis non esset publicum, obnoxium tamen erat pœnitentiæ publicæ; ut patet ex canone Concilii Eliberitani pro prima sententia laudato. Ergo non sola scandali circumstantia, sed & peccati gravitas causa erant cur peccatum subjiceretur pœnitentiæ publicæ. 2. Ipsi  
patro-

patroni secundæ sententiæ concedunt peccatores occultos propter graviora crimina Confessarii præcepto coactos ad pœnitentiam publicam; illud enim constat tum ex testimonio Origenis in confirmationem primæ sententiæ allato; tum ex officio Pœnitentiarii, quem amovit Nectarius; siquidem Pœnitentiarius ille pœnitentibus præscribebat quæ ex peccatis occultis secreto essent eluenda, quævè publicè. Hinc matrona illa, de qua Socrates & Sozomenus, dum ex præscripto Pœnitentiarii stuprum omnino occultum pœnitentia publica expiaret, ultra mandatum progressa illud etiam inconsideratè confessa est magno Fidelium scandalo. Porro nulla sufficiens ratio apparet, cur patroni secundæ sententiæ tam acriter contendant canonica peccata omnino occulta, obnoxia non fuisse pœnitentiæ publicæ vi canonum, sed solum ex præcepto Confessarii; par enim utrobique incommodum.

Non secundum; quia voluntas patrandi crimen, puta adulterium, aut homicidium, quæ caruit effectu, vel conatu, non erat pœnitentiæ publicæ obnoxia, etiamsi pluribus innotuisset, sicut nec furtum publicum, sed sine violentia commissum, saltem juxta disciplinam quarundam Ecclesiarum, & præsertim illius cui præerat S. Gregorius Nyssenus.

Non tertium. I. quia simile incommodum objici potest adversus secundam sententiam, si enim reus criminis capitalis, etiam occultus; subiciebatur pœnitentiæ publicæ, ubi præcipiebat Confessarius vel quando probari poterat saltem duorum testimonio, aut de eo nata erat aliqua suspicio, nonne famæ, aliquando etiam capitis

pitis periculum incurrebat? 2. quia in utraque sententia nullum erat revera infamiae & mortis periculum: namque licet pœnites per pœnitentiam publicam generatim profiterentur reos se graviorum peccatorum; 1. incertum erat quænam essent illa peccata, cum eadem pœnæ subeundæ essent pro diversis peccatis. 2. Plures ex consilio & solo pietatis animo stadium pœnitentiæ publicæ ingrediebantur, ut patet ex suprâ laudato exemplo Fabiolæ illustris Romanæ; Wambæ Regis Hispaniarum, de quo in Concilio Toletano XII. & Gaudentii Valerientis Episcopi, de quo in Concilio XIII. Toletano. Sic Fideles, qui nunc palam & publicè sacramentum pœnitentiæ frequentant, in gravioris peccati suspicionem non veniunt, quamvis sacramentum illud lapsis dumtaxat sit necessarium, quia scilicet plures ad illud recurrunt in remedium quotidianorum peccatorum. Quæ cum ita sint,

R. Nullum videtur incommodum, si ad conciliandas utcumque oppositas sententias canones veteres eo modo interpretemur, quo recentiores, quibus nititur hodierna Ecclesiæ disciplina: nimirum canones hodierni, qui pœnam excommunicationis & irregularitatis in atrociora quædam crimina decernunt ipso facto incurrendam, ita omnium Theologorum & Canonistarum iudicio, ligant reos occultos, ver. gr. homicidas, simoniacos, ut tamen eorum suspendatur effectus, quoties servari nequeunt absque evidenti infamiae, aut alterius gravioris incommodi periculo. Ergo à pari, cum antiqui canones non distinguant publicos inter & occultos idololatrias, homicidas & mæchos; sed omnes absolutè  
& in-

& indiscriminatim subijciant pœnitentiæ canonicæ, quæ non est absque excommunicatione, majori quidem in stationibus flentium, audientium & substratorum, minori verò in statione consistentium; verisimilius sequitur iisdem feriri ejusmodi peccatores, siue sint occulti, siue publici, cum hoc tamen temperamento erga occultos, si nempe statutam pœnam absque famæ & vitæ periculo exolvere possent, ut colligitur ex sæpius laudata epist. S. Basilii ad Amphiloc. In qua uxores adulteras, non maritos, eximit à pœnitentia publica, ne scil. in maritorum suspicionem venirent.

Q. 8. *Omnes peccatorum canonicorum rei fueruntne solemni pœnitentiæ addiçti?*

R. A sæculo IV. Clerici majores, hoc est, Episcopi, Presbyteri, & Diaconi, non fuerunt obnoxii pœnitentiæ luctuosæ.

Probatur 1. ex Conc. Carthagin. V. can. 11. anno 398. in quò sic habetur, *item confirmatum est, ut si quando Presbyteri, vel Diaconi in aliqua graviore culpa convicti fuerint, qua eos à ministerio necesse fuerit removeri; non eis manus tanquam pœnitentibus, vel tanquam fidelibus laicis imponatur.* 2. Ex Sanct. Leone epist. ad Rusticum Narbonensem: *Alienum est, inquit, à consuetudine Ecclesiastica, ut qui in Presbyterali honore, aut in Diaconi gradu fuerint consecrati, pro crimine aliquo suo per manus impositionem remedium accipiant pœnitendi.* 3. Ex Sanct. Isidoro, lib. 2. de Eccles. off. cap. 16. de pœnitentia sic scribit: *Honorum dumtaxat dignitate servata, ita ut à Sacerdotibus & Levitis, Deo tantum teste, fiat (pœnitentia) à ceteris verò astante coram Deo solemniiter Sacerdote.*

Dixi

Dixi 1. à IV. *ſæculo*: id enim æquè non conſtat de tribus primis Eccleſiæ ſæculis: plures quippe Theologi exiſtimant omnes graviorum peccatorum reos, etiam Imperatores, abſque perſonarum acceptione addiſtos fuiſſe luſtuoſæ pœnitentiæ. Conſtat de Philippo Imperatore, ex Euſebio libro 6. Hiſtoriæ, cap. 34. De Episcopis ſcribit S. Cyprianus epiſt. 68. Baſilidem Episcopatu, pro conſcientiæ ſuæ vulnere, ſe abdicaviſſe ad agendam pœnitentiam, & ſatis gratulari, ſi ſibi ut laico communicare contingeret. Et epiſt. 59. de Victore Presbytero: *Significavi, inquit, de Victore quodam Presbytero, quod ei antequam pœnitentiam plenam egiſſet, & Domino Deo, in quem deliquerat, ſatisfeciſſet, temerè Terapius collega noſter immaturo tempore, & præpoſtera ſatisfactione, pacem dederit. Quæ res non ſatis movet, reſeſſum eſſe à Decreti noſtri auctoritate, ut ante legitimum & plenum tempus ſatisfactionis, & ſine petitu & conſcientia plebis nulla infirmitate urgente, ac neceſſitate cogente, pax ei concederetur.* De Diaconis extat canon 76. Concilii Eliberitani, in quo ſic decernitur: *Si poſtea fuerit detectus in crimine mortis, quod aliquando commiſerit, ſi ſpontè fuerit confeſſus, placuit eum, acta legitima pœnitentia, accipere communionem, quod ſi aliquis eum detexerit, poſt quinquenniū acta pœnitentia accipere laicam communionem.*

Alii Theologi contendunt omnes quidem, tum Episcopos, tum Presbyteros poſt lapſum egiſſe pœnitentiam, ſed non luſtuoſam, & canonicam; nitunturque 1. Can. 25. eorum qui circumferuntur ſub nomine Apoſtolorum, & ſic ſtatuitur: *Episcopus, aut Presbyter, aut Diaconus, qui in fornicatione, aut perjurio, aut ſigto captus eſt, deponatur, non tamen communionē privetur; dicit enim Scriptura: Non vindi,*

vindicabit Dominus in idipsum. 2. Optato Milevitano, qui scribit libro 1. Episcopis lapsis manum imponere, ab Ecclesia prorsus esse alienum. Et ad calcem lib. 2. exprobrans Donatistis, quod Episcopos subjecissent pœnitentiæ publicæ, à vobis, inquit, occisi sunt in honoribus Sacerdotes. *Multis notum est & probatum, persecutionis tempore Episcopos aliquos inertia à confessione nominis Dei delapsos thurificasse; & tamen nullus eorum qui evaserunt, aut manum lapsis imposuit, aut ut genua figerent, imperavit.* Sed hæc controversia non est tanti momenti, ut in ea discutienda diutiùs immoremur.

Dixi 2. Clerici majores; nam ex epist. 7. Felicis III. qui rexit Ecclesiam sub finem V. sæculi, Clerici inferiores, & Monachi, si lapsi fuissent, pœnitentiæ solemnis legibus erant astricti; postquam enim Episcopos, Presbyteros & Diaconos ab iis exemit, deponendosque dumtaxat definiit, sic pergit: *de Clericis autem & Monachis, aut puellis Dei, aut sæcularibus præcipimus hunc tenorem . . . . . tribus annis inter audientes sint, septem autem annis subiaceant inter pœnitentes manibus Sacerdotum; duobus autem annis oblationes modis omnibus non sinantur offerre, sed tantummodò sæcularibus in oratione socientur.*

Q. 9. Qui pœnitentia solenni defuncti fuerant, poterantne aliquando ordinari?

R. Minimè, ut patet ex epist. 1. c. 14. Siricii Papæ IV. sæculo, in qua sic scribit: *Sicut pœnitentiam agere cuiquam non conceditur Clericorum, ita & post pœnitentiam, ac reconciliationem nulli unquam laico liceat honorem Clericatus adipisci.* Quia quamvis sint omnium peccatorum contagione mundati, nulla tamen debent gerendorum Sacramentorum instrumenta suscipere, qui dudum fuerint vasa vitiorum.

Q. 10. *Quam pœnitentiam agere tenebantur Clerici majores ob crimen depositi ?*

R. Nonnuquam à populi conspectu semoti in Monasteriis peccata sua expiabant: *Si Episcopus, inquit Concilium Toletanum IV. can. 29. aut Presbyter, sive Diaconus, aut quilibet ex Ordine Clericorum magos, aut aruspices, aut ariolos . . . . consulere fuerit deprehensus, ab honore dignitatis suæ depositus, Monasterii pœnam excipiat, ibique perpetuæ pœnitentiæ deditus, scelus admissum sacrilegii luat.*

Q. 11. *Utrum pœnitentia publica potuerit iterari ?*

R. Non potuit, probaturque Veterum testimonio.

Tertull. lib. de pœnit. cap. 5. *Collocavit, inquit, in vestibulo pœnitentiam secundam, (nam prima præcedit baptismum) quæ pulsantibus patefaciat; sed jam semel, quia non secundò, sed ampliùs nunquam, quia proximè frustra.*

S. Ambrosius lib. 2. de pœnit. cap. 10. *Sicut unum baptismo, inquit, ita una pœnitentia, quæ tamen publicè agitur, nam quotidiani debet nos pœnitere peccati. sed hæc peccatorum leviorum, illa graviorum.*

Sanctus Augustinus ep. 153. aliàs 54. *Quamvis eis (relapsis) in Ecclesia locus humillimæ pœnitentiæ non concedatur, Deus tamen super eos suæ pœnitentiæ non obliviscitur. Et infra: cautè salubriterque provisum est, ut locus illius humillimæ pœnitentiæ semel in Ecclesia concedatur; ne medicina vilis, minus utilis esset ægrotis, quæ tantò magis salubris est, quantò minus contemptibilis fuerit.*

Q. 12. *Quid, si quis post solemnem pœnitentiam in grave peccatum iterùm lapsus fuisset ?*

R. 1. Nec ipse de se desperare debuit, nec alii de ipso; sanctus enim Augustinus citata Epistol. 153. de ejusmodi relapso, qui pœnitendo  
vehe-



vehemenrius quàm prius se excruciat, qui charitate flagrat ardentius, sic scribit: *Quis nostrum ita desipit, ut huic homini dicat, nihil tibi ista proderunt in posterum? vade, saltem vitæ hujus suavitatem perfrui; Advertat Deus tam immanem, sacrilegamque dementiam.* Et infra: *quis tamen audeat dicere Deo, quare huic homini, qui post primam pœnitentiam rursus se laqueis iniquitatis obstringit, adhuc iterum parcis?*

R. 2. Si peccatum illud grave non erat pœnitentiæ canonicæ obnoxium, pœnitentia secreta, & absolutione sacramentali diluebatur.

Probatur, quia ex Concilio Tridentino sess. 14. cap. 2. Christus Sacramentum Pœnitentiæ ita instituit, ut per Sacerdotum sententiam non semel, sed quoties ab admisis peccatis ad ipsum pœnitentes confugerint, possint liberari. Nec ex ullo Veterum testimonio evinci potest Ecclesiam, disciplinæ causâ, à sacramentorum participatione exclusisse ejusmodi relapsos pœnitentes. Quin contrarium conjicere licet ex duplici incommodo, quod Ecclesia semper cavit, & nihilominus ex severiori illa disciplina fuisset consecutum. Namque 1. solemnis pœnitentia donum impecantiæ non conferebat. Cùm autem habita ratione humanæ infirmitatis, & continuæ infestationis dæmonis, difficile sit per totum vitæ spatium in aliquod lethale peccatum, saltem cogitationis aliquando non labescere; mensa Domini fuisset deserta, paucique sacrorum Mysteriorum fuissent participes. 1. Severior illa disciplina peccatores etiam occultissimos prodidisset; quis enim statim non intellexisset eos omnes gravioris alicujus peccati esse reos, qui per totam vitam à Sacramentis abstinebant?

R. 3. Qui post solemnem pœnitentiam semel impletam in graviora & canonica peccata incurrebant, per secretam pœnitentiam toto vitæ tempore castigati, in ipso mortis articulo dumtaxat absolutionem consequiebantur, saltem juxta disciplinam Ecclesiæ Romanæ.

Probatur ex epistola Siricii ad Himerium Taraconensem Episcopum, qui summum Pontificem consuluerat, quid sentiendum & agendum de iis, qui acta pœnitentia, tanquam canes ac fues ad vomitus pristinos, & ad volutabra redierant. Ad hanc autem quæstionem sic respondet laudatus Pontifex: *Quia tam suffragium non habent pœnitendi (scilicet pœnitentia solemni & publica) id duximus decernendum, ut sola intra Ecclesiam fidelibus oratione iungantur, sacræ mysteriorum celebritati, quamvis non mereantur, intersint: à Dominicæ autem mensæ convivio segregentur, ut hac saltem districtione correpti, & ipsi in se sua errata castigent, & aliis exemplum tribuant, quatenus ab obscœnis cupiditatibus retrabantur. Quibus tamen (quoniam carnali fragilitate ceciderunt) viatici munere, cùm ad Dominum cœperint proficisci, per communionis gratiam volamus subveniri.*

Dixi, juxta disciplinam Ecclesiæ Romanæ; Quia nonnullis Theologis videtur in quibusdam aliis Ecclesiis absolutionem ejusmodi relapsis denegatam fuisse, etiam in mortis articulo: probantque ex Synodo Elliberitana, quæ sic statuit can. 3. *Si post pœnitentiam fuerint mæchati, placuit ulterius eis non esse dandam communionem, ne lusisse de communione Dominica videantur.* Et can. 7. *Si quis post lapsum mæchiæ, acta pœnitentia, denuò fuerit fornicatus, placuit eum nec in fine habere communionem.*

## APPENDIX.

*De Indulgentiis.*

**Q**uoniam videri posset Indulgentias derogare divino satisfaciendi præcepto, operæ præmium est paucis exponere earum notionem, vim, & usum. Itaque

## §. I.

*De Indulgentiarum definitione.*

Q. I. *Quid est Indulgentia?*

R. Est remissio pœnæ temporalis, quæ post dimissam culpam luenda superest, extra sacramentum facta ab eo, qui potestatem habet dispensandi spiritualem thesaurum Ecclesiæ.

Dicitur 1. *remissio pœnæ temporalis*, ut intelligatur, per Indulgentias neque culpam, neque pœnam æternam remitti; (ille enim effectus est Sacramenti proprius) sed pœnam temporalem dumtaxat.

Dicitur 2. *extra Sacramentum*, ut distinguatur illa pœnæ remissio ab ea, quæ fit per Sacramentum; virtute enim Sacramenti pœnitentiæ, pro majori, vel minori pœnitentium præparatione, plus, vel minus minuitur reatus pœnæ temporalis.

Quia verò pœnitentes vulgò non accedunt satis parati, ut per absolutionem reatus pœnæ totaliter expungatur, Sacerdotes ex præcepto divino tenentur, ut diximus, imponere satisfactiones congruas ad eluendum quod superest pœnæ temporalis. Porro Indulgentia est ejusmodi satisfactionis remissio, & pœnæ relaxatio.

Dicitur 3. *ab eo qui habet potestatem dispensandi, &c.* Quia bona communitalis propria, & Reipublicæ thesaurus dispensari nequeunt, nisi ab eo, vel auctoritate illius qui præest communitati.

Q. 2. *Quis est ille thesaurus Ecclesiæ?*

R. Sunt bona spiritalia, quorum dispensatio credita est Ecclesiæ; & idè thesaurus Ecclesiæ dicuntur tum à Clemente VI. in Extrav. *Unigenitus*, tit. de pœnit. & remiss. anno 1350. tum à Patribus Tridentinis, sess. 21. c. 9. de refor.

Q. 3. *Quæ sunt illa bona?*

R. Merita Christi, & omnium Sanctorum, Christi quidem; nam, ut ait Apostolus 2. Corinth. 8. vers. 9. *Propter vos egenus factus est, cum esset dives, ut illius inopia vos divites essetis.* Et Clemens VI. citata Extravag. *In ara crucis innocens immolatus* (Christus) non guttam sanguinis modicam, quæ tamen propter unionem ad Verbum pro redemptione totius generis humani suffecisset; sed copiosè velut quoddam profluvium noscitur effudisse. . . . Quantum ergo exinde, ut nec supervacua, inanis & superflua tantæ effusionis miseratio redderetur, thesaurum militanti Ecclesiæ acquisivit? quem quidem thesaurum non in sudario repositum, non in agro absconditum, sed per B. Petrum cæli clavigerum, ejusque successores, suos in terris Vicarios, commisit Fidelibus salubriter dispensandum. Conflatur etiam ille thesaurus ex meritis Sanctorum, ut expressè docet Clemens VI. laudata Extrav. his verbis: *Ad cuius quidem thesauri cumulum B. Dei Genitricis, omnium electorum, à primo iusto usque ad ultimum, merita adminiculan præstare noscuntur: de cuius consumptione, seu mutatione non est aliquatenus formidandum, tam propter infinita Christi (ut prædictum est) merita: quam pro eo, quòd quantò plures ex ejus applicatione trahuntur ad justitiam,*

*stítiam, tantò magis accrescit ipsorum cumulus meritòrum.* Quibus verbis declarat summus Pontifex non solùm merita electorum, qui regnant in cœlis; sed etiam eorum qui militant in terris, spiritualem illum thesaurum ingredi, cùm asserat quo plures hìc trahuntur ad justitiam, tantò magis accrescere Ecclesiæ thesauro cumulum meritòrum.

Q. 4. *Utrùm sola Christi merita non sufficiant ad cumulatiònem ditandam Ecclesiæ, sitque necesse hic addi merita Sanctorum?*

R. Absit; cùm ex laudata Extravagante sint thesaurus infinitus, qui exhauriri non potest, ut latè probavimus Tract. de Incarnat. ubi de satisfactione Christi.

Non igitur reponuntur in thesauro Ecclesiæ merita Sanctorum, ut aliquid addant meritis Christi: *Nec enim aliud nomen est sub cœlo datum hominibus, in quo oporteat nos salvos fieri, Act. 4. v. 12.* sed ut denotetur communio Sanctorum in Ecclesia, quæ, ut dicitur Ephes. 1. v. 23. *est corpus ipsius (Christi) & plenitudo ejus, qui omnia in omnibus adimpletur*, hoc est, sicut caput perficitur accessu corporis, seu omnium membrorum, & vicissim corpus accessu capitis: ita Christus, qui in proprio & naturali corpore per passionem suam consummavit in æternum sanctificatos, Hebr. 10. omniaque gratiarum dona hominibus promeruit, se tamen mancum & mutilum caput existimaret, nisi corpus suum, quod est Ecclesia, haberet sibi adjunctum, & quemadmodum in naturali corpore multa fecit & passus est in Dei honorem & gloriam, ita in mystico suo corpore operans & patiens Patrem glorificet: quo sensu dixit Apostolus Coloss. 1. v. 24. *adim-*

pleo ea quæ defunt passionum Christi, non quòd defectum virtutis in Christo suppleret, sed quòd veluti instrumentum illi inserviret, ut fructus Passionis illius ad omnes derivaretur. *Et ita non habet homo unde gloriatur, inquit Patres Tridentini sess. 14. cap. 8. sed omnis gloriatio nostra in Christo est, in quo vivimus, in quo meremur, in quo satisfacimus facientes fructus dignos pœnitentiæ, qui ex illo vim habent, ab illo offeruntur Patri, & per illum acceptantur à Patre.* Merita itaque Sanctorum in thesauro Ecclesiæ cum meritis Christi composita spectari debent, quomodo collectio omnium causarum secundarum, quibus Deus hanc rerum universitatem administrat. Sicut enim causæ secundæ conjunctæ cum omnipotentia divina non sunt quid intensivè majus, aut potentius, quàm ipsa omnipotentia sine iis spectata, cum ad ea omnem vim & actum recipiant, nec Deus iis utatur ex aliqua necessitate, aut indigentia, quemadmodum artifex indiget instrumentis suæ artis; sed ex plenitudine omnipotentissimæ suæ bonitatis, cujus proprium est copiam sui facere. Similiter omnia Sanctorum merita meritis Christi conjuncta non sunt quid majoris pretii & æstimationis, quàm merita Christi ab iis separata; illa quippe sunt emanationes à Christo, qui tanquam caput fidelibus membris suis tribuit spiritum & motum.

Q. 5. *Quomodo merita Sanctorum concurrunt ad Indulgentias?*

R. Duæ sunt Theologorum sententiæ in scholis celebres.

Prima asserit Sanctorum merita concurrere per modum impetrationis, non verò solutionis, hoc est, reatum pœnæ temporalis per se immediatè  
non

non expungere, sed offerri ab Ecclesia, ut Deus propitiatur peccatoribus, eosque dignos reddat, quibus merita Christi per indulgentias applicentur.

Probatur hæc sententia 1. è Scriptura, Apocalypseos, cap. 1. *Christus lavit nos à peccatis nostris in sanguine suo. Semetipsum dedit redemptionem pro omnibus*, 1. Tim. 2.

Probatur 2. ex Patribus.

Origenes hom. 84. in Num. *Talis, inquit, bæc fuit hostia, ut una sola sufficeret pro totius mundi salute. Cæteri enim precibus peccata, hic solus potestate dimisit.*

S. Augustinus tract. 24. in Joan. *In fraternorum peccatorum remissionem, inquit, nullius sanguis Martyris funditur.*

S. Leo epist. 97. alias 83. *Quamvis, inquit, multorum Sanctorum in conspectu Domini pretiosa mors fuerit, nullius tamen insontis occisio propitiatio fuit mundi. Acceperunt iusti, non dederunt coronas; & de fortitudine Fidelium exempla nata sunt patientiæ, non dona iustitiæ: singulares quippe in singulis mortes fuerunt, nec alterius quisquam debitum suo sine persolvit.*

S. Thomas 3. part. quæst. 48. art. 5. ad 3. sic habet: *Passiones Sanctorum proficiunt Ecclesiæ, non quidem per modum exempli & exhortationis.*

Probatur 3. ratione; Quia ex laudata Extravagante Clementis VI. ad thesauri cumulum omnium electorum merita adminiculum præstant: atqui certissimum est omnes & singulos electos superabundantes satisfactiones non habere quibus pro aliis solvant, cum plures ex illis pœnas temporales peccatis suis debitas in Purgatorio exolvant: ergo eorum merita concurrunt dumtaxat ad Indulgentias per modum impetrationis.

Altera sententia contendit merita Sanctorum ad Indulgentias concurrere, non solum per modum impetrationis, sed etiam solutionis.

Probatur 1. ex Bulla Pii V. qui plures Baji propositiones sua censura notavit, inter quas 59. sic habet: *Per passionem Sanctorum in Indulgentiis communicatas, non propriè redimuntur nostra delicta; sed per communionem charitatis nobis eorum passiones impertuntur, ut digni sinus, qui pretio Sanguinis Christi à pœnis pro peccatis debitis liberemur.*

Probatur 2. quia ex dictis Justus potest non solum pro se, sed etiam pro alio satisfacere quoad debitum pœnæ temporalis, quin & peccatori mereri de congruo donum pœnitentiæ. Cum autem ista non præstet, nisi per merita Christi, cujus spiritu agitur, tanquam vivum ejus membrum, Patres laudati pro priore sententia meritò asserunt solo Christi Sanguine peccatores ablui, & debita ex iis contracta exolvi: *Hic est unus, verusque mediator noster, & advocatus, pro quo nullus interpellat, sed ipse pro omnibus aliquando quidem per membra corporis sui, quæ pro se invicem sollicita sunt.* S. Augustinus lib. contra Parmenianum.

Dices; Beati in cœlo acceperunt mercedem suam, ergo non possunt solvi aliorum debita bonis eorum operibus.

Distinguo antec. Acceperunt mercedem essentialem, Conc. Accidentalem, Nego antec. Pertinet autem ad eorum beatitudinem accidentalem, ut ii, pro quorum salute fuerunt solliciti, dum in terris agerent, tam ardentè & assidue Deum precati sunt, carnem suam jejuniis, vigiliis, & aliis afflictationibus macerarunt, ab omnibus pœnis liberentur, & in bonis actibus usque



usque ad finem perseverent. Nec quis sibi fingat Justum, qui pro aliis orat, jejunat, pauperibus largitur, minùs apud Deum mereri, & se ipsum aliqua parte mercedis defraudare: cùm enim opus exerceat majoris charitatis, majus quoque præmium à Deo consecutus est.

## §. II.

*De Indulgentiarum existentia.*

Q. *Extatne in Ecclesia potestas concedendi Indulgentias?*

Negarunt,

1. Tertullianus Montanista factus, lib. de pudicitia, cap. 22. ubi Martyribus denegat quod Catholicus ipsis concessum agnovèrat libro ad Martyres cap. 1. Hic enim approbat ad preces Martyrum Ecclesiam pœnitentibus pœnas eorum peccatis debitas relaxare solitam: *Domus quidem Diaboli est & carcer, sed vos idèò in carcerem pervenistis, ut illum etiàm in domo sua conculcetis; jam enim foris egressi conculcaveratis . . . . sed inveniat munitos, & concordia armatos; quia pax vestra bellum est illi, quam pacem quidam in Ecclesia non habentes, à Martyribus in carcere exorare consueverunt. Et idèò eam etiàm propterea in vobis habere, & fovere, & custodire debetis, ut si fortè, & aliis præstare possitis. Sed postea in hæresim Montanistarum lapsus, quem priùs laudaverat usum improbavitque impugnavitque: At tu, inquit S. Zephyrinum alloquens, & jam in Martyres tuos effundis banc potestatem, ut quisque ex consensione vincula induit adhuc mollia in novo custodia nomine, statim ambiunt mœchi, statim adeunt fornicatores . . . & pacem ab iis quærunt, qui de sua periclitantur.*

2. Valdenſes duodecimo ſæculo Indulgentias reprobarunt, ex Raynero libro contra Valdenſes cap 6. de *Indulgentiis*, inquit, *quæ ſunt per Eccleſiam, non credunt.*

3. Wicleſus decimo quarto ſæculo, cui adhæſerunt Joannes Huſ, & Hieronymus de Praga, in eodem verſatus eſt errore, fuit enim ejus hæc propositio in Conc. Conſtantiensi damnata ſeſſ. 15. *Indulgentiæ Papæ, ſive Episcoporum conceſſæ nihil profunt.*

4. Petrus Oxomensis decimoquinto ſæculo aſſeruit *Romanum Pontificem Purgatorii pœnam remittere non poſſe*; quam propositionem proſcripſerunt primùm Archiepiſcopus Toletanus, deinde Sixtus IV.

5. Lutherus indignè ferens, quod Leo decimus provinciam publicandi Indulgentias demandaret, non ſuæ familiæ Auguſtinenſium, ſed Dominicanorum, i. invidiæ facibus ardens contra varios Indulgentiarum abuſus debacchatus, ac tandem ipſum dogma ſubvertere aggreſſus eſt his proſcriptionibus à Leone decimo proſcriptis: *Indulgentiæ ſunt piæ fraudes Fidelium, & remiſſiones bonorum operum. Seducuntur credentes Indulgentias eſſe ſalutares, & ad fructum ſpiritus utiles.* Lutherum ſecuti ſunt Zvvinglius & Calvinus.

Contra hos errores Concilium Tridentinum ſeſſ. 25. Decreto de Indulgentiis, ſic habet, ac definit: *Sacroſancta Synodus Indulgentiarum uſum Chriſtiano populo maximè ſalutarem, & ſacrorum Conciliorum auctoritate probatum, in Eccleſia retinendum eſſe docet & præcipit, eoſque anathemate damnat, qui aut inutiles eſſe aſſerunt, vel eas concedendi in Eccleſia poteſtatem eſſe negant. In his tamen concedendis moderationem juxta*

*ta veterem & probatam in Ecclesia consuetudinem, adhiberi cupit: ne nimia facilitate Ecclesiastica disciplina enervetur. Abusus, qui in his irrepserunt, quorum occasione insigne hoc Indulgentiarum nomen ab Hæreticis blasphematur, emendatos & correctos cupiens, præsentì Decreto generaliter statuit, &c. In hocce Decreto quatuor notanda sunt.*

1. Concilium docet extare in Ecclesia potestatem concedendi Indulgentias.

2. Generatim dumtaxat asserit eas esse Fidelibus salutares, nec definit quæ sit earum utilitas, circa quam Theologi variè opinantur.

3. Præscribit Indulgentiarum usum, declaratque debere esse moderatum juxta veterem, & probatam in Ecclesia consuetudinem. Concilium Lateranense IV. can. 62. jam perstrinxerat immoderatum Indulgentiarum usum his verbis: *ad hæc quia per indiscretas & superfluas Indulgentias, quas quidam Ecclesiarum Prælati facere non verentur, & claves Ecclesiæ contemnuntur, & pœnitentialis satisfactio enervatur, decernimus, &c. Idem præstiterat XV. sæculo Sixtus IV. Extravag. Etsi, lib. 5. cap. 5. in qua revocat plures Indulgentias à se concessas: Nos, inquit, qui Deo propitio ejusdem gregis Domini causam gerimus, & usum spiritualis thesauri elargitione cupimus ipsi Deo reddere acceptabilem; ne exinde clavium auctoritas deducatur in contemptum, ipsique ad peccandum procliviores, ut diximus, liberius prolabantur . . . . auctoritate Apostolica tenore præsentium statuimus, &c. Et post Concilium Tridentinum Clemens VIII. referente Baronio ad annum 847. ad antiquam formam non sine divino instinctu effusas nimis Indulgentiarum concessiones restringere aggressus est; sunt enim potius remissiores vasta*  
Indul-

*Indulgentiarum laxitate Fideles.* Nostra etiam ætate Innocentius Undecimus multas revocavit Indulgentias, tanquam obreptitiæ, & sine sufficienti causa obtentas.

4. Idem Concilium Tridentinum damnat abusus, qui circa Indulgentias obrepserunt, ac imprimis pravos quæstus pro iis consequendis, *quorum occasione insigne hoc Indulgentiarum nomen ab Hæreticis blasphematur*; mandatque Episcopis, ut diligenter quisque in sua Diœcesi hujusmodi abusus corrigat, ut in prima Synodo Provinciali recogniti, statim ad Summum Pontificem deferantur, cujus auctoritate, & prudentia, quod universali Ecclesiæ expediet, statuatur; *ut ita sanctarum Indulgentiarum munus piè, sanctè, & incorrupte omnibus Fidelibus dispensetur.*

His præmissis, ad propositam quæstionem

R. De fide est, extare in Ecclesia potestatem concedendi Indulgentias, earumque usum Fidelibus esse salutarem. Duæ sunt responsionis partès à Concil. Tridentino definitæ.

Prima pars, quæ est de potestate concedendi Indulgentias, probatur 1. è Scriptura, Matth. 16. vers. 19. *Tibi dabo claves regni cœlorum.* Ad quid autem promittuntur Petro claves regni cœlorum? an præcisè & unicè, ut claudat, & nemini referet cœlestem thesaurum? absit, subdit enim Christus; *quodcunque solveris super terram, erit solutum & in cœlis.* Quod autem Christus promiserat Petro cap. 16. illud extendit ad cæteros Apostolos, Matth. 18. vers. 18. *quæcunque*, inquit, *solveritis super terram, erunt soluta & in cœlo.* Ex quibus verbis S. Cyprianus cum Collegis suis in Concilio Africano, collegit Apostolos & eorum successores accepisse

cepisse potestatem imponendi pœnitentibus pœnas satisfactorias, & impositas, vel imponendas relaxandi, aut remittendi ex causa legitima, *cum permiserit ipse, qui legem dedit*, inquit, epist. 54. ad Cornelium Summum Pontificem, *ut ligata in terris, etiam in cœlis ligata essent: solvi autem possent illic, quæ hic prius in Ecclesia solverentur.*

Probatur 2. ex constanti Ecclesiæ Traditione.

I. Sæculo Apostolus 2. Cor. cap. 2. hac potestate usus est erga incestum Corinthium, cui indulgisse se dicit in persona Christi, hoc est, auctoritate à Christo accepta, *ne abundantiori tristitia absorberetur.* In quæ verba sanctus Chrysostomus hom. 4. in secundam ad Corinthios sic scribit: *Ex ea re docemur, quod non solum ad peccatorum naturam, verum etiam ad mentem habitumque peccantium oporteat moderari disciplinam.*

II. Sæculi usum testatur Tertullianus locis supra citatis.

Pro tertio sæculo habemus luculentum testimonium S. Cypriani. 1. Enim scribit ad preces Martyrum consuevisse Ecclesiam indulgere pœnitentibus, & pœnas ipsis injunctas, vel injungendas remittere. 2. Monet Martyres, ne pro omnibus promiscuè gratiam illam postulent, sed pro iis dumtaxat, qui exemplo incesti Corinthii, pœnitentiæ laboribus strenuè defungerentur. 3. Invehitur in Presbyteros, cui, Episcopo inconsulto ad preces Martyrum omnibus peccatoribus indiscriminatim pacem concedebant, eosque ad communionem temerè admittebant. 4. Vult Indulgentias à Martyribus expetitas executioni non esse mandandas, nisi sedata persecutione, cum ipsi Martyres expleto martyrio obiissent. Verba sancti

sancti Martyris operæ pretium est hic inscribere; Credo, inquit, epist. 13. ut qui libellum à Martyribus acceperunt, & auxilio eorum adjuvari apud Dominum in delictis suis possunt, si premi infirmitate aliqua & periculo cœperint, exomologesi facta, & manu eis à vobis in pœnitentiam imposita, cum pace à Martyribus sibi promissa ad Dominum remittantur. Quanta autem cautione Indulgentiæ sint dispensandæ, aperit epistola 11. ad Martyres, seu Confessores in carceribus detentos: Credideram quidem, inquit, Presbyteros & Diaconos, qui illic præsentés sunt, monere vos & instruere plenissime circa Evangelii legem, sicut in præteritum semper sub antecessoribus nostris factum est (nota antiquam consuetudinem) ut Diaconi ad carcerem commeantes Martyrum desideria consiliis suis & Scripturarum præceptis gubernarent. Sed nunc cum maximo animi dolore cognosco non tantum illic vobis non suggeri divina præcepta, sed adhuc potius inveniri, ut ea, quæ à vobis ipsis & circa Deum caute, & circa Sacerdotem Dei honorifice fiunt, à quibusdam Presbyteris resolvantur . . . . . Illi contra Evangelii legem, contra vestram quoque honorificam petitionem, ante actam pœnitentiam, ante exomologesin gravissimi atque extremi delicti factam, ante manum ab Episcopo & Clero impositam, offerri lapsis pacem, & Eucharistiam dare, id est, sanctum Domini Corpus profanare audeant. Et infra: oro vos quibus possum precibus, ut Evangelii memores, & considerantes quæ, & quanta antecessores vestri Martyres concesserint, quàm solliciti in omnibus fuerint, vos quoque sollicitè & caute petentium desideria ponderetis, utpote amici Domini, & cum illo postmodum judicaturi, inspiciatis & actum, & opera, & merita singulorum: ipsorum quoque delictorum genera & qualitates cogitatis, ne si quid abrupte & indigne, vel à vobis promissum, vel à nobis factum

factum fuerit, apud Gentiles quoque ipsos Ecclesia nostra erubescere incipiat. Et hoc Patres Tridentini sua ætate contigisse supra dicebant, nempe propter abusus, qui in Indulgentiis irrepserant, insigne Indulgentiarum nomen ab Hæreticis blasphemari.

IV. Sæculo Concilium Ancyranum anno 314. can. 5. & Nicænum anno 325. can. 12. statuunt humanius agendum cum pœnitentibus, & de pœnis relaxandum, si cum fervore ad pœnitentiæ labores ferantur. Idem decernunt S. Basilii epist. ad Amphilochem, S. Gregorius Nyssen. epist. ad Letojum, & Concil. Quinisextum, seu in Trullo septimo sæculo can. 12.

Superflue referrentur exempla Indulgentiarum concessarum à sæculo octavo, utpote frequentiora, maximè sæculo XI. & XII. occasione recuperandæ Terræ sanctæ, quam invaserant Sarraceni. Ipse S. Bernardus in eum finem Indulgentias ab Eugenio III. concessas promulgavit, ut patet ex libro 2. de Consideratione, cap. 1. narratque epist. 246. tot homines Indulgentiarum consequendarum spe allectos, peregrinationem Jerosolymitanam suscepisse, ut urbes vacuæ remanerent: *Vacuantur, inquit, urbes & castella, & pene jam non inveniunt, quem apprehendant septem mulieres virum unum, adeo ubique viduæ vivis remanent viris.*

Secunda pars, nempe Indulgentias populo Christiano esse salutare, probatur ex allatis momentis in confirmationem primæ partis.

Namque I. sine impietate nemo asseruerit Christum frustra & incassum Apostolis contulisse potestatem solvendi; aut Apostolum Paulum, & universam deinceps Ecclesiam inutiliter illam potestatem

tem extendisse ad solvendas pœnas peccatis debitas. 2. Ipse Apostolus expressè scribit ea potestate usum se, ne circumveniretur à Satana, neve incestus pœnitens abundantiori tristitia absorberetur, ac proinde ejus dispensatio fuit utilis & salutaris. Sanctus quoque Cyprianus laudata epist. 54. nomine Concilii scribit ad S. Cornelium, se quibusdam breviasse tempus pœnitentiæ, *ne quod divitiem magis humane crudelitatis, quam divine & paternæ pietatis dulcedinem apponimus, oves nobis commissa à Domino reposcantur.*

## §. III.

*De indulgentiarum utilitate.*

Q. *Quenam est Indulgentiarum utilitas, quisve earum effectus?*

Non una est Theologorum sententia. Alii, ut, Alexander Halensis, Durandus, Paludanus, Adrianus VI. Cardinalis Cajetanus Tractatu de Indulgentiis quem adversus Lutherum scripsit, censent Indulgentias, non liberare nisi à pœnis injunctis, hoc est, in Sacramentali Confessione impositis; quia de iis tantum mentionem faciunt Summi Pontifices, dum Indulgentias concedunt. Alii, ut S. Thomas in 4. dist. 20. quæst. 1. art. 3. & in Supplem. quæst. 25. art. 1. Joannes Major, Dominicus Soto, Bellarminus; & cæteri passim Theologi contendunt Indulgentias solvere à pœnis, sive injunctæ sint, sive injungendæ. Sed alia est controversia majoris momenti, utrum scil. Indulgentiæ valeant ad absolvendum à reatu pœnæ, quam quis apud Deum meretur, an solum à vinculo, quo Confessarius ligaverit pœnitentem,  
aut



aut ligarent Canones, si adhuc vigerent. Quid autem in ejusmodi controversiis tenendum sit, aperient sequentes responsiones. Itaque

R. 1. Indulgentiæ, quæ absolute & absque restrictione conceduntur, se extendunt ad omnem pœnam temporalem, sive injunctam, sive injungendam.

Probatur 1. quia Christus Matth. 16. & 18. absolute, & absque ulla limitatione dedit Apostolis solvendi potestatem, nec Patroni oppositæ sententiæ ullum in Traditione habent fundamentum restringendi hujusmodi potestatem ad pœnas in Sacramento injunctas; licet enim in jure repariantur Indulgentiæ concessæ sub hac formula, *de pœnis injunctis*, plures etiam proferri possunt ex jure, quæ absolute & absque hujusmodi formula, conceduntur. Bonifacius VIII. in celebri Extrav. *antiquorum*, Clemens VI. in Extrav. *unigenitus*, Sixtus IV. in Extrav. *quemadmodum*, & plerique deinceps Pontifices in Bullis pro Jubilæo illam formulam omittunt, plenasque ac plenissimas Indulgentias largiuntur, hoc est quantum claves se extendere possunt, ut ipsemet Bonifacius mentem suam exposuit, ex auctore Glossæ in Constitution. *antiquorum*. 2. Quia si Indulgentiæ hodiernæ restringerentur ad pœnas in Sacramento injunctas, vix hodie locum haberent, cum levissimæ pœnæ injungantur à Confessariis.

Utrum autem in hypothesi, quod Indulgentia concessa sit sub hac formula, *de pœnis injunctis*, extendi debeat ad injungendas, dubitari potest. Bellarminus lib. 1. de Indulgentiis c. 7 negat extendi: contra verò affirmant Suarez in 3. parte S. Thomæ disp. 50. sect. 3. conclus. 3. Syl-

vius in eandem partem, & alij benemulti; quia, ut habetur cap. 27. *ex parte titul. de Decimis*, ubi *maius conceditur, minus concessum esse videtur*; atqui maius est remittere pœnas injunctas; quàm injungendas illæ enim duplici titulo debentur, scilicet, & reatu pœnæ culpam consequente, & præcepto Confessarii: ergo formula, *de injunctis pœnis*, non est, inquiunt, restrictiva, sed ampliativa.

Dices: Forum sacramentale est supremum, nec Confessarius: ut sic superiorem in terris agnoscit, a quo sententia ejus possit irritari: ergo nequidem Summus Pontifex per Indulgentias solvere potest, quæ Confessarius ligavit.

Distinguo consequ. Non potest solvere directè, corrigendo sententiam Sacerdotis, vel circa eam dispensando, Conc. Indirectè, tollendo debitum & reatum pœnæ temporalis, Nego consequ. Explicatur solutio familiari exemplo illius, qui cum multam pecuniariam ex Senatusconsulto pendere teneretur, benevolum divitem invenit, qui multam proprio ære exsolvit, & ita indirectè debitorem eximit à lege imposita, quamvis nullam habeat auctoritatem, aut jurisdictionem in Senatum, qui eam tulit. Similiter Prælatus, dum applicat satisfactiones Christi & Sanctorum pro potestate sibi divinitus concessa, reatum pœnæ, propter quem expiandum Confessarius pœnitentiam imposuerat, expungit, sicque pœnitens injunctam sibi pœnam exolvere non tenetur, cum nihil supersit solvendum, ut supponitur.

Ergo, inquires, qui gravia peccata commisit, propter quæ Confessarii præcepto tenetur eleemosynas largiri, jejunare, & orare, per Indulgentias plenarias immunis erit ab illis laboriosis operibus?

Di.

Distinguo conseq. Si ipsi constet, quòd lucratus sit illas Indulgentias, & opera illa sibi sint imposita in meram vindictam, nullatenus verò in novæ vitæ custodiam, & infirmitatis medicamentum, Conc. Secus, Nego consequentiam. Debitor enim tenetur debito quamdiu solutum fuisse non probat : atqui nemo certus esse potest absque speciali revelatione reatum pœnæ, cui obnoxius erat, per Indulgentias fuisse expunctum : *Homo nescit, utrum amore, an odio dignus sit*, Eccles. 9. *de propitiato peccato noli esse sine metu*, Eccli. 5. Sed etsi id ipsi constaret, ad summum immunis esset ab injuncta pœnitentia mere vindicativa & pœnali. Nam Indulgentiæ non eximunt à pœnitentia medicinali, utpote necessaria necessitate mediæ ad coercendas cupiditates, & perseverandum usque in finem; alioquin enervarent Ecclesiasticam disciplinam, ut loquitur Concilium Tridentinum, & earum obtentu Christi fideles procliviores ad illicita in posterum committenda redderentur, Extravag. *Etsi*, de pœnitentiis & remissionibus. Quin Summi Pontifices in suis Bullis ita potestatem faciunt Confessariis absolviendi ab omnibus criminibus & censuris tempore Jubilæi, ut hanc clausulam non omittant, *injuncta salutari pœnitentia*. Porro cùm omnes satisfactiones, quas Confessarii injungunt juxta hodiernam Ecclesiæ disciplinam, sint simul medicinales & vindicativæ, ab ipsomet pœnitente exolvantur necesse est. Unde meritò Alexander VII. damnavit hanc propositionem : *Pœnitens propria auctoritate substituere sibi alium potest, qui loco ipsius pœnitentiam adimpleat*.

Instabis, ex hac responsione sequitur Indulgentias nunc esse inutiles; cùm enim Canones

Pœnitentiales non vigeant, leviores injungantur satisfactiões magis ad novæ vitæ custodiam, quàm ad præteritorum peccatorum vindictam, continuaque debeat esse Fidelium pœnitentia, nullo levamento sunt illis Indulgentiæ.

R. 1. Nego sequel. Imò quia Ecclesia propter refrigescentem charitatem de pristina sua disciplina aliquid remisit, videles existunt amplius obnoxii, & debitores justitiæ divinæ; magisque indigent Indulgentiarum subsidio, ut patebit ex sequenti responsione. Itaque

R. 2. Per Indulgentias remittuntur pœnæ temporales justitiæ divinæ debitæ, & in futuro sæculo luendæ. Hæc propositio apud Catholicos adeò certa est, ut Suarez cit. disput. 50. sect. 2. conclus. 1. existimet, eam esse de fide, utpote satis expressè definitam à Concilio Trident. cit. Decreto de Indulgentiis.

Probatur 1. è Scriptura, Matth. 18. *Quæcumque solveritis super terram, erunt soluta & in cælo; hoc est, in Dei foro & judicio.* Unde auctor Commentariorum in epistolas sancti Pauli inter opera sancti Ambrosii, expendens verba Apostoli 2. Cor. cap. 2. *quod donavi, si quid donavi propter vos in persona Christi*, sic habet: *& ut ratum ei cui donavit ostenderet apud Deum ait in persona Christi se donasse quod donavit, hoc est, accepta tulisse Christo, cujus legationeungebatur, ut factum Apostoli sit factum Christi, sicut dixit: quæcumque solveritis super terram, erunt soluta & in cælo.*

Probatur secundo ex Traditione.

Tertullianus libro de pudicitia cap. 22. apertè declarat, hanc fuisse Ecclesiæ fidem secundo sæculo, Indulgentias precibus Martyrum concessas  
re-

remittere pœnam justitiæ divinæ debitam; sic enim perstringit sanctum Zephyrinum Summum Pontificem: *An tu & in Martyres tuos effundis hanc potestatem? sufficiat Martyri propria delicta purgasse. Ingrati & superbi est in alios quoque spargere, quod pro magno fuerit consecutus. Quis alienam mortem sua solvit, nisi solus Dei Filius? Si propterea Christus in Martyre est, ut mœchos & fornicatores Martyr absolvat, occulta cordis edicat, ut illa delicta concedat, & Christus est. Manifestum est, ibi non agi de remissione Disciplina Ecclesiasticæ, sed pœnarum apud Deum debitarum.*

Sanctus Cyprianus epist. 13. sic scribit: *Ut qui libellum à Martyribus acceperunt, & auxilio eorum adjuvari apud Dominum in delictis suis possunt, si premi infirmitate aliqua & periculo cœperint, exomologesi facta, & manu eis in pœnitentiam imposita, cum pace à Martyribus sibi promissa ad Dominum remittantur.* Porro relaxatio pœnarum canonicarum jamjam morituris est prorsus inutilis & superflua, cum ab eis per mortem absolvantur: ergo B. Martyri persuasum erat indulgentias precibus Martyrum concessas remittere pœnas justitiæ divinæ debitas. Unde serm. de lapsis ait: *Credimus quidem posse apud judicem plurimum valere Martyrum merita & opera Justorum.*

S. Thomas in 4. quæst. 1. art. 3. referturque in Supplemento quæst. 25. art. 1. *Quidam dicunt, inquit, quodd Indulgentiæ non valent ad absolvendum à reatu pœnæ, quam quis in Purgatorio secundum iudicium Dei meretur, sed valent ad absolvendum ab obligatione, qua Sacerdos obligavit pœnitentem ad pœnam aliquam, vel ad quam etiam ordinatur ex Canonum statutis. Sed hæc opinio non videtur vera. 1. Quia est expresse contra*

privilegium Petro datum, ut, quod in terra remitteret, & in cælo remitteretur. Unde remissio, qua fit quantum ad forum Ecclesiæ, valet etiam quantum ad forum Dei. Et præterea Ecclesiæ ejusmodi Indulgentias dans magis damnicaret, quàm adjuvaret; quia remitteret ad graviores pœnas, scilicet Purgatorii, absolvendo à pœnitentiis injunctis. Et ideo aliter dicendum, quod valent, & quantum ad forum Ecclesiæ, & quantum ad judicium Dei, ad remissionem pœnæ residuæ post contritionem, & confessionem, & absolutionem, sive sit injuncta, sive non.

Sixtus Quartus Constitutione, quæ incipit, *liceat ea.*, damnavit Petri Oxomensis propositionem, qua asserēbat, *Romanum Pontificem Purgatorii pœnam remittere non posse.* Et Leo X. in sua Bulla contra articulos Lutheri, hunc inter cæteros perstringit: *Indulgentiæ his, qui veraciter eas consequuntur, non valent ad remissionem pœnæ pro peccatis actualibus debitæ apud divinam justitiam.*

Denique Concilium Tridentinum citato Decreto, Pseudoreformatos anathemate percutit, quia denegabant Ecclesiæ potestatem concedendi Indulgentias, asserēbantque eas, quas prædicat, esse inutiles & pias fraudes: atqui Pseudo-reformati nunquam negarunt, Ecclesiam posse remittere pœnas, quas ipsamet propter disciplinam præscripsit, aut ejusmodi Indulgentiam esse aliquando utilem; quin ipsi in sua secta nonnunquam hac utuntur potestate. Sed in eo præcisè situs est eorum error, quod doceant Ecclesiam non posse per indulgentias solvere à pœnis temporalibus in futuro sæculo eluendis: Ergo Concilium Tridentinum reverà anathemate percutit negantes indulgentias valere ad remissionem pœnæ temporalis in purgatorio exsolvendæ, ac proinde satis  
ex-

expressè definiit per Indulgentiam remitti pœnam temporalem iustitiæ divinæ debitam.

Præterea Concilium Tridentinum citato Decreto definit Indulgentias esse Christiano populo salutares : atqui nisi solverent à pœnis in Purgatorio luendis, essent longè perniciosissimæ, quemadmodum supra docebat Sanctus Thomas, quatenus scilicet Fideles ita absolverent à pœnis canonicis, ut eos acerbioribus obnoxios efficerent; nam pœnæ canonicæ, etiam graviores, & productiores, collatæ cum pœnis Purgatorii levissimæ sunt, & pro nihilo habendæ, ut communiter docent Sancti Patres : *Neque in ira tua emendes me*, inquit Sanctus Augustinus in Psalm. 35. *ut in hac vita purges me, & talem me reddas, cui emendatio igne non opus sit propter illos, qui salvi erunt, sic tamen per ignem . . . . . & quia dicitur, salvus erit, contemnitur ille ignis.* Ita planè quamvis salvi per ignem, gravior tamen erit ille ignis, quàm quidquid potest pati homo in hac vita. Et Sanctus Gregorius in Psalm. 3. pœnitentialem, illum ignem transitorium, inquit, *omni tribulatione præsentis existimo intolerabiliorem.* S. quoque Anselmus in cap. 3. ep. 1. ad Cor. sic scribit : *Sciendum est quia gravior est ille ignis, quàm quidquid homo pati potest in hac vita.* Omnia enim tormenta, quæ hic sunt; facilia sunt; & tamen homines, ne ea patiantur, quidquid ab homine fuerit iussum faciunt. *Quantò melius est facere quæ Deus jubet, ne illa graviora patiantur?*

Ex quibus plenissimè satisfit iis, quæ suprâ objiciebantur contra utilitatem Indulgentiarum quas Ecclesia impræsentiarum largitur. Quid enim utilius, quidve optabilius debitori, qui solvendo non est, & tamen ad solvendum urgetur,

alioquin acerbissima passurus, quàm si quem beneficium inveniat, qui omnia ejus debita dissolvat? Atqui multis debitis laboramus apud Deum, graviora in Purgatorio experturi, *quàm quidquid homo pati potest in hac vita.* Sed occurrit pia mater Ecclesia, aperit Indulgentiarum thesaurum.

## §. IV.

*De Indulgentiarum causis.*

Philosophi vulgo distinguunt quatuor genera causarum, scilicet finalem seu motivam, efficientem, materialem & formalem. Materialis duplex est, *ex qua, & in qua* Causa materialis *ex qua* Indulgentiarum sunt merita Christi & Sanctorum, ex quibus conflatur thesaurus Ecclesiæ, ut diximus §. I. Materialis *in qua* est subjectum, seu ii, quibus applicantur Indulgentiæ. Sed de subjecto Indulgentiarum plura dicenda sunt sequenti §. Agemus hic dumtaxat de causa finali, sive motivo, propter quod concedi possunt Indulgentiæ: de causa efficiente, hoc est, de iis, qui Indulgentias concedere possunt & de causa formali, seu de modo, quo dari solent Indulgentiæ. Itaque

Q. I. *Quis est Indulgentiarum finis?*

R. Exponit Clemens VI. Extravag. *Unigenitus*, ut cunctorum Fidelium, inquit, augeatur devotio, fides splendeat, spes vigeat, charitas vehementius incalcescat; nam propter finem temporalem Indulgentiæ concedi non possunt, nisi ordinetur ad finem spirituales, v. g. ad Religionis amplificationem.

Q. 2.



Q. 2. *Valentne Indulgentiæ sine causa legitima concessæ?*

R. Conveniunt omnes Theologi Indulgentias sine legitima causa concessas, non esse ratas coram Deo, nec expungere reatum pœnæ in Purgatorio luendæ.

Probatur 1. ex Scriptura: 1. Cor. 4. *sic nos existimet homo ut Ministros Christi, & dispensatores mysteriorum Dei: hic jam quæritur inter dispensatores, ut fidelis quis inveniatur: atqui infidus est dispensator, qui bona Domini sui sine causa dispensat.*

Probatur 2. ex Traditione. Sanctus Cyprianus sermone de lapsis, invehitur adversus ejusmodi dispensationes: *contra Domini ac Dei legem, inquit, temeritate quorundam, laxatur incautis communicatio: irrita & falsa pax, periculosa dantibus, & nihil accipientibus profutura.* Innocentius III. in Concilio Lateranensi IV. canone 62. Indulgentias sine causa concessas vocat indiscretas & superfluas. Clemens VI. citata Extravag. *Unigenitus*, docet, thesaurum Ecclesiæ ea lege Petro & ejus successoribus fuisse creditum, ut eum *pro piis rationabilibus causis dispensent.* Martinus V. in Constitutione post Concilium Constantiense vult interrogari suspectum de hæresi, *utrum credat, quod Papa omnibus Christianis verè contritis & confessis ex causa pia & justa possit concedere Indulgentias in remissionem peccatorum?*

Probatur 3. ratione; quia dispensatio sine causa in iis, quæ sunt juris divini, prorsus irrita est: atqui pœna temporalis, quæ dimissa culpa superest, jure divino est expianda: ergo sine causa tolli nequit.

Q. 3. *Quævis causa pia, etiam levissima, sufficitne ut Indulgentia rata habeatur coram Deo?*

D d 5

R. Non

R. Non conveniunt Theologi.

Affirmant Durandus, & Paludanus in 4. dist. 2. S. Antoninus 1. p. tit. 10. cap. 3. §. 1. Sylvester in summa, Glossa in Extravag. *antiquorum*, & alii benemulti.

Negant verò S. Bonaventura eadem dist. 20. Joannes Gerson Tract. de Absolutione Sacramentali, Adrianus in 4. de Indulgentiis, Cajetanus Tract. de Indulgentiis, Joannes Major eadem dist. 20. Dominicus Soto in 4. dist. 21. q. art. 2. Petrus Soto lect. 2. de Indulgentiis, Navarrus de Jubilæo, Estius, Sylvius, & alii plures ex Recentioribus.

Bellarminus lib. 1. de Indulgentiis cap. 12. ut aliquo modo conciliet tam graves & celebres Theologos, observat 1. ad causam justam ut plurimum duo requiri: 1. finem aliquem pium, ac Deo gratum, cujus affectio magis placeat Deo, quàm pœnitentialis satisfactio, quæ per Indulgentiam relaxatur; is enim fidelis & prudens est dispensator cœlestis thesauri, qui fideliter agit causam Domini sui, & juxta ejus voluntatem operatur: 2. opus aliquod fini proportionatum, nam licet finis valde placeat Deo, si tamen per opus injunctum nullo modo valeat obtineri, non videtur justa causa dandæ Indulgentiæ, ut si v. gr. detur indulgentia plenaria iis, qui semel recitant Orationem Dominicam pro conversione Hæreticorum, *causa*, inquit ille, *non videbitur justa*; quoniam licet conversio Hæreticorum res sit maxima, & Deo gratior, quàm pœnitentialis satisfactio multorum Fidelium, vix tamen confert ad illum finem consequendum brevissima illa Oratio.

Obfer-

Observat 2. idem Bellarminus distinguendum inter Indulgentias, quæ conceduntur privato aliqui, & eas, quæ dantur in commune omnibus Fidelibus propter gravem finem, v. gr. pro ædificanda & dotanda Ecclesia Parochiali.

Priores Indulgentiæ requirunt causam gravem, & opus proportionatum. 1. quia Concilium Trid. cit. Decreto de Indulgentiis, vult eas concedi *juxta veterem & probatam Ecclesiæ consuetudinem*: atqui veteres, ut S. Cyprianus §. II. laudatus, Patres Nicæni can. 12. censent iis dumtaxat indulgendum, qui lacrymis, pœnitentia, & bonis operibus meriti sunt, ut quod superest pœnæ luendæ, ipsis misericorditer remittatur. 2. quia infidus est dispensator, qui pro causa levissima profundit thesauros Domini sui. 3. quia omnes conveniunt non posse dispensari in votis, nisi gravi causa, quæ magis placeat Deo, quàm ipsa voti impletio; ergo à pari. 4. si pro quacunque pia causa datæ apud Deum essent Indulgentiæ, nullæ dici possent superflue, cum pia aliqua causa semper allegari possit.

Posteriores verò Indulgentiæ, quæ in commune multis dantur, absolutè non requirunt opus injunctum difficile & laboriosum, modò sit medium aptum atque utile ad consequendum finem, cujus gratia conceduntur illæ Indulgentiæ. *Dicendum*, inquit S. Thomas in 4. dist. 20. & in Supplem. q. 25. art. 2. ad tertium, *quòd quando datur Indulgentia indeterminatè*, (v. g. ei, qui dederit auxilium ad fabricam Ecclesiæ) *intelligitur tale auxilium, quod sit conveniens ei, qui auxilium dat, & secundum quod accedit ad hoc* (scilicet ad construendam Ecclesiā) *unde etiam aliquis pauper dans unum denarium,*  
*confe-*

*consequitur totam Indulgentiam : non autem dives , quem non decet ad opus tam pium & fructuosum ita parùm dare , sicut non diceretur Rex aliquis auxilium facere , si ei obolum daret.*

Dices : S. Thomas cit. articulo ad primum, sic habet : *In arbitrio dantis Indulgentiam est taxare, quantum per Indulgentiam de pœna remittatur. Si tamen inordinatè remittat , ita ut homines quasi pro nihilo ab operibus pœnitentiæ revocentur , peccat faciens tales Indulgentias , nihilominus quis plenam Indulgentiam consequitur : ergo valet Indulgentia ex pia causa , sed levi.*

R. 1. Non satis constare , quæ fuerit mens S. Thomæ circa propositam quæstionem. Nonnulli, etiam ex ejus Discipulis, fatentur illum revera adhæsisse priori sententiæ, in qua illum deferunt, persuasi quòd si absolviisset summam, posteriorem sententiæ fuisset amplexus. Alii Thomistæ, ut Dominicus Soto, Cajetanus, Estius, & Sylvius contendunt ipsum patrocinari suæ Sententiæ ; sic enim scribit in 4. dist. 46. & in Supplem. qu. 71. art. 10. *nec tamen sequitur, quòd Prælati Ecclesiæ possit pro suo arbitrio animas è Purgatorio liberare, quia ad hoc ut Indulgentiæ valeant , requiritur causa conveniens.* Unde

R. 2. distinguendo antecedens cum Adriano, Dominico Soto & Sylvio, si quis inordinatè, id est, nimis frequenter Indulgentias largiatur, ita ut homines quasi pro nihilo ab operibus pœnitentiæ revocentur, peccat quamvis sub sit gravis causa, v. gr. bellum diuturnum, & religioni periculosum extinguendum, nihilominus subditus plenam Indulgentiam consequitur, Concedo : quia adest gravis causa, & supponitur subditum conferre.

ferre, quantum in se est, ut effectus obtineatur: si inordinatè, & sine causa sufficienti Indulgentias concedat, nihilominus subditus illam consequetur, Nego anteced. S. itaque Thomas, juxta interpretationem illorum Theologorum, vult duntaxat Indulgentias non debere esse frequentiores, etiamsi causæ sint frequentes; improbat v. gr. Indulgentiam plenariam concedi quolibet semestri, quamdiu bellum durabit, vel quoadusque hæresis, quæ grassatur, fuerit extincta: nihilominus tamen admittit, fidelem, qui pro virili confert ad hunc finem obtinendum, plenariam Indulgentiam consequi.

Instabis: Sanctus Thomas citato articulo 2. admittit tritum Canonistarum axioma: *Indulgentiæ tantum valent, quantum sonant, vel prædicantur.* Ergo.

Distinguo anteced. admittit cum distinctione; nempe, si omnes condiciones adsint, auctoritas in dante, legitima causa propter quam dat, & dispositio in fuscipiente, de qua dicetur infra, Concedo: admittit absolutè. Nego antecedens: ne quidem ipsa Sacramenta, quæ per se operantur quod significant, habent suum effectum, nisi adsint omnes condiciones. Ergo sicut de fide non est, per hanc, aut illam absolutionem actu & de facto remissa esse peccata, quamvis fide divina certissimum sit, illam per se efficacem esse ad delenda quælibet peccata; quia semper est timendi locus, ne defuerint condiciones à Deo præscriptæ: quin Confessarius etiam peritissimus ac diligentissimus, nonnunquam cum dolore deprehendit defectum in pœnitente, propter quem irritam judicat absolutionem prius à se collatam. Similiter quamvis nefas sit in dubium revocare Indulgentia-

gentiarum virtutem ac utilitatem, certum tamen non est, omnes adfuisse conditiones, ut fructus earum actu & de facto perciperetur. Illud ipsum agnoscunt Summi Pontifices, qui identidem revocant nonnullas Indulgentias, tum à se, tum à Prædecessoribus suis per obreptionem obtentas.

Dices; multis dantur Indulgentiæ pro mortis articulo, etiam nullo injuncto opere: atqui nulla est causa eas concedendi, quæ non sit omnibus Fidelibus communis, nempe ut liberentur à pœnis Purgatorii: ergo Indulgentiæ omnibus promiscuè dari possunt.

Nego minorem; ejusmodi enim Indulgentiæ conceduntur in supplementum pœnitentiæ, cui totum vitæ tempus addixere viri pii & benè meriti. Hæc autem indulgendi causa visa est legitima S. Cypriano, & Patribus Nicænis suprà laudatis.

Nec obstat, quòd plures ex iis, qui ætatem exegere in vitiis, vel inertia, sæpè gaudeant ejusmodi privilegio; hi quippe obreptitiè & contra intentionem concedentis obtinuerunt gratiam. Unde patet quàm cautè abstinendum sit ab obloquutionibus adversùs Indulgentiarum dispensatores; hi enim moventur sine, qui in se spectatus est gravis ponderis; quamvis plerumque in singularibus deficiat.

Aliud afferri potest exemplum Indulgentiarum, quæ conceduntur certa die accedentibus religionis gratia, ad sacram aliquam ædem. Ejusmodi causa respectu multorum videtur admodum levis: sed absolutè, & juxta intentionem dispensatoris spectata, est magni momenti; multùm quippe conferre potest ut *Fidelium augeatur devotio,*  
*fides*

*fides splendeat, spes vigeat, charitas vehementius incal-  
scat : ut loquitur Clemens VI. suprâ laudatus.*

Q. 3. *Quenam est causa efficiens Indulgentiarum?*

Certum est Christum Dominum esse causam principem. De ministeriali duntaxat potest esse quæstio.

R. Jure ordinario & divino soli Episcopi sunt Indulgentiarum dispensatores.

Probatur 1. ex sæpiùs laudatis Christi verbis Matth. 18. *Quæcunque solveritis super terram, erunt soluta & in cælo.* Ex quibus suprâ collegimus potestatem concedendi Indulgentias; verba enim illa ad solos Apostolos, & eorum successores Episcopos diriguntur.

Probatur 2. ex Traditione; nam Sancti Patres & Concilia hanc potestatem agnoscunt in solis Episcopis.

Sanctus Cyprianus epistola 9. scribit hætenùs inauditum Presbyteros ad preces Martyrum Indulgentias pœnitentibus concedere; *quod enim, inquit, non periculum metuere debemus de offensa Dei, cum aliqui de Presbyteris, nec Evangelii, nec loci sui memores, sed neque futurum Dei judicium, neque nunc sibi præpositum Episcopum cogitantes, quòd nunquam omninò sub antecessoribus factum est, cum contumelia & contemptum totum sibi vendicant?* Concilium Ancyranum canone 5. ubi agit de Indulgentiis, sic decernit; *Episcopum hanc habere licentiam oportet,* Concilium quoque Nicænum can. 12. *postmodum, inquit, licebit Episcopo de his aliquid humanius decernere.* Et Martinus V. Constitutione in Concilio Constantiensi edita, vult suspectos de hæresi Wiclefiana interrogari, utrùm credant Papam omnibus Christianis; & singulos Episcopos suis subditis concedere

dere posse Indulgentias in remissionem peccatorum.

Probatur 3. ratione, quam suppeditat S. Thomas; quia ille solus distribuere potest bona Communitatis, qui Communitati præest, & habet forum externum, in quo jurisdictionem exerceat: atqui soli Episcopi præsunt Ecclesiæ, soli habent forum externum, & jurisdictionem exteriorem, ad quam pertinet potestas largiendi Indulgentias, ut scribit Alexander III. ad Episcopum Cantuariensem, cap. *Quodd autem*, tit. de pœnit. & remiss. *Quodd autem consuluisti*, inquit, *utrum remissiones . . . . aliis profint, quàm iis, qui remittentibus subsunt: hoc voluimus tuam fraternitatem tenere, quod cum à non suo Judice ligari nullus valeat, vel absolvi, remissiones prædictas prodesse illis tantummodo arbitramur, quibus ut profint, proprii judices specialiter indulserunt.*

Ergo summus Pontifex omnibus Christianis, Episcopus verò suis duntaxat Diœcesanis, sive ipse, sive illi à Diœcesi absentes sint, Indulgentias concedere possunt.

Dices: Ex cap. *Nostro*, tit. de pœnit. & remiss. Archiepiscopus dare potest Indulgentias pro omnibus Diœcesibus suæ Provinciæ. *Nostro*, inquit summus Pontifex, *postulasti certificari responso, utrum per tuam Provinciam possis concedere remissionis Literas generales. Nos igitur tuæ Fraternitati breviter respondemus, quodd per Provinciam tuam liberè potes concedere hujusmodi Literas, ita tamen quodd statutum generalis Concilii non excedas: atqui Archiepiscopus non habet jurisdictionem in Diœceses suorum Suffraganeorum, nisi in cursu visitationis, aut in casu appellationis. Ergo Indulgentiæ dari possunt absque jurisdictione.*

Distin-



Distinguo minorem. Non habet jurisdictionem ordinariam extra recensitos casus, Concedo, extraordinariam, & quoad hunc effectum, Nego minorem; citato enim capite illis tribuitur jurisdictione ad concedendas Indulgentias in tota Provincia, etiamsi actu eam non visitent, ut notat Panormitanus.

Dixi in responsione, *jure ordinario & divino*; nam potestas dandi Indulgentias delegari potest Presbyteris, Diaconis, & simplici Clerico, ut patet ex can. 60. Concilii Lateranensis IV. *Præsenti decreto*, inquiunt Patres, *firmiter prohibemus, ne quis Abbatum ad talia se præsumat extendere* (scilicet Indulgentiarum Literas concedere) *nisi forte quisquam eorum speciali concessione, vel alia legitima causa super hujusmodi valeat se tueri*: ubi Patres agnoscunt Abbates ex concessione, seu delegatione, dare posse Indulgentias. Et ratio est, quia potestas concedendi Indulgentias non est actus ordinis, sed jurisdictionis, quam Clerici, Presbyteris inferiores, possunt habere; vel delegatam, sicut Legati Summi Pontificis; vel ordinariam, sicut electi & nondum consecrati Episcopi. Ita Sanct. Thomas in 4. dist. 20. & in Suppl. qu. 26. art. 2.

Q. 4. *Possuntne Episcopi concedere quaslibet Indulgentias etiam plenarias?*

R. Jure ordinario usi sunt hac potestate, ut patet ex laudatis textibus S. Cypriani, Concilii Ancyran, & Nicæni; sed in Concilio Lateranensi IV. detractum est de ea potestate, ex eo quod plures Episcopi ea abuterentur in detrimentum Ecclesiasticæ Disciplinæ; *quia per indiscretas & superfluas Indulgentias*, inquiunt Patres can. 62. *quas*

*quidam Ecclesiarum Prælati facere non verentur, & claves Ecclesiæ contemnuntur, & pœnitentialis satisfactio enervatur; decernimus, ut, cum dedicatur Basilica, non extendatur Indulgentia ultra annum, sive ab uno solo, sive à pluribus Episcopis consecretur; ac deinde in anniversario Dedicationis tempore quadraginta dies de injunctis pœnitentiis indulta remissio non excedat. Hunc quoque dierum numerum Indulgentiarum Literis præcipimus moderari, quæ pro quibuslibet causis aliquoties conceduntur. Refertur canon ille tit. de pœnit. & remiss. Cum ex eo; quod ita interpretantur Innocent. IV. Sylvester in Summa, verbo, Indulgentia; Fagnanus in illud caput, & alii contra Suarem; dist. 55. sect. 3. num. 15. ut limitentur dumtaxat Episcopales Indulgentiæ, quæ publice ac solemniter in foro externo conceduntur, non verò quæ in foro pœnitentiæ dispensantur, in quo censent Episcopos plurium dierum & annorum Indulgentias justa de causa largiri posse.*

*Q. 5. Quenam est Indulgentiarum forma?*

Constat apud omnes, Indulgentias essentialiter non constare ex verbis tanquam ex forma, quemadmodum Sacramenta novæ legis; sed eas posse concedi solo nutu voluntatis, & ad eas dumtaxat requiri verba, aut aliud signum sensibile, ut innotescat subditis illas concedi. Difficultas solum est, quæ sit earum ratio constitutiva, & causa formalis, an concedantur per modum absolutionis aut solutionis, aut suffragii & impetrationis.

R. Indulgentia pro vivis concessa, est vera absolutio simul & solutio; pro defunctis verò non potest dari nisi per modum suffragii & impetrationis.

Prima

Prima pars probatur, quia Prælati concedens Indulgentias, exercet actum jurisdictionis, & tanquam Judex, virtute clavium subditos solvit à pœna temporali, ut patet ex laudato cap. *Cum autem: cum à non suo Judice ligari nullus valeat vel absolvi*, inquit summus Pontifex, *Indulgentia solis illis profunt, quibus proprii Judices eas indulserunt.* Ergo sicut Sacerdos, dum reatum culpæ remittit in Sacramento Pœnitentiæ, verè absolvit; ita & Prælati dum pœnas peccatis debitas per Indulgentias relaxat.

Indulgentia est quoque solutio; quia Prælati virtute clavium applicat satisfactiones Christi fidejussoris nostri, qui pro nobis plenè satisfecit & solvit. *Faciens Indulgentias*, inquit Sanctus Thomas, Supplem. quæst. 25. artic. 1. ad 3. *solvit pœnam quam debuit* (suscipiens) *de bonis Ecclesiæ communibus.* Et in responsione ad secundum: *Qui indulgentias suscipit, non absolvitur simpliciter à debito pœnæ, sed datur sibi, unde debitum solvat; hoc est non gratis ei remittitur pœna debita; neque eam ex propriis solvit; sed Ecclesia ipsa per applicationem satisfactionum Christi pro illo solvit.* Utrum autem satisfactiones Sanctorum, quæ in thesauro Ecclesiæ includuntur, per modum solutionis aut suffragii dumtaxat applicentur, expendimus §. primo, ad quem remittimus Lectorem.

Dices 1. absolutio potest concedi homini invito, excommunicatus v. g. etiam renitens potest absolvi à vinculo excommunicationis: atqui Indulgentia non potest concedi invitis: ergo non est absolutio.

Distinguo majorem. Absolutio potest concedi invito, nempe cum non requirit dispositio-

nes in eo qui absolvitur, ut in excommunicato, Concedo : semper, Nego majorem ; nullus enim invitus absolvi potest in Sacramento Pœnitentiæ.

Dices 2. Absolutio necessario præsupponit causæ cognitionem, sine qua tamen Indulgentiæ conceduntur : ergo Indulgentiæ non dantur per modum absolutionis.

Distinguo antecedens : absolutio, quæ datur absolute & absque conditione, Transeat ; absolutio, quæ datur cum conditione, *si subditus sit verè contritus, & opera injuncta impleverit.* Nego antecedens.

Dixi, *transeat*, quia Episcopus propter bonum commune, & tranquillitatem suæ Diœceseos, potest, nulla conditione apposita, in communi absolvere à vinculo suspensionis, quotquot ex Clericis sibi subditis, in eam inciderint : & ita facilitatum fuisse scio in aliqua Diœcesi, in qua plures ex Parochis Catecheses sub pœna suspensionis *ipso facto* præscriptas omiserant.

Secunda pars, quæ est de Indulgentia concessa pro defunctis, probatur ; quia cum Ecclesia in defunctos non habeat jurisdictionem, non potest illos absolvere ; sed Indulgentiæ illis profunt dumtaxat per modum impetrationis & suffragii, ut infra dicetur.

## §. V.

### *De subjecto Indulgentiarum.*

Subjectum Indulgentiarum sunt ii, quibus Indulgentiæ conceduntur. Difficultas autem est, quibus concedi possint, an vivis tantum, an etiam defunctis. De defunctis dicemus §. sequenti.

Cer-

Certum est, Indulgentias non posse concedi nisi Fidelibus baptizatis; quia Ecclesia in alios non habet jurisdictionem. Circa verò Fideles baptizatos.

Q. 1. *Fideles baptizati culpæ mortalis rei suntne capaces Indulgentiæ?*

R. In sensu composito; hoc est, quandiureatus culpæ in eis remanet, Indulgentiarum non sunt capaces; quia Indulgentiæ sunt remissio pœnæ temporalis: atqui pœna peccatis debita remitti nequit, quamdiu reatus culpæ non fuerit remissus per Sacramentum Pœnitentiæ, quod est necessarium necessitate mediæ, saltem in voto, ad expungendum reatum culpæ lethalis. Hinc summi Pontifices non concedunt Indulgentias, nisi contritis & confessis.

Dices: plures è summis Pontificibus dicunt se Indulgentias concedere in remissionem peccatorum; & per eas Fideles absolvere à vinculis peccatorum: ergo Indulgentiæ valent ad remissionem peccatorum.

Distinguo antec. In remissionem peccatorum quoad pœnam temporalem, Concedo; quoad ipsum reatum culpæ, Nego ant. Addo in concessione Indulgentiarum aliquando promitti Indulgentiam tum quoad culpam, tum quoad pœnam; sed mediâtè tantum quoad culpam hoc est, mediantibus laboriosis pœnitentiæ laboribus injunctis, & confessione sacramentali, *si in vera pœnitentia decesserunt*; inquit Urbanus II. in Concilio Claromontano, *& peccatorum Indulgentiam, & fructum æternæ mercedis se non dubitent habituros.*

Q. 2. *Status gratiæ requiriturne tanquam conditio necessaria ad ritè perficienda opera in Bullis injuncta?*

R. 1. Saltem requiritur, cùm ultimum opus impletur; quia eo dumtaxat instanti Indulgentia sortitur effectum. Non sortitur ante, cùm nondum impletæ sint conditiones; neque postea, quia tempus ad consequendam Indulgentiam determinatum præteriit.

R. 2. Necesse non est ut singula opera in Bullis præscripta fiant in statu gratiæ, modò impleantur animo verè pœnitenti, & ab affectu peccati lethalis libero.

Probatur ex veteri Ecclesiæ disciplina, juxta quam Episcopus prius probabat lapsorum pœnitentiam, lacrymas, jejunia, &c. ac tum demum ad preces Martyrum absolutionem à peccatis simul & indulgentiam impertiebat. Si precem, inquit S. Cypr. *toto corde faciat, si veris pœnitentiæ lamentationibus & lacrymis ingemiscat: si ad veniam delicti sui Dominum justis & continuis operibus inflectat... roganti potest clementer ignoscere, potest acceptum referre quidquid pro talibus & petierint Martyres, & fecerint Sacerdotes.* Hujusmodi disciplina clariùs cernitur in Concilio Ancyrano & Nicæno sæpiùs laudatis. Et ratio est, quia preces, quæ pro jubilæo funduntur in stationibus, jejunia, & eleemosynæ juvant ad conciliandam Dei amicitiam, & disponunt ad concipiendam veram contritionem, absolutionemque cum fructu recipiendam. Cajetanus tamen & Navarrus aliter sentiunt, & Sanctus Carolus p. 7. Act. Eccl. Med. consulit, ut ante stationes præmittatur confessio sacramentalis, quod non crediderim extendendum ad eos, qui, cùm criminibus sint implicati, necdum pœnitentiæ operibus Deum sibi propitium reddere studuerunt.

Q. 3. *Qui nullius peccati lethalis est conscius, teneaturne sacramentaliter confiteri, ut fructum Indulgentiæ consequatur?*

R. Sacramentalis confessio præscribitur in Bulla vel tanquam pars operum, sub quorum conditione Indulgentiæ conceduntur; vel tanquam medium necessarium, ut quis in statum gratiæ sanctificantis restituatur? Si primum, sacramentalis confessio est necessaria, utpote conditio sine qua Indulgentia non conceditur. Si secundum, necessaria non est. Suarez autem disp. 52. sect. 3. Sylvius & alii existimant per illa verba, quæ vulgo leguntur in Bulla Indulgentiarum, *contritis & confessis*; designari dumtaxat dispositionem necessariam ad restituendum statum gratiæ sanctificantis, adeo ut qui ante tempus Jubilæi fuit rite confessus & absolutus, nec postea relapsus, non teneatur sacramentaliter confiteri ad lucrandam gratiam Jubilæi, sed in praxi recedendum non est à communi usu Fidelium, qui tempore Jubilæi non omittunt sacramentaliter confiteri.

Q. 4. *Qui implent omnia opera à summo Pontifice injuncta, consequunturne plenariam Indulgentiam?*

R. Consequuntur, si tria concurrunt. 1. causa legitima, propter quam Indulgentiæ conceduntur. Sed subditi præsumere debent causam sufficientem, præsertim Jubilæorum, in quibus nulla potest esse obreptio ex parte postulantium cum summus Pontifex Jubilæum non concedat nisi cognita & ponderata causa, eamque gravem judicaverit. 2. proportio operis cum pœna, quæ remittenda est. Proportionem autem voco, non quæ satis sit ex opere operantis ad totum pœnæ reatum expungendum; aliàs locus non esset In-

dulgentiæ; debitor enim qui plenè solvit, nullam à creditore expectat relaxationem. Sed opus dicitur conveniens gratiæ expetitæ, quando operans, quantum humana infirmitas patitur, ad promerendam tam copiosam remissionem nihil negligit, quod Cajetanus opere de Indulgentiis explicat accommodato exemplo: *In qualibet bene ordinata Republica, inquit, quantumcunque rationabilis adesset quandoque causa dispensandi communem thesaurum in cives gravatos ære alieno, negligentes tamen solvere, indigni censerentur adjutorio thesauri; ex eo enim, quod possint de suo solvere, & non curant, indignos se reddunt tali sublevamine.* 3. Necessaria est sufficiens dispositio ex parte subjecti, cui Indulgentia conceditur.

Prima conditio, quæ est de necessitate causæ legitimæ & sufficientis ad largiendam Indulgentiam, constat ex dictis §. IV. ubi ejus necessitatem fusè probavimus.

Secunda conditio, quæ est de proportionem operis cum Indulgentia plenaria, probatur.

Bonif. VIII Extravag. *Antiquorum*, ait: *unusquisque tamen plus merebitur, & Indulgentiam efficacius consequetur, qui Basilicas ipsas (Apostolorum) amplius & devotius frequentabit.* Ergo in mente summi Pontificis, qui non tam devotè opus injunctum perficit, integram Indulgentiam, quam concedit, non consequitur, cum illo devotior amplius obtineat.

S. Bonaventura in 4. dist. 20. qu. ult. *Ille, inquit, qui dat Indulgentias, cum eas tribuit, considerat causam, pro qua reputat eum dignum tanta gratia, & secundum quod plus, vel minus accedunt homines ad illam causam, plus vel minus participant de Indulgentia.*

S. Tho.



S. Thomas in 4. Sententiarum, & in Supplem. q. 25. art. 2. ad 3. *Quando, inquit, datur Indulgentia indeterminate ei, qui dat auxilium ad fabricam Ecclesiæ, intelligitur tale auxilium, quod sit conveniens ei, qui auxilium dat; & secundum hoc plus vel minus de indulgentia consequitur, &c.* Textum integrum protulimus §. IV.

Innocentius IV. in cap. *Quod autem*, de pœnitentiis, sic scribit; *Licet generaliter fiat Indulgentia propter laborem, propter devotionem, & propter pericula; tamen unus plus alio habet intra metam à Prælato constitutam, secundum quod plus devotus est, vel plus laborat, vel majoribus periculis se exponit.*

Tertia conditio, nempe dispositio eorum, quibus Indulgentiæ conceduntur, tria requirit; 1. veram pœnitentiam, & ex toto corde ad Deum conversionem. 2. animum ab omni peccato veniali alienum. 3. intentionem seu propositum efficax faciendi deinceps fructus dignos pœnitentiæ. Triplicem hanc dispositionem necessariam esse agnoscunt omnes Theologi; sed ubi exponendum est qualis debeat esse pœnitentia, quam inter dispositiones ad lucrandas Indulgentias primo loco numeravimus, acriter inter se pugnant; nam circa secundam & tertiam nulla potest esse difficultas, ut patebit ex earum explicatione.

1. Igitur Bellarminus lib. 1. de Indulgentiis cap. 13. Suarez disp. 52. sect. 11. & alii asserunt cum Canonistis, pœnitentiam ad Indulgentias requisitam necessariò non includere propositum satisfaciendi; quia, inquiunt, Indulgentiæ dantur loco satisfactionis; quando enim quis pro debitore solutionem offert, creditor jus non habet exigendi ab eo, ut ex proprio ære solvat: atqui

Ecclesia in nostra hypothefi aperit fuum thefaurum , ut pro pœnitentibus ex fatisfactionibus Chrifti folvat : ergo fruſtra ab iis requiritur ut de viſceribus ſuis ſatisfaciant.

Alii contra, ut Cajetanus, Adrianus VI. Dominicus Soto , & Joannes Heſſelius, qui ambo adfuerunt Concilio Tridentino, & poſt Concilium Tridentinum Navarrus Tract. de Jubilæo Eſtius, Sylvius ; & alii recentiores non pauci, quin & plures Epifcopi, ut Catalaunenſis, Agenenſis, Montispeſſulani, in Catechiſmis de Indulgentiis, auctoritate ſua editis, docent veram non eſſe pœnitentiam, etiam tempore Jubilæi, niſi includat animum ſatisfaciendi Deo; nec Indulgentiam eſſe fomentum negligentia, ſed ſupplementum infirmitatis humanæ. Cum igitur *Eccleſia*, inquit Cajetanus cit. opere, ſit à Deo ordinata, æquum non eſt ut ſpiritualis diſpenſatio theſauri negligentes ſatisfacere pro dignis habeat; hoc enim vere eſſet enervare ſatisfactiones pœnitentiales. Non proſunt igitur *Indulgentiæ conſtitutis in gratia negligentibus ſatisfacere per ipſos, quoniam indigni ſunt Indulgentia*. Et Joannes Heſſelius 2. par. Catechiſmi c. 46. Si plenariam, inquit, *Indulgentiam acciperet omnis, qui utcunque contritus eſt & conſeſſus, qui eſt in ſtatu gratiæ, malè diceret Bonif. VIII. Extravag. Antiquorum, quod unusquisque plus mereretur, & efficiacius conſequeretur Indulgentias, qui Baſilicas ipſas amplius & devotius frequenteret. Quare non eſt putandum, ut quidam docent, quod quicumque Indulgentiarum particeps fuerit, ſi ſtatim moreretur abſque ulla pœna, continuò ad cæli gaudia tranſiturus ſit. Quam propoſitionem cum quidam Concionator paucis abhinc annis in Eccleſia Pariſienſi protuliſſet non ſine auditorum offenſione, ipſe*  
pro

pro sua modestia & pietate eandem propositionem in sequenti concione temperavit, & clarius mentem suam exposuit, agente Eminentissimo Archipræsule Noaillio. *Et revera* (pergit idem auctor) *si ad hoc ut plenarias Indulgentias homines acciperent, sufficeret eos esse in statu gratiæ, plurimum evacuetur studium pœnitentiæ & satisfactionis; nec vellent homines ullam subire pœnitentiam, si putarent se aliquam plenarias Indulgentias, & totius promeritæ pœnæ condonationem esse accepturos.*

Probatur hæc sententia 1. auctoritate Veterum.

S. Cyprianus locis supra laudatis, docet iis non indulgendum, pro quibus intercedebant Martyres, nisi & ipsi studerent laboriosis pœnitentiæ operibus Deum placare, & iustitiæ divinæ satisfacere: *Peto inquit epist. 13. ut eos, quos ipsi videtis, quos nostis, quorum pœnitentiam satisfactioni proximam conspiciatis, designetis nominatim libello, & sic ad nos fidei ac disciplinæ congruentes literas dirigatis.*

Gregorius VII. Lincolnienſi Episcopo indulgentiam delictorum petenti ea lege concessit, ut pœnitentiam pro viribus ageret, *absolutionem præterea peccatorum tuorum, sicut rogasti, tibi mittere dignum duximus, si tamen bonis operibus inbærendo, commissos excessus plangendo quantum valueris, corporis tui habitaculum Deo mundum templum exhibueris.* In quæ verba Baronius ad annum 1073. num. 71. sic scribit: *ex quibus apparet Sedis Apostolicæ Indulgentias illis communicari, qui, quantum suppetunt vires, bene operari non prætermittunt; non autem ignavis, otiosis, ac negligentia torpescantibus.*

S. Antoninus 1. p. tit. 10. cap. 3. §. 3. de patronis hujus sententiæ sic habet: *nec credunt quod pro-*

*propter has Indulgentias generales minus teneatur agere pœnitentiam in hac vita, & hoc dictum satis videtur concordare æquitati, ut notat Innocentius.*

Probatur 2. ratione; quia plurimum interest inter eum, quem injuriæ alteri illatæ pœnitet propter pœnam; quam certò non effugiet; & eum, qui dolet de ipsa offensa utpote illata homini bene de se merito, & quem impensè diligit. Prior, ubi liberalitate & beneficio amici à pœnæ debito liber fuerit, tranquillo animo consistit, & ad otium facile se se convertit; sublata quippe est pœnitentiæ causa. Contra vero posterior, etiamsi debitum solutum fuerit ab alio, nihilominus dolore percellitur, nec pœnitentiæ suæ finem facit, quod beneficium impensè delictum injuria affecerit. Atque ut is animus in justis sit continuus, Deus cum remissione peccatorum infundit virtutem pœnitentiæ, quæ otiosa non est in justis, utpote viva & charitate formata. Et ita corrui fundamentum oppositæ sententiæ.

Dices: Hæc sententia pugnat contra Indulgentiarum efficaciam, detrahitque de illarum virtute: ergo non est admittenda.

Nego ant. Quia, ut ratiocinatur Cajetanus loco cit. *nec aliquid adimitur efficaciæ Indulgentiarum, sicut nihil adimitur efficaciæ Sacramentorum, ex hoc quòd oportet accedentes ad illa esse dignè dispositos, si fructuosas sibi esse volunt; soli siquidem indigni Indulgentia, ab illius fructu juxta hunc dicendi modum excluduntur: Igitur sicut Sacramenta eo efficacius operantur quo subiecta fuerint melius disposita; sic & Indulgentiæ.*

2. Ad percipiendum integrum fructum Indulgentiæ animus susipientis liber esse debet ab affectu

festu cujus peccati etiam venialis, alioquin Indulgentiæ partem tantum consequetur. Ratio est, quia in omnium sententia relaxatio pœnæ peccatis debitæ necessariò supponit culpam remissam, quæ remitti non potest, nisi displiceat, & animus ab ea sit averfus. Hinc reprobi in inferno pœnas peccatorum venialium dabunt æternas; quia flammæ ignis nunquam abstergent maculam ejusmodi peccatorum: ergo quibus religio non est quo minus peccata venialia committant, semper cupidi, elati, prompti ad iram & rixas, nimium sui & voluptatum amantes, post Jubilæum multis nominibus debitores manent justitiæ divinæ, experturi inæstimabilem acerbitem Purgatorii, ut loquitur Guillelmus Parisiensis Tractatu de Sacramento Ordinis Capite 4.

Ex his colligere licet exquisitas requiri dispositiones ad plenariam Indulgentiam, paucissimosque eam integrè consequi.

3. In subjecto Indulgentiarum requiritur intentio & propositum efficax faciendi fructus dignos pœnitentiæ. 1. quia alioquin per Indulgentias enervaretur Ecclesiastica disciplina, & Fideles procliviores ad peccandum redderentur, ut ait Sixtus IV. supra laudatus. 2. quia Clemens VI. Extravag. sæpius laudata, *Unigenitus*, docet Indulgentias concedi, ut cunctorum Fidelium augeatur devotio, fides splendeat, spes vigeat, charitas vehementius incalescat. 3. quia in concessione Indulgentiarum summi Pontifices expresse monent Confessarios, ut injungant pœnitentias salutes: atqui pœnitentia salutaris & medicinalis ea est, ex Concilio Tridentino sessione 14. capitulo 8. quæ a peccato revocat, & quasi fræno quod-

quodam concupiscentiam coercet, medetur peccatorum reliquiis, vitiosos habitus contrariis virtutum actionibus tollit, ac demum Christo conformes reddit. Porro qui in iis se exercet procul dubio facit fructus dignos pœnitentiæ. Ergo.

Q. 5. *Estne perfectius non uti Indulgentiis absque earum contemptu, sed ex desiderio plenè satisfaciendi iustitiæ divinæ, ac propterea nolle ut fiat sibi ulla pœnæ relaxatio?*

R. Perfectio vitæ Christianæ consistit in charitate, quæ si sit in nobis perfecta, sicut in Apostolo, efficiet, ut dicamus, *cupio dissolvi, & esse cum Christo*: fervidi enim amantis est velle coniungi cum objecto amato, nec unquam eliget differri tam optatam unionem; nisi major Dei gloria id requirat. Porro qui debitor pœnæ in purgatorio luendæ hinc exit, removetur ad tempus ab optatis sponsi amplexibus, nec ulla inde Deo accrescit gloria, & nominis exaltatio, aut proximi utilitas, ergo charitas non inclinatur ad ejusmodi separationem, quin (quod hic maximè notandum) animæ in purgatorio detentæ, licet in iis charitas sit perfecta & confirmata, expetunt quam citissimè ab illo exilio revocari, officiosumque illis est, ut agentes in terris sua suffragia ad hoc interponant, proferatque Ecclesia de thesauro suo unde dissolvantur earum debita, propter quæ in acerbo illo carcere detinentur.

## §. VI.

*De Indulgentiis quæ pro mortuis conceduntur.*

Q. 1. *Indulgentiæ possuntne extendi ad animas in purgatorio detentas?*

Ne-

Negant Pseudoreformati, & cæteri Hæretici, qui non credunt existentiam purgatorii, ut Petrobrussiani, Albigenſes, Valdenses. Ex Catholicis etiam negarunt XIII. sæculo Ostiensis, lib. 5. de remiss. XV. sæculo Gabriel Biel in canonem Missæ; sed sententiam retractavit, cùm in ejus notitiam venit plures è summis Pontificibus concessisse Indulgentias pro defunctis, & Sixtum IV. damnasse propositionem, qua Petrus Oxomensis negabat Indulgentias prodesse mortuis. Concilium Tridentinum præsentem quæstionem non attingit, satisque visum est Patribus, si generatim definirent extare in Ecclesia potestatem concedendi Indulgentias. Nihilominus

R. Indulgentiæ extendi possunt ad animas in purgatorio detentas. Quamvis hæc propositio non sit formaliter de fide, utpote nondum ab Ecclesia definita; est tamen certa inter Catholicos, & secundum Sylvium, ad fidem pertinens. Probatur ex usu universalis Ecclesiæ; nam ex S. Augustino ep. 54. aliàs 118. si quid tota per orbem frequentat Ecclesia, quin ita faciendum sit, disputare, insolentissimæ insanix est: atqui à pluribus sæculis Ecclesia concessit Indulgentias pro defunctis. Idem Gabriel loco citato refert undecim summos Pontifices confirmasse gratiam pro defunctis concessam à Paschali, sive ille sit I. (ut vult Bellarminus) qui sedit anno 817. sive sit II. qui electus est anno 1099. ut opinatur Sanbovius; quorum auctoritate permotus Gabriel lectione 57. in canonem Missæ sic scribit: *Non jam velut opinionem, sed sententiam certam complecti debere existimo*, (nempe Indulgentias prodesse defunctis per modum suffragii) *tum propter pluralitatem Doctorum*  
eam

eam afferentium scilicet *Alexandri de Hales*, *S. Bonaventuræ*, *B. Thomæ*, *Ægidii*, *Durandi*, *Petri de Tarentasia*, *Richardi de Mediavilla*, *Thomæ de Argentina*, & aliorum plurimorum : tum maxime & principaliter propter determinationem summorum Pontificum priorum & modernorum. A tempore Gabrielis similem gratiam fecerunt plures Pontifices Maximi, ut *Alexander VI.* *Clemens VII.* *Julius III.* & *Gregorius XIII.* in Bullis Jubilæi *Leo X.* in Constitut. contra Lutheri errores, hunc, inter alios, damnavit articulum : *Sex generibus hominum Indulgentiæ nec sunt necessariae, nec utiles, videlicet mortuis, &c.* Eundem errorem jam proscripserat *Sixtus IV.* in *Petro Oxomensis* : Et *Joannes Major*, qui scribebat XVI. sæculo ineunte, in 4. dist. 20. qu. 2. testatur eundem errorem à sacra Facultate Parisiensi fuisse damnatum, sequè interfuisse deliberationi.

Dices I. Usus non est in Ecclesia admittendus, nisi fundetur vel in Scriptura, vel in traditione : atqui usus Indulgentiarum pro defunctis neque in Scriptura, neque in Traditione fundatur : non in Scriptura ; nullus enim proferri potest locus, qui ejusmodi Indulgentiis faveat : neque etiam in Traditione, quæ ab Apostolis descendat ; cum per sex priora sæcula nullum Concilium, nullusque ex Patribus mentionem fecerit de Indulgentiis pro mortuis.

Nego minor. Namque

Usus ille deduci potest ex verbis Christi Domini, *quodcunque solveris super terram, &c.* Licet enim animæ non sint super terram, delicta tamen, propter quæ puniuntur, commissa sunt in terra ; reus autem sortitur forum ubi deliquit. Deinde animæ in purgatorio existentes solvuntur in terra,  
extra



extra quam non est locus purgatorii. Denique Christi verba possunt sic exponi, *quodcunque existens in terra solveris, &c.* Unde Alexander de Hales part. 4. quæst. 83. art. 2. sic habet; *ex hoc patet, quod in collatione clavium maxima fuit homini, sive summo Pontifici collata potestas, & probabiliter, vel verissime præsumitur quod thesaurus Ecclesiæ est in illius potestate, & quod illis, qui sunt in Purgatorio; quia ratione charitatis, in qua decesserunt, sunt idonei ad Beneficiorum Ecclesiasticorum susceptionem, potest illis beneficia communicare, & sic potest illis facere Indulgentias & relaxationes.*

2. Usus ille fundatur etiam in Traditione Apostolica, juxta quam Ecclesia à I. sæculo sua pro defunctis obtulit suffragia, ut constat ex S. Augustino ferm. 172. aliàs 32. de verbis Apostoli, & libro, quem de cura pro mortuis scripsit ad S. Paulinum, qui ab ipso quæsierat, cur Fideles sint solliciti sepelire corpora propinquorum in Basilicis Sanctorum: *Adjungis etiam, inquit, cap. 1. vacare non posse quod universa pro defunctis Ecclesia supplicare consuevit.* Atque ut hanc S. Paulini sententiam confirmet, subjicit: *in Machabæorum libris legimus oblatum pro mortuis sacrificium. Sed etsi nusquam in Scripturis veteribus omnino legeretur, non parva est universæ Ecclesiæ, quæ in hac consuetudine claret, auctoritas; ubi in precibus Sacerdotis, quæ Domino Deo ad ejus altare funduntur, locum suum habet etiam commendatio mortuorum.* Tandem cap. 4. solvit propositam quæstionem de cura sepeliendi corpora apud memorias Sanctorum: *Non video, inquit, quæ sunt adjumenta mortuorum nisi ad hoc, ut dum recolunt ubi sint posita eorum, quos diligunt, corpora, eisdem Sanctis illos tanquam patronis susceptos apud Dominum*  
*D. Habert Theolog. Tom. VI. Ff adju-*

*adjuvandos orando commendent.* Quibus verbis S. Doctor declarat Fideles consueville rogare pro defunctis Sanctorum suffragia. Si ergo privati mortuos juvare possunt non solum suis precibus, jejuniis, & aliis bonis operibus, sed etiam Sanctorum suffragiis, ac præsertim oblatione Sanguinis Christi, ut fusè probavimus tom. 5. ubi de Purgatorio, Tractatu de Missæ sacrificio cap. 9. quidni idipsum possit Ecclesia, & successor Petri, cui datæ sunt claves regni cœlorum?

Dices 2. Ecclesia non habet jurisdictionem in animas defunctorum; nam ex sancto Leone epistola 91. quoddam Sacerdotale ministerium implere non potuit, Deus suæ justitiæ reservavit: ergo Ecclesia Indulgentias pro defunctis largiri nequit.

Concesso anteced. Respondet S. Thomas in 4. dist. 20. & in Supplem. quæst. 71. art. 10. Ecclesiam directe, & primario vivis Indulgentiam concedere, indirecte verò & secundario defunctis, *principaliter quidem prodest ei qui Indulgentiam accipit, scilicet, qui facit hoc, pro quo Indulgentia datur, ut qui visitat limina alicujus Sancti; unde cum mortui non possint facere aliquid horum, pro quibus Indulgentiæ dantur, eis directe Indulgentiæ valere non possunt. Secundario autem & indirecte profunt ei, pro quo aliquis facit illud, quod est Indulgentiæ causa . . . . non enim est aliqua ratio qua Ecclesia transferre possit communia merita (quibus Indulgentiæ iniuntur) in vivos, & non in mortuos. Nec tamen sequitur, quoddam Prælatum Ecclesiæ possit pro suo arbitrio animas à Purgatorio liberare; quia ad hoc ut Indulgentiæ valeant, requiritur causa conveniens Indulgentias faciendi. Sola autem pia affectio in defunctorum animas non est causa sufficiens, ut docet Suarez*  
Di-

Disput. 53. sect. 3. num. 14. sed clarius solvi potest proposita difficultas. Quare

Respondeo distinguendo aliter consequ. Ecclesia Indulgentias pro defunctis largiri nequit per modum absolutionis, Conc. Quia defuncti non sunt subditi clavibus Ecclesiæ: per modum suffragii, Nego consequ. Quia, ut mox dicebat S. Thomas, nulla est ratio cur Ecclesia non æquè offerat pro defunctis ac pro vivis satisfactiones Christi & Sanctorum.

Indulgentiæ ergo aliter pro vivis, aliter pro defunctis dispensantur. Pro vivis dantur per modum absolutionis & solutionis, ut supra demonstravimus: pro defunctis verò per modum suffragii dumtaxat, ut docent communiter Theologi, & hæcenus declararunt Summi Pontifices: *Modernus Pontifex Innocentius Octavus*, inquit Gabriel cit. lectione 57. *Indulgentias hujusmodi olim per Pium Secundum, & Sixtum præfatum visitantibus Ecclesiam Santonensem, & fabricæ ejus contribuentibus ad animas in Purgatorio redimendas per modum suffragii, extensas, & ad contribuentes ad sanctam Cruciatam contra Turcas extendit.*

Nec dicas Ecclesiam mortuos aliquando excommunicatione ligare, aliquando verò ab ea solvere; nam ejusmodi excommunicationibus, vel absolutionibus, mortui nec ligantur, nec solvuntur, sed viventes, quibus Ecclesia, vel prohibet ne Sacrificia offerant, & publicas preces fundant pro defunctis, qui deteguntur objisse in Ecclesiam contumaces, ut Wiclefus in Concilio Constantiensi: vel permittit, ut pro defuncto suffragia ferant, cadaver ejus honorificè in loco sacro sepeliant, quando deprehendit excom-

municationem per errorem fuisse in eum latam dum viveret, ac proinde Ecclesia in hujusmodi actionibus non in mortuos, sed in viventes jurisdictionem exercet.

At, inquires, Summi Pontifices declarant se virtute clavium, & ex potestate sibi à Deo concessa Indulgentias ad defunctos extendere: Ergo revera eos absolvunt.

Nego consequ. Quia ad absolvendum satis non est, quòd Summus Pontifex jus habeat dispensandi thesaurum Ecclesiæ; sed insuper requiritur ut ii, in quorum gratiam thesaurum aperit, sint illi subditi. Responsio illustratur exemplo Regis, qui ex ærario suo defumit ad solvendos captivos, quorum alii in ejus carceribus detinentur, alii in carceribus alterius Principis. In priores jurisdictionem exercet, eosque auctoritate judiciaria verè absolvit: posteriores vero suis dumtaxat suffragiis juvat apud Principem, si fortè oblatam pro iis pecuniam velit accipere, & liberos eos dimittere. Similiter Summus Pontifex pro potestate sibi divinitus concessa, thesaurum Ecclesiæ dispensat, tam pro vivis, quàm pro defunctis, sed diversimodè; nam vivis, utpotè sibi subditis, illum applicat per modum absolutionis: defunctis verò per modum suffragii, quatenus satisfactiões Christi & omnium Sanctorum offert Deo, qui animas in Purgatorio tanquam in suo carcere detinet. Unde Summus Pontifex per Indulgentiam pro vivis proximè & immediatè remittit pœnam tanquam Minister Dei, & locum ejus tenens: per Indulgentiam verò pro defunctis non remittit propriè pœnam; sed offert Deo pretium æquivalens, ut ipse remittat.

Q. 2. Si Indulgentiæ plenariæ extendantur ad animam alicujus defuncti, puta si pro ea offeratur Sacrificium ad altare privilegiatum, ut vocant, anima impleto opere injuncto, evolatne statim in cœlum?

R. Certum est non evolare, nisi adsint omnes conditiones: 1. Potestas in concedente. 2. Causa legitima, propter quam conceduntur Indulgentiæ plenariæ. 3. Opera viventibus injuncta debita modo impleta: quarta vulgo additur conditio, quæ se tenet ex parte ipsius animæ, & mox explicanda.

Constat de potestate Summi Pontificis: cùm autem Episcopi non concedant ejusmodi Indulgentias, Theologi colligunt eorum potestatem ex usu Ecclesiæ restrictam esse ad Indulgentias pro vivis.

Circa causam legitimam potest esse dubium: nam ex Sanct. Thoma citata quæst. 71. artic. 10. Supplem. Summus Pontifex non potest pro arbitrio liberare animas è Purgatorio, sed ad hoc requiritur causa conveniens: *Non sufficit autem pro causa*, inquit Bellarminus libro 1. de Indulg. cap. 14. *utilitas illarum animarum, vel gloria Dei, quæ redundaret ex animarum illarum liberatione. Non si ista sufficerent, Christus ipse jam omnes animas liberasset. Itaque requiritur causa aliqua particularis pertinens ad honorem Dei, & Ecclesiæ utilitatem, sicut de Indulgentiis pro viventibus diximus; ita ut Summus Pontifex arbitretur gratiorem esse Deo rem illam, cujus gratia Indulgentiæ conceduntur, quàm executionem justitiæ; quæ exercetur in expiandis animabus Purgatorii.* Porro Indulgentiæ, quæ non sunt universales pro tota Ecclesia, obreptitiè possunt obtineri obtentu magnæ utilitatis, quæ revera non est; ac proin-

inde ex hac parte dubitari potest de effectu Indulgentiæ, seu animarum relaxatione.

Major est dubitandi ratio circa tertiam conditionem; num scilicet, viventes debito modo opera injuncta perfecerint. Si enim ex dictis nullus potest esse certus se consecutum fructum Indulgentiæ sibi concessæ; quia nescit an amore, vel odio dignus sit, & injuncta opera perfecerit ut oportet: longè major est dubitandi ratio, an fructus Indulgentiarum ad animas defunctorum pervenerit? cùm ex S. Thoma citato art. 10. ad eas non transferatur, nisi secundo & vivis mediantibus, quam sententiam sequuntur non solum plures Theologi, sed & Summi Pontifices, ut observat Illustrissimus Remensis Archipræsul Carolus Mauritius *le Tellier* in suo Mandato de Altaribus Privilegiatis, dato die 16. Octobris anno 1694. in quo integrum exhibet Rescriptum Innocentii XII. qui testatur Innocentium X. Alexandrum VII. & Innocentium XI. certas Indulgentias concessisse Fidelibus utriusque sexus verè pœnitentibus & confessis, quas possent applicare per modum suffragii animabus Fideium, qui ex hac vita decesserunt Deo conjuncti vinculis charitatis. Ex quibus verbis laudatis Archipræsul sic docet Fideles sibi subditos in præfato Mandato. *Cette grace qui est accordée par l'autorité légitime de l'Eglise, ne peut être recue directement que par les Fideles vivans, qui sont soumis à la juridiction de Sa Sainteté. C'est ce qu'elle déclare nettement par son Bref, lorsqu'elle dit qu'elle accorde Indulgence plénier & remission de tous pechez à tous ceux, qui étant véritablement pénitens & confessez, recevront la Sainte Eucharistie, &c. Ce n'est qu'à eux à qui l'indulgence peut être offerte & promise*

*mise directement, s'ils accomplissent les œuvres de justice, qui sont prescrites par ledit Bref.* Ex quibus liquet Indulgentias mortuis non prodesse, nisi ipsi vi-  
uentes, qui illas ad mortuos transferunt, sint in  
statu gratiæ, & opera injuncta debito modo im-  
pleant.

Quartam conditionem, quæ se tenet ex parte animæ Indulgentiis sublevandæ addit Cajetanus, nempe ut præter statum gratiæ, studuerit dum in terris ageret, satisfacere pro suis peccatis, & juvare mortuos suos suffragiis. Suarez disp. 53. sect. 4. & plures alii Theologi necessariam negant ejusmodi conditionem. Bellarmin. lib. 1. de Indulgentiis c. 14. sententiam Cajetani ut piam agnoscat & utilem, ut viventes ad bona opera excitentur, eam tamen minùs veram, & ab omnibus passim refelli asserit.

Nihilominus non solus Cajetanus, ut volunt Bellarminus & Suarez, docuit animas defunctorum Indulgentiis plus vel minus juvari pro fervore charitatis, & studio satisfaciendi dum in terris agerent; nam ipse Sanctus Thomas ita sensisse videtur 3. part. qu. 52. art. 8. ubi negat Christum suo descensu ad inferos omnes animas à Purgatorio liberasse; & ad auctoritatem S. Augustini, qui epist. 154. aliàs 99. videtur contrarium asserere his verbis: *Nulla causa occurrit, cur ille credatur venisse Salvator, nisi ut ab eisdem doloribus salvos faceret*, sic respondet Angelicus Doctor, dicendum quod ex illa auctoritate Augustini non potest concludi, quòd omnes illi, qui in Purgatorio erant, fuerint à Purgatorio liberati, sed quòd aliquibus eorum fuerit hoc beneficium collatum: illis scilicet, qui jam sufficienter purgati erant, vel etiam qui dum adhuc viverent, meruerunt

*per fidem & devotionem ad mortem Christi, ut eo descendente liberarentur à temporali Purgatorii pœna. Eandem doctrinam, quæ est plurimum Recentiorum, laudatus Archipræsul Remensis in suo Mandato tradit; asseritque Indulgentias prodesse defunctis, à proportio du soin qu'ils ont pris pendant leur vi de se rendre dignes de ce secours. Et in confirmationem hujusce sententiæ abducit illud S. Augustini testimonium, libro de cura pro mortuis cap. I. genere vitæ quod gessit quisque per corpus, efficitur, ut profint, vel non profint, quæcumque pro illo pie fiunt, cum reliquit corpus.*

Q. 3. *Si adsint omnes requisitæ conditiones, estne certum quodd anima, ad quam extenditur Indulgentia plenaria, statim liberetur à Purgatorio?*

Respondet Bellarm. citato lib. cap. 14. quæstionem illam esse omnium difficillimam, quamvis enim dubitare non liceat, quin Indulgentiæ utiliter extendantur ad defunctos, iisque plurimum prodesse possint; non constat tamen apud Catholicos, utrum statim solvantur ab omni pœna. Plures affirmant, plures etiam negant, ut Cajetanus & recentiores non pauci, quibus adstipulatur idem Archipræsul, laudato Mandato: *Quoi-qu'il soit vrai que les Fideles qui gagnent les Indulgences, profitent aus ames des Trepassez, dont ils ont en vue de soulager les peines par les œuvres de penitence, qu'ils accomplissent au desir du Bref; il n'est pourtant pas certain, ni par consequent permis d'assurer que par l'Indulgence qu'ils gagnent, & par leurs actions de penitence & de justice, les ames de Fideles Trepassez solent en particulier entierement delivrees des peines du Purgatoire. Et infra: Comme l'Indulgence accordée par Sa Saintete dans cette occasion n'a pas assurement une vertu plus etendue que*



que le sacrifice de la Messe , quoiqu'il soit vrai que l'usage en est très salutaire ; il demeure pour constat qu'il n'y a aucune certitude du tems fixe & determine , auquel les Indulgences delivrent du Purgatoire les ames des Fideles Trepassez par la seule application qui leur en est faite. Similia habet Catechismus Catalaunensis.

Ex his , quæ de Indulgentiis in gratiam mortuorum concessis disputata sunt , intelligunt Clerici quid in Ecclesia certum , quidve ad opiniones Scholæ pertineat. Certum est ejusmodi Indulgentias mortuis esse levamina : hanc veritatem teneant , prædicent , & adversus obrectatores tueantur. Quomodo autem profint mortuis , sobriè ac cautè in hac parte se gerant , & ex variis opinionibus circa hancce quæstionem allatis , securas in praxi eligant ; hoc est , quæ viventes magis ædificant ; mortuis omnium judicio utiliores esse possunt : tales autem existiment , quas Pastores gregibus suis prædicandas decernunt.

## §. VII.

*De divisione Indulgentiarum.*

Q. I. *Quomodo dividuntur Indulgentiæ ?*

R. Dividuntur 1. in eas , quæ conceduntur pro vivis , & eas , quæ extenduntur ad mortuos.

2. In temporarias , quæ dantur ad tempus , v. g. pro una die ; & perpetuas.

3. In partiales , quæ sunt ad relaxandam duntaxat partem pœnæ debitæ ; & plenarias quibus tota pœna remittitur.

Ff

4. Ple-

4. Plenariæ sunt duplicis generis; aliæ vocantur simpliciter plenariæ; aliæ Jubilæus, vel ad instar Jubilæi.

Q. 2. Quo sensu accipiendi sunt anni, qui in Indulgentia partiali aliquando numerantur usque ad centum mille, aliquando etiam viginti aut etiam triginta millia?

R. Quidam opinati sunt ejusmodi annorum exaggerationem excogitatam fuisse à quæstuariis, ad facilius emungendas Fidelium pecunias, cùm in litteris Apostolicis non legatur tam enormis numerus. Recto tamen sensu ejusmodi numerus quantumcunque enormis intelligi potest, nimirum de pœnis canonicis, quas insignes peccatores exolvere non possent, etiam per mille annos, aut per viginti millia annorum; si enim pro peccato semel commissio, puta blasphemia, sacrilegio, homicidio, &c. pœna canonica est septem vel viginti annorum qui in omnia flagitiorum genera lapsus est, eaque per diuturnum tempus, & quàm sæpius iteravit, reus est pœnæ plurium millium annorum.

Q. 3. Quid est Jubilæus?

R. Jubilæus, secundum vim nominis Hebraici *Jobal*, idem est, ac remissio, sive libertas quia Judæi quolibet anno 50. qui incipiebat die 10. mensis septimi, seu Septembris, redibant ad possessiones suas, si fortè eas necessitate compulsi vendidissent à debitis omnibus absolvebantur, servi cum liberis suis libertate donabantur; non serebant, nec metebant sponte nascentia, ut colligitur ex c. 25. Levitici: *Clanges buccina mense septimo decima die mensis, propitiationis tempore in universa terra vestra, sanctificabisque annum quinquagesimum, & vocabis remissionem*

*sionem cunctis habitatoribus terræ tuæ; ipse enim est Jubilæus. Revertetur homo ad possessionem suam . . . . non seretis, neque metetis sponte in agro nascentia . . . . si paupertate compulsus vendiderit se tibi frater tuus . . . . usque ad annum Jubilæum operabitur apud te, & postea egredietur cum liberis suis.*

Clemens VI. anno 1350. ad instar Jubilæi legalis annum sacrum à Bonifacio institutum anno 1300. & deinceps quolibet 100. anno celebrandum, reduxit ad quinquagesimum quemque annum celebri Extravag. *Unigenitus*, in qua sic habet: *Nos autem attendentes, quod annus quinquagesimus in Lege Mosaica (quam non venit Dominus solvere, sed spiritualiter adimplere) Jubilæus remissionis & gaudii, sacerque dierum numerus, quo lege fit remissio, censebatur. Et infra, volentesque quamplurimos hujusmodi Indulgentiæ fore participes, cum pauci multorum respectu, propter vitæ hominum brevitatem, valeant ad annum centesimum pervenire, de Fratrum nostrorum consilio, prædictam concessionem Indulgentiæ ex superscriptis & aliis justis causis, ad annum quinquagesimum duximus reducendam.*

Ex auditis tamen Clementis verbis colligere non licet Jubilæum Judæorum institutum fuisse in figuram Jubilæi Christianorum, quomodo cæremonia agni Paschalis v. g. fuit à Deo præcepta in typum Eucharistiæ; namque figuræ omnes veteris legis implendæ erant in Lege Evangelica: & à Christo Domino, qui est veritas, revera fuerunt impletæ. Jubilæus autem Christianorum est arbitrarius, & lege humana institutus, proptereaque nonnunquam mutatus. Urbanus quippe VI. anno 1389. statuit ut annus sacer ab anno 1390. recurreret trigésimo tertio quovis anno, in

in memoriam 33. annorum, quos vulgo creditur Christus egisse in terris : & Paulus II. anno 1470. Jubilæum reduxit ad vigesimum quintum annum ; quam dispositionem confirmavit Sixtus IV. anno 1473. eamque nunc observat Ecclesia.

Annus igitur sacer dicitur Jubilæus, propter analogiam cum Jubilæo legali ; illo quippe anno servi peccati redeunt in libertatem filiorum Dei ; Debita pœnæ temporalis relaxantur, merita bonis operibus comparata, & per peccatum subsequens extincta, seu, ut loquuntur, mortificata reviviscunt, & ita peccatores ad pristinam possessionem revertentur : vacant quoque Christiani à servilibus peccati operibus, proptereaque annus ille merito sanctus habetur. Quoniam autem Christus prædicavit captivis Indulgentiam, & annum acceptabilem, ut prædixerat Isaias cap. 61. Clemens VI. & cæteri deinceps Summi Pontifices statuerunt ; ut sacer ille annus inciperet à primis vesperis Nativitatis Domini ad primas ejusdem Festi vespervas anni proximè secuturi ; cautumque est sub pœna excommunicationis ipso facto incurrendæ, ne ullæ aliæ Indulgentiæ prædicentur per totum illum annum.

Dantur aliæ Indulgentiæ ad instar Jubilæi, quoties recens Pontifex Maximus inauguratur, & quando Ecclesia magnis calamitatibus premittur. Dicuntur autem illæ Indulgentiæ ad instar Jubilæi ; quia iisdem gaudent privilegiis, quibus Jubilæus.

Q. 4. *In quo differt Jubilæus ab Indulgentia, quæ simpliciter dicitur plenaria?*

R. Differt tantum in quibusdam privilegiis, quæ non comitantur Indulgentiam plenariam : in præ.

præcipuo autem effectu, qui est integra pœnæ debita remissio, prorsus conveniunt: utraque enim Indulgentia totam pœnam remittit.

Q. 5. *Quæ sunt Jubilæi privilegia?*

R. 1. Conditiones ad effectum Indulgentiarum requisitæ multo magis elucet in Jubilæo: namque 1. causa propter quam datur Jubilæus, est longè gravior, utpote totam spectans Ecclesiam; nec in ea potest esse subreptio, sicut in Indulgentiis privatis. 2. Ad Jubilæum melius disponuntur Fideles, tum propter plura, & majora opera, quæ injunguntur: tum propter communia Christianorum vota, qui veluti junctis viribus vim cælo inferunt. Quàm autem vis illa Deo sit grata, & efficax ad flectendam ejus misericordiam, nemo est, qui non intelligat.

R. 2. In Indulgentiis, quæ sunt ad instar Jubilæi. 1. Liberum est cuique eligere quem maluerit ex approbatis ab Episcopo Confessarium. 2. Quivis Confessarius ab Episcopo approbatus potest absolvere ab omnibus peccatis & censuris, etiam reservatis, sive Episcopo, sive summo Pontifici; & commutare vota, vel in iis dispensare (exceptis votis Religionis & castitatis perpetuæ) modò tamen sit causa sufficiens, juxta regulas traditas ubi de dispensatione voti; Tract. de Religionis.

Quæ verò observanda sunt tempore Jubilæi, quomodo Confessarii possunt commutare opera injuncta, si fortè pœnitentes præ infirmitate ea perficere nequeant; aut quid observandum, si differenda sit absolutio, ne pœnitentes dilati frustrentur Jubilæi beneficio, superfluum hic exponemus, cum isthæc sigillatim in Bullis exprimantur.

Q. 6.

Q. 6. *Moniales beneficio Jubilei possuntne confiteri cuilibet Sacerdoti ab Episcopo approbato?*

R. Possunt cuilibet ex approbatis ad confessiones Monialium excipiendas, non aliis: quia respectu illarum non sunt approbati. Idem dicendum de Sacerdotibus alterius Diœceseos; quia approbatus in una Diœcesi, non est hoc ipso approbatus in altera; sed indiget approbatione expressa, vel tacita Episcopi, qui est Ordinarius pœnitentis, ut illum valide absolvat.

Aliæ difficultates circa casus reservatos occurrunt occasione Jubilæi, sed iis fecimus satis supra, ubi de casibus reservatis.

## CAPUT XI.

### *De Forma Sacramenti Pœnitentiæ.*

Diximus cap. I. §. 4. formam hujusce Sacramenti esse absolutionem, seu sententiam, qua Sacerdos, tanquam Judex à Christo institutus, peccatorem confessum, contritum, & satisfacere paratum, solvit à vinculis peccatorum. Quæ sit autem hujusce sententiæ vis & efficacia, demonstravimus cap. 3. Supereft nunc ut exponamus 1. quibus verbis absolutio exprimi debeat. 2. Quibus personis sit impertienda, vel deneganda, vel differenda. 3. Nonnullis difficultatibus satisfaciamus.

#### §. I.

#### *Quibus verbis constat absolutio.*

R. **C**onstat his verbis: *Ego te absolvo à peccatis tuis in nomine Patris, & Filii, & Spiritus Sancti.*

Pro-

Probatur 1. tum ex Decreto Eugenii IV. tum ex Concilio Tridentino sess. 14. cap. 3. in quo sic legitur : *Docet præterea sancta Synodus , Sacramenti Pœnitentiæ formam , in qua præcipue ipsius vis sita est , in illis Ministri verbis positam esse : Ego te absolvo , &c. quibus quidem de Ecclesiæ sanctæ more preces quædam laudabiliter adjunguntur : ad ipsius tamen formæ essentiam nequaquam spectant , neque ad ipsius Sacramenti administrationem sunt necessaria.*

Probatur 2. ratione , & auctoritate S. Thomæ , 3. part. quæst. 84. art. 3. & Catechismi Romani 2. part. §. 19. de Sacramento Pœnitentiæ. Forma Sacramenti novæ legis , inquiunt , debet significare quod in Sacramento geritur , ut in Baptismo , *Ego te baptizo* , absolutionem ; in Eucharistia , *hoc est Corpus meum* , transubstantiationem ; atqui laudata verba , *ego te absolvo* , significant effectum Sacramenti Pœnitentiæ , scilicet , remissionem peccatorum , quæ sunt vincula , quibus animæ constrictæ tenentur , juxta illud Prov. 5. *funibus peccatorum suorum quisque constringitur.*

Q. 2. *Valeretne forma his verbis expressa* , ego remitto , vel , condono tibi peccata tua in nomine , &c.

R. Valeret ; colligitur enim ex Evangelio : Joannis 20. *Quorum remisistis peccata , remittuntur eis.* Sed sine peccato usurpari non posset , quia in Sacramentis administrandis servandus est ritus ab Ecclesia præscriptus ; & quidem ex Christi verbis , Matth. 18. *quæcunque solveritis super terram , &c.*

Q. 3. *Singula verba formæ laudatæ suntne de essentia & necessitate Sacramenti ?*

R. Quamvis singula sint ex præcepto exprimenda , ad veritatem tamen Sacramenti duo ista suffi-

sufficiunt, *te absolvo* ; quia effectum Sacramenti satis exprimunt.

Dices 1. per verba illa, *absolvo te*, æquè significari potest absolutio à censuris, ac absolutio à peccatis : ergo per illa satis non exprimitur effectus Sacramenti, nisi eorum sensus determinetur per sequentes voces, *à peccatis tuis*.

Distinguo antec. Significari potest absolutio à censuris in quibusdam circumstantiis, in quibus nempe pœnitens jam à peccatis sacramentaliter absolutus confiteretur Superiori se ligatum esse suspensione, Conc. Superior enim in hac hypothefi dicendo, *te absolvo*, significaret se solvere duntaxat suspensionis vinculum : in circumstantiis, in quibus pœnitens reum se peccati cum dolore accusat, Nego antecedens : In iis enim circumstantiis verba illa, *te absolvo*, determinatè significant remissionem peccatorum ; sic in Baptismo, quamvis, *te baptizo*, ex hominum instituto significare possit ablutionem corporis, tamen ex Christi institutione, & ex circumstantiis, in quibus verba illa proferuntur, ad ablutionem animæ significandam determinatur.

Dices 2. Forma Baptismi esset irrita, & prorsus nulla, omissis his particulis, *in nomine Patris*, &c. ergo & forma Sacramenti Pœnitentiæ.

Nego conseq. & paritatem. Disparitas est, quòd Christus ipse jusserit baptizandum *in nomine Patris*, &c. & ita verba ejus semper interpretata est Ecclesia : at neque ex Scriptura, neque ex Traditione Ecclesiæ habemus in forma absolutionis necessariò exprimendum esse mysterium Trinitatis. Addi potest ratio convenientiæ, ut ajunt ; nempe, quod Baptismus, non verò Pœnitentia,



nitentia , sit solemnis professio Religionis Christianæ , cujus sanctissima Trinitas primum est mysterium.

Q. 4. *Præter laudata verba, te absolvo, cetera suntne consentaneè addita?*

R. Affirmativè; namque 1. pronomen, *ego*, auctoritatem quandam sonat, quæ competit Judici sententiam proferenti. 2. Per has voces, *à peccatis tuis*, clariùs exprimitur effectus Sacramenti. 3. Sacerdos, dum addit, *in nomine Patris, &c.* significat Dei virtute, & auctoritate ministeriali dumtaxat se peccata absolvere. Unde sanctus Augustinus serm. 99. aliàs homilia 23. *Ut evidentius, inquit, ostenderet Dominus à Spiritu Sancto, quem donavit fidelibus suis, dimitti peccata, non meritis hominum, quodam loco sic ait resurgens à mortuis: Accipite Spiritum Sanctum, & continuò subjecit, si cui dimiseritis peccata, dimittuntur ei: hoc est, Spiritus dimittit, non vos: Spiritus autem Deus est: Deus ergo dimittit, non vos. Sed ad Spiritum quid estis vos? Nescitis quia templum Dei estis, & Spiritus Dei habitat in vobis? Deus ergo habitat in templo sancto suo, hoc est, in sanctis suis fidelibus in Ecclesia sua: per eos dimittit peccata: quia viva templa sunt. Sed qui dimittit per hominem, potest dimittere & præter hominem. Propterea, inquiunt Patres Tridentini, de Ecclesiæ more preces laudabiter adjunguntur, quibus Sacerdos testatur inane suum fore ministerium, nisi Deus votis ejus annuens, & peccatoris pœnitentia placatus, invisibiliter operetur; quod egregiè explicat Alexander de Hales 4. parte Summæ quæst. 21. his verbis: Sacerdos per potestatem clavis mediator est Dei ad hominem, & hominis ad Deum. Unde per ipsum*  
*D. Habert Theolog. Tom. VI. Gg pecca-*

*peccator ascendit ad Deum, & sic est Sacerdos os peccatoris, sive loquens de peccatore: & per ipsum descendit Deus ad hominem, & sic est Sacerdos os Dei. Secundum quod ascendit, habet se per modum inferioris & supplicantis; secundum quod descendit, per modum superioris & judicantis. Secundum primum modum potest gratiam impetrare, & ad hoc est idoneus: secundum alterum modum, potest Ecclesiæ reconciliare; & ideo in signum ejus præmittitur in forma absolutionis oratio per modum deprecativum, & subjungitur absolutio per modum indicativum.*

Q. 5. *Quis est verborum illorum sensus, ego te absolvo?*

R. In mente Sancti Thomæ, cit. articulo 3. quæst. 1. ad 5. significant, ego Sacramentum absolutionis tibi impendo: juxta alios verò Theologos, do tibi, quantum in me est, gratiam reconciliativam seu peccatorum remissivam: sicque utrolibet sensu vera est forma, etiam respectu illius, qui prius Deo reconciliatus per absolutionem, iterum peccata clavibus subjicit: tum quia, ut supra diximus, ille recipit gratiam peccati remissivam: tum quia amplius cum Deo reconciliatur, & crescit in ejus amicitia: tum quia ipsi remittitur aliquid pœnæ temporalis.

Q. 6. *Absolutio debetne exprimi verbis absolutis & indicativis, aut deprecativis?*

R. 1. Certum est ratam esse verbis indicativis; namque 1. sanctus Thomas opusculo 22. capite 11. quendam contrarium asserentem, ex eo quod nullus Veterum ea usus fuerit erroris infirmulat: *Miror, inquit, qua temeritate aliquis asserat esse solutum, quem habens claves non significat se solvere, sed solum rogat esse solvendum.* 2. Quia Patres Tri-

den-

dentini citato capite 3. disertè affirmant Sacramenti Pœnitentiæ formam in hisce verbis esse positam, *ego te absolvo*, nec ad eam pertinere preces, quas adjungit Sacerdos.

R. 2. Circa formam deprecatoriam dissentiunt Theologi.

S. Thomas laudato opusculo 22. quem ejus Schola sequitur, absolute negat, validam esse formam deprecatoriam; contenditque eam in Ecclesia nunquam fuisse in usu.

Alia sententia in Scholis evasit communis, nempe formam deprecatoriam ratam & licitam fuisse usque ad initium XII. sæculi in Ecclesia Latina, atque etiam nunc in Græca: à XIII. autem sæculo indicativam ita obtinuisse in Ecclesia Latina, ut forma deprecatoria jam foret nulla. Tres hujus sententiæ sunt partes.

Prima pars probatur 1. ex sanctis Patribus, qui communiter docent peccatores absolvi orationibus Ecclesiæ. S. Augustinus lib. 3. de Baptismo: *Manus impositio*, inquit, *sicut Baptismus, repeti non potest; quid est enim aliud, nisi oratio super hominem?* Et S. Leo Epist. 83. aliàs 91. scribit Deum sic præsidia suæ bonitatis ordinasse, ut *Indulgentia Dei nisi supplicationibus Sacerdotum nequeat obtineri.*

Respondent Thomistæ solemne esse Patribus, ut orationis nomen tribuant formis Sacramentorum, etiam Baptismi, & Eucharistiæ; quia licet sint indicativæ, precibus solent admisceri. Sed ista solutio evanescet argumento seq. Itaque

Probatur 2. ex omnibus Græcorum Euchologiis, ex Sacramentario sancti Gregorii, Ordine Romano, libro Alcuini de divinis Officiis, &

omnibus Latinorum Ritualibus libris, in quibus ritus Sacramentorum accuratè describuntur: atqui in ejusmodi libris forma Sacramenti Pœnitentiæ semper deprecatoria legitur; cùm aliæ formæ, verbi gratia, Baptismi & Eucharistiæ referantur verbis absolutis & indicativis: ergo forma Sacramenti Pœnitentiæ est formaliter oratio, & non interpretative dumtaxat, ex adjunctis precibus; sicut forma Baptismi & Eucharistiæ.

Respondent Thomistæ, Veteres in suis libris reticuisse verba, quibus Sacramenta perficiuntur, ne mysteria nostra in profanorum notitiam venirent: *Verba dicere non possum*, inquit Innocentius I. de forma Confirmationis, epist. ad Docentium, *ne magis prodere videar, quàm ad consulationem respondere.*

Contra: hæc cautio necessaria fuerit prioribus sæculis, quibus Christiani inter Idololatrias versabantur, saltem locum non habuit septimo sæculo & seqq. Deinde nulla est ratio cur in laudatis Euchologiis & Sacramentariis, seu ritualibus libris referantur absque ullo scrupulo formæ aliorum Sacramentorum, omittatur vero forma Sacramenti Pœnitentiæ.

Secunda pars, nempe formam deprecatoriam etiamnunc in Ecclesia Græca esse validam & licitam, probatur 1. quia cùm Latini ignorare non potuerint eam apud Græcos esse in usu, ea tamen de re in Concilio Lugdunensi II. & in Florentino nullatenus conquesti sunt, aut quæstionem moverunt. 2. Clemens VIII. in Instructione, quam anno 1595. edidit super ritibus Græcorum, quos in Collegio Romano suis sumptibus alebat, permisit ipsis usum formæ deprecatoriæ, ea ta-

men

men conditione, ut si casu necessitatis Catholicos Latinos absolvant, forma indicativa utantur. Verba illius sunt: *In casu necessitatis Presbyteri Græci Catholici possunt Latinos absolvere. Utantur forma absolutionis in generali Concilio Florentino præscripta, & postea, si voluerint, dicant orationem illam deprecativam, quam pro forma ejusmodi absolutionis dicere tantum consueverunt.*

Dices: Forma Sacramenti Pœnitentiæ debet proferri per modum sententiæ; est enim actus judicialis: atqui oratio non profertur per modum sententiæ, cum sit actus supplicis, non Judicis: ergo forma Sacramenti Pœnitentiæ non potest esse oratio.

Distinguo minor. Oratio non profertur per modum sententiæ, quando Judex agit proprio nomine & auctoritate, Conc. Quando agit nomine Superioris, & tanquam causa instrumentalis, Nego min. Cum enim orat causam principem ut absolvat confessum & pœnitentem, satis indicat judicare se eum absolvendum.

Confirmatur responsio. Absolutio ab excommunicatione est actus judicialis: atqui in omnium Theologorum sententia potest proferri verbis deprecatoriis: *Alia ratio est, inquit S. Thomas cit. opusculo 22. de absolutione ab excommunicatione, quæ non est sacramentalis, sed magis judiciaria jurisdictionem consequens; illa enim verba efficaciam habent ab intentione dicentis: unde non refert quibuscunque verbis utatur ad exprimendam suam intentionem.*

Tertia pars, nempe formam deprecatoriam hodie non valere in Ecclesia Latina, probatur I. auctoritate Theologorum Parisiensium, qui à quingentis circiter annis ita censuerunt, ut refert

Sanct. Thomas laudato opusc. 22. ubi refellens adversarium, qui pro forma deprecatoria opponebat auctoritatem Thologorum duodecimi sæculi sic habet : *Inducit quoque sic sensisse quosdam antiquos & famosos Magistros; scilicet Magistrum Guillelmum de Altissiodore, & Magistrum Guillelmum quondam Parisiensem Episcopum, & Dominum Hugonem quondam Cardinalem, de quibus quod ita senserint non constat. Sed etsi sic senserunt, . . . . . nunquid si nunc viverent, præjudicare possent communi sententiæ Magistrarum Parisiis regentium, qui contra sentiunt, decernentes absque his verbis, ego te absolvo, absolutionem non esse per solam deprecativam orationem?* 2. Franciscus Maironis decimo quarto ineunte sæculo scribens in 4. asserit dist. 14. quæst. 1. ad 3. quosdam in Provincia uti solidos esse forma deprecative : *Sed, inquit, improbata fuit ista forma.* 3. Eugenius Quartus in suo Decreto non tradit aliam formam, quam indicativam. 4. Concilium Tridentinum sess. 14. cap. 3. disertè docet formam Sacramenti Pœnitentiæ positam esse in illis verbis, *ego te absolvo*, & adjunctas preces nequaquam pertinere ad ipsius essentiam, neque ad Sacramenti administrationem.

Dices ; Ecclesia nihil mutare potest circa substantiam Sacramentorum, ex dictis cap. 7. de Sacramentis in genere ; ergo non potuit efficere, ut forma deprecative, quæ obtinuit ubique usque ad duodecimum sæculum, & etiam nunc valet apud Græcos, sit hodie nulla & irrita apud Latinos.

Nego conseq. 1. Quia ex dictis citat. cap. 7. Christus non determinavit omnium Sacramentorum formas, sicut materias ; sed plerasque Ecclesiæ reliquit determinandas. 2. Quia in quibusdam

busdam Sacramentis, puta Matrimonii, & Pœnitentiæ, est aliquid morale dependens à lege humana : in Matrimonio quidem contractus civilis ; & in Pœnitentia actus judicialis : ad contractum autem & actum judicalem requiruntur quædam solemnitates & conditiones ab Ecclesia apponendæ, sine quibus non erunt validi. Christus igitur pro materia Sacramenti Matrimonii instituit contractum validum, & pro forma Sacramenti Pœnitentiæ actum judicalem, & juridicè exercendum : conditiones autem tum contractus, tum actus judicialis, permisit determinandas per legem humanam. Hinc est, quòd contractus clandestinus, qui ante Concilium Tridentinum erat validus, ac proinde idonea materia Sacramenti Matrimonii, per idem Concilium factus sit irritus, & consequenter insufficiens materia Sacramenti, quemadmodum aqua naturalis substantialiter corrupta definit esse materia Baptismi. Similiter ex dispositione Ecclesiæ absolutio validè, & juridicè proferri non potest, cùm antea posset, verbis deprecativis, aut à Sacerdote per Episcopum non approbato, nisi curam animarum habet.

## §. II.

*De iis, quibus concedenda, vel deneganda est absolutio.*

Q. I. *Sacerdotes acceperuntne à Deo potestatem tum concedendi, tum denegandi, seu differendi absolutionem?*

R. De fide est accepisse ; ita enim definiit Concilium Tridentinum sess. 14. can. 15. in quo sic habet : *Si quis dixerit claves Ecclesiæ esse datas tan-*

tum ab absolvendum, non etiam ad ligandum . . . anathema sit.

Probatur 1. ex Scriptura, ubi Christus utramque potestatem Apostolis simul concessit, Matth. 18 *Quæcunque alligaveritis super terram, erunt ligata & in cælo: & quæcunque solveritis, &c.* Joan. 20. *quorum remisistis peccata, remittuntur eis; & quorum retinueritis, retenta sunt.*

Probatur 2. ex constanti Traditione, cujus testes sunt antiqui Patres, & Concilia à nobis laudata, ubi de necessitate satisfactionis, & de Pœnitentia publica. Quin ex S. Hieronymo in cap. 16. Matth. explicita peccatorum confessio eò tendit, ut Sacerdos, cum audierit peccatorum varietates, sciat, *quis ligandus sit, quisve solvendus.* Unde egregium sæculi decimi sexti lumen S. Thomas à Villanova, Caroli V. à concionibus, & ad Archiepiscopatum Valentinum renitens, sed miraculo quodam assumptus, Confessarios, qui indiscriminatim absolvunt, his gravissimis verbis infectatur sermone quem habuit feria sexta post Dominicam quartam Quadragesimæ: *ò Medice, cur fœtentem solvis? cur indigno veniam promittis? cur, cui absolutionis beneficium exhibeas, non discernis? duas tibi claves Dominus dedit, unam discernendi, alteram judicandi; absolvendi, scilicet, & ligandi; & tu sine discretionis examine neminem ligas, omnes absolvis; una tantum clave, neque integra quidem uteris.* Ergo non sine manifesta hæresi contumaciter assereretur nunquam denegandam esse absolutionem.

Q. 2. *Tenenturne Sacerdotes uti aliquando potestate ligandi, seu denegandi, aut differendi absolutionem?*

R. Certum est aliquando teneri, sequiturque necessario ex præcedenti responsione; non enim  
Chri-



Christus frustra eis concessit hanc potestatem, sed ut ea utantur quoties opus fuerit. Quare meritò Clerus Gallicanus anno 1700. erroneam declaravit hancce propositionem, olim ab Innocentio XI. & ab Academia Lovaniensi damnatam : *Pœnitenti habenti consuetudinem peccandi contra legem Dei, naturæ, aut Ecclesiæ, etsi emendationis spes nulla appareat, nec est deneganda, nec differenda absolutio, dummodo ore proferat se dolere, & proponere emendationem.* Judicium autem illustrissimi Conventus tale fuit : *Hæc propositio est erronea, & ad finalem impœnitentiam inducens ;* Namque propositio erronea dicitur, quæ pugnat contra conclusionem clarè, & necessariò elicitam ex propositione fidei ; atqui ejusmodi est damnata illa propositio : Ergo.

Q. 3. *Estne grave peccatum confessos indiscriminatum & sine delectu absolvere ?*

R. Affirmativè ; namque per infidam illam administrationem gravis injuria infertur Deo, Ecclesiæ, & ipsismet pœnitentibus.

Ac 1. quidem infidus Confessarius reus est apud Deum violati Sacramenti : atqui profanatio Sacramentorum, ex S. Thoma 2. 2. qu. 99. art. 3. ex peccatis sacrilegii gravissimum. Liceat ergo nobis hîc cum sancto Thoma à Villa nova citato sermone usurpare verba Prophetæ, *in domo Dei horrendum vidi*, nempe ipsosmet mysteriorum Dei dispensatores, sanctum dare canibus, sanguinem novi testamenti pollutum ducere, & tradere in manus peccatorum, eo sanè Juda peiores, quòd ille facti pœnitens dixerit, *peccavi tradens sanguinem justum* ; illi contra in hoc arbitrentur obsequium se præstare Deo, post ejusmodi prævaricationes ad altare accedant intrepidi,

quasi gens, quæ fecerit justitiam; audeantque convitiis laceßere, qui eos non fuerint imitati. Sed in Evangelio legimus esse prædictum, inquit S. Cyprianus epist. 55. magis domesticos inimicos futuros . . . . neque nobis ignominia est pati à fratribus, quod passus est Christus, nec illis gloria est facere quod fecerit Judas.

2. Ejusmodi Confessariorum prævaricatio est Ecclesia adeo noxia, ut idem sanctus Thomas à Villa-nova cit. ferm. asserere non dubitet inde scaturire omnia vitia, quæ agrum Domini invadunt. Quid, inquit, Ecclesiam Domini hodie perdit, nisi Confessariorum & Pastorum blandiens adulatio, deliniens, demulcensque assentatio? vae miseris! non ægritudinem, sed contritionem ac confusionem peccatorum curant (hoc est expungunt) quàm augere debuissent, promittentes pacem, quibus non est pax: & veniam, quibus æterna damnatio parata est. Parvum est, inquiunt, nimirum humanum est peccare. Quis est homo qui non peccat? facilis est venia . . . . Confessus es, absolutus es, sufficit tibi ad salutem, vive lætus . . . . sic vulnera liniunt, vermem conscientie extinguunt, stimulum peccati auferunt, & securos peccatores ad inferna demittunt, Quin visum est S. Cypriano ferm. de lapsis, Ecclesiam minùs passam fuisse à crudelissimis tyrannibus, quàm ab infidis illis Confessariis: emerfit, inquit, novum genus cladis, & quasi parum persecutionis procella sævierit, accessit ad cumulum sub misericordiae titulo malum fallens & blanda pernicies. Et nonnullis interjectis, dicit ejusmodi Sacerdotes id esse in Ecclesia, quod (est) grando frugibus, turbidum sidus arboribus, quod armentis pestilens vastitas, quod navigiis sæva tempestas. Ne cui autem videantur hæc prolata Rhetorum more, & per quandam  
exag-

exaggerationem, audiendi sunt Patres in secundo Concilio Lateranensi, numero mille congregati; cùm enim Concilium illud sit œcumenicum, dubitare fas non est quin verba illius sint ad pondus sanctuarii exacta, & Spiritus Sanctus locutus sit can. 22. in quo sic habetur: *Sanè quia inter cœtera unum est quod sanctam maximè perturbat Ecclesiam, falsa videlicet pœnitentia, Confratres nostros & Presbyteros admonemus, ne falsis pœnitentiis Laicorum animas decipi, & in infernum pertrahi patiantur. Falsam autem pœnitentiam esse constat; cùm spretis pluribus ne uno solo pœnitentia agitur, aut cùm sic agitur de uno, ut non discedatur ab alio . . . . falsa etiam sit pœnitentia cùm pœnitens ab officio vel curiali vel negotiali non recedit, quod sine peccato agi nulla ratione prævalet.* Enimverò facilitas illa, qua omnes confessi absolvuntur, modò ore proferant ipsos pœnitere, cupiditatibus habenas laxat, legum divinarum humanarumque repagula subvertit, timorem Dei indignantis ac minantis excludit, & peccandi addit fiduciam, quasi domus Dei sit spelunca latronum, ut Deus ipse conqueritur Jeremiæ 7. v. 11.

3. Nihil perniciosum magis ipsismet pœnitentibus, quàm inofficiosa illa Confessariorum indulgentia: tum quia eorum vulnera non sanat, sed operit, & dissimulando exasperat: tum quia spem vitæ æternæ ipsis adimit, & ad impœnitentiam finalem certissimè inducit; qui enim per confessionem absolutum se credit, alia remedia non quærit, securus vivit & moritur. Contra verò qui fortioribus Confessarii consiliis monitus est de morbi periculo; vel disciplinæ illius curandum se tradit, vel, si se subducat impatiens, saltem conscientiaæ stimulis exagitatus non quiescit,  
sed

sed consentanea remedia aliquando tandem sibi quæret : fera enim , ut observat S. Aug. etsi non cadat sub ictu , & ubi vulnerata est , manus tamen venatoris non aufugit. Propterea Ezech. 13. hæc dicit Dominus Deus , vae qui consument pulvillos sub omni cubito manus . . . . ad capiendas animas ; & cum caperent animas populi mei , vivificabant animas eorum. Et violabant me ad populum meum propter pugillum bordei , & fragmen panis , ut interficerent animas , quæ non moriuntur , & vivificarent animas , quæ non vivunt , mentientes populo meo credenti mendacijs. Et Jer. 6. Curabant contritionem filiae populi mei cum ignominia dicentes , pax , pax , & non erat pax . . . . Quamobrem cadent inter ruentes. In quæ verba sic exclamat S. Thomas à Villanova cit. serm. o miseri animarum non curatores , sed interfectores ; non consultores , sed deceptores ! quid respondebitis Domino pro grege , quem vestris blanditijs decepistis , vestris consilijs jugulastis ? Quàm autem isthæc agendi ratio aliena sit à pia matre Ecclesia testatur Clerus Romanus epist. quæ est 31. inter epist. Sanct. Cyprian. Absit , inquit , ab Ecclesia Romana vigorem suum tam profana facilitate dimittere , & nervos severitatis eversa fidei majestate dissolvere , ut . . . . nova per misericordiam falsam vulnera veteribus transgressionis vulneribus imprimantur , ut miseris ad everisionem majorem eripiatur & pœnitentia. Ubi enim Indulgentiæ poterit Medicina proficere , si etiam ipse Medicus intercepta pœnitentia indulget periculis , si tantummodò operit vulnus , nec finit necessaria temporis remedia obducere cicatricem ? hoc non est curare , sed , si dicere verum volumus , occidere. Simili zelo S. Cyprianus ser. de lapsis adversus ejusmodi infidos Sacerdotes invehitur ; contra Evangelii vigorem , inquit , contra Domini ac Dei legem temeritate quorundam

*dam largitur incautis communicatio . . . . Operiuntur morientium vulnera, & plaga lethalis altis & profundis visceribus infixæ, dissimulato dolore contegitur . . . . non est pax illa, sed bellum, nec Ecclesiæ jungitur, qui ab Evangelio separatur. Quid injuriam beneficium vocant? quid impietatem vocabulo pietatis appellant? S. Ambr. scribit lib. 2 de pœnit. cap. 9. Nonnulli, inquit, ideo poscunt pœnitentiam, ut statim sibi reddi communionem velint. Hi non tam se solvere cupiunt, quàm Sacerdotem ligare; suam enim conscientiam non exuunt, & Sacerdotis induunt. Et serm. 4. in Psal. 118. Citò refricatur vulnus, quod sanatum medicinæ lege non fuerit, inò etiam securiorem curatio sentit profectum. Ideoque si virus in interiora proserpit, medicamenta foris apposita (Empyricorum more) non sentit. Exigit ergo medicinæ ratio, ut aut sectione, aut adustione curetur. Nisi enim putrefacta recidantur, aut humor inutilis decoquatur, frustra medicinæ manus adhibentur ad vulnera. Ideoque bonus Medicus hujusmodi ægrum legitimè dicit esse curandum, ut possit medicina proficere. Lege ergo miseretur, (juxta illud, Et de lege tua miserere mei) qui cum justitia sapientiaque miseretur, ut ea dimittat, quæ scit fure posse dimitti, ne cum alterius miseretur, seipsum legi faciat obnoxium . . . . Consideremus etiam ne ipsum deteriorem faciamus, cujus miseremur injuslè; plerumque enim non coercere delinquentes, majoris austeritatis est, quàm si ulciscaris.*

Ex iis planè demonstratur Confessarios, de quibus est sermo, *piè impios, & impie pios*, ut loquitur S. Thomas à Villa-nova cit. ser. graviter peccare, & æternæ damnationis reos constituit. Ne autem Clerici, quibus inservimus, in tantam perniciem, monendi sunt quid imprimis cavere debeant. Itaque

Q. 4. *Quot timenda sunt Confessariis, ne inducantur in ejusmodi prævaricationem?*

R. Quinque, scilicet incertitia, negligentia, naturalis compassio, timor mundanus, & laxiores opiniones.

Ac I. quidem nemo nisi expertus crederet quàm multi ex Confessariis ignorant rationes curandi morbos animi, & tritas medicinæ spiritualis regulas. Illud persæpè probant, qui eorum peritiam tentant juxta Concilii Tridentini decretum, in ejusmodi quippe examine si Examiner Pœnitentis personam suscipiat, & per umbratilem confessionem conscientiam à pluribus annis vitiatam, puta per diuturnam inimicitiam, aut injustam rei alienæ detentionem ipsis exhibeat, ut exploret quæ sit eorum agendi ratio in frequentioribus illis casibus; deprehendunturque rudiora hujusce spiritualis medicinæ rudimenta tenere, sed in iis ita cæcutire, ut meritò judicentur non solum inepti ad illam exercendam, sed etiam rei quoddam illam tam imperitè hæctenus exercuerint; nam cæcus cæco ducatum præstans in peccati foveam cadit cum illo qui ducitur.

Ministerii difficultas negligentia patere solet; cum enim curare animarum vulnera res sit multæ operæ, Confessarius laboris impatiens, conscientias altius perscrutari refugit, ne latentem morbum detegat, qui negotium ipsi face scat, moramque interponat in Confessione, quàm citissimè concludi expetit; & ita vulnera palpat, eaque per absolutionem magis tegit, quàm sanat.

3. Præter commiserationem, quæ ex charitate efflorescit, & supernaturali conditur sapientia, Confessario apprimè necessariam, est alia naturalis,

lis, veriùs dicam animalis commiseratio, quam caro gignit, & ipsa in Confessario maximè noxia, utpote quæ nervos omnes mentis & corporis frangat; qui enim hujusmodi affectione ducitur, mollis est, &, ut ait Tullius, parum vir, hoc est, imbecillis animi, quem ratio non regit, sed sensus; & ideo necessarium dolorem cuiquam inferri non sustinet, quin commoventur ejus viscera, si vel avicula sub oculis ejus occidatur, & quodammodo deliquium patitur, ubi secundum artis leges sectio aut adustio est adhibenda. Quis autem pronuntiare dubitaverit hominem sic affectum ad curandos tam corporis quàm animi morbos minimè idoneum? Vix enim vim sibi inferet, ut vulnus aperiat, putredines amputet, ne æger vociferetur & conqueratur per dolorem impatiens; sicque Pœnitentes, qui ejus fidei se committunt, sub blando misericordiæ tit. decipit, *hoc enim non est curare, sed, si verum dicere, volumus perimere*, ut scribit Clerus Romanus ad Sanct. Cyprianum.

4. Nihil potentius ad frangendum animum Confessarii, quàm timor mundanus: nec gravio-rem hucusque in ministerio Sacerdotali expertus sum tentationem, quàm cùm nonnulla occurrunt improbanda & resecanda, utpote legi divinæ dissentanea, quæ tamen pœnitentes licita arbitrantur, nec ab iis avelli se patiuntur; nisi enim Confessarius iis morem gerat, & benignis sed falsis interpretationibus legem flectat ad pervicaces eorum voluntates, statim excidit à gratia, præsertim potentum, propter quos in existimatione fuit apud homines; pro magno siquidem habetur honore, esse à Confessionibus Magnatum & coli  
veluti

veluti patrem in nobili familia. Atqui non solum honorificis ejusmodi titulis protinus spoliabitur, sed insuper pristinus amor in odium & celebris fama in contemptum convertentur, malè audiet apud vulgus, patebitque oblocutionibus, interdum & persecutionibus. Qui ineluctabiles illas tentationum procellas providet intrepidus, vel sustinet inconcussus, magnus est ille vir, & judicio Sanct. Bernardi singularis; *est enim vitium*, inquit scribens ad Eugenium Summum Pontificem, *cujus, si te immunem sentis, inter omnes quos novi ex his qui cathedras ascenderunt, sedebis, me judice, solitarius, quia singulariter levasti te supra te. Hujus callidissimæ vulpeculæ magnorum neminem comperi satis cavisse versutias.*

5. Denique laxiores opiniones suggestu fatanæ, qui se transfigurat in Angelum lucis, excogitatæ, ut blandiuntur pœnitentium cupiditatibus, ita molles, & laboris impatientes Confessarios faciliè decipiunt, ne sit illis religio Sacramentum conferre indignis, & solvere quos ligare tenentur. Sed adversus isthæc erroris pericula certam Confessariis fixere regulam Summus Pontifex Innocentius XI. & Clerus Gallicanus, nempe illicitum esse in sacramento Pœnitentiæ, aliisque Sacramentis conferendis, sequi opinionem probabilem de valore Sacramenti, relicta tutiore.

Patent jam scopuli ad quos plures è Confessariis salutis naufragium patiuntur: faxit Deus Optimus, ut ii, pro quibus scribimus, illos quæ par est diligentia declinent, & deposito omni humano affectu, solvant, aut ligent juxta legem sibi à Deo præscriptam.



Q. 3. *Quibus impertienda est aut neganda absolutio?*

R. Generatim loquendo iis statim impertienda est, quos Confessarius prudenter judicat verè esse contritos: iis verò deneganda, quos moraliter certus est, aut esse potest & debet, carere sufficienti contritione: tum denique differenda ad tempus, si possit, cum meritò dubitari debet de veritate contritionis. Tres responsionis sunt partes.

Prima, quæ est de concedenda statim absolutione confessis & dispositis, probatur; quia illi jus habent ad absolutionem; confessio quippe fit ad obtinendam absolutionem; si nihil obstat ex parte confitentis; & Confessarius eam excipit hac tacita conditione: ergo impleta conditione ex parte confitentis, Confessarius eum absolvere tenetur.

Dixi *generatim loquendo*; quia si pœnitens versetur in morali ac veluti proximo labendi periculo, quantumcunque contritus appareat, differenda tamen est absolutio, donec removerit peccandi occasionem, v. g. fornicariam emiserit, controversiam inimicitiarum causam diremerit, aut si id fieri nequeat, saltem confirmatus sit in novæ vitæ proposito; paratus enim debet esse pœnitens, non solum ad recipiendum, sed etiam conservandum absolutionis beneficium, ut patet ex Ecclesiæ disciplina, juxta quam non licet baptizare parvulos, quandiu manent in potestate parentum infidelium, ut diximus Tractatu de Baptismo; quia gratiam Sacramenti, quam haud dubiè reciperent, certò prævidentur amissuri.

Secunda pars probatur i. his omnibus momen-

tis, quibus supra demonstravimus sine gravi peccato non absolvi manifestè indignos. 2. auctoritate Innoc. XI. & Cleri Gallicani, qui proscripserunt hanc propositionem, *Pœnitenti habenti consuetudinem peccandi contra legem Dei, naturæ aut Ecclesiæ, etsi emendationis spes nulla appareat, nec est deneganda, nec differenda absolutio, dummodo ore proferat se dolere, & proponere emendationem.* 3. ratione, quia nunquam licet, sub quovis necessitatis prætextu, celebrare Sacramenta alio ritu, & in alia materia, quàm Christus instituit, v. gr. Eucharistiam conficere alio pane, quam triticeo; baptizare alia aqua, quam elementari, ut vocant, putà rosacea; nam præterquam quod irritum esset Sacramentum, & planè nullum, Minister reum se gravissimi sacrilegii constitueret: atqui vera contritio est à Christo instituta essentialis materia Sacramenti Pœnitentiæ; ergo nefas est illud administrare, si evidenter desit vera contritio.

Hæc ratio probat iis quoque denegandam absolutionem, qui licèt non nisi peccata venialia exponant, ne vel unum tamen ex illis vitare curant; semper torpent otio, data quavis occasione mentiuntur, rixantur, verbis asperioribus proximum lædunt; de quibus qualibet hebdomada bis etiam aliquando apud Sacerdotem se accusant: *assidue se dicunt peccatores*, inquit S. August. vel quivis Auctor ferm. 7. de tempore, nunc in appendice 117. *& tamen adhuc illos peccare delectat: confessio est, non emendatio; promuntiatur offensa, non tollitur: nam ex Sanct. Thoma 3. p. qu. 87. art. 1. sicut peccatum mortale remitti non potest, quandiu voluntas peccato adhæret; ita etiam nec peccatum veniale.*

Nec

Nec dicas peccata venialia non esse materiam necessariam confessionis, inde enim sequitur duntaxat liberum esse ea clavibus non subicere; sed nullatenus inde concludi potest licitum esse sacramentaliter ea confiteri absque vera contritione; sicut ex eo quod Sacerdos non teneatur ex præcepto hodie Sacrum facere, non sequitur eum absque gravi peccato posse non assumere panem triticeum ad sacrificium; vera enim contritio non est minùs necessaria Sacramento Pœnitentiæ, quam panis triticeus Eucharistiæ.

Ergo, inquires, consultius est peccata venialia non confiteri; cum sine peccato omitti possint, nec sine morali periculo gravioris delicti exponantur: atqui absurdum est illud consequens, cum adversetur laudatis piorum moribus, qui peccata quotidiana non solum qualibet hebdomada, sed nonnunquam singulis fere diebus, ut de Sancto Carolo, & aliis non paucis legitur, confessione sacramentali abstergere consueverunt.

R. 1. Ad eos restringi responsionem nostram, qui peccata venialia ita confitentur, ut de nullo eorum veram habeant contritionem; si enim vel de uno ex iis sincerè doleant cum vero emendationis proposito, rei non sunt violati Sacramenti, cum unum peccatum veniale sine aliis solvi ac remitti possit, quanquam facilè non præsumitur eum, qui voluntate deliberata Deum offendere proponit, pœnitentiæ donum ab ipso accipere.

R. 2. distinguendo majorem, peccata venialia non confiteri consultius est illi, qui iis omnibus plena voluntate adhæret, Concedo: illi, qui ea detestatur, deslet, & pro humana fragilitate

impugnat, quotidie vim sibi inferens quemadmodum viri pii, quorum exemplum objicitur, Nego majorem. Absit ergo ut scrupulum justis injiciat isthæc nostra responsio, illosque anxios reddat, cum scriptum sit Prov. 14. *Ne quæras impietatem in domo justî, neque vastes requiem ejus, quia etsi in multis offendat, in malo non persistit, sed statim resipiscit, & per pœnitentiam resurgit. Peccatum, inquit Sanct. Chrysostomus hom. 21. in 1. ad Corinth. si quando ad animam (ejus) divertit, hospes est non incola; quia compunctio citius discedere compellit; septies enim in die cadet justus, & resurget. Prov. 24. Quis autem hominem sic affectum dubitabit quotidie cum fructu posse absolvi? sed quid ista pœnitentiæ & pietatis exempla ad frigidam eorum agendi rationem, qui contra impetum superbiæ, cupiditatis, iræ conari nesciunt? Qui voluntate deliberata, aut supina negligentia quotidie cadere frequenter se accusant, & in iis similiter persistunt? Quis meritò non dixerit scenam esse & ludum ejusmodi confessiones, quibus simulant se dolere, & satisfactionem Deo exhibere ob tam multiplices offensas, cum interim iis omnibus insistere in animo habeant? *irrisor est, & non pœnitens*, inquit S. Isidorus lib. 7. Sent. c. 16. *qui adhuc agit quæ pœnitet, nec Deum videtur placare subditus, sed subsannare superbus.* Non nego tamen ignorantiam, modò supina non sit, plures excusare à crimine violati Sacramenti.*

Ex iis sequitur absolutionem iis esse denegandam,

1. Qui cum proximo inimicitias exercent, nec cum eo reconciliari volunt, nec odium deponere.

2. Qui

2. Qui cum æs alienum detineant, aut proximi famam læserint, restituere vel satisfacere detrectant. Quodd si polliceantur se facturos factis, (nisi sint in periculo mortis constituti) nihilominus remitti debent, quando in superiori confessione jam moniti, Confessarii præcepto non paruerunt. Ita primum Concilium Mediolanense: *Caveant Confessores, ne ante debitam satisfactionem illos absolvant, quibus cum facultas adsit restituendi, vel legata, quæ ad pias causas facta sunt, persolvendi, illisque, ut id facerent, superiori confessione præceptum sit, præstare tamen neglexerunt, exceptis iis, qui periculose ægrotant, quos tamen moneant, ut quæ debent quamprimum solvant.* Similia habet Concilium Burdigalense anno 1583. & alia quamplurima. Idem iudicium feret Confessarius de iis, 1. qui debita solvere negligunt, unde creditores, artifices, mercatores grave patiuntur detrimentum: *Non morabitur opus mercenarii tui apud te usque mane, ait Dominus Levit. 19. v. 13.* 2. qui nimio vestium ornatu, & aliis sumptibus superfluis, debita contrahunt, quibus solvendis pares non sunt. Ita S. Carolus in Instruct. Confess. *nec eos etiam absolvat, inquit, qui in vestium splendore, aut superfluo corporis ornatu, mortaliter peccant. Et quia hodie sæculi pompæ & vanitates ad summum creverunt, potissimum ex culpa & negligentia Confessariorum . . . . aliquos hic casus designare placuit, in quibus mortaliter peccat, cui cordi est nimius ille luxus. Quisquis igitur utitur hac pompa, ut alios ad peccatum mortale pelliciat, reus ipse fit mortalis peccati, aut si ex illius occasione violat ipse, vel aliis auctor est & causa, cur violent Dei vel Ecclesiæ præcepta. Si quæ uxor maritum ad nimios sumptus cogat, quos sciat aut probabiliter suspicetur odia, dissensio-*

nesque domesticas parère, maritum vel alios compellere ad blasphemica verba, ad turpes, & illicitos quæstus vel contractus, ad refecandas eleemosynas, quas alioqui erogare tenetur, ad novum æs alienum contrahendum, cui solvendo statò tempore par esse non possit (quod nusquam contingit sine gravi proximi detrimento) si impediatur ne filiae jam nobiles collocentur . . . . . generatim hoc iudicium ferri potest, huiusmodi homines esse in statu peccati mortalis, nisi habito diligenti cum pœnitente examine, Confessario constet de contrario ob particulares quasdam rationes. Reum etiam peccati mortalis facit modus se ornandi: etiam si non excedat statum & facultates personæ; nempe si lasciviam inspiret, vel ex se, vel secundum communem hominum opinionem: vel si videatur, dubitetve probabiliter ex occasione illius (quod inter honestos conditionis suæ viros ac mulieres nondum sit usitatus) non defuturos, qui amorem impudicum concipiant.

3. Qui artes illicitas & prohibitas profitentur, ut Lenones, Comædii, Usurarii, & quicumque artibus quidem per se licitis, utuntur ad illicita, ut Pictores, qui pingunt tabellas obscœnas, & ad libidinem provocantes; Bibliopolæ, qui vendunt libellos famosos, & alios in quibus nonnulla habentur Religioni & bonis moribus contraria. Idem iudicium esto de iis, qui apud se expositas habent ejusmodi tabellas, & prohibitos libros retinent ac legunt. Quid verò sentiendum sit de aleatoribus; de iis, qui impensius ludò indulgent, qui spectacula & choreas frequentant, fusè exposuimus Tract. de Justitia & Jure, ubi de ludo.

4. Qui ex negligentia culpabili ignorant prima fidei rudimenta, ut mysteria sanctissimæ Trinitatis,

nitatis, & Incarnationis. Ita Innocentius XI. anno 1679. & Clerus Gallicanus anno 1700. in censura sequentium propositionum. Prima: *Non nisi fides unius Dei necessaria videtur necessitate medii, non autem explicata remuneratoris.* Secunda: *Absolutionis capax est homo quantumvis laboret ignorantia Mysteriorum fidei, & etiamsi per negligentiam etiam culpabilem nesciat mysterium sanctissimæ Trinitatis & Incarnationis Domini.* Verba censuræ sunt: *Hæ propositiones in Deum remuneratorem, & in Christi mediatoris nomen contumeliosæ sunt, erroneæ & hæreticæ.* Hinc Concilium Mediolanense V. præcipit ut Confessarius antequam rudiorum confessiones excipiat, ab iis exigit ut recitent Orationem Dominicam, Salutationem Angelicam; Symbolum Apostolorum, & Decalogum. Ita ut, inquit S. Carolus in Instr. pœnit. explicite & intelligenter sciant, non autem quasi recitantes tantum. Et in Instr. Confess. Si verò ea de re nusquam antea monitus fuerit, ipsum absolvat, præmissa semper instructione de his rebus necessaria, ut sit impræsentiarum absolutionis capax. Et infra Patres ac matres familias, qui suos filios filias, servos & ancillas (qua de re particulatim interrogabantur) supradicta doctrinæ Christianæ capita addiscere non compellunt, vel non invigilant, & procurant, ut Dei Ecclesiæque præcepta observentur, aut, quod pejus est, eorum observationem impediunt . . . . . tempus non concedunt, quo illi juxta Ecclesiæ præceptum Missam audire possint: aut nescientes quinam è sua familia legitimo teneantur impedimento, cœnare eos sinunt tempore Quadragesimali, & aliis jejuniorum diebus, aut ante statam horam prandere, aut eos non admonent & corrigunt, quando hæc præcepta transgrediuntur . . . si in his casibus officio non satisfaciant, nec de negligentia hætenus in familiæ suæ ad-

*ministratiōe commissā emendentur, non absolvantur. Quid si id se præstituros polliceantur, neque his de rebus moniti antea fuerint à Confessario aut Parocho; poterit eos absolvere. Sed si sæpius moniti, nullatenus emendati fuerint, proroget illis absolutionem, donec sinceræ emendationis argumenta aliquo temporis spatio dederint.*

5. Qui versantur in proxima peccandi occasione, quam faciliè remove-re possunt, ut constat ex censura, qua Innoc. XI. anno 1679. & Clerus Gallicanus anno 1700. perstrinxerunt sequentes propositiones, Prima, *Potest aliquando absolvi, qui in proxima occasione peccandi versatur, quam potest & non vult omittere: quin imo directe & ex proposito querit, aut ei se ingerit.* Secunda, *Proxima occasio peccandi non est fugienda, quando causa aliqua utilis, aut honesta non fugiendi occurrit.* De quibus propositionibus sic censuit facer Conventus: *Hæ propositiones scandalosæ sunt, perniciosæ, hæreticæ, apertè repugnantes præcepto Christi jubentis manum, pedem, oculum quoque dextrum scandalizantem abscindere & projicere.*

Dixi, *quam remove-re potest*, quia si Pœnitens eam remove-re non possit, ut filia familias, quæ non potest discedere è domo paterna, quæ est illi proxima peccandi occasio; tunc salutaribus consiliis est muniendus, & priusquam absolvatur, probandus, donec occasio, quæ hactenus proxima fuit, evadat remota.

Peccati autem mortalis occasiones aliæ ex natura sua ad peccandum inducunt, aliæ per accidens, & ex infirmitate pœnitentis, qui in iis positus ita peccare consuevit, ut probabile sit illum in eadem peccata lapsurum, si in ejusmodi occasione perseveret.

Occasiones, quæ ex natura sua inducunt, ad pecca-



peccatum, ex Sancto Carolo, sunt, aleatorios ludos profiteri, domum hunc in finem paratam habere, ac aleatores recipere; domi retinere personam quacum peccatur, aut alio modo cum ipsa cohabitare, in eadem conversatione, colloquiis, aspectibus, amorisque impudici significationibus & incentivis perseverare. Pœnitentem ergo aliqua ex his occasionibus aut similibus irritum Confessarius absolvere non debet.

Occasiones porro secundi generis sunt eæ, quæ, etsi ex natura sua sint licitæ & honestæ, ex personæ tamen infirmitate multis peccatis implicant; sic plerisque sunt hodie seculi nostri vitio (inquit idem S. Præsul) bellum, negotiatio, Magistratus, Advocatorum, Procuratorumque professio. Qua in re invigilare eo majus operæ pretium est, quodd Confessariorum hac in parte incuria in omnibus artibus & professionibus regnent plures abusus, gravissimaque peccata, sine quibus jam videtur à multis ne justissimas quidem professiones exerceri posse. Sic v. g. in Magistratum & aliorum officiorum institutione ea solemnī sæpè Sacramento promittuntur, quæ nunquam observantur. Apud Jurisconsultos, Advocatos, & Procuratores clientum improbitati & injūstitiæ contra propriam conscientiam servitur. In militia, duello, odiis, homicidiis, alea, blasphemis, rapinis, & impudiciis peccari solet. Mercatores usuras palam exercent, pro sinceris fucatas merces plerumque proponunt, pretiis longè justo majoribus omnia vendunt, frequentia sunt apud eos perjuria, fraudesque in solvendis pedagiis, aliisque. Præter ista, quæ in artificibus sæpè occurrunt, plura alia, & quidem graviora sunt in ipsis reprehendenda; nempe opera malè conficiunt sive ex negligentia, sive ex imperitia, ex iis quæ fidei eorum committuntur,

ut panni , injustè apud se retinent ; festis diebus laborant ita ut vix cultui divino unquam vacent , & Dei verbum audiant , & familiam suam eodem modo teneant occupatam. Propter quæ & alia similia , ut observat idem Sanct. Carolus , plerique ex iis , quos recensuimus , numquam rectè ac validè sunt confessi. Iis merito annumerantur, Confessarii imperiti , & ignavi Pastores , quos Propheta increpat tanquam canes mutos , qui latrare non valent præ imperitia , animi imbecillitate , aut negligentia ; qui pascunt seipso , & non gregem ; quod in eo infirmum est non consolidant , quod ægrotum non sanant , & quod perit non quærunt ; quo fit ut vitam omnem in peccatis mortalibus traducant , & ideo non sunt absolvendi , nisi aut professionem suam deseruerint , si illius incapaces sint propter imperitiam , vel animi imbecillitatem ; aut emendationis signa dederint ; si ex sola negligentia & socordia quæ erant suæ professionis non impleverint ; nam ex Concilio generali Lateranensi secundo , can. 22. *falsa fit pœnitentia , cum pœnitens ab officio vel curiali , vel negotiali non recedit , quod sine peccato agi nulla ratione prævalet.* Et ex S. Bern. ser. 1. de Resurrect. *non satis cecidisse piget hominem , qui adhuc manere disponit in lubrico : aut errasse , qui ducem non quærit. Veræ compunctionis indicium opportunitatis fuga , subtrahitio occasionis.*

Tertia pars , nempe absolutionem differendam ad tempus : excepto tamen casu necessitatis , cum merito dubitatur , num in pœnitente adsit sufficiens contritio , probatur ; quia in Sacramentis conficiendis non licet uti materia dubia , præsertim ubi haberi potest certa ; peccaretque graviter

viter Sacerdos, qui ad sacrificium v.g. adhiberet panem hordeaceum. Quin Innoc. XI. & Clerus Gallicanus damnarunt hanc quorundam Modernorum propositionem: *Non est illicitum in Sacramentis conferendis sequi opinionem probabilem de valore Sacramenti, relicta tutiore.* Atqui contritio, de qua merito hic dubitatur, vel dubitare oportet, est materia necessaria Sacramenti Pœnitentiæ, sine qua esset irritum, & plane nullum: ergo absolutio non est concedenda sed differenda, si adsit ratio dubitandi de veritate contritionis.

Dixi, *excepto casu necessitatis*; quia in extremis periculis Medicus, cui desunt remedia indubitata, utitur dubiis, quibus spes salutis utcunque affulgere potest; melius enim est periclitantem ægrotum aliqua spe recreari, quam omnino desperare. Sic ex præcepto Ecclesiæ parvulus nondum plene natus, & in vitæ periculo constitutus, sacra abluitur unda in ea quæ patet corporis parte, etiam minima, quamvis dubitetur, num validus sit Baptismus ita collatus, & ideo sub conditione iterandus ex eodem Ecclesiæ præcepto, si parvulus contra spem evaserit. Idem censet S. Aug. de Sacram. Pœnit. sic enim loquitur ferm. 393. alias homil. 47. de peccatore, qui ad ultimam ægritudinem pœnitentiam distulit. *Si quis, inquit, positus in ultima necessitate ægritudinis voluerit accipere pœnitentiam, & accipit, & mox reconciliatur, & tunc vadit; fateor vobis, non illi negamus quod petit, sed non præsumimus quodd bene hinc exit . . . nunquid dico, damnabitur? non dico, sed non dico etiam, liberabitur . . . Ideo do tibi pœnitentiam, quia nescio; nam si scirem nihil tibi prodesse, non tibi darem. Item si scirem tibi prodesse,*  
non

*non te admonerem, non te terrerem.* Nihil quippe terribilius excogitari potest, quam in evidens æternæ damnationis periculum se conjicere. Unde S. Doctor sic pergit. *Duæ res sunt: aut ignoscitur tibi, aut non ignoscitur: quid horum tibi futurum sit, nescio: ergo: dimitte incertum, tene certum.*

Porro contritio debet esse dubia Confessario, quando pœnitens peccandi consuetudine implicatus profert in testificationem suæ conversionis, non preces fusas cum lacrymis; non opera, non mores emendatiores, sed verba duntaxat, quibus pollicetur, sicut in aliis confessionibus frustra jam pollicitus est, se amplius non peccaturum, cum ex Tertulliano lib. de pœnit. c. 6. Sacramenta, etiam Baptismi, non ideo præcise conferantur ut homines peccare desinant, sed quia jam desierunt. *Non ideo abluimur, inquit, ut delinquere desinamus, sed quia desimus, quoniam jam corde loti sumus. Ceterum si ab aquis peccare desistimus, necessitate, non sponte innocentiam induimus. Quis ergo in bonitate præcellens? cui non licet, an cui displicet malum esse? qui iubetur, an qui delectatur à crimine vacare? Et cap. II. Deliqui, dicito in Deum, & periclitator in æternum perire: itaque nunc pendeo, & maceror, & excrucior, ut Deum reconciliem mihi, quem delinquendo læsi.* Quibus verbis perspicuum est secundo & tertio sæculo, quibus floruit Tertullianus, Sacrorum Antistites in signum veræ contritionis exegisse opera, & morum emendationem.

Sanct. Ambros. lib. 2. de pœnitentia, cap. 5. scribit peccatores sua ætate, hoc est quarto sæculo, non alio modo testatam fecisse suam conversionem: *Qui agit pœnitentiam, inquit, non solam dilue-*

*diluere lacrymis debet peccatum suum; sed etiam emendatioribus factis operire & tegere delicta sua. Et cap. 6. homo es, & vis rogari ut ignoscas, & putas Deum tibi non roganti ignoscere?*

Sanct. August. quinto sæculo testatur Enchyrid. cap. 65. eandem disciplinam tunc in Ecclesia fuisse universalem, neque de ipsis criminibus, quamvis magnis, remittendis in sancta Ecclesia, Dei misericordia desperanda est agentibus pœnitentiam secundum modum sui cujusque peccati: in actione autem pœnitentiæ, ubi tale commissum est, ut is qui commisit à Christi etiam corpore separetur; non tam considerata est mensura temporis, quam doloris, cor enim contritum & humiliatum Deus non spernit. Verum quia plerumque dolor alterius cordis occultus est alteri, neque in aliorum notitiam per verba, aut quæcunque signa procedit . . . rectè constituuntur ab iis, qui Ecclesiis præsunt, tempora pœnitentiæ ut fiat satis etiam Ecclesiæ. Et laudato ferm. 393. peccatorem alloquens, qui petit pœnitentiam, & mox absolvitur, quia differri non potest, si scirem tibi nihil prodesse, non tibi darem. Item si scirem tibi prodesse, non te admonerem, non te terrerem: ergo dimitte incertum, tene certum.

Sanct. Gregorius, qui Ecclesiam rexit sexto & septimo sæculo, homilia 26. in Evang. ait: videndum quæ culpa præcessit, & quæ sit pœnitentia secuta post culpam, ut quos omnipotens Deus per compunctionis gratiam visitat, illos Pastoris sententia absolvat. Tunc enim vera est absolutio præsentis, cum æterni sequitur arbitrium Judicis. Et lib. 6. in 1. Reg. (si tamen illius operis est auctor) signum veræ conversionis non est in oris confessione, sed in afflictione pœnitentiæ. Tunc namque benè conversum peccatorem cernimus, cum digna afflictionis austeritate delere nititur quod loquen-

*loquendo confitetur.* Enimverò si fides esset semper adhibenda verbis confitentium, omnes, etiam evidenter indigni, essent absolvendi: quis enim eorum ore non proferat dolere se, & emendationem proponere? atqui scandalosum est, ex Innocentio XI. & erroneum ex Clero Gallicano, supra laudatis, asserere, pœnitenti habenti consuetudinem peccandi contra legem Dei, etsi emendationis spes nulla appareat, nec denegandam, nec differendam absolutionem, dummodo ore proferat se dolere, & proponere emendationem.

Ivo Carnotensis, ep. 228. quærenti Presbytero quomodo Ecclesiæ disciplina, juxta quam pœnitentes aliquandiu separantur à Corpore Christi, conciliari possit cum Prophetica sententia quæ dicit, *In quacunque hora peccator ingemuerit, salvus erit*; respondet sicut S. August. supra: quæ quæstio, inquit, facile solvitur, si interni Judicis animadversio & humanæ fragilitatis consideratio diligentius attendatur. Cum enim criminalis culpa delinquentem separet à capite & corpore, rationis ordo hoc exigit, ut internus Judex tanto remittat celerius, quanto solus magis videt interius: Judex verò, qui tantum videt in facie, usque adeo delinquentes sub peccati pœna detineat, donec per manifestum pœnitentiæ fructum quis sit pœnitentis affectus intelligat. Per internum enim gemitum satisfacit interno Judici, & idcirco indilata datur ab eo peccati remissio: Ecclesiæ verò, quia occulta cordis ignorat, non solvit ligatum, licet resuscitatum, nisi de monumento elatum, id est, publica satisfactione purgatum.

S. Carolus in Instructionibus Confessariorum (quas tanquam certas regulas tradiderunt Innoc. XIII. Sanct. Franciscus Salesius, vir suo sæculo  
om-

omnium mitissimus, in Constitutionibus Synodalibus tit. 9. cap. 5. num. 3. & Clerus Gallicanus anno 1655.) sic habet: *Confessarios monitos voluimus, ut donec emendationem perspexerint, absolutionem iis pœnitentibus procrastinent, quos verisimile est ad peccata iterum lapsuros, quantumvis polliceantur, ac spondeant ea se dimissuros. Hujusmodi verò sunt adolescentes, otio ut plurimum dediti, qui in ludis, comessationibus, ebrietatibus, & impudiciis majorem vitæ partem impendunt. Iis pariter accenseri debent blasphemi, detractores, turpiloquio addiçti, innumerique alii impii, qui semel tantum quotannis, tempore Quadragesimali labente, sese Sacerdoti sistunt ad confessionem; sicut universim omnes, qui per multos annos in eadem peccata prolapsi fuerunt, adjecto debitæ correctionis studio.*

Si quis autem obstinato animo, quod absit, locupletissimis hisce testimoniis refragaretur, cum ad experientiam provocaremus, exemplo periti Medici, quem æmuli tanquam circunforaneum Pharmacopolam, Gallicè, *Charlatan*, injustè traducunt, concedamus, inquit ille, quod ad sanitatem perduxit vestra curatio & mea. Febris hujus & illius adolescentis est libido, iracundi ira, ebriosi vinolentia? quis horum vestra curandi ratione convaluit? Ad summum pestiferas illas febres, cum essent continuæ, aliquando in tertianas & quartanas convertistis, sed ex toto non quieverunt, donec mihi se regendos præbuerint. Profero eosdem adolescentes jam victores libidinis, uxorem bene precantem Confessario, qui conjugem ad sobrietatem reduxit, totam familiam, quæ nunc summa pace fruitur, quam iracundus ille turbabat. Quæ cum ita sint, quis dubitabit illorum fidei animam suam committere, apud

apud quos ea sunt experimenta, qualia si Medicus corporum proferre posset, omnes catervatim ad eum confluerent?

Dices: Hæc curandi ratio sæpe morbum exasperat, & pœnitentes hujus disciplinæ impatientes aliquando à seipsis desperati, Religionis officia abjiciunt, & in omnia flagitia ruunt præcipientes. Ergo.

R. 1. Hoc argumentum nimis probat; ex eo enim concludere licet etiam manifestè indignis absolutionem esse concedendam, ne deteriores evadant: atqui indignum ea se probat, qui æquis Confessarii præceptis non acquiescit; nam inter conditiones confessionis sacramentalis requiritur ut sit parere parata. Præterea non sunt facienda mala, ut eveniant bona: atqui malum est eum absolvere extra casum necessitatis, de cujus conversione dubitatur.

R. 2. Distinguo antecedens: exasperat, si asperius dimittantur pœnitentes: Concedo: si blandè ac clementer, Nego antecedens. Itaque animarum vulnera non secus ac corporum quàm mollissimè sunt contrectanda; satis est lanio, ut carnes secet ac dividat: ac peritus Medicus imprimis sollicitus est quomodo vulneris dolorem mulceat, & summa artis illius est, ut dextre & quam minimo doloris sensu putredines amputet. In lanio inclementem & ineptum Confessarium cogita, qui durè & asperè indignos repellit: in Medico vero Confessarium, qui scit compati infirmitatibus pœnitentis, & ligat eum vinculis charitatis. Quodsi ille tanquam furens vincula abruptat, Confessarius nihilominus blandis verbis



bis illum dimittet; spero, inquit, te fanis consiliis assensum aliquando daturum, & ut Deus hanc tibi gratiam concedat, obnixè illum deprecabor.

Nec est cur Confessarium ita se gerentem quis nimis severitatis incuset: *ute enim*, inquit Sanctus Chrysostomus homil. 14. in 2. ad Cor. *febrè ac phrænesi laborantem misericordia prosequitur, isne qui in lecto eum sternit, ac vinculis astringit, atque à noxiis cibis & potionibus arcet? an qui ei mero se ingurgitandi facultatem præbet, ac sui juris & arbitrii eum esse jubet, omniaque facere, quæ ab homine sano atque incolumi valetudine fieri debent? an non morbum quoque hic exulcerat, qui humanitatis officio fungi sibi videtur, cum contra ille morbum pellat ac profiget? eodem modo hic quoque judicamus. Humanitatis enim est, ægrotis non ubique indulgere, ac præposteris ipsorum cupiditatibus adblandiri. Nemo eum, qui apud Corinthios stupri crimine se obstrinxerat, tam annabat, quam Paulus, qui eum satanæ tradi jubebat. Nemo rursus tam eum oderat, quam ii, qui peccanti applaudebant & obsequebantur . . . illi quidem malum, quod jam erat, auxerunt: hic verò id quoque, quod primum contractum fuerat, evulsit. Proinde non est quod hanc rem crudelitatis & sævitiae esse arbitraris, sed summæ clementiæ ac benignitatis, præstantissimæque medendi rationis, nec vulgaris erga peccatoris salutem curæ.*

Alia quamplurima solent objici adversus tertiam hancce nostram responsionem, quibus cumulatè satisfecimus in nostra Praxi pœnitentiaria, ad quam Lectorem remittimus, ne in immensum crescat iste Tractatus, qui longe est productior, quam proposueramus.

Q. 6. Quousque differenda est absolutio pœnitentibus, de quorum conversione dubitatur?

R. S. Chrysoft. loco cit. *Temporis moram non quero, sed animæ correctionem. Hoc itaque fac demonstres, sintne compuncti, sintne in melius inmutati, & res tota confecta est. Quod nisi ita sit, nihil profecto temporis diuturnitas emolumenti attulerit; neque enim sæpiusne obligatum vulnus fuerit querimus; sed an obligatio illa quicquam profuerit. Ac siquidem etiam ad exiguum tempus adhibita profuit, non jam adhibeatur: si autem nondum eam adhibuisse iuvit, etiam post decem annos adhibeatur. Denique hic tibi ejus, qui vincit, est, solvendi præscriptus terminus esto, nempe ipsius utilitas.*

Monuimus jam pœnitentes, quorum absolutio differtur ad tempus, puta ad mensem, interim fulciendos consiliis Confessarii, eoque frequentius, quo sunt infirmiores, & vehementioribus pulsantur tentationibus; alioquin brevi considerint animo, & ad ingenium redirent, absolutionisque dilatio ipsis esset inutilis, ne dicam perniciofa.

### §. III.

*Satisfit reliquis difficultatibus circa absolutionem.*

Q. I. *Confessarius, ut sit fidelis Christi Minister, neve indignos absolvat, teneturne scrutari pœnitentium dispositiones, & inquirere, quæ interdum premunt silentio?*

R. S. Thomas in 4. dist. 19. eum teneri. *Sacerdos, inquit, debet scrutari conscientiam peccatoris in confessione, quasi Medicus vulnus, & Judex causam;*  
quia

quia frequenter præ confusione confitens taceret, interrogatus revelat. Enimverò Medici est introspicere altitudinem vulneris quod denudat æger, corporis vires & habitum explorare, ut convenientia præscribat remedia. Est quoque Judicis percontari, num confessio sit plena & integra, tum maximè cum reus ipse est sui accusator; periculum enim est, ne amore sui excæcatus, & communi aliorum usu deceptus, plura excuset, quæ tamen damnanda sunt; *Væ peccatis hominum, quæ sola inusitata exhorrescimus; usitata verò . . . . quamvis tam magna sint, ut omnino claudi contra sese faciant regnum Dei, sæpè videndo ea tolerare, sæpè tolerando nonnulla etiam facere cogimur*, S. Aug. Enchir. cap. 80. Et S. Greg. Sæpe, inquit, de se mens ipsa mentitur, fitque ut aliud in intimis intentio suprimat, aliud tractantis animo superficies cogitationis ostendat, fingit se de bono opere amare quod non amat, de mundi autem gloria non amare quod amat. Denique Clerus Gallicanus propositionem jam ab Innocentio XI. proscriptam, *Non tenemur Confessario interroganti fateri peccati alicujus consuetudinem*, declaravit anno 1700. falsam, sacrilegiis faventem, Ministrorum Christi judiciariæ potestati, confessionis integritati, atque ipsius Sacramenti institutioni ac fini derogantem.

Monet tamen Angelicus Doctor citato loco, cavendum ne ejusmodi inquisitio pœnitenti sit offencilo. Esset autem,

i. Si interroget, de peccatis à quibus immunitatem pœnitentem satis ostendunt ejus vivendi institutum, & confessio, in qua non accusat nisi venialia peccata ex mera fragilitate & sine deliberata voluntate commissa; insulsæ enim & ab-

furdæ illæ interrogationes, præterquamquod confessionem sacramentalem in odium adducunt, ipsum ministerium contemptui exponunt, & indignationem provocant.

2. Si percontationibus suis flagitia detegat, quæ alioqui pœnitens in hominem cadere non credidisset; ejusmodi enim patefactio incendit ad ea committenda, nec desunt exempla eorum, qui in libidinis insanias prolapsi sunt, à quibus prius sani vixerant, quam à Confessario eas edocerentur. Sacerdos igitur directe & aperte non quæret à juvene, num se contaminaverit nefandis illis criminibus, quibus violantur jura naturæ; sed interrogabit de iis, quæ sunt communia, & omnibus nota, num scilicet, turpibus delectatus fuerit, sive aspectu, sive auditu, sive tactu, vel sola cogitatione. Si pœnitens respondeat se horum non esse conscium, ulterius non progredietur percontatio. Si verò pœnitens se in iis deliquisse confiteatur, perget Confessarius non docendo, sed quærendo quid fecerit, aut passus fuerit, an solus, an cum aliquo, ac denique quomodo illud perpetraverit; & ex responsis pœnitentis facile intelliget, an ille reus sit, necne, mollitiei, sodomix, &c. *Non fiat explicita interrogatio*, inquit Sanct. Thomas loco citato, *de peccatis, nisi de illis, quæ omnibus manifesta sunt: de aliis autem adinventionibus peccatorum ita debet à longinquo fieri interrogatio, ut si commisit, dicat; si non commisit, non addiscat.*

Q. 2. *Quandonam tenetur Confessarius interrogare pœnitentem?*

R. Tenetur

1. Quo-

1. Quoties advertit eum præ ignorantia, inadvertentia, aut alio quovis defectu, non explicare peccatorum species, circumstantias, & numerum; de fide enim est ea esse explicanda, pertinereque ad integritatem confessionis: Minister autem Sacramenti cavere debet, ne quid defit integritati Sacramenti quod administrat; peccaretque graviter, si illius negligentia Sacramentum conficeretur mutilum.

2. Quando pœnitens non exponit peccata lethalia, quorum ipse Confessarius aliunde certò novit illum esse reum; quæ frequentius occurrunt, in exemplum adduco. Pœnitens aliquando nullis conscientiae stimulis pungitur, quòd usuras exerceat, libros venditet, in quibus multa continentur contra fidem, vel bonos mores; onera Reipublicæ injustè distribuat; larga munera ab iis accipiat, qui ab ipso, vel vexari timent, vel sublevari sperant, sive per fas, sive per nefas: Parochianos verbo Dei rarissime pascit, si sit Pastor. Iis accenseri debent, qui cum per annum in omni genere scelerum cum aliorum scandalo volutentur, instante Paschate, apud extraneum Sacerdotem peccata deponunt in fraudem disciplinæ, & aliquot post dies proprio Sacerdoti nonnisi levia confitentur. Confessarius in omnibus his & aliis similibus exemplis tenetur sciscitari à pœnitente, cur gravium illorum peccatorum nullam faciat mentionem; pronuntiare illum absolutione indignum, nisi pro illis satisfaciât, & in melius mutetur, imo præteritas confessiones esse sacrilegas, & idèò iterandas, utpote quæ fuerint sine emendationis proposito. Hujusce autem responsionis ratio patet ex dictis; nimirum nun-

quam, sub quovis prætextu, licet indignis conferre Sacramenta, maximè si petantur secreto: atqui in allatis exemplis pœnitentes sunt evidenter indigni, & absolutionem secreto petunt: ergo Confessarius eam sub gravi peccato denegare tenetur, quandiu sufficientia emendationis signa non dederint.

3. Quamvis Confessario non constet pœnitentem peccata lethalia reticere, quoties tamen adest legitima ratio dubitandi num reticeat, tenetur illum interrogare, tum quia cavere debet, ut diximus, ne confessioni integritas desit; tum maximè quia morale periculum est, ne pœnitens contritione careat, & ex vincibili saltem ignorantia, gravi alicui peccato adhærescat.

Est autem Confessario dubitandi locus,

1. Quando in civitate, v. g. in aliqua arte, aut in quovis vitæ genere dominantur certa vitia, puta usuræ, fraudes in Artificibus, injustitiæ in distribuendis Reipublicæ oneribus, in venditionibus, graves & publicæ negligentiae, seu prævaricationes in Ministris Ecclesiæ; cum enim constet Confessario gravia illa peccata in loco vigere & perpetrari à pluribus, procul dubio timere debet, ne hic pœnitens, quem non novit, sit unus ex illis, ac proinde illius conscientiam perscrutari tenetur: *Interrogetur peccator*, inquit sanctus Thomas loco citato, *de peccatis quæ consueverunt in hominibus illius conditionis abundare.*

2. Quando pœnitens sæpius in idem crimen lapsus est, aut si semel, vel quia unica illius criminis committendi occurrit occasio, vel quia à paucis diebus absolutionis beneficium percepit. Singulis propositionis partes expono.

Ac

Ac r. quidem cum pœnitens sæpius in idem crimen lapsus est, suspiciōem injicit, ne superior confessio contritione caruerit; ideoque Confessarius inquirat necesse est, utrū pœnitens aliquamdiu post confessionem dignos pœnitentiæ fructus fecerit, hoc est, strenuè adversus tentationes, & peccandi occasiones pugnaverit, aut paulo post confessionem, seu data prima occasione lapsus fuerit. Si primum, ratam judicabit confessionem, ibique sistet percontatio. Si secundum, irritam & sacrilegam pronuntiabit confessionem, pergetque inquirens utrū idem defectus in superioribus confessionibus occurrerit, & ita fortè detegat innumera crimina, quæ reticebat pœnitens, propter quæ iterandæ sunt confessiones, postquam sufficientia pœnitentiæ & emendationis signa dederit. Idem ferendum judicium de eo, qui semel aut bis lapsus est, quia una, aut altera dumtaxat peccandi occurrit occasio; pœnitens v. g. confitetur in solemniis nativitatis B. Virginis a festo sancti Petri jejunium Ecclesiasticum semel se solvisse, & quidem sine legitima causa; Confessarius timere debet, ne ejusmodi pœnitens soleat transgredi præcepta jejunii; proptereaue sciscitabitur quæ sit ejus agendi ratio occurrente jejunii præcepto. Eandem adhibebit cautionem erga eum, qui Paschate confitetur se sine causa non jejunasse, nisi ter quavis Quadragesimæ hebdomada; aut solvisse jejunium quoties ad comestationes ab amicis invitatus fuit, aut eos, juxta mundanorum morem, à se invitandos existimavit: aut denique antevertisse horam prandii, & in cœnula famem explevisse. Extra casus recensitos interrogatio non solum est superflua,

flua , sed pœnitenti molesta , magisque obest , quam profit.

Q. 5. *Estne monendus pœnitens , qui ex ignorantia legem non observat ?*

R. Si laborat ignorantia vincibili , monendus est ; quia ejusmodi ignorantia non excusat à peccato. Cum igitur conclusiones primariæ juris naturalis invicibiliter ignorari nequeant , ut suo loco probavimus , monendi sunt Magistratus , Pastores , Confessarii , &c. quibus religio non est , quominus graviora sui muneris negligant , irritas esse absolutiones ipsis ita indormientibus concessas.

R. 2. Quando ignorantia est invincibilis , monendus est pœnitens , 1. si illa ignorantia vergat in damnum proximi. Talis est ignorantia illius , qui bona fide lucrum percipit vi mutui ; quamvis enim possit quis invincibiliter ignorare sœnus esse illicitum , cum non pugnet nisi contra remotiores conclusiones legis naturalis ; quia tamen ex iniquo illo contractu proximus læditur , Confessarius tenetur religionem ejusmodi usurario injicere , ac præcipere , ut contractus illos rescindat. 2. Si error pœnitentis sit publicus ; Confessarius enim non posset illum dissimulare sine aliorum offensione , & scandalo. 3. Si sit occultus , & ex commonitione sperandum sit commodum , nedum timendum incommodum ; quia Confessarius , utpotè Dei Minister , & Judex ab eo constitutus , tenetur vindicare legem , præsertim ad versus eos , in quos jurisdictionem exercet. Aliquando tamen commonitio differenda est ad tempus opportunum , ut videre est in exemplo conjugatæ,



jugatæ, quæ contraxit cum impedimento ex crimine occulto, puta ex fornicatione cum consanguineo conjugis; Confessarius enim inconsiderate admodum ipsi detegeret illico impedimentum, quod illa invincibiliter ignorat; quia removet bonam fidem, qua utitur matrimonio, eamque conjiceret in occasionem proximam fornicationis & incestus, cum non possit separari ab eo, quem hæctenus credidit suum legitimum conjugem. Confessarius igitur in iis & similibus circumstantiis pœnitentem prætextu gravioris delicti dimittet ad tempus, dissimulabitque impedimentum, donec ab Episcopo facultatem obtinuerit restituendi matrimonium in integrum. Quomodo vero id fieri debeat, dicetur ubi de matrimonio.

Dixi; Si ex communicatione commodum sit sperandum; Quia si adversus malum occultum & invincibiliter ignoratum, nullum appareat remedium, & gravia incommoda prævideantur secutura, monita conjux, v.g. divortium faceret cum scandalo, & magno liberorum detrimento, dissimulandum est impedimentum, & illa bona fide relinquenda.

Q. 4. *Licetne impertire absolutionem moribundo vocis & rationis usu destituto?*

Certum est 1. impertiendam, si ex aliorum testimonio habeatur ipsum prius signa dedisse pœnitentiæ, & Sacerdotem postulasse; ita enim præcipiunt Concil. Carthaginense IV. can. 76. Arausicanum I. can. 12. Toletanum XII. can. 2. S. Leo, ep. 83. alias 91. & omnes libri Rituales.

Certum est 2. si quis in ipso actu criminis, v. g. in duello, vel ebrietate, sensibus destituatur,

moxque moriturus credatur, absolvendum non esse, nec sacro oleo unguendum, cum crimen manifestum per pœnitentiam non retractaverit. Unde meritò sacra Facultas Parisiensis anno 1665. contrariam opinionem declaravit falsam, temerariam, scandalosam, & Sacramento Pœnitentiæ injuriosam. Quæstio itaque solùm esse potest de eo, qui Christiane vixit, vel post peccatum pœnitendi spatium habuit, sed nullum signum doloris dedit, an in extremo illo vitæ periculo possit absolvi?

R. Duæ sunt oppositæ Theologorum sententiæ.

Prima affirmat non solum posse, sed etiam debere absolvi; nititurque 1. auctoritate S. Augustini, qui libro 1. de adulterinis conjugis, cap. 28. scribit, catechumenos, vel pœnitentes, qui adulterina retinent consortia, baptizandos, vel reconciliandos esse, si in infirmitate positi vocis & rationis usum subitò amiserint: *Baptizandos puto, inquit, ut etiam hoc peccatum (adulteri) cum cæteris lavacro regenerationis abluatur. Quis enim novit, utrum fortassis adulterinæ carnis illecebra usque ad Baptismum statuerant detineri? . . . . quæ autem Baptismatis, eadem reconciliationis est causa, si fortè pœnitentem finiendæ vitæ periculum præoccupaverit: nec ipsos enim ex hac vita sine arrha suæ pacis exire velle debet mater Ecclesiæ.*

2. Auctoritate quarundam Ecclesiarum, ut Ecclesiæ Lemovicensis in Statutis Synodalibus anno 1620. cap. 21. in quo sic habetur: *Poterit quoque idem applicari remedium ei, qui judicio, omniumque sensuum usu statim captus est, non petita pœnitentia, nulloque signo contritionis edito . . . . licet hoc in casu*

*casu nihil de absolutionis effectu promittere possimas. Sed animarum salvandarum causa nullum remedium omnittere debemus, quod Deus potestati nostræ commisit.*

3. Ratione ; quia in casu extremæ necessitatis, si desit remedium indubitatum, adhibendum est dubium : atqui Sacramentum Pœnitentiæ in nostra hypothesi est remedium dubium : ergo est adhibendum.

Major constat apud omnes & supra à nobis est probata. Minorem negant patroni oppositæ sententiæ, contenduntque Sacramentum in iis circumstantiis collatum non esse dubium, sed prorsus irritum. Quare

Minor probatur : ideo Sacramentum Pœnitentiæ in ejusmodi circumstantiis collatum esset irritum & nullum ; quia deesset materia ejus essentialis : nempe contritio sensibilis : atqui 1. non constat apud omnes Theologos contritionem esse partem essentialem Sacramenti, cum tota Scotistarum Schola doceat eam esse dumtaxat dispositionem præviam & necessariam : ergo Sacerdos ex illa opinione, quam tot celebres Theologi propugnant, saltem dubitare potest an valeat Sacramentum ; & in ejusmodi dubio æque tenetur illud conferre, ac Sacramentum Extremæ Unctionis, quod juxta universalem Ecclesiæ disciplinam, in nostra hypothesi administrandum est. 2. Certum non est in illo moribundo deesse contritionem ; nisi enim conjectaretur, Sacramentum Extremæ Unctionis non esset ei conferendum, sicut revera non convertitur illi, qui in ipso actu criminis sensibus destitutus est.

Nec

Nec dicas necessum non esse ad Sacramentum Extremæ Unctionis, ut contritio sit sensibilis, sicut ad Sacramentum Pœnitentiæ, cujus est pars essentialis, ac proinde debet esse signum sensibile. Namque 1. plures Theologi, ut Scotistæ, negant contritionem esse partem Sacramenti. 2. Necesse non est ut pars Sacramenti actu percipiatur sensibus; sed satis est ut percipi possit, Sacerdos v. g. qui conjectaret adesse panem, qui revera adest, proferretque verba consecratoria, validè consecraret, quamvis nec visu nec tactu panem perciperet. Quis autem affirmaverit istum moribundum, dum esset rationis compos, pro peccatis suis Deum non orasse, genua non flexisse, pectus non tutudisse in signum doloris? Quot ergo rationes sperandi, licet cum aliqua formidine, validam fore absolutionem, ideoque impertiendam, cum in extremis dubia adhiberi debeant remedia, si desint indubitata.

Opposita sententia negans in proposito casu concedendam absolutionem, hæc profert momenta.

1. Nullum extat vestigium in Traditione, absolutionis concessæ homini, qui nullum dedit pœnitentiæ signum, quin Concilia & Patres supra laudati, omnesque libri Rituales communiter præscribunt ejusmodi moribundos esse reconciliandos, modò adsint testes, qui Sacerdotem certiores faciant eos Sacramentum postulasse. Nec testimonium Sancti Augustini à patronis oppositæ sententiæ laudatum ipsis favet; agit enim S. Doctor de peccatoribus, qui per publicam pœnitentiam expiabantur, vultque piè credendum eos omnem carnalem affectum è cordibus expulisse, quam-

quamvis nondum concubinas actu & de facto è domibus suis ejecissent.

2. Sacramentum Pœnitentiæ celebratur in forma judicii reconciliativi, quod necessario constat ex sententia Judicis, & peccatoris confessione, ac contritione: atqui in moribundo, de quo est sermo, nulla confessio, nequidem implicita, nulla contritio sensibilis, ergo Sacramentum Pœnitentiæ non potest illi conferri.

3. Cum sequens propositio ad sacram Facultatem Parisiensem delata fuisset an. 1665. *Talis infirmus, qui amisit loquelam, vel usum rationis, si bene vivebat, & frequentabat confessionem, communionem, quamvis non petierit Sacramenta, quia ex insperato talia acciderunt, debet præsumi contritus, & faciente aliquo confessionem generalem pro eo, sicut fit in populo, Sacerdos faciat absolutionem ab omni sententia & peccato:* Sic autem de ista propositione censuit sacer Ordo, *Doctrina hujus propositionis universim & absolute sumpta, est in praxi periculosa.* Quibus verbis videtur non excludere quosdam particulares casus, in quibus ejusmodi moribundi absolvi fortè possent absque periculo, v. g. si plures naufragio perirent; dubium quippe non est quia ex iis aliqui absolutionem exoptent, peccatores se confiteantur, & à Deo veniam petant.

Quæ ex oppositis sententiis in praxi sit præferenda, nostrum non est definire, maxime, cum experti simus Episcopos, eosque Parisienses Theologos non unius esse sententiæ circa præsentem quæstionem ac mandasse Sacerdotibus sibi subditis, alios ut in casu de quo est sermo impertirent absolutionem, alios ut denegarent; maxime cum præ-

præsto sit Extrema Unctio, quæ vim habet delendi peccata, etiam lethalia, si per absolutionem remitti nequeant.

## CAPUT XII.

### *De Effectibus Sacramenti Pœnitentiæ.*

Q. 1. *Qui sunt effectus Sacramenti Pœnitentiæ?*

R. Quinque numerantur. 1. Remissio peccati & pœnæ æternæ. 2. Immunitio pœnæ temporalis pro majori, vel minori dispositione pœnitentis. 3. Redintegratio amicitiae cum Deo per peccatum violatæ. 4. Restitutio & reviviscientia, ut loquuntur, virtutum ac meritorum, quæ per peccatum fuerant deperdita. 5. Auxilia actualia, seu jus ad illa accipienda tempore opportuno, quibus peccator justificatus possit deinceps vitare peccata, & in bono proficere, ac perseverare.

Primus & secundus effectus probantur ex iis, quæ in hocce Tractatu disputata sunt; nihilque nobis occurrit, quod adjici debeat.

De tertio effectû plura, & quidem gravissimo-  
menti hic essent dicenda, ut eluceat stupenda  
mutatio, quæ per absolutionem validam fit in  
peccatore, dum recipitur in pristinam Dei ami-  
citiam; nisi ista maximo quo potuimus studio ex-  
posuissemus, Tractatu de Gratia, ubi de justifi-  
catione à pag. 390. ad pag. 430. ad quæ operæ pre-  
tium est recurat Lector, qui perspectam hujus  
Sacramenti virtutem habere, eamque Fideles do-  
cere voluerit. Ibi quoque à pagina 451. & seq.  
sup.

suppeditantur indicia , quibus conjectare liceat utrum collata , vel percepta absolutio effectum consecuta fuerit.

Circa quartum autem & quintum effectum nonnulla sunt elucidanda. Itaque

Q. 2. *Reviviscuntne virtute absolutionis bonorum operum merita per subsequens peccatum mortificata ?*

Nota triplex à Theologis operum genus distingui ; alia scilicet sunt mortifera , alia mortua , alia mortificata.

Opera mortifera sunt peccata mortalia , quæ separant à Deo , & charitatem excludunt , quæ vivit anima : *Vita corporis anima est* , inquit Sanctus Augustinus *ferm. 65. vita animæ Deus est. Sicut adest vita corporis , id est , anima , ne moriatur corpus : sic debet adesse vita animæ , hoc est Deus , ne moriatur anima.*

Opera mortua ea sunt , quæ homo ex gratia elicit in statu peccati mortalis ; cùm enim opera illa careant habituali gratia ; seu charitate , quæ est vita anima , rectè dicuntur opera mortua.

Opera mortificata dicuntur ea , quæ ex gratia , facta sunt ab homine justo priusquam lapsus esset in peccatum mortale , quo ejusmodi operibus vita adimitur.

Non agitur hic de operibus mortiferis , cùm vitæ sint incapacia , illamque formaliter excludant.

Certum est opera mortua non reviviscere ; quod enim nunquam vixit , reviviscere non potest : atqui opera mortua nunquam vixerunt , cùm facta sint sine charitate.

Quæstio igitur est dumtaxat de operibus mortificata-

tificatis, utrum scilicet per absolutionem reviviscant?

Negarunt quidam Veteres, ut refert sanctus Thomas 3. parte, quæst. 89. artic. 5. sed cum Theologorum turba

R. Opera mortificata per veram absolutionem reviviscunt, non quidem quasi actio ipsa transiens, secundum suum esse redeat, quod est impossibile; sed quod meritum illius à Deo imputetur pœnitenti ad salutem.

Probatur ex Scriptura & Sanctis Patribus.

Joelis 2. ait Dominus: *Convertimini ad me in toto corde vestro . . . . . & reddam vobis annos, quos comedit locusta, bruchus, & rubigo, & eruca; quod Sanct. Hieronymus interpretatur de meritis per pœnitentiam recuperatis: Annos, inquit, quos perturbationibus ante regnantibus perdideratis in vobis, quando opera vestra locusta, bruchus, rubigo, erucaque consumpserant, Deus vobis perire non passus est; tunc comedetis fructus justitiæ, & sanabimini, & laudabitis nomen Domini Dei vestri, qui fecit vobiscum mirabilia, Galat. 3. Tanta passi estis sine causa, si tamen sine causa. Quibus posterioribus verbis significat Apostolus, Galatas, qui à fide defecerant, præmium pristinorum laborum recepturos, si ad sanio rem mentem redirent, ut advertit S. Hieronymus in hunc locum, ubi sic habet: *Quicumque ob Christi fidem laboraverit, & postea lapsus fuerit in peccatum, sicut priora dicitur passus fuisse, dum peccat; sic rursum non perdet ea, si ad pristinam fidem, & antiquum studium revertatur.**

S. Ambrosius de filio prodigo: *Vide, inquit, quam bonus Deus, & facilis indulgere peccatis, non solum ablata restituit, sed etiam insperata concedit.*

Dices:



Dices : Ezech. 18. *Si averterit se justus à justitia sua . . . omnes justitiæ ejus , quas fecerat , non recordabuntur : Ergo.*

Distinguo antec. Si averterit se , & impœnitens in iniquitate sua moriatur , ut ibidem dicitur , Conc. Si averterit se , & facti pœnitens ad Deum convertatur , Nego antec. Habetur enim vers. 22. *Omnium iniquitatum ejus quas operatus est , non recordabor , in Justitia sua , quam operatus est , vivet.*

Q. 3. *Reviviscentia bonorum operum estne proprietas à justificatione inseparabilis , quemadmodum risivum à rationali , & virtutes infusæ à gratia sanctificante ?*

R. Minimè ; ex eo enim quod Deus veniam peccatori concedat , eumque in suam amicitiam recipiat , non necessario sequitur ipsi imputanda priorum operum merita , ut patet exemplo Aulici , qui post offensam redit in gratiam Principis , & consuetam familiaritatem , nec tamen in pristinam dignitatem , alteri jam forte collatam , restituitur ; novumque censetur Regis beneficium , si ipsi alia similis conferatur. Sic Ecclesiæ Pastores constituerunt , ne quisquam post publicam alicujus criminis pœnitentiam Clericatum accipiat , vel ad Clericatum redeat , ut observat S. Augustinus epist. 185. alias 50. Mera est igitur Dei liberalitas , quod ita absolvat peccatorem , ut ei imputet ad vitam æternam merita , quæ ante peccatum comparaverat.

Q. 4. *Reviviscuntne merita in eodem perfectionis gradu ?*

Certum est merita non posse redire in eodem perfectionis gradu , quin simul gratia sanctificans , & virtutum dona quibus pœnitens ante lapsum

*D. Habert Theolog. Tom. VI. Kk orna-*

ornatus fuerat, in eodem gradu restituantur, quia major gloria respondet majori gratiæ & charitati; nec potest fieri, ut quis habeat merita ac gloriam ampliorem cum minori sanctitate, & charitate.

Ut igitur huic quæstioni fiat satis, expendendum est, utrum gratia sanctificans, virtutum dona, & bonorum operum merita per absolutionem reviviscant in ea perfectione, quæ lapsum præcesserat. Cùm autem nec Scriptura, nec Traditio quæstionem dilucidè definiant, Theologi in varias abeunt partes, & unusquisque opinatur ut verisimilius sibi videtur, ne dicam, prout affectus est.

Prima sententia contendit gratiam sanctificantem, virtutes, & bonorum operum merita per quamcunque Pœnitentiam, modo sufficiens sit ad obtinendam absolutionem, semper reviviscere in eadem perfectione.

Secunda priori formaliter contraria, negat gratiam sanctificantem & virtutes per præcedens peccatum deperditas ullatenus reviviscere; vultque pœnitentem virtute absolutionis gratiam recipere duntaxat pro modo suæ dispositionis. Quod si quæras à patronis hujusce opinionis, quomodo ergo bonorum operum merita reviviscant ad vitam æternam (ut omnes Theologi communiter asserunt) siquidem visio beatifica, quæ est vita æterna, Joan. 17. Resp. gratia sanctificanti, nec poterit quis esse major in gloria, si ante mortem in charitate minor fuerit, ut jam observavimus. Respondent non reviviscere merita ad gloriam essentialem, quæ in visione beatifica consistit; sed ad accidentalem duntaxat, quam reponunt  
in

in gaudio speciali, quod pœnitens percipiet ex bonis operibus, quæ lapsum præcesserunt.

Sed ista expositio adversatur communi Theologorum sententiæ de reviviscentia bonorum operum virtute absolutionis; nam pœnitens nondum reconciliatus, imo quivis peccator deletatur conscientia recte facti. Unde sic conficitur argumentum. Absolutio sacramentalis mortificata opera vivificat, & merita per peccatum subsequens amissa restituit: atqui per peccatum nec conscientia bonorum operum, nec gaudium naturaliter inde consequens perdita sunt; ergo in illis reponenda non est reviviscentia, quam Patres & Theologi laudant tanquam singulare Dei beneficium, & mirabilem absolutionis effectum.

Tertia sententia, quæ via incendit media inter duo illa extrema, docet pœnitentem, præter gratiam sanctificantem, quæ respondet ejus pœnitentiæ, accipere insuper gradus gratiæ & virtutum quas per lapsum amiserat; & bonorum operum præcedentia merita ei imputari ad vitam æternam, & præmium essentiale pro intensiori, vel remissiori pœnitentia: cui sententiæ subscribendum videtur. Quare ad propositam quæstionem

R. Gratia sanctificans, virtutum dona, & bonorum operum merita, per absolutionem reviviscunt, pro majori, vel minori peccatoris pœnitentia, ita ut si pœnitentia ejus fuerit maxime vehemens & intensa, per absolutionem recuperet quidquid gratiæ & meriti per peccatum amiserat; si verò fuerit admodum remissa, parum, vel etiam forte nihil, ex iis reparet.

Probatur 1. auctoritate Concilii Tridentini, sess. 14. cap. 2. ubi expressè docet lapsos post baptismum, non nisi per acrem & incensam pœnitentiam resurgere ad integram sanitatem, à qua per peccatum exciderunt: *Ad quam, inquit, novitatem & integritatem per Sacramentum Pœnitentiæ sine magnis nostris fletibus & laboribus divina id exigente iustitia, pervenire nequaquam possumus.*

Probatur 2. ex S. Thoma 3. part. quæst. 89. art. 2. in quo sic habet: *Contingit autem intensiorem motus pœnitentis quandoque proportionatam esse majori gratiæ, quam illa, à qua exciderat per peccatum: quandoque autem æquali, quandoque vero minori. Et ideo pœnitens quandoque resurgit in majori gratia, quam prius habuerat, quandoque autem in æquali, quandoque etiam in minori. Et in responsione ad secundum: Pœnitentia, quantum est de se, habet virtutem reparandi defectus ad perfectum, & etiam promovendi in ulteriorem statum. Sed hoc quandoque impeditur ex parte hominis, qui remissius movetur in Deum, & in detestationem peccati. Et artic. 5. ad 3. Qui per pœnitentiam resurgit in minori charitate, consequetur quidem præmium essentiale, secundum quantitatem charitatis, in qua invenitur. Habebit tamen gaudium majus de operibus in prima charitate factis, quam de operibus, quæ in secunda fecit; quod pertinet ad præmium accidentale.*

Probatur 3. ratione triplici. 1. Opposita sententia in praxi est perniciofa; fovet enim pœnitentium inertiam, è pectoribus excludit voluntariam sui dejectionem, ac consequenter veram pœnitentiam cap. 9. *Est prosternendi & humiliificandi hominis disciplina: ut quid enim mœrore animum dejiceret, apud Deum ingemisceret, jejuniis preces aleret,*

aleret, qui præsumit sibi brevi lacrymula, & præteritorum flagitiorum displicentia etiam remissa restituendam ingentem meritorum copiam, quam ante horrendos lapsus comparaverat, & ideo anteponendum fore pluribus aliis: qui non ita fœde in voluptatum cœno volutati sunt? Illud absurdum amplius patefiet sequenti ratione.

2. Igitur supponamus duos homines justos, quorum alter vitam arctiorem, & asperiores proficitur, alter paulo laxiorem, & ambos in laudabili agendi instituto per decennium perseverasse, quo elapso, posterior moriatur, prior verò omni flagitiorum generi se addicat, donec morti proximus per remissam pœnitentiam ad Deum revertatur. Ille, juxta oppositam sententiam, subito evadit altero longe sanctior, Deo acceptior, propter intensas virtutes & copiosa merita, quæ lapsum præcesserunt, & integre reviviscunt, ac consequenter majori gloria, ac felicitate est donandus. Atqui illud, omnium judicio, est longè absurdissimum; ergo virtutes & merita integre non reviviscunt, nisi per intensam contritionem, & dignos pœnitentiæ fructus. De iis, qui post gravia delicta sic ad Deum redeunt, intelligendum scribit Sanct. Gregorius hom. 34. in Evangel. quod legitur, Luc. 15. majus gaudium esse in cœlo de peccato pœnitente, quam de justo stante: *Quia, inquit, Dux in prælio plus eum militem diligit, qui post fugam reversus, hostem fortiter premit, quam illum, qui nunquam terga præbuit & nunquam aliquid fortiter gessit. Sic agricola illam amplius terram amat, quæ post spinas, uberes fruges profert, quam eam, quæ nunquam spinas habuit, & nunquam fertilem messem producit.*

Tertia ratio ducitur ab experientia eorum, qui per pœnitentiam surgunt è cœno vitiorum, in quod è statu eximiæ virtutis, veluti è cœlo turpiter se immerferant, ut status Religiosi desertores. Si quorundam ex iis pœnitentia fuit intensa ac vehemens, vel ipso sensu percipitur in illis pristinam charitatem, cæterasque virtutes revixisse, ideoque meliores esse pluribus justis, qui non indigent pœnitentia: *Ex ipso enim suo dolore compuncti*, inquit S. Gregorius citata homilia 34. *inardescunt in amorem Dei, seseque in magnis virtutibus exercent, honores fugiunt, acceptis contumeliis lætantur, flagrant desiderio, ad cœlestem patriam anhelant; concupiscentiam, cui habenas laxaverant, fortiter comprimunt, & vitiosos habitus longa consuetudine contractos, quasi sentes in animo radicata, solícite evellunt contrariis operibus.* Qui verò fuerunt in pœnitentia remissi, cernuntur ægre ad pietatis opera ferri, calcaribus indigent vixque disciplina eos ab assuetis coercet, rara illorum compunctio, oratio sine devotione, tepida conversatio, animalis cogitatio, ut loquitur sanctus Bernardus. Quis autem ejusmodi pœnitentes illis anteponat justis, *qui tanto sibi in rebus licitis usum præbent*, inquit sanctus Gregorius citata homilia, *quanto se perpetrasse nulla illicita meminerunt*; audeatque asserere in iis præter charitatem respondentem remissæ illorum pœnitentiæ, priorem revixisse in eodem perfectionis gradu, cum certum sit magnam charitatem otiosam non esse, sed magna operari?

Q. 5. *Si quis post pœnitentiam iterum labatur, reviviscuntne etiam peccata per absolutionem remissa?*

R. Non

R. Non redeunt formaliter , sed virtualiter dumtaxat.

Prima pars probatur ; Quia in peccato tria spectari possunt. Primum, actio ipsa inordinata. Secundum, reatus culpæ, seu macula peccati ex actione inordinata in anima remanens. Tertium, reatus pœnæ æternæ, atqui nihil horum formaliter reviviscit per lapsum recidivum: ergo.

Minoris veritas elucebit in hypothese quod pœnitens postea lapsus sit ex præsumptione, & peccatum ejus prius per absolutionem deletum fuerit desperatio; in illa quippe hypothese præsumptio 1. Revocare non potest actum desperationis, cum illum formaliter excludat. 2. Non inducit maculam desperationis, utpote peccati sibi oppositi; absurdum enim est dicere eum, qui præsumpsit, reum esse desperationis. 3. Non suscitatur prioris peccati dimissi reatum pœnæ æternæ; quia reatus ille est inseparabilis à reatu culpæ repugnatque cum, qui immunis est à macula peccati desperationis, reum esse pœnæ æternæ peccato desperationis debitæ: ergo peccata per absolutionem dimissa, formaliter non redeunt per lapsum recidivum.

Nec dicas lapsum recidivum non esse quidem causam physicam reviviscentiæ, propter rationem allatam; sed posse dici causam moralem, quatenus lapsus recidivus meretur, ut Deus revocet gratiam sub conditione concessam; modo pœnitens iterum non labatur. Ne, inquam, hoc dicas; quia Deus non potest restituere peccatum deletum, sicut restituit virtutes per subsequens peccatum extinctas, alioquin esset auctor peccati.

Secunda pars, nempe peccata per absolutionem remissa, virtualiter seu æquivalenter redire per lapsum recidivum, probatur; quia, ut peccatum dimissum verè dicatur virtualiter reviviscere, satis est quod subsequens contrahat ex illo circumstantiam, quæ malitiam ejus multum aggravet, & peccatorem obnoxium reddat acerbiori supplicio. Sic in judiciis humanis fur jam multatus, si furtum iteret, pejor judicatur, nec virgis cæditur sicut prius, sed suspendio suffocatur. Atqui lapsus recidivus ex peccatis per absolutionem dimissis contrahit specialem malitiam graviore pœna plectendam, & quidem triplici de causa.

Primo, qui iterum labitur, non potest ostendere ignorantiam, quæ peccatum non parum minuit, nec habet partem in oratione Domini nostri. *Pater dimitte illis, non enim sciunt quid faciunt*, Luc. 23. in pœnitentia quippe intellexit quam amarum sit dereliquisse Dominum, quam fallaces voluptatum terrenarum illecebræ, propriam exhorruit insaniam, ingemuit, coram Deo se dejecit, & lacrymatus est; veniam non solum concessit pius Pater, sed insuper stolam sanctitatis & omnium virtutum ornamenta statim protulit, & ad spirituales delicias admisit, ut non fide tantum, sed & experimento disceret quanta sit felicitas adhærere Deo & mandatis ejus. His momentis Apostolorum Princeps epist. 2. cap. 2. exagitat eos, qui post actam pœnitentiam peccatis se iterum implicant: *melius enim erat illis, inquit, non cognoscere viam justitiæ, quam post agnitionem retrorsum converti ab eo, quod illis traditum est, sancto mandato; contigit enim eis illud veri proverbii: Canis rever-*  
sus



*ſus ad vomitum, & ſus lota in volutabro luti.* Apoſtolus quoque Paulus Hebr. 6. valde exaggerat hancce peccati recidivi circumſtantiam: *Impoſſibile eſt enim, inquit, eos, qui ſemel ſunt illuminati, guſtaverunt etiam donum cœleſte, & participes facti ſunt Spiritus Sancti . . . . . & prolapſi ſunt; rurfus renovari ad pœnitentiam.* Explicuimus ſuo loco, quo ſenſu vox, *impoſſibile*, ſit accipienda.

Secundo, S. Thomas & omnes Theologi in peccato recidivo agnoſcunt ingrati tudinem ex peccatis dimiſſis exurgentem, quæ illud multum aggravat: *Dicendum, inquit Angelicus Doct̃or 3. part. quæſt. 88. art. 2. quod peccata dimiſſa per pœnitentiam redire dicuntur, in quantum reatus eorum, ratione ingrati tudinis; virtualiter continetur in peccato ſequenti.* Et in 4. diſt. 21. artic. 2. quæſt. 3. ait: *Quanto fuerunt peccata dimiſſa graviora, tanto fuit beneficium remiſſionis majus, & quanto beneficium fuit majus, tanto ingrati tudo major; & ſic aliquo modo quantitas reatus præcedentium peccatorum manet in ingrati tudine recidivi.*

Tertio, ex peccatis dimiſſis exurgit in iterata prolapſione contemptus Dei, cujus pondus Tertullian. appendit lib. de pœnit. cap. 5. graviffimis hiſce verbis: *Dei dono contumeliam facit: deſpicit datorem, cum datum deſerit: negat beneficium, cum beneficium non honorat . . . . . Cæterum non leviter in Dominum peccat, qui cum æmulo ejus diabolo pœnitentia renuntiaveſſet, & hoc nomine illum Domino ſubjeciſſet, rurfus eundem regreſſu ſuo exigit, & exultationem ejus ſeipſum facit, ut denuo Malus, recuperata præda ſua; adverſus Dominum gaudeat.* Nonne (quod dicere quo-

que periculofam est, sed ad ædificationem proferendum est) diabolum Domino præponit? Comparationem enim videtur egisse, qui utrumque cognoverit, & judicato pronuntiassse eum meliorem, cujus se rursus esse maluerit. Ita qui per delictorum pœnitentiam instituerat Domino satisfacere, diabolo per aliam pœnitentiæ pœnitentiam satisfaciet, eritque tanto magis perosus Deo, quanto æmulo ejus acceptus.

Porro cum pro modo culpæ debeat esse pœnæ modus, mirum non est, quod Scriptura graviora minetur eis, qui post pœnitentiam iterant peccata, quam iis, qui primo peccaverunt, ut 2. Petr. cap. 2. *Facta sunt eis posteriora pejora prioribus.* Et ipse Dominus ad Paralyticum, cui sanitatem corporis simul & animæ restituerat. Jo. 5. *Vade, noli amplius peccare, ne deterius tibi contingat.* Et Luc. 11. aperit quæ pœna ejusmodi relabentem maneat non solum in futuro sæculo, sed etiam in præsentī, nimirum longe durior servitus sub tyrannide dæmonis, qui, Deo permittente & deferente, revertitur cum septem spiritibus nequioribus se, & fiunt novissima hominis illius pejora prioribus. Enimvero experientia quotidiana docet idem fere ei contingere quod Samsoni, à quo pristina fortitudo discesserat, Judic. 16. v. 20. nova illa vincula ægre admodum dissolvere, nec posse ea facilitate, qua prius moveri ad pœnitentiam; quia ingratitude, inquit Sanct. Bernardus serm. 51. in Cantica, *inimica est animæ, exinanitio meritorum, virtutum dispersio, beneficiorum perditio.* Ingratitudo ventus urens, siccans sibi fontem pietatis, rorem misericordiæ, fluentia gratiæ. Denique ex Apostolo, Hebr. 6. *impossibile est enim eos (saltem mora-*

moraliter) qui semel sunt illuminati . . . . , & prolapsi sunt, rursus renovari ad pœnitentiam.

Q. 6. Utrum per lapsum recidivum semper confurgat tantus reatus, quantus fuerat peccatorum prius dimissorum?

Resp. Sanct. Thomas 3. p. quæst. 88. art. 3. quosdam ita censuisse, sed immerito; quia quandoque peccatum mortale sequens est multo minus quolibet peccatorum prius dimissorum adulterium, v. g. præcesserat, & simplex fornicatio subsequitur: atqui simplex fornicatio conjuncta cum ingrati animi vitio, non est peccatum æque grave, ac adulterium: Unde manifestum est, inquit, quod non est necesse, quod propter ingratitudinem semper per peccatum sequens redeat tantus reatus, quantus fuit præcedentium peccatorum: sed necesse est quod proportionaliter, quanto peccata prius dimissa plura fuerunt & majora, tanto redeat major reatus per quaecunque sequens mortale peccatum.

Ex his colliges quid sentiendum sit de iis, qui propter iteratam prolapsionem mutant Confessarium, rati eum propterea difficiliter concessurum absolutionem, nimirum eos teneri, saltem in hujusmodi circumstantiis, aperire ingrati animi vitium ex lapsu recidivo contractum. Ita Suarez, sect. I. ad articulum quartum hujusce quæstionis 88. sancti Thomæ, quamvis existimet hocce ingrati animi vitium non ita aggravare, ut semper necesse sit illud Confessario exponere; quia in nostra hypothese interest Confessarii noscere statum pœnitentis, ut judicet an differenda sit absolutio, necne, aut injungenda fortiora remedia contra recidivum peccatum. Unde Innocentius Undecimus,

cimus, & Clerus Gallicanus supra laudati; damnarunt quorundam Modernorum sententiam, qua afferebant pœnitentem non teneri aperire peccandi consuetudinem.

Dices 1. Libri 3. Rêgum cap. 17. mulier Sareptana Eliam sic alloquitur: *Quid mihi & tibi, vir Dei, ingressus es ad me, ut rememorarentur iniquitates meæ?* ergo reatus peccatorum remissorum integre reviviscit per peccatum subsequens.

Nego conseq. Namque 1. verba illa commode intelligi possunt de peccatis nondum dimissis, quorum pœna fuerat dilata; sicut Deus ad preces Moysis distulit vindictam peccati idololatriæ Judæorum, Exodi 32. vers. 14. & 24. adeo ut verborum illorum sensus sit, quid à me peccatum est in te, vir Dei, ut Deus interficeret filium meum, & apparerent iniquitates meæ quasi oppositæ lûmini sanctitatis tuæ, ac divinis oculis intolerabiles redderentur? Sic Sanctus Petrus agnoscens divinam Christi potentiam in captura piscium, Luc. 5. tremore correptus ad genua ejus procidit exclamans: *Exi à me, quia homo peccator sum, Domine.*

Si verba illa accipiantur de peccatis dimissis, loquitur mulier de pœna temporali iis debita, & & ad præsentiâ Eliæ accelerata.

Instabis: Si Deus animadvertit pœna temporali propter peccatum jam dimissum, quidni, & pœna æterna puniret eum, qui, cum nondum plene satisfecisset pro peccatis per absolutionem dimissis, iterum lapsus est, & sine pœnitentia defunctus?

R. Du-

R. Duplex est Theologorum sententia circa pœnas temporales, quæ supersunt ab illo eluendæ. Alii censent peccatum dimissum in illa hypothese in æternum castigatum iri, sed per accidens, non vero per se, quemadmodum supra diximus propter peccatum veniale, cui non debetur nisi pœna temporalis, conjunctum tamen cum mortali, damnatum pœnas æternas esse daturum, quia in inferno nulla fit remissio. Alii contra probabilius existimant illud residuum pœnæ temporalis æque in inferno ac in Purgatorio posse deleri; quia pœnæ sive Purgatorii, sive inferni non sunt satisfactiones, sed satisfationes. Unde si damnatus satis passus sit quoad reatum pœnæ temporalis, non fit ei remissio, si pœna sub isto respectu desinat, quando satis passus est, nec quidquam absurdi videtur Sancti Thomæ in 4. dist. 22. quæst. 1. art. 1. ad 5. *Quod quantian ad aliquid accidentale, pœna inferni minuatur usque ad diem judicii.* Alia est ratio peccati venialis; quia cum ejus macula & rubigo calore ignis inferni detergi nequeat, necesse est ut in æternum puniatur.

Dices 2. Matth. 18. Dominus debitum jam à se dimissum repetit à servo crudeli in conservum suum, minaturque se idem præstiturum nobis, nisi fratribus culpas condonemus: *Ex quibus dictis, inquit Sanctus Gregorius lib. 4. Dial. cap. ult. constat, si hoc quod in nos delinquitur, ex corde non dimittimus, & illud rursus exigitur quod jam per pœnitentiam dimissam gaudebamus.* Et Sanct. Augustinus ser. 83. alias 15. de verbis Domini cap. 6. *dicit enim Deus: Dimitte, & dimittetur tibi. Sed ego prior dimisi, dimitte, vel postea. Nam si non dimiseris, revocabo te,*  
&

*Et quidquid tibi dimiseram replicabo tibi. Non enim mentitur Veritas, non enim fallit, aut fallitur Christus. Ergo.*

Distinguo antec. Quidquid dimissum fuerat, exigitur, replicatur & revocatur virtualiter & æquivalenter, Conc. Formaliter, Nego antec. Itaque si quis ex corde fratri suo acceptam injuriam non dimittit, Deus quidem delatam peccati maculam non restituit; illud enim esse impossibile jam demonstravimus; sed propter ingrati ejus animi duritiam absolutionis sententiam aliquo sensu eoque vero revocat. Nimirum dixerat pœnitenti, non morieris; nunc illum damnat ad mortem: solverat ejus vincula, nunc illum addicit tortoribus in æternum cruciandum: illi præstiterat quo deinceps non peccaret, si vellet; Sacramentum enim jus tribuit ad specialia auxilia, quibus pœnitens facilius in bono perseverare possit: nunc aufert illi opportuniora illa subsidia, eumque in tot scelera nonnunquam labi patitur, ut reus evadat non secus ac si præteritorum criminum veniam non esset assecutus. Et ita non immerito dicitur Deum propter lapsum recidivum revocare concessam gratiam, exigere, ac repetere debitum prius à se remissum.

Dixi Sacramentum pœnitentiæ jus tribuere ad specialia auxilia, quibus pœnitens in bono perseverare possit; ut enim ait S. Augustinus lib. de nat. & grat. cap. 26. *Sanat Deus non solum ut deleat quod peccavimus, sed ut præstet etiam ne peccemus, & hic est insignis effectus Sacramenti, quod non solum animæ febres depellat, sed etiam arceat, quod*

quod præcipuum est in arte medica ; febrem enim ad tempus sistere potest circunforaneus Medicus : at fervare ex toto à novis ejus accessionibus , solius est periti Medici. *Duo sunt officia medicinæ ; unum quo sanatur infirmitas , alterum quo sanitas custoditur. Ibi infirmus , ut liberetur ; hic sanus , ne corrumpatur , orat ,* Sanct. Augustinus in Psalm. 7. Atqui ex S. Thoma 3. p. quæst. 65. art. 1. Christus instituit Sacramentum Pœnitentiæ uti spiritualem medicinam contra animæ morbos , in quos illa quantocius recideret , nisi virtute Sacramenti muniretur ; quia *licet per gratiam sanetur quantum ad mentem , inquit Sanctus Thomas 1. 2. quæst. 109. art. 9. remanet tamen in ea corruptio & infectio quantum ad carnem . . . . . Et ideo necesse est nobis , ut à Deo dirigamur & protegamur.* Jus autem confert Sacramentum ad specialia auxilia tempore opportuno accipienda ; unde vocatur à Sancto Augustino in Psalm. 7. *justum adjutorium , hic justum auxilium est , quod jam justo tribuitur.* Sed cum fundetur in gratia sanctificante , ut probavimus tractatu de Sacramentis in genere , cap. 17. &c. amittitur , dum pœnitens per peccatum mortale ab ea excidit.

Neque vero inde colligas peccatorem per lapsum recidivum omni prorsus gratia destitui , & in veram peccandi necessitatem induci ; namque Tractatu de Gratia cap. 6. §. 7. fusè ostendimus infideles negativos , & fideles induratos totaliter à Deo non deferi ; nec peccare necessariò. Deseritur ergo dumtaxat commodioribus auxiliis , sine quibus diu non perseverabit absque novo peccato , juxta tritum illud Sancti Gregorii effectum hom. 11. in Ezech. *Peccatum quod per pœnitentiam*

*tiam non deletur , suo pondere ad aliud trahit ; cui concinit S. Thomas 1. 2. q. 109. art. 8. in statu naturæ corruptæ indiget homo gratia habituali sanante naturam, ad hoc ut omnino à peccato abstineat.*

Quod in prima editione hic objiciebatur , nunc habetur Tract. de Grat. cap. 6. §. 7. ubi agitur de gratia per se efficaci, quam objectio directè impetit.







# Tractatus DE SACRAMENTO EXTREMÆ UN- CTIONIS.

**C**irca Sacramentum Extremæ Unctionis expendemus, 1. an existat : 2. quæ sit ejus materia : 3. quæ forma : 4. quis Minister : 5. quod ejus subjectum : 6. qui ejus effectus : 7. quæ ejus necessitas.

## CAPUT PRIMUM.

De existentia Sacramenti Extremæ Unctionis.

Q. I. *Quinam erraverunt circa Sacramentum Extremæ Unctionis?*

*D. Habert Theolog. Tom. VI.*

**L1**

**R. I.**

R. 1. Waldenses XII. sæculo, Wiclefus XIV. & Joannes Hus, à quo Hussitæ XV. erraverunt quidem circa ritum Extremæ Unctionis; sed illam non expunxerunt ex albo Sacramentorum.

Probatur 1. Waldenses in Professione Fidei, quam obtulerunt Regi Uladislao, septem Sacramenta confitentur: *Sacramenta*, inquit, *septenario inclusa numero Ecclesiæ Christi utilia esse pandimus*: & in hac fide permanserunt donec à Calvinistis seducti fuere, quemadmodum probat Meldenfis Episcopus Bossuetius. 2. Errores Wiclefi & Joannis Hus recensentur & damnantur in Concilio Constantiensi absque ulla mentione erroris, de quo hic agitur.

Errarunt ergo dumtaxat illi hæretici circa ritum, quo sacra illa unctione administratur in Ecclesia, nonnullaque carpsērunt tanquam abusus, propter quos ipsum Sacramentum contemnebant.

Reynerius ait lib. de Valdensibus c. 5. *Sacramentum Unctionis reprobant, quia tantum divitibus datur, & propter plures Sacerdotes ibi necessarios*. Phile-dorfius lib. contra Valdenses, cap. 25. *Reprobant Valdenses Hæretici, inquit, consecrationes vestium Sacerdotalium . . . aquæ baptismalis, chrismatis, &c.* Sed sicut non sequitur Calvinistas rejicere Baptismum, ex eo quòd improbent benedictionem aquæ baptismalis, & ritum, quo in Ecclesia celebratur; ita nec Valdenses rejecisse Sacramentum Extremæ Unctionis, quia reprehenderunt olei benedictionem, & alios ritus, quos Ecclesia observat in ejus administratione. Unde Innocentius III. epist. 65. præscripsit tantum, ut Valdenses ab hæresi redeuntes hanc fidei professionem ederent *Unctionem infirmorum cum oleo consecrato veneramus*. Nec

Nec aliud exigit Concilium Constantiense sessione ultima ab eo, qui suspectus esset de Hussitarum hæresi; sic enim illum interrogari jubet, *utrum credat quod Christianus contemnens susceptionem Sacramentorum Confirmationis, Extremæ Unctionis, aut solemnizationis Matrimonii, peccet mortaliter?*

R. 2. Lutherus & Calvinus primi apertè negarunt XVI. sæculo Extremam unctionem esse Sacramentum propriè dictum; de ea enim sic scribit Lutherus lib. de captivitate Babylonica; *omitto enim quod hanc epistolam non esse Apostoli Jacobi, nec Apostolico spiritu dignam multi valde probabiliter asserant, licet consuetudine auctoritatem, cujuscunque sit, obtinuerit. Tamen sit etiam esset Apostoli, dicerem non licere Apostolis sua auctoritate Sacramentum instituere, hoc enim ad Christum solum pertinebat.*

Calvinus lib. 4. Instit. c. 19. §. 18. *Fictitium inquit, Sacramentum est Extrema unctio, bistrionica hypocrisis, quam citra rationem & sine fructu ad Apostolos referre volunt.* Nimirum contendit Hæreticus ille unctionem, de qua S. Jacobus, pertinuisse ad donum curationum, quod Apostoli non transmiserunt ad suos successores; ex quo concludit Sacerdotes hodiernos nimia temeritate & arrogantia uti ejusmodi unctione ad sanandos infirmos. Pudet Dallæum Pseudoministrum Calvinistam in Gallia Veteres insimulare hujusmodi præsumptæ hypocrisis, proptereaque multis probare conatur in usu non fuisse apud eos Extremam unctionem. Sed Chamierius etiam Pseudominister in Gallia, lib. 4. de Sacram. c. 21. fatetur negari non posse, quin unctio a Veteribus adhibita fuerit infirmis, sed ut mera cæremonia propter mysticas significationes, *non imus inficias, inquit, neque enim tam*

ignota nobis historia Ecclesiæ, sed quæstiones distinguimus: & quamvis credamus perperam continuatum usum post sublatam donum sanationum, sicut perperam continuata lumina medio die ex primo usu nocturno, & linguæ Latinæ ex Latinorum consuetudine: tamen non tam sumus faciles, ut persuaderi possimus omnes ritus usurpatos in Christianorum usu fuisse Sacramenta, vel eorum luminum exemplo, quorum necessitate manifeste sublata, necesse fuit allegorias comminisci.

Q. 2. Extrema unctio estne Sacramentum proprie dictum?

R. Affirmative; idque fide divina credendum definit Concilium Tridentinum sess. 14. de Extrema unctione tribus canonibus, quibus proscribit tam Veterum, quam recentiorum errores. Primo quidem canone sic habet: *Si quis dixerit: Extremam unctionem non esse vere & proprie Sacramentum à Christo Domino institutum, & à Beato Jacobo Apostolo promulgatum, sed ritum tantum acceptum à Patribus, aut figmentum humanum, anathema sit.* Secundo canone. *Si quis dixerit sacram infirmorum Unctionem non conferre gratiam, nec remittere peccata, nec alleviare infirmos, sed jam cessasse, quasi olim tantum fuerit gratia curatio- num; anathema sit.* Tertio canone: *Si quis dixerit Extremæ unctionis ritum & usum, quem observat sancta Romana Ecclesia, repugnare sententiæ Beati Jacobi Apostoli, ideoque eum mutandum, posseque à Christianis absque peccato contemni, anathema sit.*

Probatur 1. Concilii definitio ex Scriptura, Jac. 5. *infirmatur quis in vobis? inducat Presbyteros Ecclesiæ, & orent super eum, ungentes eum oleo in nomine Domini; & oratio fidei salvabit infirmum, & alleviabit eum Dominus, & si in peccatis sit, remittentur ei.* Ex quibus verbis sic conficitur argumentum: Qua-  
tuor

tuor sunt necessaria ad Sacramentum proprie dictum. 1. signum sensibile : 2. promissio gratiæ huic signo annexa : 3. institutio divina : 4. mandatum hujus signi , seu ritus observandi ; atqui quatuor ista reperiuntur in laudatis Apostoli verbis , ergo in illis denotatur verum & proprie dictum Sacramentum.

Minor probatur quoad singula.

1. Habetur signum sensibile , nimirum unctio cum oratione.

2. Promissio gratiæ , *alleviabit eum Dominus* ; scilicet , ut , interpretibus Patribus Tridentinis c. 2. morbi incommoda ac labores levius ferat , & contra timorem mortis & conscientiæ stimulos fiduciam in misericordia Dei collocet ; denique , *si in peccatis fuerit , remittentur ei*.

3. Institutionem divinam denotat Apostolus , cum tam fidenter promittit sacra illa unctione alleviandum infirmum , & peccata ejus dimittenda ; virtus enim humana tantam efficaciam signo exteriori tribuere non potuit.

Nec aliud senserunt Magister Sententiarum , & Sanctus Bonaventura , cum lib. 4. Sentent. distinct. 24. docuerunt , sicut ante eos Hugo à Sancto Victore , hoc Sacramentum fuisse ab Apostolis institutum ; mens quippe illorum fuit Christum non per se immediate , sed per Apostolos Sacramentum illud instituisse ; ideoque existimandum non est eorum doctrinam laudato primo canone , fuisse proscriptam.

Communis tamen est Theologorum sententia , Sacramentum Extremæ unctionis à Christo Domino immediate fuisse institutum , & à Sancto Jacobo solummodo promulgatum ; & ita docent

Patres Tridentini ejusdem sessionis 14. c. 1. de Extrema unctione: *instituta est*, inquit *sacra hæc Unctio infirmorum tanquam vere & proprie Sacramentum novi testamenti à Christo Domino nostro, apud Marcum quidem insinuation; per Jacobum autem Apostolum, ac Domini fratrem Fidelibus commendatum, ac promulgatum.*

Patres consulto dicunt Sacramentum hoc fuisse insinuatum Marci sexto, non vero institutum, ut immerito contendunt nonnulli Theologi: tum quia Apostoli nondum erant Sacerdotes ut Sacramentum illud conferrent; tum quia ungebant ægros nondum baptizatos, aliquando necdum credentes, ut signa curationum essent ipsis motiva credibilitatis; sic cæcus natus Joan. 9. & claudus Act. 3. & innumeri alii tum crediderunt in Christum, cum divina ejus virtute sanatos se fenserunt. Sacramentum igitur Extremæ unctionis institutum creditur post Resurrectionem, sicut Sacramentum Pœnitentiæ & Confirmationis.

4. Divinum mandatum retinendi in Ecclesia sacrum unctionis ritum, elucet in verbis Apostoli; qui eo loci totus est, ut doceat Fideles quid agere debeant in variis vitæ eventis: *Tristatur aliquis vestrum? inquit, oret: æquo animo est? psallat: infirmatur quis in vobis? inducat Presbyteros Ecclesiæ, &c. Confitemini ergo alterutrum peccata vestra, & orate pro invicem, ut salvemini.* Procul dubio ista usque ad consummationem sæculi sunt observanda, & hætenus observavit Ecclesia, ut mox dicetur. Ergo ex ipso contextu perspicuum est Apostolum loqui de unctione perpetuo servanda.

Ad id autem, quod Lutherus supra opponebat, multos probabiliter asserere hanc epistolam non esse canonicam; nec Apostolico spiritu dignam,

gnam, Respondeo : etiamsi primis sæculis quidam de ejus auctoritate dubitaverint, ab utraque tamen Ecclesia, Latina scilicet & Græca, semper fuisse laudatam uti sacram ac divinam. Illud patet ex Concilio Laodicensi; & Cartaginensi tertio, ex Origene hom. 7. in Josue; ex S. Athanasio in synopsi, Epiphanio hæresi 76. Hieronymo ad Paulinum, Aug. lib. 2. de doctrina Christiana cap. 8. Innocentio I. epist. ad Decentium, Gelasio I. qui quinto sæculo in Concilio septuaginta Episcoporum Romæ confecit canonem genuinorum librorum sacre Scripturæ, & à spuris eos distinxit.

Dices : Ex S. Aug. Enchir. c. 66. *Sacramenta magis ad spem futurorum bonorum, quam ad retentionem vel adoptionem præsentium pertinent* : atqui unctio, de qua loquitur S. Jacobus primario tendit ad sanitatem corporis restituendam, secundario vero tantum ad salutem animæ, *si in peccatis fuerit*, inquit; quæ conditionata locutio insinuat infirmum, etiamsi in peccatis non fuerit; nihilominus inungendum propter infirmitatem corporis, ac proinde unctionem illam esse remedium mere corporeum, non vero Sacramentum proprie dictum.

Nego minorem; namque Apostolus absolute promittit infirmum alleviandum, quatenus hæc unctio magnam in eo divinæ misericordiæ fiduciam excitat, & confirmat ad levius ferendos morbi dolores, & tentationibus dæmonis tum maxime sævientis facilius resistendum, ut interpretantur Patres Tridentini citato capite 2. & semper intellexit Ecclesia, ut mox patebit. Nec refert, quod sanitas corporis primo loco recensetur à Sancto Jacobo; id enim postulabat contextus oratio-

nis; cum enim dixisset Apostolus, *infirmatur quis in vobis?* consequens erat, ut statim loqueretur de sanitate corporis per sacram illam unctionem recuperanda, si ad animæ salutem conduceret. Sic Christus Matth. 19. interroganti Petro v. 27. quid esset sperandum ei, qui omnia propter Christum reliquisset, respondet Christus v. 29. *Omnis qui reliquerit domum, vel fratres, &c. propter nomen meum, centuplum accipiet, & vitam æternam possidebit.* Et clarius Lucæ capite 18. recipiet multò plura in hoc tempore, & in sæculo venturo vitam æternam. Ubi primo loco bona temporalia promittuntur, utpote quæ interrogationi directè respondeant; nec tamen inde sequitur, quod primario illorum intuitu omnia propter Christum sint dimittenda.

Probatur 2. ex constanti Traditione, cujus fidem facit Innocentius I. usque ad suam ætatem, hoc est, ad quintum sæculum, quo ineunte electus est summus Pontifex. Sic enim epistola ad Decentium Eugubinum Episcopum solvit ejus dubia: Sane, inquit, quoniam de hoc sicut de cæteris consulere voluit dilectio tua: (scilicet de infirmis inungendis per Presbyteros Ecclesiæ, ut habetur Jacobi 5.) quod non est dubium de Fidelibus ægrotantibus accipi vel intelligi debere, qui sacro oleo chrismatis perungi possunt: quo, ab Episcopo confecto, non solum Sacerdotibus, sed omnibus uti Christianis licet in sua aut suorum necessitate inungendo. Cæterum illud superfluum videmus adjectum, ut de Episcopo ambigatur, quod Presbyteris licere non dubium est. Nam idcirco de Presbyteris dictum est, quia Episcopi aliis occupationibus impediti, ad omnes languidos non ire possunt. Cæterum si Episcopus aut potest, aut dignum ducit aliquem à se visitandum, & benedicere, & tangere chrismate, sine cunctatione potest,



*test, cujus est ipsum chrisma conficere. Nam pœnitentibus istud infundi non potest; quia genus est Sacramenti. Nam quibus reliqua Sacramenta negantur, quomodo unum genus putatur posse concedi? Integrum testimonium proferre operæ pretium fuit; quia in eo plura observanda sunt.*

Primo, Decentius Episcopus non dubitat de veritate Sacramenti Extremæ Unctionis, ut garrunt Hæretici; sed ortas difficultates circa illud Sacramentum pro more Episcoporum proponit fedi Apostolicæ, quæritque 1. an verba Sancti Jacobi intelligi debeant de infirmis dumtaxat per Sacerdotes inungendis; nam Græci sanos etiam & bene valentes inungunt, ut infra dicitur. 2. Utrum Laici oleo per Episcopum consecrato seipfos inungere possint ad depellendos corporis morbos, quemadmodum abluunt sese aqua ad usum Baptismatis consecrata. 3. Num Sanctus Jacobus ita doceat Presbyteros esse Ministros Extremæ unctionis, ut excludat Episcopos. 4. Utrum conferenda sit sacra illa unctio pœnitentibus, qui adhuc stadium pœnitentiæ decurrunt, necdum per absolutionem sunt reconciliati. Ad singula autem respondet Summus Pontifex. Ad primum, dubium non esse S. Jacobum intelligendum de Fidelibus ægrotantibus. Ad secundum, posse Laicos fideles in suis necessitatibus uti oleo per Episcopum sanctificato: eo Græci etiam nunc deliniunt Fideles, qui divinis Officiis interfunt. Verum usus ille sacramentum non est, sicut nec usus aquæ lustralis, quam Fideles quotannis hauriunt ex fonte baptismali, & domum secum deferunt. Ad tertium, Apostolum non excludere Episcopos, & ideo Presbyteros potius appellasse,

Ll 5

quia

quia Episcopi solent detineri publicis ac gravi-  
bus negotiis. Ad quartum (quod spectat contro-  
versiam in qua versamur) sacram unctionem non  
esse adhibendam pœnitentibus nondum reconciliatis; quia est genus seu species Sacramentorum,  
quæ non conferuntur pœnitentibus, priusquam  
à vinculis peccatorum soluti fuerint.

Observandum 2. Innocentium iis posteriori-  
us verbis non loqui de Sacramento latè sumpto,  
seu de cæremonia ab Ecclesia instituta & usurpa-  
ta propter mysticas significationes, ut vult Cha-  
mierius; sed de Sacramento proprie dicto; ait  
enim sacram unctionem esse genus seu speciem  
Sacramenti eamque reponit in numero eorum Sa-  
cramentorum, quæ non debent conferri pœniten-  
tibus nondum reconciliatis: atqui ejusmodi pœ-  
nitentibus non denegantur cæremoniæ Ecclesia-  
sticæ, quæ vulgo dicuntur Sacramentalia, cinere  
benedicto consperguntur, crebris manuum im-  
positionibus substernuntur, plures super eis fun-  
duntur orationes, solis Sacramentis propriè di-  
ctis defraudantur. Unde concludit Summus Pon-  
tifex, certum esse ac indubitatum in Ecclesia, sa-  
cram unctionem iis non posse concedi, *nam qui-  
bus reliqua Sacramenta negantur, inquit, quomodo unum  
genus putatur posse concedi?* Nihil clarius.

Observandum 3. Innocentium non instituere  
novam disciplinam, sed explicare, quæ hætenus  
observata fuerit in universa Ecclesia. Edant ad-  
versarii, si possunt, ejus originem. Certè Ori-  
genes testatur sacrum hunc ritum ante suam æta-  
tem, hoc est, ante tertium sæculum obtinuisse;  
sic enim scribit hom. 2. in Levit. *Est adhuc septi-  
ma, licet dura & laboriosa per pœnitentiam remissio pec-  
catorum,*

catorum, cum lavat peccator in lacrymis stratum suum....  
 & cum non erubescit Sacerdoti Domini indicare peccatum suum, & quærere medicinam secundum eum, qui ait, Dixi pronuntiabo adversum me injustitiam meam Domino; & tu remisisti impietatem cordis mei. In quo impletur & illud, quod Apostolus dicit; Si quis autem infirmatur, vocet Presbyteros Ecclesiæ, & imponent ei manus, ungentes eum oleo in nomine Domini. Origenes conjungit Extremam unctionem cum Sacramento Pœnitentiæ: tum quia, ex Patribus Tridentinis sess. 14. in Prologo de Sacramento Extremæ unctionis, hoc Sacramentum non modo pœnitentiæ, sed & totius Christianæ vitæ (quæ perpetua pœnitentia esse debet) consummativum existimatum est à Patribus: tum quia Græci ista duo Sacramenta simul conferre solent. Unde Sanctus Chrysostomus illa duo Sacramenta non separat lib. 3. de Sacerdotio, in quo sic habet: neque enim solum cum nos regenerant (Sacerdotes) sed postea etiam condonandorum nobis peccatorum facultatem obtinent, infirmatur, inquit, inter vos aliquis? accersat Presbyteros.

Observandum 4. vel hoc uno Innocentii responso corruere omnia argumenta, quæ congerit Dallæus ad suadendum ritum Extremæ unctionis esse inventum humanum posterioribus sæculis excogitatum; scilicet opponit Hæreticus ille 1. Veteres, qui mysteria Religionis Christianæ accurate exposuerunt, ut S. Dionysium libro de Eccles. Hierarch. S. Clementem libro Constitut. S. Justinum in Apologia, Tertullianum in Apologetico, S. Cyrillum in Catechesibus, nullam mentionem facere Extremæ unctionis. 2. Historicos Scriptores, qui licet sigillatim referant quæ con-

contigerunt in priorum obitu, nusquam commemorant eos fuisse sacra unctione delibutos, ut S. Gregorius Nazianzenus in Orationibus de sorore Gorgonia, de patre Gregorio, de amico suo Basilio; S. Hieronymus de obitu Marcellæ, Afellæ, Paulæ; Sanctus August. lib. 9. Confessionum de iis, quæ contigerunt in morte piissimæ matris Monicæ. Hæc, inquam, argumenta, & alia similia tanquam umbræ evanescunt ad lucem testimonii, quod habemus præ manibus.

Enimverò in Jure duo testes affirmantes prævalent centum negativis; & apud Philosophos argumentum negativum nullius est roboris adversus argumentum positivum, ut vocant. Atqui habemus hic duos testes locupletissimos, Decentium scilicet Episcopum Eugubinum, & Innocentium Summum Pontificem. Decentius inquit an Episcopus æque ac Presbyter infirmos ungere possit. Hæc autem quæstio non movetur frustra de re, quæ nunquam fuit, nec esse potest; sed de praxi, quæ in Diœcesi Eugubina obtinebat Presbyterorum ministerio: ambigitque Decentius, an possit & ab Episcopo adhiberi illa unctio etiam pœnitentibus nondum reconciliatis. Innocentius respondet, 1. videri superfluum, *ut de Episcopo ambigatur, quod Presbyteris licere non dubium est*, 2. hoc Sacramentum non debere conferri pœnitentibus; quia est ejusdem generis cum aliis Sacramentis, puta Eucharistia, quæ ejusmodi pœnitentibus non conceduntur.

Quid efficit silentium aliorum Patrum adversus duos illos locupletissimos testes? quanquam soli non sunt; nam duo coætanei idem testantur, scilicet S. Chrysostomus supra laudatus, & Sanct. Augu-

Augustinus lib. de Speculo, ubi inter plura in novo Testamento retinenda & observanda, recenset præceptum S. Jacobi, *infirmatur quis in vobis? inducat Presbyteros, &c.* Simile testimonium tulerat Origenes cit. hom. 2. in Levit. ante ducentos fere annos.

Ideo autem alii Patres priorum seculorum non scripserunt de Extrema Unctione; quin illius defuit scribendi necessitas, aut occasio, nullus Hæreticus Sacramentum illud impugnabat; abusus nondum irreperant in ejus celebratione, cum non soleat conferri nisi periculose decumbentibus, qui tunc pro virili salutis suæ consulunt: administratur, non in publicis Fidelium conventibus, in quibus multa occurrunt ordinanda, corrigenda, ut sacris mysteriis debita reverentia habeatur, sed in privatis ædibus; unde necessum semper fuit, ut Patres plura dicerent aut scriberent de Baptismo, Confirmatione, Eucharistia, & Pœnitentia; vixque se dabat occasio sermonem habendi de Extrema unctione, nec nisi casu Innocentius I. testimonium, quo Novatores convincimus, posteris reliquit. Adde plures è Veteribus sub nomine Pœnitentiæ, Extremam unctionem complexos fuisse tanquam ejus complementum, ut patet ex laudatis textibus Origenis & Sancti Chrysostomi.

Non magis nocet catholico dogmati silentium eorum, qui historiam Sanctorum adornarunt; si enim Sanctus Gregorius Nazianzenus, & Sanct. Augustinus nihil referunt de sacro viatico, quod procul dubio collatum est Sanctæ Gorgoniæ, S. Basilio, & S. Monicæ; quid mirum si de Extrema unctione pariter fileant? Sed & illud præsertim

tim notatu dignum est, plures Historicos, qui res gestas & decessum Sanctorum, quos tulit posterior ætas, accurate scripserunt, non meminisse, Extremam unctionem illis fuisse administratam, hanc circumstantiam prætermiserunt Scriptores vitæ Sancti Bernardi, nisi eam nomine Pœnitentiæ complexi sint propter rationem supra allatam, cum tamen adversarii, testimoniis mox proferendis fateri cogantur illud Sacramentum fuisse in usu à quinto sæculo; & ipse Sanctus Bernardus in vita Sancti Malachiæ cap. 31. de illo in extremis posito sic scribat, *jubet se sacro oleo ungi . . . . ungitur, & sumpto viatico, Fratrum se orationibus, & Fratres Deo commendans ad lectum revertitur.*

Igitur usum Extremæ unctionis in Ecclesia Latina à quinto sæculo testatur Sacramentarium S. Gregorii, qui Ecclesiæ præfuit sexto sæculo exeunte, & septimo ineunte; in eo quippe describitur ritus, quo oleum infirmorum consecratur feria quinta in cœna Domini. Testatur Concilium Cabilonenſe secundum an. 813. *Secundum Beati Jacobi documentum*, inquiunt Patres can. 48. *cui etiam documenta Patrum consentiunt, infirmi oleo, quod ab Episcopis benedicitur, à Presbyteris ungi debent; sic enim ait: infirmatur quis in vobis? &c. Non est itaque parvipendenda hujusmodi medicina, quæ animæ corporisque medetur languoribus.* Eadem habent Concilium Aquisgranense canone 5. anno 836. Moguntinum anno 847. *Ab infirmis*, inquit can. 26. *in mortis periculo positis per Presbyteros pura inquirenda est confessio. Et ideo secundum canonicam auctoritatem, ne illis clausa janua pietatis videatur, orationibus & consolationibus Ecclesiasticis sacra cum unctione Dei animati secundum statuta sanctorum Patrum, communionem viatici refi-*

*reficiantur.* Hic præmittitur unctio sacra viatico. Ita observatum fuisse erga Leonem IX. refert Wibertus lib. 2. cap. 16. *Decernit, inquit, ut . . . ungeretur sacri olei liquore, super quo facto exbilaratus usquequaque, munitusque corporis & sanguinis Domini communione, &c.* Obiit autem Leo nonus anno 1054.

Quæ de Waldensibus 12. sæculo, & de aliis Hæreticis initio hujus capituli retulimus, evidenter demonstrant, Extremam unctionem deinceps sicut prius usque ad Concilium Tridentinum in Ecclesia Latina fuisse usurpatam.

Consensionem Ecclesiæ Græcæ cum Latina circa Sacramentum Extremæ unctionis probant 1. eorum Euchologia, in quibus præscribitur ritus consecrandi oleum infirmorum, & usus illius. 2. censura, qua Jeremias Patriarcha Constantinopolitanus perstrinxit Confessionem Augustanam Lutheranorum, in qua Extrema unctio expungitur è numero Sacramentorum: quam censuram confirmavit Concilium Constantinopolitanum sub Parthenio anno 1642. & Concilium Bethlehemiticum anno 1672. 3. redintegrata unio utriusque Ecclesiæ in Conciliis Lugdunensi secundo, & Florentino, in quibus visi sunt Græci ab initio schismatis (cujus semina jecit Photius nono sæculo) non discrepasse à Latinis in re tanti momenti, cum de ea nulla fuerit inter illos discrepatio.

Ergo ab Apostolis usque ad hodiernam diem semper & ubique in Ecclesia creditum est, nemine refragante, nisi solis Pseudoreformatis, Extremam unctionem esse Sacramentum proprie dictum.

## CAPUT II.

De materia Sacramenti Extremæ unctionis.

**M**ateria, ex sæpe dictis, duplex est; alia remota, alia proxima.

Q. 1. *Quenam est materia remota Extremæ unctionis?*

Respondent Patres Tridentini cap. i. de Extrema unctione, esse oleum ab Episcopo benedictum: quia designatur à Sancto Jacobo, cit. cap. 5. *ungentes eum oleo in nomine Domini*: & semper adhibitum est ab Ecclesia, ut constat ex omnibus textibus superiori capite allatis. Quod autem oleum sit idonea hujus Sacramenti materia, docent iidem Tridentini Patres; quia *aptissime Spiritus sancti gratiam, qua invisibiliter anima ægrotantis inungitur; repræsentat*; cum enim oleum naturaliter 1. leniat corporis dolores; 2. roboret, ac defatigatas vires recreet; 3. lumini pabulum præbeat: aptissime significat Extremæ unctionis virtutem, qua ægroti animam alleviat, exhilarat, & confirmat; peccatorum reliquias abstergit, fidem nutrit, fiduciam in Dei misericordia excitat, & sanitatem corporis restituit, si saluti animæ expediat.

Q. 2. *Quale genus olei est materia Extremæ unctionis?*

R. Solum oleum ex Olivarum baccis expressum; quia oleum aliunde eductum, v. gr. ex nucibus non dicitur proprie & simpliciter oleum, sed cum addito & secundum quandam similitudinem. Sicut ergo aqua ex floribus aut herbis educta non est materia idonea Baptismi, nec alius panis quam triti-



triticeus Eucharistiæ ; ita nec aliud oleum quam ex olivis expressum, Extremæ unctionis.

Q. 3. *Oleum illud estne alteri liquori miscendum, ut sit idonea hujus Sacramenti materia?*

R. Minimè ; neque enim ex Scriptura, neque ex Traditione, ullius mixtionis necessitas colligitur ; imo Pontificalia Latina & Euchologia Græca oleum simplex requirunt.

Dices : Innocentius I. sæpius laudata epistola ad Decentium scribit ægrotantes sacro oleo chrismatis perungi, & Episcopi esse illud chrisma conficere : ergo alius liquor est admiscendus oleo.

Nego consequ. quia chrisma idem sonat apud Græcos, quod unctio apud Latinos, quæ peragitur quolibet pingui liquore. Unde S. Augustinus tract. 33. in Joan. oleum olivarum vocat unguentum & chrisma.

Q. 4. *Benedictio olei estne necessaria?*

R. Certum est necessariam esse necessitate saltem præcepti Ecclesiastici ; eam enim requirunt Eugenius IV. in Decreto pro Armenis ; & Concilium Tridentinum c. 1. supra laudato : constatque ex testimoniis præcedenti capite laudatis, oleum infirmorum in Ecclesia Latina & Græca solemni benedictione semper fuisse præparatum. Sed difficultas est, utrum ejusmodi benedictio sit de necessitate Sacramenti ?

Affirmant plures Theologi, ut Bellarminus, Estius, Suárez, Sylvius, & alii ; cui sententiæ videtur favere Sanctus Thomas in 4. dist. 23. & in Supplem. quæst. 29. art. 5. ubi distinguit inter aquam Baptismi & oleum infirmorum, scribitque aquam non esse benedictione necessario consecrandam sicut oleum ; quia sanctificata est contactu

corporis Christi, quando baptizatus est: atqui Sanctus Thomas non loquitur de benedictione præcepti Ecclesiastici, & Sacramento accidentaria; cum ipsum non latuerit extare Ecclesiæ præceptum solemniter benedicendi fontem baptismalem in pervigilio Paschæ & Pentecostes: ergo revera intelligendus est de benedictione essentiali Sacramento Extremæ unctionis, minime vero Sacramento Baptismi. Nititur autem illa sententia tum Traditione universalis Ecclesiæ, quæ pro materia Extremæ unctionis semper assignavit oleum benedictione consecratum: tum auctoritate Eugenii IV. in Decreto pro Armenis, & Patrum Tridentinorum, qui conceptis verbis docent materiam hujus Sacramenti esse oleum ab Episcopo benedictum. Quod autem benedictio illa non sit accidentaria Sacramento, & præcepti dumtaxat Ecclesiastici in mente Conciliorum & Sanctorum Patrum inde patet, quod aliter loquantur de materia Baptismi; simpliciter enim enuntiant esse aquam, & raro mentionem faciunt benedictionis, qua præsanctificatur.

Negant vero benedictionem esse præcepti divini, & Sacramento essentialem; Victorius, Cajetanus, Maldonatus, Sanbovius, Natalis Alexander, & alii bene multi, quorum sententia evasit admodum communis in Academia Parisiensi, probaturque r. argumento negativo; quia hujusce benedictionis necessitas neque ex Scriptura, neque ex Traditione colligitur. Non ex Scriptura; S. enim Jacobus simpliciter asserit infirmum oleo unguendum, absque ulla mentione benedictionis: quod autem addit, *in nomine Domini*, (in quibus verbis vim faciunt Patroni oppositæ sententiæ)

tentiæ) non refertur ad oleum; sed ad ipsam unctionem seu actionem Ministri; qui debet ungere; non suo, sed Dei nomine: non etiam ex Traditione; quamvis enim ex ea habeatur oleum debere esse benedictum illam esse præcepti divini, & Sacramento essentialem, cum ex constanti universalis Ecclesiæ Traditione vinum in altari offerendum non sit simplex vinum, sed vinum aqua delibutum; & tamen mixtio illa, in communi Theologorum sententia, non est præcepti divini, nec de substantia Sacramenti & sacrificii. Ideo autem Eugenius IV. & Patres Tridentini oleum benedictum indicant pro materia Extremæ unctionis, non vero aquam benedictam pro materia Baptismi; quia controversia est in Scholis circa benedictionem olei, nulla vero circa benedictionem aquæ: ne autem viderentur detrahare probabilitati opinionis, quæ asserit benedictionem pertinere ad essentiam Sacramenti Extremæ unctionis, si oleum nude pro materia Extremæ unctionis proponerent, sicut aquam pro materia Baptismi, loquendi formulam, usu Veterum receptam, retinuerunt; cum certum sit ejusmodi benedictionem esse convenientem, saltemque ab Ecclesia præceptam; ac proinde Waldenses meritò fuisse damnatos ex eo, quod illam spernerent.

Probatur 2. eadem sententia argumento positivo. Ritus à Deo institutus, & ad substantiam Sacramenti pertinens fixus est, constans, ac immutabilis: *Christi Ecclesia*, inquit Vincentius Lyrinensis communit. 1. cap. 32. *sedula & cauta depositorum apud se dogmatum custos, nihil unquam in iis immutat, nihil minuit, nihil addit, non amputat necessaria, non apponit superflua*: atqui nihil in Ecclesia fi-

xum circa ritum benedicendi oleum infirmorum, sed varius est ille ritus pro diversitate regionum, apud Latinos ejusmodi benedictio, ita Episcoporum semper fuit propria, ut Presbytero nequidem à Summo Pontifice demandari possit juxta Patronos primæ sententiæ; quia inquit Suarez disp. 40. sect. 1. quæ sunt juris divini, & ad substantiam Sacramentorum pertinent, ab Ecclesia mutari nequeunt: nec refert, pergit idem Theologus, quod ex dispensatione summi Pontificis Presbyteri aliquando confirment; quia habemus ex Traditione Presbyterum esse à Deo institutum Ministrum extraordinarium Confirmationis; nullum vero vestigium extat sive in Scriptura, sive in Traditione, ipsum posse consecrare oleum infirmorum, aut Chrisma confirmatorum, imo constans est Traditio saltem in Ecclesia Latina Presbyterum, ubi agitur de unctione perficienda, debere uti oleo aut chrismate per benedictionem Episcopi confecto seu consecrato. Attamen in Ecclesia Orientali Presbyteri benedicunt oleum, quo inungunt infirmos; quem ritum Ecclesia Latina hoc ipso approbasse censetur, quo in suam communionem Græcos admisit in Concilio Lugdunensi secundo, & Florentino; vera enim Ecclesia fœdus inire nequit cum iis, quos novit errare in re tanti momenti, hoc est, Sacramenta adulterare, & alio ritu celebrare, quam à Christo sunt instituta. Quin Clemens VIII. conceptis verbis hancce Græcorum praxim confirmavit in instructione directa ad Episcopos Latinos, in quorum Diœcesibus Græci versantur: *non sunt cogendi presbyteri Græci, inquit, olea sancta (præter chrisma) ab Episcopis Latinis Diœcesanis accipere, cum ejus-*

*ejusmodi olea ab eis in ipsa oleorum & Sacramentorum exhibitione, ex veteri ritu conficiantur & benedicantur. Ergo valde probabile est benedictionem olei non esse à Christo institutam, nec pertinere ad substantiam Sacramenti.*

Verumtamen cum ex Decreto Innocentii XI. & ex censura Cleri Gallicani sæpius laudatis, non liceat in Sacramentis conferendis sequi opinionem probabilem de valore Sacramenti, relicta tutiore; si Sacerdos advertat incautè se adhibuisse oleum Cathecumenorum aut chrisma pro oleo infirmorum, observabit Decretum Innoc. III. C. *Pastoralis*, tit. de Sacr. non iterandis in talibus nihil est iterandum, sed cautè supplendum quod incaute fuerat prætermissum. Ut autem caveatur ejusmodi error, qui non est ita infrequens, præscribere solent Episcopi, ut oleum infirmorum servetur in vase separato.

Q. 5. *Quid aget Parochus, quando oleum benedictum deficit?*

R. Priusquam totaliter deficiat, admiscebit non consecratum; sic enim habetur C. *Quod in dubiis*, de consecratione Eccl. non negamus quin oleum non consecratum, consecrato possit oleo commisceri. Canon non præscribit ut oleum admixtum sit cum minori quantitate; ideoque Theologi contendunt hanc cautionem, quam alii requirunt, non esse necessariam.

Q. 6. *Quænam est materia proxima Sacramenti Extremæ unctionis?*

R. Est ipsa unctio; quia usus materiæ remotæ dicitur materia proxima Sacramenti, usus aquæ aut chrismatis v. g. scilicet ablutio aut Chrismatio dicitur materia proxima Baptismi aut Confirmationis: ergo unctio, quæ est usus olei, est materia proxima Extremæ unctionis.

Q. 7. Quotuplex unctio est adhibenda?

R. Ad Sacramenti veritatem una sufficit; sed ex præcepto Ecclesiæ multiplex est adhibenda, pro cuiusque Diœceseos diversitate.

Prima pars probatur 1. ex Scriptura, quæ non secus loquitur de unctione infirmorum, ac de ablutione Catechumenorum. De unctione ait S. Jacobus cit. 5. *orent super eum, ungentes eum oleo in nomine Domini.* Et de ablutione Christus Dominus Mat. 20. *docete omnes gentes, baptizantes eos in nomine, &c.* Atqui una ablutio sufficit ad Baptismum; ergo & una unctio ad Sacramentum Extremæ unctionis. 2. quia libri Rituales passim præscribunt, ut, si mors instet, vel morbus contagiosus Ministrum exponat evidenti periculo, una fiat unctio in capite, in quo vigent omnes sensus, sin minus in alia parte corporis, dicaturque: *per istam sacram unctionem, & suam piissimam misericordiam, indulgeat tibi Dominus quidquid deliquisti per visum, auditum, odoratum, gustum, tactum, & gressum.*

Secunda pars patet ex Euchologiis Græcorum, & libris Ritualibus Latinorum, in quibus plures præcipiuntur unctiones, sed non semper in iisdem corporis partibus. Apud Græcos inunguntur frons, facies, propter sensuum organa; non oculi, nec aures, nec nares. Apud Latinos non idem ubique servatur ritus; unctioni quinque organorum sensus, quæ ubique obtinuit, vulgo unctio pedum adjungitur, quibusdam in locis unctio pectoris; in aliis unctio capitis, in aliis unctio renum, & hunc posteriorem ritum Eugenius IV. in suo Decreto pro Armenis præscribit his verbis: *hoc Sacramentum nisi infirmo, de cuius morte timetur, dari non debet, qui in his locis unguendus est,*

in oculis propter visum, in auribus propter auditum, in naribus propter odoratum, in ore propter gustum vel locutionem, in manibus propter tactum, in pedibus propter gressum, in renibus propter delectationem ibidem vigentem. Sed hæc postrema unctio prætermitti debet in mulieribus, pudoris causa, ex Concilio Mediolanensi quarto, & ex iis Ritualibus, qui illam præcipiunt pro viris, nam plures eam prorsus omitunt, videnturque in locum illius sufficere unctionem pectoris. In hac autem varietate unusquisque consulat librum Ritualementis Diœceseos, in qua ministrat: religioseque adhæreat ritibus ibidem præscriptis, iisque præsertim, qui spectant unctioes quinque organorum sensus, utpote quæ ita obtinuerint in Ecclesia Latina, ut plures Theologi existiment pertinere ad substantiam Sacramenti, à quibus non omnino recedit S. Thomas in quartum Sent. dist. 23. qu. 2. art. 3. ubi sic scribit: *ideo illa unctio ab omnibus observatur, quæ fit ad quinque sensus, quasi de necessitate Sacramenti; sed quidam non servant alias.* Quod si infirmus sit mutilus, unctio fieri debet in parte viciniore; quamvis enim per organum, quo orbatus est, exterius peccare non potuerit, potuit tamen appetere actus noxios qui per ejusmodi organum perficiuntur, & exterius prodeunt.

### CAPUT III.

De forma Sacramenti Extremæ Unctionis.

Q. 1. *Quenam est forma Sacramenti Extremæ Unctionis?*  
 R. Est oratio, quam minister fundit, dum infirmum inungit, sic enim tradidit S. Jacobus cit. capite 5. *orient super eum, ungentes eum oleo in nomine Domini.*

Q. 2. *Quanam debet esse illa oratio?*

R. Christus non determinavit quibus verbis præcise constare debeat, sed determinandum permisit Ecclesiæ, ut diximus Tom. 5. Tract. de Sacramento in genere cap. 7. Hinc variæ orationis formulæ non solum apud Græcos, sed etiam apud Latinos, quæ cum eundem referant sensum, tanquam legitimæ sunt habendæ. A pluribus tamen sæculis in Ecclesia Latina obtinuit isthæc forma deprecativa, *per istam sanctam unctionem, & suam piissimam misericordiam, indulgeat tibi Deus quidquid deliquisti per visum, auditum, &c.* Hanc formam vindicat Sanctus Thomas in 4. dist. 23. qu. 2. art. 4. eam laudant, tum Eugenius IV. in Decreto pro Armenis, tum Patres Tridentini sess. 14. cap. 1. de Extrema unctione.

Q. 3. *Singula verba suntne essentialia formæ?*

R. Minime, quia effectus Sacramenti satis exprimitur hisce vocibus, *per istam unctionem indulgeat tibi Deus*, quia nonnulli putant satis esse si dicatur, *indulgeat tibi Deus*, quemadmodum in Sacramento Pœnitentiæ valeret hæc forma, *absolve te*: ergo cætera verba non sunt necessaria, nisi necessitate præcepti.

Q. 4. *Laudata forma deprecativa estne ita necessaria, ut si minister uteretur indicativo hoc modo, ungo te in remissionem peccatorum, vel indulgeo tibi quidquid deliquisti, irritum foret Sacramentum?*

R. 1. De fide est hujusmodi formam deprecatoriam esse convenientem; ita enim definiit Concilium Tridentinum sess. 14. de Extrema unctione canone 3. *Si quis dixerit Extremæ unctionis ritum & usum, quem observat Sancta Romana Ecclesia, repugnare sententiæ B. Jacobi Apostoli, ideoque eum mutandum,*



dum, posseque à Christianis absque peccato contemni; anathema sit. Enimvero ejusmodi forma exprimitur actio & intentio Ministri; cum dicitur, *per istam unctionem* : & principalis causa, quæ spirituales effectus operatur, cum additur, & *per suam piissimam misericordiam*. Denique præcipuus Sacramenti effectus postremis verbis, *quidquid deliquisti*.

R. 2. Concilium Tridentinum ita laudavit hanc formam, ut non declaraverit indicativam fore irritam. Unde pertinet ad controversiam Scholæ, an valeret indicativa. Pro ea pugnarunt ante Concilium Tridentinum Albertus Magnus; Paludanus, Richardus : & post Concilium Navarrus in summa, & Becanus existimarunt opinionem Alberti non carere omni probabilitate; sed non recedendum à communi Theologorum sententia. Quare

R. 3. Sola forma deprecatoria est legitima.

Probatum tum ex Scriptura, quæ orationem pro forma hujus Sacramenti indicat; ait enim S. Jacobus, *oratio fidei salvabit infirmum, & alleviabit eum Dominus*. Quibus verbis Apostolus tribuit orationi effectum Sacramenti : ergo pertinet ad essentiam Sacramenti; tum ex Traditione universalis Ecclesiæ; hætenus enim Ecclesia, tam Græca, quam Latina, hoc Sacramentum conficit forma deprecativa.

Dices : Forma indicativa aliquando fuit in usu apud Latinos, ut patet tum ex forma Ambrosiana, quam laudat Paludanus in 4. dist. 23. sic enim habet : *Ungo te oleo sanctificato in nomine Patris, & Filii, & Spiritus sancti* : tum ex Sacramentali Veneto, de quo Arcudius lib. 5. de concordia c. 5. in

eo quippe Sacramentali hæc forma legitur, *ungo te oleo sancto*. Testatur quoque Albertus Magnus in 4. dist. 23. se legisse antiquissimos Germaniæ Rituales libros, qui hujusce Sacramenti formam mere indicativam continerent: ergo Sacramentum Extremæ Unctionis confici potest forma indicativa.

Respondet S. Thomas quæst. 29. Supplem. à 8. ad 3. *Verba indicativi modi, quæ secundum morem quorundam præmittuntur orationi, non sunt forma Sacramenti, sed sunt dispositio ad formam, quæ deprecatoria immediate sequitur laudata verba Ambrosianæ unctionis, ut more militis uncti præparatus, ad certamen possis aereas potestates superare*; Hæc enim verba optativi modi orationem exprimunt. Sic in forma Veneta laudatis verbis adjungitur, *ut quidquid illicito visu deliquisti, hujus olei unctione expietur per Christum Dominum nostrum*. Sed quidquid sit de antecedente,

R. Negando conseq. quæ enim auctoritas quarundam particularium Ecclesiarum adversus Ecclesiam universalem?

## CAPUT IV.

### De Ministro Sacramenti Extremæ Unctionis.

Q. I. *Quis est Minister Sacramenti Extremæ Unctionis?*  
 Pseudo-Reformati contendunt Ministros unctionis, quam commendat sanctus Jacobus c. 5. esse, vel seniores ætate, vel Magistratus; seu primates Communitatis: *Quod, inquit Calvinus lib. 4. Institut. cap. 19. apud Jacobum Presbyteros interpretantur Sacerdotes, & pluralem numerum ad decorem positum nugantur, nimis frivolum est*. Quasi  
 vero

vero Ecclesiæ eo tempore sacrificarum examnibus abundarint, in longa pompa procedere potuerint ad ferendum sacri olei ferculum. Adversus illum errorem extat canon 4. Concilii Tridentini sess. 14. de Extrema Unctione, in quo sic habetur: *Si quis dixerit Presbyteros Ecclesiæ, quos B. Jacobus adducendos esse ad infirmum inungendum hortatur, non esse Sacerdotes ab Episcopo ordinatos, sed ætate seniores in quarvis Communitate, ob idque proprium Extremæ Unctionis Ministrum non esse solum Sacerdotem; anathema sit.* Quare ad propositam quæstionem

R. De fide est solum Sacerdotem esse hujus Sacramenti Ministrum.

Probatur 1. ex Scriptura, *infirmatur quis in vobis?* inquit S. Jacobus, *inducat Presbyteros Ecclesiæ, &c.* Atqui Presbyterorum nomine intelliguntur Sacerdotes; tum qui in Scripturis Sacerdotes solent vocari Preybyteri, seu seniores, ut 1. Petri cap. 5. *Seniores Græce (πρεσβυτερες,) qui in vobis sunt, obsecro consenior,* 1. Timoth. 4. vers. 14. *noli negligere gratiam, quæ in te est, quæ data est tibi per prophetiam cum impositione manuum Presbyterii, idest, cœtus Episcoporum: tum quia si seniores ætate hic intelligerentur, juvenis Sacerdos, aut Episcopus, qualis erat Timotheus, non posset induci ad ungendos infirmos, quo nihil absurdius: tum denique quia Ecclesia semper intellexit, Sacerdotes hic designari.* Unde

Probatur 2. ex constanti Ecclesiæ Traditione, cujus testes capite 1. adduximus Origenem, sanctum Chrysostomum, Innocentium Primum epistola ad Decentium, Sacramentarium sancti Gregorii, Concilium Cabilonense secundum, &c.

Q. 2. *Omnis Sacerdos potestne conferre illud Sacramentum?*

R. Potest valide; quia ad id sufficit potestas Ordinis: non potest licitè, nisi habeat jurisdictionem ordinariam, vel delegatam, ex Clementina 1. de privilegiis, in qua Regulares feriuntur excommunicatione, si absque licentia proprii Sacerdotis Extremam Unctionem administrent; in casu tamen necessitatis, absente Parocho, quilibet Sacerdos non solum potest, sed etiam debet ungere infirmum in extremis positum, ut expresse habetur in Concilio Mediolanensi quinto his verbis: *si porro is (Parochus) impeditus, aut alias in mora est, mortisque periculum instat, hoc (Sacramentum) Sacerdos alius administret*; alioquin Clementina esset in destructionem, nec proinde vera lex, quæ essentialiter est ordinatio rationis in bonum commune; nec contraria Navarri sententia cap. 27. Manualis defendi potest.

Q. 3. *Quot requiruntur Sacerdotes?*

R. 1. In Ecclesia Græca septem adhibentur, ex Simeone Thessalonicensi libro de Sacramentis apud Morinum ad calcem ejus operis de Pœnitentia: *Quamvis*, inquit Simeon, *non sit scriptus (numerus Sacerdotum) necessarium tamen est antiquam observare Traditionem, & sint quidem septem, ut veteris moris est: si vero necessitas fuerit, tres sint ad minus.* Plures etiam in Ecclesia Latina olim conveniebant ad ungendum infirmum. Hinc criminatio Waldensium, ex Reynero libro de Waldensibus, adversus pluralitatem illam Sacerdotum.

R. 2. Unus Sacerdos sufficit, probaturque 1. ex sæpius laudata epistola Innocenti I. in qua discernit Episcopum, si velit, posse illud Sacramentum

tum conferre. 2. Ex Alexandro Tertio, cap. *Quæsit*, de verborum significatione, in quo sic habet: *Sacerdos, uno præsentē Clerico, & etiam solus, potest infirmum ungere.*

Dices: S. Jacobus cit. cap. 5. requirit plures Sacerdotes: *Inducat, inquit, Presbyteros: ergo.*

Nego conseq. Nam ex S. Augustino lib. 3. de consensu Evangelist. cap. 16. pluralis numerus in Scripturis sæpius pro singulari ponitur, ut Matth. 27. latrones, qui juxta Christum crucifixi erant, dicuntur ipsi improperasse; cum tamen scribit S. Lucas id ab uno tantum factum fuisse: *Quid autem usitatus, quam ut dicat aliquis, & rustici mihi insultant, etiamsi unus insultet?*

Q. 4. *Quomodo plures Sacerdotes concurrere possunt ad unum & idem Sacramentum conficiendum; an unus unam unctionem, puta oculorum, perficiet, alter vero alteram, puta pedum, ita ut quilibet verba proferat; an vero plures ungent, & unus dumtaxat verba proferet?*

R. 1. Primum posse fieri, secundum minimè: quia idem ipse, qui applicat materiam, formam exprimere debet; omnium enim judicio Baptismus esset irritus, si unus aquam funderet, alter vero præscripta verba proferret.

R. 2. Verisimilius est unus dumtaxat antiquitus contulisse Sacramentum, cæteros vero convenisse, ut preces pro infirmo funderent: *Quia, inquit S. Thomas libro 4. contra Gentes cap. 73. hoc Sacramentum perfectæ curationis effectum habet, & in eo requiritur copia gratiæ; competit huic Sacramento, ut multi Sacerdotes intersint, & ut oratio totius Ecclesiæ ad effectum hujus Sacramenti coadjuvet. Unde Jacobus dicit, inducat Presbyteros Ecclesiæ, & oratio fidei salvabit infirmum.*

## CAPUT V.

De subjecto Sacramenti Extremæ Unctionis.

Q. I. *Quodnam est subjectum Extremæ Unctionis?*

R. Apud Græcos quivis Fidelis pœnitens, sive sanus sit, sive infirmus; apud Latinos vero soli infirmi.

Prima pars probatur ex Euchologiis Græcorum, & ex iis, qui de eorum ritibus accurate scripserunt, ut Arcudius lib. 5. cap. 4. ubi sic habet: *Favet multum auctoritas Euchologii, in quo non tantum ægrotus, sed etiam sanus, qui sit ungendus, introducitur. Favet etiam præsens Græcorum consuetudo, quæ quidem viget non in aliquo angulo Græciæ, sed ubique passim.* Idem supponit Innocentius IV. epist. ad Episcopum Tusculanum, in qua prohibet, ne Sacerdotes Græcorum, aut Confessores Græcorum pro satisfactione pœnitentiæ unctionem aliquam solummodo injungant. Quibus verbis Summus Pontifex non vetat, ne Sacerdotes Græci cum Sacramento Pœnitentiæ simul conferant unctionis Sacramentum; sed vult dumtaxat, ut præter unctionem pœnitentibus satisfactionem imponant.

Secunda pars constat tum ex Eugenio IV. in Decreto pro Armenis, tum ex Concilio Trid. tum ex omnibus libris ritualibus.

Ergo in Ecclesia Latina Extrema Unctio conferenda non est reis, qui mortis supplicio mox sunt afficiendi, nec mulieribus partui periculoso proximis, nec militibus jamjam conflicturis; quia morbo non laborant. Secus dicendum de senio confectis; decrepita enim illa ætas est gravis infirmitas. Ita Concilium Mediolanense IV. *Parochus, inquit,*

Inquit, *Extremæ Unctionis Sacramentum sicut his ministrare debet, adultis scilicet periculose ægrotantibus, propeque moribundis, senio confectis etiam non ægrotis in diem morituris; ita istis ne ministret, nempe pueris rationis usu carentibus, mulieribus in partu laborantibus, ad bellum proficiscentibus, navigantibus, peregrinantibus, & iis qui mox ultimo supplicio multandi sunt.*

Q. 2. *Ritus Græcorum estne damnandus?*

R. Minime; 1. Quia etsi S. Jacobus docet infirmos unguendos, non excludit fanos, 2. Quia Latini propter ejusmodi ritum nullam litem Græcis intentarunt in Concilio Lugdunensi secundo, ac præsertim in Concilio Florentino, ubi constitutum est liberum cuique Ecclesiæ suos ritus observare?

Q. 3. *Utra praxis est præferenda, an Latina, an Græca?*

R. Licet quisque teneatur sequi morem suæ Ecclesiæ ex Concilio Florentino mox laudato, absolute tamen loquendo ritus Latinorum est præferendus; nititur enim tum sacra Scriptura, *infirmatur quis in vobis? inducat Presbyteros*, inquit S. Jacobus: tum Traditione, cujus non est invenire initium, ut colligitur ex epistola Innocentii I. laudata cap. 1. nec ullus ex Veteribus sacram hanc unctionem ad fanos retulit. Unde etiamsi S. Jacobus fanos expresse non excludat, proptereaque praxis Græcorum non videatur formaliter contraria Scripturæ sacræ, Traditione tamen non æquè firmatur ac praxis Latinorum.

Q. 4. *Quibus infirmis est impertienda unctio extrema?*

Simeon Thessalonienfis, Græcus schismaticus, libro de Sacramentis, quem Morinus edidit ad calcem in operis de Pœnitentia, Latinos falsa crimina-

minatione impetit, quasi asserant unctionem extremam conferri non debere nisi mox discessuris, & omni sensu destitutis: *Qui omnia immutant Latini*, inquit, *hanc etiam caeremoniam corruperunt, atque non esse exhibendam ægrotantibus, sed moribundis ajunt. Quandoquidem enim hoc Sacramentum dimittit peccata, propterea moribundis exhibetur (à Latinis) ne si quis superfixerit, rursus peccet. O clementiam! frater Dei enumerat, & oratio fidei salvabit infirmum, & eriget eum Dominus: hi vero ajunt, ut moriatur.*

Lutherus lib. de captivit. Babyl. similem calumniam Catholicis impingit: *Apostolus*, inquit, *in hoc ungi & orari præcipit, ut infirmus sanetur, & allevietur, hoc est, non moriatur . . . illi contra dicunt non esse dandam unctionem, nisi discessuris, hoc est, ut non salventur & allevientur . . . ideo & extremam volunt unctionem, ut non sit verum per eam sanari infirmum, quod ille (Jacobus) statuit: si hoc non est insanire, rogo quid est insanire?*

Calvinus lib. 4. Instit. cap. 19. non minus petulanter debacchatur adversus Catholicos: *Jacobus*, inquit, *omnes infirmos vult inungi; isti non infirmos, sed semimortua cadavera sua pinguedine inficiunt, cum jamjam anima in primoribus labris laborat, vel ut ipsi loquuntur, in extremis. Si præsentem habent medicinam in suo Sacramento, qua vel morborum acerbiteriam leniant, vel saltem aliquod animæ solatium afferant, crudeles sunt, qui nunquam in tempore medentur. Sed adversus ejusmodi calumnias ad propositam questionem.*

R. Extrema Unctio, in mente Ecclesiæ Latine, impertienda est infirmis cum vitæ periculo decumbentibus, nec spectanda est extrema vitæ periodus.

Pro-



Probatur ex Summis Pontificibus, Conciliis, & Sacramentariis; seu libris Ritualibus.

Eugenius IV. in Decreto pro Armenis sic habet, *hoc Sacramentum nisi infirmo, de cujus morte timetur, dari non debet.*

Concilium Trid. sess. 14. cap. 3. expresse docet sacram hanc unctionem impertiendam esse aliis infirmis, quam iis, qui in vitæ exitu sunt constituti: *Declaratur etiam, inquit, esse hanc unctionem infirmis adhibendam, illis vero præsertim, qui tam periculose decumbunt, ut in exitu vitæ constituti videantur.*

Concil. Mediolanense I. sic statuit: *Extremæ Unctionis Sacramentum curet Parochus, ut ægroto, dum integris est sensibus, adhibeatur.*

Concil. Burdigalense anno 1583. *Non eo usque differendum est, inquit, dum æger omnibus pene sensibus destitutus sit.*

Concil. Bituricense anno 1584. *Administretur tempestive à Sacerdote Extrema Unctio olei sancti; ita ut Christianus mente adhuc integra Sacramenti efficaciam cognoscere possit.*

Studeant igitur Pastores corrigere eorum errorem, qui ad divinum unctionis remedium non recurrunt, nisi cum propinquorum desperata est salus; nam præterquamquod Novatoribus præbent occasionem calumniandi Ecclesiam Catholicam, ipsi in suos crudeles existunt.

Q. 5. *Extrema Unctio estne exhibenda omnibus infirmis periculose decumbentibus?*

R. 1. Non est exhibenda,

1. iis, qui in ipso actu criminis sensibus sunt destituti, utpote qui sint impœnitentes, & gratiæ sanctificantis incapaces.

Dixi, *in ipso actu criminis*; Quid si spatium pœnitent.

D. Habert Theolog. Tom. VI

N n

niten.

nitendi habuerint priusquam fierint rationis impotes, sacra unctio non est eis deneganda; quia conjectare licet eos pœnituisse, etiamsi nullum suæ pœnitentiæ signum dederint. Ita communiter Theologi, etiam ii, qui negant in ejusmodi circumstantiis concedendam absolutionem, ut supra observavimus Tract. de Pœnit. ubi de absolutione.

2. Neque iis exhibenda est, quibus lumen rationis nunquam affuit, ut pueris & amentibus à nativitate, qui nulla habuere lucida intervalla, hi quippe post Baptisma nullum peccatum contraxerunt, quod eis remittatur, nullæ in ipsis supersunt peccatorum reliquiæ, quas divina unctio abstergat.

Nec dicas sanitatem corpoream iis infirmis posse restitui per sacram unctionem; nam effectus ille est tantum secundarius: Sacramentum autem non debet conferri nisi iis qui sunt capaces effectus primarii; Sacramenta enim sunt instituta ad nostram sanctificationem, nec licet ad ea accedere solo motivo temporalis commodi: *Totum quod salutaribus agitur Sacramentis*, inquit Sanctus Augustinus Enchir. cap. 66. *magis ad spem futurorum bonorum, quam ad retentionem, vel adeptionem præsentium pertinet.* Iis igitur infirmis exceptis

R. 2. Adultis quibusque Fidelibus periculose decumbentibus, sive piè, sive male vixerint, modo pœnitentes præsumi possint, adhibenda est Extrema Unctio, etiamsi sensibus sint destituti; per Baptismum enim jus acceperunt ad alia Ecclesiæ Sacramenta, quibus privandi non sunt, nisi constet eos jure suo cecidisse per manifestam impœnus

nitentiam. Juvat huc referre, quæ S. Augustinus libro 1. de adulterinis conjugiiis capite 26. & 28. scribit de Catechumeno sensibus destituto : *Non solum incredibile est, inquit, nec in fine vitæ hujus baptizari Catechumenum velle ; verum etiamsi voluntas ejus incerta est, multo satius est nolenti dare, quam volenti negare, ubi velit an nolit sic non apparet, & tamen credibilius sit eum, si posset, velle se potius fuisse dicturum ea Sacramenta percipere, sine quibus jam credidit non se oportere de corpore exire.* Ne quis autem putet sanctum Doctorem intelligendum dumtaxat de Cathecumenis, qui saniepi vixerunt, ait : *Ego non solum alios Catechumenos, verum etiam ipsos, qui viventium conjugiiis cupulati retinent adulterina consortia, cum salvos corpore in his permanentes non admittamus ad Baptismum, tamen si desperati, & intra se pœnitentes jacuerint, nec pro se respondere potuerint, baptizandos puto, ut etiam hoc peccatum cum cæteris lavacro regenerationis abluatur.* Quis enim novit utrum fortassis adulterinæ carnis illecebram usque ad Baptismum statuerant detineri . . . . *Quæ autem Baptismatis eadem reconciliationis est causa (à fortiori Extremæ Unctionis, ad quam exteriora pœnitentiæ signa non ita requiruntur in omnium Theologorum sententia) si forte pœnitentem finiendæ vitæ periculum præoccupaverit. Nec ipsos enim ex hac vita sine arrba suæ pacis exire velle debet mater Ecclesia.*

Q. 6. *Extrema Unctio estne adhibenda ante, vel post perceptum sacrum viaticum?*

R. 1. Sacerdos debet observare ritum in suo Rituali præscriptum.

R. 2. Dubium non est quin apud Græcos Eucharistiæ soleat præmitti ; cum ex dictis illam

conjungant cum Sacramento Pœnitentiæ , quod ante Eucharistiam confertur.

Certum est etiam in Ecclesia Latina prius inunctos fuisse infirmos, quam sacro viatico reficerentur ; sic enim Ivo Carnotensis Decreti parte 15. cap. 26. refert ex libro pœnitentiali Theodori Cantuariensis , qui floruit VII. sæculo , *sacro unctione olei inuncti secundum statuta Sanctorum Patrum, communione Viatici reficiantur.* Bolandus tomo 2. Februarii de Tresano sæculi sexti Presbytero sanctissimo ita narrat : *Oleum sanctæ reconciliationis accepit , & cum cordis intima contritione & humilitate suscepit , . . . quæ postquam explevit , Viaticum petiit.* Lib. 6. Capitularium Caroli Magni cap. 75. hæc leguntur : *Si infirmitate quis depressus fuerit , vitam sine communione non finiat , nec unctione sacrati olei careat ; & si finem perspiciat , sacrosancto corpore Deo anima ejus à sacerdote precibus commendetur.* Concilium Aquisgranense an. 836 canon. 5. sic statuit : *Si autem infirmitate depressus fuerit , nec confessione atque oratione Sacerdotali , nec non unctione sacrati olei per ejus (Presbyteri) negligentiam careat.* Denique si finem urgentem perspexerit , commendet animam Christianam Domino suo more Sacerdotali cum acceptione sacræ communionis.

Concilium Moguntinum anno 847. de infirmis eadem habet cap. 26. *sacra cum unctione Dei animati secundum statuta Sanctorum Patrum communione Viatici reficiantur.* Wibertus in vita Leonis IX. qui obiit anno 1051. lib. 2. c. 16. scribit ; *perpendens non diutius eum retinendum carnis ergastulo , decrevit , ut . . . inungeretur sacri olei liquore.* Super quo factò exhilaratus usquequaque , munitusque Corporis & Sanguinis Domini communione , &c. Et ratio hujusce disciplinæ ea est , quod Sacramentum unctionis extremæ sit  
con-

consummatio pœnitentiæ, abstergat peccatorum reliquias, animam erigat, paratioremque reddat ad perceptionem sacrosanctæ Eucharistiæ. His auctoritatibus & rationibus permotus Eminentissimus Cardinalis *de Noailles*, Parisiensis Archiepiscopus, in libro Rituali, quem edidit, hortatur ut prior disciplina restituatur, videmusque plures votis ejus morem gerere.

Q. 7. *Extrema unctio potestne iterari?*

Negarunt duodecimo sæculo Goffridus Vindocinensis lib. 2. epist. 19. ad Yvonem Carnotensem; ipse quoque Yvo epist. 20. ad eundem Goffridum, & plures alii, adversus quos Petrus Cluniacensis ejusdem ævi lib. 5. ep. 7. propugnavit communem Catholicorum sententiam, juxta quam

R. Certum est Extremam Unctionem iterari posse; ita enim declaravit Concilium Trident. sess. 14. c. 3. de Extrema unctione, his verbis, *quod si infirmi post susceptam hanc unctionem convalescerint, iterum hujus Sacramenti subsidio juvari poterunt, cum in aliud simile vitæ discrimen inciderint.* Quibus verbis Concilium indicat Extremam unctionem non esse iterandam in eodem morbo perseverante,

Probatur autem nostra responsio; tum quia S. Jacobus non obscure insinuat toties inducendos Presbyteros ad unguendum, quoties quis infirmatur; ait enim absolute, & absque ulla restrictione, *infirmatur quis in vobis? inducat Presbyteros Ecclesiæ, & orent super eum ungentes, &c.* tum quia nova identidem recurrit causa utendi divino hocce remedio, nempe gravis superveniens morbus, novus animæ torpor & conflictatio, *iterari prout mihi videtur*, (inquit Petrus Cluniacensis citata epistola 7.) *neceffe est infirmorum unctionem, quia*

*iterari necesse est peccatorum, propter quam fit illa unctio, remissionem.*

Duo opponebant patroni oppositæ sententiæ. Primum; unctio infirmorum publica est pœnitentia: atqui pœnitentia publica non potest iterari: ergo nec unctio infirmorum. Secundum, aliæ unctiones, ut Baptismatis, Confirmationis, Ecclesiarum, & sacrorum vasorum, non iterantur: ergo nec unctio infirmorum.

Respondeo ad duo illa momenta.

Ad primum; 1. De fide est Sacramentum Pœnitentiæ iterari posse ex Christi instituto: 2. Pertinuit ad meram Ecclesiæ disciplinam, quod Pœnitentia solemnīs non iteraretur, propter rationes, quæ hic non occurrunt; ideoque Ecclesia nihil simile sanxit circa Extremam Unctionem, nec absolute potuit sancire, cùm ex Christi instituto iterari possit.

Ad secundum; unctiones, quæ obijciuntur, ideo non iterantur, quia sunt consecrationes, quæ tandiu manent, quandiu res, vel personæ consecratæ extant. At unctio infirmorum non est ad consecrandum, sed ad sanandum, ac proinde toties est adhibenda, quoties gravis morbus recurrit: *Ordinatur*, inquit S. Thomas libro 4. contra Gentes cap. 73. *huius Sacramenti inunctio ad sanandum.* Medicina autem sanativa toties iterari debet, quoties infirmitas interatur.

## CAPUT VI.

*De effectibus Sacramenti Extremæ Unctionis.*

Pseudoreformati negant unctionem infirmorum habere effectum aliquem; contenduntque remissionem

missionem peccatorum, quam pollicetur sanctus Jacobus, tribuendam esse vel fidei infirmi, vel orationibus Fidelium: *Non negamus* inquit Lutherus lib. de captivitate Babylonica, *per Extremam Unctionem dari remissionem & pacem; non quia Sacramentum sit divinitus institutum, sed quia suscipiens ita credit sibi fieri.* Et Calvinus lib. 4. Institut. cap. 19. *Jacobus dicit ubi unctus oleo fuerit infirmus, & precatio concepta fuerit super eum, si in peccatis fuerit, remissionem iri . . . non intelligens pinguedine deleri peccata; sed Fidelium orationes, quibus afflicti frater Deo commendatus fuerit, non fore irritas, . . . isti per sacram suum, idest, abominabilem unctionem, peccata remitti impie mentiuntur.* Sed impius ille error satis superque confutatus est capite primo, ubi demonstravimus unctionem infirmorum esse novæ legis Sacramentum propriè dictum, ac proinde signum gratiæ per se efficax: superest dumtaxat, ut expendamus proprios ejus effectus, præter communem omnibus Sacramentis, nempe gratiam sanctificantem. Itaque

Q. 1. *Quinam sunt effectus Sacramenti Extremæ Unctionis proprii?*

R. Tres referuntur à sancto Jacobo citato capite quinto. 1. Sanitatem corporis restituit, si tamen animæ saluti expediat. 2. Infirmum alleviat, erigit. 3. Peccata, si quæ sint, remittit. Eosdem effectus recenset Concilium Trident. sessio. 14. capite 2. de Extrema Unctione, sed alio ordine; sanitatis enim corporeæ primo loco meminit Apostolus; quia contextus sermonis id exigit: cum enim dixisset, *infirmatur quis in vobis?* consequens erat, ut statim unctionem commendaret tanquam remedium efficax ad ægritudinem depellendam: Concilium verò primo & secundo loco

reponit, quod est in Sacramento præcipuum, scilicet, gratia Spiritus sancti, *cujus unctio delicta, si quæ sint adhuc expianda, ac peccati reliquias aufergit, & ægroti animam alleviat & confirmat*, tertio demum loco sanitatem appellat, *sanitatem corporis*, inquit, *interdum ubi saluti animæ expedierit, consequitur.*

Q. 2. *Quid per reliquias peccati intelligitur?*

R. Humani defectus & infirmitates ex peccato originali, & actualibus contractæ, ut propensio ad malum, torpor ad bonum operandum; quædam grævedo animam deprimens, quo minus ad cœlestia sese erigat, mœror & anxietas, quæ morti vicinum vexare solet, & diffidentiam provocat, *quæ causa est*, inquit sanctus Augustinus lib. 15. de Trinitate cap. ult. *cur acie fixa lucem illam incommutabilem videre non possis, nisi infirmitas? & quid tibi eam fecit, nisi iniquitas?*

Q. 3. *Sacramentum Extrēmæ Unctionis estne primario & per se institutum ad triplicem illum finem & effectum?*

Nota, voces illas, *per se & primario*, non esse confundendas, aliud quippe est esse institutum per se ad aliquem finem: aliud primario: quædam enim tam ex intentione operantis, quam operis assumuntur ad finem; qui tamen non intenditur nisi secundo. Veritas patebit exemplo Medici, qui ita vult levare dolorem capitis, ut timeat nocere pulmōni male affecto, ideoque parat medicamentum, in quo miscet utilia ad utrumque morbum curandum. Medicamentum illud per se est ad medendum capiti & pulmōni, sed primario capiti, id enim primum intendit Medicus: secundo pulmōni. His prænotatis,

R. Ex.



R. Extrema Unctio per se & primario animam alleviat, abstergendo peccati reliquias, secundo tantum, & nihilominus per se peccata, sive mortalia, sive venialia remittit, & sanitatem corporis, modo animæ expedit, restituit. Tres sunt responsionis partes.

Prima pars, quæ est de alleviatione animæ per abstersionem reliquiarum peccati, probatur: quia ex Patribus, tam Græcis, quam Latinis, hoc Sacramentum est Pœnitentiæ perfectivum, &, ut loquitur Synodus Tridentina in præmio de Extrema Unctione, consummativum: atqui pœnitentiam non potest perficere, nisi quatenus reliquias peccati abstergit, & animam adversus infirmitatem ex peccatis relictam confirmat, ac roborat; ergo Sacramentum Extremæ Unctionis est revera primario institutum ad alleviandam animam, & abstergendas peccati reliquias.

Minor probatur. Sacramentum Extremæ Unctionis Pœnitentiam perficit, & consummat, vel quatenus peccati venialis, sive mortalis maculam delet: vel quatenus abstergendo peccatorum reliquias animam exhilarat, confirmat, ac roborat. Primum dici nequit; quia Sacramentum Pœnitentiæ primo, & per se omnem maculam peccati mortalis, & venialis delet, nisi pœnitens ponat obicem. Restat ergo, ut secundum dicatur: *Prima utilitas & effectus hujus Sacramenti est*, inquit sanctus Carolus in Instruct. de Extrema Unctione, *quod peccati reliquias tollit tanquam complementum Sacramenti Pœnitentiæ.*

Dices 1. Sacramentum Pœnitentiæ valet ad abstergendas peccati reliquias: ergo Extrema Unctio non est ad id instituta.

Probatur anteced. Ex dictis ad calcem Tractatus superioris, Sacramentum Pœnitentiæ jus quoddam tribuit ad accipienda auxilia, quibus pœnitens possit concupiscentiam comprimere, tentationibus obsistere, in bono proficere, & usque ad finem perseverare; ergo Sacramentum Pœnitentiæ virtutem habet abstergendi peccatorum reliquias.

Nego consequentiam primi antecedentis, Medicus enim, qui hominem infirma valetudine hactenus curavit parvis & lenioribus remediis, alia fortiora adhibet, si ille in gravem morbum forte incidat: atqui pœnitens, qui periculoso morbo laborat, longe majori, quam antea, torpore & anxietate premitur, cruciant acutissimi dolores corporis, cupido vitæ mox amittendæ anxium reddit, horror præsentissimæ mortis turbat quam maximè, inde præteritorum scelerum memoria, & intolerandi conscientiæ stimuli; hinc prævisum Dei judicium mox venturum miris modis exagitant. Adde & vehementiores dæmonis impulsus, qui in desperationem conjicerent, nisi divinam misericordia succurreret, novasque vires & arma suppeditaret. Unde Concilium Trident. circa institutionem hujus Sacramenti primo loco declarat, & docet, quod clementissimus Redemptor noster, qui servis suis quovis tempore voluit de salutaribus remediis adversus omnia omnium hostium tela esse prospectum, quemadmodum auxilia maxima in Sacramentis aliis præparavit, quibus Christiani conservare se integros, dum viverent, ab omni graviore spiritus incommodo possint; ita Extremæ Unctionis Sacramento finem vitæ tanquam firmissimo quodam præsidio munivit. Nam etsi adversarius noster occasiones per omnem vitam quærat & captet, ut  
devo-

devorare animas nostras quoquomodo possit; nullum tamen tempus est, quo vehementius ille omnes suæ versutiae nervos intendat ad perdendos nos penitus, & à fiducia etiam, si possit, divinæ misericordiæ deturbandos, quam cum impendere nobis exitum vitæ perspicit. Et Catechismus Romanus part. 2. de Extrema Unctione §. 28. Nihil, inquit, ad mortis tranquillitatem magis conducit, quam si tristitiam abjiciamus, & læto animo Domini adventum expectemus, paratique simus depositum nostrum, quodcumque illud à nobis repetere voluerit, libenter reddere. Ut igitur hac sollicitudinè Fidelium mentes liberentur, animusque pio & sancto gaudio repleatur, Extremæ Unctionis Sacramentum efficit. Atque ita corrui argumentum in objectionis confirmationem adductum; cum enim peccatorum reliquiarum hominem periculose decumbentem magis vexent ac premant, præsentiori remedio opus habet.

Dices 2. Post perceptum Extremæ Unctionis Sacramentum manent in iis qui convaluerunt peccatorum reliquiarum, scilicet, fomes peccati, vitiosi habitus, natura in malum propensa, torpor ad bonum operandum; ergo Extrema Unctio non abstergit peccatorum reliquias.

Distinguo consequ. Non abstergit immutando naturalem corporis habitudinem & dispositionem, Concedo: Non abstergit tribuendo robur, & vigorem adversus ejusmodi peccatorum reliquias, Nego consequ. Itaque Extrema Unctio aliter abstergit peccatorum reliquias, aliter reatum culpæ: culpam ita abstergit, ut amplius non remaneat, sed eam prorsus delet: reliquias vero peccatorum abstergit, quatenus animam exhilarat, confirmat, fortemque reddit in propria infirmitate.

tate. Ita Catechismus Romanus citato §. 28. *Alleviatur, inquit, & erigitur ægri animus divinæ bonitatis spe; eaque corroboratus morbi incommoda omnia fert levius, ac ipseus dæmonis calcaneo insidiantis artificium & calliditatem facilius eludit.*

Secunda pars, scilicet, Extremam Unctionem peccata tam mortalia, quam venialia, remittere per se, sed secundo, non vero primario probatur.

Ac I. quidem quod non remittat per se primario, tum quia hæc conditionalis sancti Jacobi locutio, *si in peccatis sit, remittentur ei*, satis indicat Sacramentum istud non esse primario institutum ad delendam peccatorum maculam; tum quia Extrema Unctio est Sacramentum vivorum, supponitque animam à morte peccati suscitatum, & curatione dumtaxat indigere: tum denique quia Sacramentum Pœnitentiæ; ex dictis, est necessarium necessitate medii iis, qui post Baptismum in peccata lethalia prolapsi sunt; atqui Sacramentum Pœnitentiæ ipsis non ita esset necessarium, si Extrema Unctio ad delenda peccata lethalia primario esset instituta: Ergo.

Quod autem Extrema Unctio per se, licet secundo, remittat peccata tam mortalia, quam venialia, probatur I. ex laudatis verbis sancti Jacobi, *si in peccatis sit, remittentur ei*. Quæ verba non possunt restringi ad peccatorum reliquias, nec ad peccata venialia, cum dubium non sit, quin infirmus implicetur ejusmodi reliquiis per peccatum saltem originale contractis, & conscius sit levioris alicujus peccati; scriptum est enim, Eccl. 7. v. 21. *non est . . . homo justus in terra, qui faciat bonum, & non peccet.* Ergo dubium Apostoli

cadit in peccata mortalia, aitque, si quæ sint, ea remissum iri per sacram unctionem.

Probatur 2. ex verbis formæ, *indulgeat tibi Deus quidquid deliquisti*, ex quibus sic argumentari licet: Sacramenta novæ legis id per se operantur, quod significant: atqui Sacramentum Extremæ Unctionis significat remissionem quorumcunque peccatorum; ergo illa per se remitti saltem secundariò.

Nec dicas commune esse Sacramentis vivorum, præsertim Eucharistiæ, peccata secundo remittere; namque 1. propugnativimus suo loco Sacramentum Eucharistiæ, à fortiori cætera, quæ dicuntur vivorum, peccata mortalia non remittere: nisi mediante perfecta contritione, quæ si desit in eo, qui bona fide Eucharistiam percipit, manet peccati mortalis reatus. Secundo, opposita sententia affirmans Eucharistiam per accidens immediate remittere peccatum mortale, quando invincibiliter ignoratur, piis quidem, sed admodum incertis conjecturis nititur, nec deduci potest ex natura ipsiusmet Sacramenti, quod est institutum tanquam spiritualis cibus, qui supponit vitam; nec ex Christi promisso. Contra vero virtus remittendi peccata etiam mortalia, quam unctioni infirmorum tribuimus, est in Scripturis expressa, *si in peccatis sit, remittentur ei*: verbis formæ significata, *indulgeat tibi Deus quidquid deliquisti*: & quod notatu dignum est, Patribus Tridentinis capite 2. vindicata adversus alienas interpretationes, quibus nonnulli verba sancti Jacobi & sensum formæ Sacramentalis obscurare conantur: *Res etenim hæc, inquit Patres Tridentini, gratia est Spiritus sancti, cujus unctio delicta, si quæ sint adhuc expianda: ac peccati reliquias abstergit.* Hic conceptis

ceptis verbis distinguuntur delicta à reliquiis peccati, & ea delicta, quorum infirmus potest non esse reus : ergo lethalia; nam à venialibus nullus est omnino immunis.

At, inquires, Sacramentum Extremæ Unctionis institutum est per modum curationis, & medicinæ spiritualis : atqui medicina, sicut & cibus vitam supponunt in eo, qui curatur, & alimentis reficitur : ergo Extrema Unctio grave peccatum, quod est mors animæ, non expellit.

Distinguo majorem : Institutum est primario, Concedo : Institutum est unicè ut medicina spiritualis, Nego major. Nam secundariò institutum est ad restituendam vitam spiritalem, si forte infirmus eam per peccatum amiserit, ut constat tum ex verbis Sancti Jacobi, tum ex ipsa forma Sacramenti; tum ex doctrina Concilii Tridentini.

Distinguo similiter minorem : Medicina, quæ non habet nisi vim sanandi, supponit vitam, Conc. Medicina, quæ habet vim & sanandi, & vitam infundendi, qualis ea, de qua agitur, Nego minor.

Unum igitur ex hoc argumento elici potest, scilicet eum, qui sibi conscius est peccati mortalis, teneri clavibus Ecclesiæ se subicere, aut si non possit, saltem conari, quantum in ipso est, ad perfectam contritionem cum voto sacramentalis confessionis, quod verissimum est; quia Sacramentum illud primario fuit institutum in remedium vivorum, qui gravi infirmitate laborant.

Probatur 3. nostra responsio ex Traditione.

Origenes, & S. Chrysostomus cap. 1. laudati docent per unctionem, de qua S. Jacobus, peccata remitti.

Petrus

Petrus Cluniacensis, quem præced. capite appellavimus, asserit iterandam hanc unctionem : *Quia iterari necesse est peccatorum, propter quam fit illa unctio, remissionem.*

Sanctus Thomas lib. 4. contra Gentes c. 73. sic scribit : *Contingit quod homo omnium peccatorum, quæ commisit, notitiam, vel memoriam non habet, ut possit per pœnitentiam singula expurgare, sicut etiam quotidiana peccata, sine quibus præsens vita non agitur, à quibus oportet hominem in suo exitu per hoc Sacramentum emundari.*

Sanctus Carolus in Instruct. de Extrema Unctione : *Prima : inquit, utilitas & effectus hujus Sacramenti est, quod peccati reliquias tollit tanquam complementum Sacramenti Pœnitentiæ. Quæ reliquiæ peccata esse intelliguntur, sive mortalia, sive venialia, quæ post alia Sacramenta remanent ; potest enim fieri, ut ignorante eo, qui commisit, vel non valente confiteri, peccatum mortale remaneat, in quo delendo ita hoc Sacramento juvatur, ut fieri possit eum per hoc Sacramentum salvari, qui alioqui fuisset damnandus.*

Neque vero ejusmodi periculum ita remotum, aut rarum cuiquam videri debet, ut illud non timeat, Extremamque Unctionem negligat ; nam præterquamquod non desint, quibus alia Sacramenta conferri nequeunt, plures laborant ignorantia vincibili, ob quam certa Sacramenta suo fructu caruere : irritæ fuerunt absolutiones ipsis concessæ, vel quia defuit sufficiens dolor de peccatis, quorum se accusarunt : vel quia propriis cupiditatibus & aliorum exemplis excæcati multa excusarunt, quæ tamen eos æternæ damnationis reos constituunt. Denique quotquot in æternum pereunt, omnes paucis exceptis, propter peccata igno-

ignorantiæ vincibilis, extremum illud malum incurrunt. Hinc geminatae Ecclesiæ preces, *illumina oculos meos, ne unquam obdormiam in morte*, Psalm. 12. *ab occultis meis munda me* Psalm. 18. hinc firmissimarum Ecclesiæ columnarum tremor, *nihil . . . . . mihi conscius sum, sed non in hoc justificatus sum*, 1. Corinth. 4. *multum timeo occulta mea, quæ norunt oculi tui, mei autem non. Tu nosti de hac re ad te gemitum cordis mei, & flumina oculorum meorum*, Sanct. Augustinus libro 10. Confessionum, cap. 35.

Christus itaque maximè commendavit suam erga homines charitatem, & sincerum salutis eorum desiderium, cum extremo huic remedio eam virtutem tribuit, quæ suppleat omnes defectus, qui ex ignorantia vincibili fortè præcesserunt; tamque provide subveniat eo momento, ex quo pendet æterna, vel felicitas, vel miseria.

Quisquis ista attentius perpenderit, commiseretur plerosque Fideles, quibus tantus gratiarum thesaurus est prorsus ignotus Pastorum incuria, qui nunquam, aut raro, de eo verba faciunt ad plebem; ex quo accidit, ut Deus frustretur gloria sibi debita ob præstantissimum illud beneficium, plerique illud negligant, sæpe etiam refugiant tanquam firmam mortis sententiam; Parochi tam præsens, tamque divinum remedium infirmis proponere vereantur, ne animis concidant, turbetur familia veluti ad acerbum & fatalem nuntium, quo accepto, affines & domestici dedunt se lacrymis, & ex ægrotis ii religiosiores habentur, qui se ad arbitrium Sacerdotis accommodant patienterque ferunt divinam illam curationem sibi adhiberi, pauci admodum, qui illam exoptent,  
& ea



& ea, qua per est, devotione, ac animi præparatione suscipiant.

Dispositio autem ad istud Sacramentum requisita, ex dictis facile colligitur; cum enim probatum maneat, sacram hancce unctionem esse Christianæ pœnitentiæ perfectionem ac complementum, manifestè sequitur, debere infirmos huic fini respondere per eam contritionem, quæ cum Sacramento reparare valeat omnes defectus antea actæ pœnitentiæ, alioqui integrum unctionis fructum non perciperent, Sacramenta quippe operantur secundum dispositiones suscipientium.

Porro in pœnitentia, qua sani defunguntur, quatuor defectus occurrere possunt; aut enim carent efficaci proposito vitandi peccata, quæ in confessione Sacramentali deponunt, solaque velleitate, ut ajunt, sibi blandiuntur: aut ignorantia vincibili ac culpabili gravia peccata excusant, quæ ideo perpetrare non cessant: aut (quod sæpius contingit) multa levia contemnunt, & per consentaneum dolorem abstergere negligunt: aut denique per dignos pœnitentiæ fructus non satisfaciunt Deo, & apud ipsum obnoxii remanent pœnæ temporali.

Atqui Extrema unctio sine accuratiore pœnitentia infirmi, vitia illa integre non corrigit: non defectum (si quis fuerit) efficacis propositi, nisi voluntas infirmi plene jam mutata omnem peccandi affectum deponat: non peccata ignorantiae, nisi infirmus nunc condemnet, quæ hactenus excusaverat: sitque paratus, si convaluerit, ad ingrediendam arctam semitam crucis, seu Evangelii, & dimittendam spatiosam, ac tritam sæculi viam tenebris obductam, ut sic ignorantia, si quæ

prius in illo fuerat voluntaria, deinceps censetur involuntaria, & veniæ digna. Non etiam sacra unctio absterget peccata venialia, nisi universalior infirmi contritio ad ea se extendat: cum ex dictis nullum peccatum quantumcunque leve sine pœnitentia deleri queat: non denique reatum pœnæ temporalis, quam sanctus Thomas, & plures post ipsum Theologi númerant inter peccati reliquias, nisi infirmus ardentiori desiderio plene satisfaciendi Deo accensus strenue morbi dolores & incommoda sustineat, & animo contrito imminuentem rerum temporalium, ipsiusque vitæ amissionem acceptet in expiationem suorum scelerum. Ita fere S. Thomas libro 4. contra Gentes, cap. 73. ubi sic habet: *Hujusmodi quidem spirituales infirmitates per pœnitentiam sunt curandæ . . . . sed quia homo, vel per negligentiam, aut per occupationes varias vitæ, aut etiam propter temporis brevitatem, aut propter alia hujusmodi prædictos defectus in se perfecta non curat; salubriter ei providetur, ut per hoc Sacramentum prædicta curatio compleatur, & à reatu pœnæ temporalis liberetur, ut sic nihil in eo remaneat, quod in exitu animæ à corpore eam possit à perceptione gloriæ impedire.*

Ne quis autem putaret Sacramentum ista operari sine convenienti infirmi pœnitentia, mentem suam aperit Angelicus Doctor in 4. dist. 43. q. 1. art. 2. ubi sic scribit ad secundum: *Reatum pœnæ dimittit (unctio) ex consequenti, in quantum debilitatem tollit; quia eandem pœnam levius portat fortis, quam debilis.* Sensus est Extremam unctionem non per se immediatè expungere reatum pœnæ, sed mediante infirmi pœnitentia, quatenus illum confirmat ad alacrius ac generosius ferendos morbi dolores, in remissionem peccatorum.

Ex

Ex his colliget Pastor , 1. Sacramentum Extremæ unctionis amplam dicendi copiam ipsi sup-  
 peditare , ut subditi audiant & discant sani quod  
 graviori morbo correpti edoceri nequeunt : Si  
*hæc ipsa rerum capita à Pastoribus latius , & ea , qua de-  
 cet , diligentia explanata erunt , dubitandum non est , quin  
 Fideles ex hac doctrina maximum pietatis fructum perci-  
 piant* , ait Catechismus Romanus de Extrema un-  
 ctione , §. ult. 2. Quæ debeat esse ratio præpa-  
 randi infirmum ad percipiendam Extremam un-  
 ctionem : nimirum satis non est ut Pastor genera-  
 tim moveat ad pœnitentiam ; sed insuper debet  
 sigillatim attingere capita superius notata ; ac præ-  
 fertim quæ spectant ignorantiam vincibilem , pro-  
 pter quam tot homines in æternum pereunt.

Tertia pars nostræ responsionis : nempe Ex-  
 tremam unctionem sanitatem corporis restituere ,  
 non quidem primario , sed secundario tantum , &  
 in hypothesi quòd saluti animæ expediat , proba-  
 tur 1. ex Scriptura Jacobi 5. cap. sæpius laudato ,  
*infirmatur quis in vobis ? inducat presbyteros Ecclesiæ...  
 & oratio fidei salvabit infirmum* : quæ posteriora ver-  
 ba Hugo Victorinus , Magister Sententiarum , S.  
 Thomas , S. Bonaventura , & alii communiter  
 Theologi intelligunt de sanitate corporea : & me-  
 rito quidem , alias verba non cohærent cum  
 præcedentibus , *infirmatur quis in vobis ?*

Probatur 2. ex Traditione ; nam ex præscri-  
 pto ritu conferendæ Extremæ unctionis Ministri  
 hætenus orarunt pro corporea salute infirmi , ut  
 patet ex Sacramentario Sanct. Gregorii , & ex  
 Concilii Cabillonensis II. can.48. Nec audiendus  
 videtur Estius , dum scribit , orationes illas non  
 habere efficaciam ex opere operato , sed ex opere

operantis; nec expectandam sanitatem ex virtute Sacramenti; sed ex suffragiis Ecclesiæ & Ministrorum; aliena enim est ejusmodi interpretatio à communi Catholicorum sententia, quam exponunt Eugenius IV. in Decreto pro Armenis, & Concilium Tridentinum cap. 2. de Extrema Unctione. Eugenius quidem in laudato Decreto sic habet: *effectus (unctio) est mentis sanatio; in quantum autem expedit, etiam corporis.* Et Concil. Trid. cit. capite: *sanitatem, inquit, corporis interdum ubi saluti animæ expedierit (infirmus) consequitur.*

Quod vero effectus ille non sit primarius, sed secundarius tantum, probatur; quia Sacramenta primo & per se instituta sunt ad animæ sanctificationem, ut patet ex eorum definitione. Nullus, ex S. Augustino, propter temporale commodum debet effici Christianus: *Fides, inquit lib. de catechizandis rudibus cap. 5. non res est salvandi corporis, sed credentis animi.* Et Enchirid. cap. scribit, parvulos post lavacrum regenerationis doloribus cruciari, *ut intelligamus, inquit, totum quod salutaribus agitur Sacramentis, magis ad spem futurorum bonorum, quam ad retentionem vel adoptionem præsentium pertinere.*

Extrema Unctio tamen non absolute, sed conditionate tantum corpoream salutem restituit, nempe si saluti animæ expedierit; quia operans, inquit S. Thomas in 4. dist. 23. qu. 1. in art. 2. *numquam inducit secundarium effectum, nisi secundum quod expedit ad principalem, ideo ex hoc Sacramento non sequitur corporalis sanatio semper, sed quando expedit ad spiritualem sanationem, tunc semper eam inducit, dummodo non sit impedimentum ex parte recipientis.*

Objicit Lutherus lib. de captivitate Babylonica; Repugnat experientiæ divinam promissionem sanitatis corporeæ esse annexam unctioni infirmorum. *Quis, inquit, non videt hanc promissionem in paucis; imo in nullis impleri? inter mille enim vix unus restituitur, idque nemo Sacramento, sed naturæ vel medicinæ beneficio putat.*

R. I. Retorquendo argumentum contra ipsum Lutherum docentem Fideles in Baptismo per fidem induere Christum; namque inter mille Lutheranos vix unus, verius dicam, nullus tam præclaro justitiæ ornamento circumdatus cernitur. Si respondeat non omnium esse fidem, illud ipsum nos vero & Catholico sensu reponemus, nimirum Fideles magis in arte Medicorum confidere, quàm in hocce efficacissimo unguento divinitus præparato, utpote qui ad illud non recurrant ut plurimum, nisi cum à spe sanitatis recuperandæ exciderunt: *non ergo æstimet homo ille (qui postulat in fide hæsitans) quod accipiat aliquid à Domino, Jac. I.* Deinde unde habet Lutherus, quod si quando restituatur sanitas homini pleno fide, id non Sacramento, sed naturæ vel medicinæ sit tribuendum?

2. Sanitas corporea non absolute promittitur, sed sub conditione, nimirum si animæ saluti expediat. Expediebat quidem primis Ecclesiæ sæculis, quibus fides in cordibus infidelium erat inferenda & roboranda: ut stupendæ illæ, ac miraculo plenæ sanationes frequentius contingerent: at adulta jam fide, rariores esse debuerunt; quemadmodum arbores, inquit S. Gregorius, postquam radices altius egerunt, non amplius irrigantur ab agricola.

Instabis: Ex concessis miracula nunc à Ministris Ecclesiæ non sunt intendenda, nec expectan-

da; atqui sanatio supra naturæ vires est miraculum : ergo Ministri Ecclesiæ eam per sacram unctionem nec intendere , nec expectare debent.

Respondet Dominicus Soto in 4. dist. 23. q. 1. art. 2. Extremam Unctionem per se quidem non conferre corporis sanitatem , sed auxilium dumtaxat ad illam restituendam ; posse autem esse tantam morbi iniquitatem ; ut vinci nequeat sine miraculo , quod à Ministris Ecclesiæ non est expectandum. Mentem suam explicat exemplo artis Medicæ , quæ licet infallibiter juvet ; attamen propter nimiam vim morbi non semper sufficit ad sanitatem præstandam. Sed hæc responsio communiter rejicitur , imo Suarez disp. 41. sect. 3. n. 4. existimat esse ut minus temerariam , utpote communi Theologorum sententiæ adversam , & , quod gravius est , oppositam non quidem definitioni , sed doctrinæ Concilii Trident. supra laudati. Quare

R. Concessa majore , distinguo minorem. Sanatio supra naturæ vires est miraculum ; si fiat etiam supra consuetum gratiæ aut Sacramenti operandi modum , Concedo : si fiat juxta consuetum gratiæ , aut Sacramenti operandi modum , Nego min. Namque ex S. Thoma , quem laudavimus ubi de justificatione , ad verum miraculum duo requiruntur , 1. ut opus excedat naturæ vires : 2. ut sit ratum ; & præter ordinem à Deo constitutum.

Hinc justificatio , licet excedat naturæ vires , non est miraculum ; quia rata non est , nec Sacramentum Pœnitentiæ eam operatur , nisi secundum ordinem à Deo institutum. Similiter sanitas , quæ naturæ viribus propter morbi iniquitatem

tem restitui non potest, per virtutem Sacramenti absque miraculo restituitur; quia id fit juxta legem à Deo præscriptam.

## CAPUT VII.

De necessitate Sacramenti Extremæ Unctionis.

**M**eminisse oportet duplicem esse necessitatem; alia dicitur necessitas medii; alia necessitas præcepti, sive Divini, sive Ecclesiastici. De utraque necessitate hic inquirendum. Itaque

Q. 1. *Extrema unctio estne necessaria necessitate medii?*

R. Simpliciter & absolute necessaria non est necessitate medii; quia illud simpliciter & absolute necessarium non est necessitate medii, sine quo salus obtineri potest: atqui sine Extrema Unctione salus obtineri potest, cum sacra illa unctio sit Sacramentum vivorum, supponatque infirmum à peccatis lethalibus solutum & justum.

Dixi, *simpliciter & absolute*; nam Extrema Unctio per accidens, & in quibusdam circumstantiis potest esse necessaria necessitate medii, nempe quando infirmus invincibiliter ignorat se peccato lethali gravatum, nec perfecte contritus est; quia in illo casu absque Extrema Unctione esset dammandus, ut capite præcedenti exposuimus.

Q. 2. *Extrema Unctio estne necessaria necessitate præcepti?*

Certum est 1. Pastores præcepto tum Divino tum Ecclesiastico teneri ministrare illud Sacramentum, etiamsi supponatur nulla necessitas illius recipiendi; tum quia dispensator, quem con-

stituit Dominus super familiam suam, infidelis est, nisi singulis distribuat quæ à Domino accepit in aliorum utilitatem : tum quia Extrema Unctio est Sacramenti Pœnitentiæ perfectio, sicut Confirmatio Baptismi : ergo sicut Episcopi jure divino & Ecclesiastico Confirmationem conferre tenentur : ut suo loco probatum est ; ita Parochi Extremam Unctionem : tum quia Canones Ecclesiæ ita præcipiunt ; *sacra unctione olei inuncti secundum statuta sanctorum Patrum, communione Viatici reficiantur*, inquit Theodorus Cantuariensis libro Pœnitentiali, ut legere est apud Ivonem Carnotensem, & Concilium Cabillonense secundum, *infirmi oleo, quod ab Episcopo benedicitur, à Presbyteris ungi debent*. Concilium quoque Mediolanense quintum, *si ad illius ministrationem accersitus (Parochus) ire neglexerit, cum rationem Deo reddet, tum pœna ab Episcopo graviter plectatur*. Atque ad accendendam Parochorum diligentiam, Patres ipsis ibidem proponunt exemplum Sancti Malachiae in Hibernia Episcopi, de quo S. Bernandus in ejus vita sic narrat cap. 24. *cum pararet ungere eam (mulierem) visum est omnibus differendum potius usque mane, erat enim vespere. Acquievit Malachias . . . . at vero post modicum subito clamor factus est . . . . accurrit Malachias, tumultu audito, & accedens ad lectum, ut certo comperit expirasse, consternatus est animo, sibi imputans, quod fraudata gratia Sacramenti obierit : & elevatis in cælum manibus, Obsecro, Domine, inquit, insipienter egi Ego, ego peccavi qui distuli : non ista, quæ voluit. Hæc dicens contestatus est in audientia omnium, nullam se recepturum consolationem, nullam daturum requiem spiritui suo, nisi, quam tulerat, liceret restituere gratiam. Et stans super eam tota nocte laborabat in gemitu suo,*



*fuo, & pro oleo sancto, longo imbre lacrymarum perfundens mortuam, vicem illi unctionis quam poterat, exhibebat . . . . Quid plura? aperuit oculos, quæ fuerat mortua . . . . Sed & Malacbias gratias agens benedixit Dominum, & unxit eam nihilominus, sciens in hoc Sacramento remitti peccata, & quod oratio fidei salvet infirmum. Post hæc abiit ille, & illa convaleuit.*

Certum est 2. infirmum graviter peccaturum, qui nollet inungi ex contemptu, vel ex illa negligentia, quæ aliis esset offensionis & scandalo, nunc vero, inquit Concilium Trident. c. 3. *tanti Sacramenti contemptus absque ingenti scelere, & ipsius Spiritus sancti injuria esse posset.* Et Concilium Coloniense secundum anno 1549. *Statuimus, ut si quis Sacramentum illud nobis ab Apostolo Jacobo tantopere commendatum contempserit, Ecclesiastica careat sepultura.*

Quæstio igitur solum esse potest, utrum extet divinum præceptum recipiendæ Extremæ Unctionis in ægritudine periculosa?

Negat Suarez disp. 44. sect. 1. num. 2. plures Theologos laudat pro sua opinione, quam vult esse communem. Eam amplexi sunt Estius, Sylvius, & Sanbovius.

Opposita tamen sententia habet suos patronos, ut Magistrum Sententiarum lib. 4. dist. 23. ubi docet, omittere Extremam Unctionem ex contemptu vel negligentia, esse periculosum & damnabile: S. Bonaventura in eandem dist. De mente Sancti Thomæ non ita constat: sed ex recentioribus benemulti, etiam in Academia Parisiensi, eandem sententiam docent ac propugnant, quibus adhærendum videtur, cum sit eadem ratio Extremæ Unctionis ac Confirmationis, quam suo loco demonstravimus præceptam jure divino

& Ecclesiastico : sicut enim Confirmatio est perfectio Baptismi, sic Extrema Unctio est perfectio & consummatio Pœnitentiæ : illa quidem, ut sanum adversus Religionis Christianæ hostes corroboret; ista, ut infirmum confirmet adversus dæmonis tentationes, quæ in vitæ exitu solent esse acriores. Quare

R. Sacramentum Extremæ Unctionis est necessarium necessitate præcepti divini & Ecclesiastici.

Prima pars probatur 1. ex sæpius laudato c. 5. S. Jacobi, *infirmatur quis in vobis? inducat Presbyteros Ecclesiæ. Verbum, inducat, æque præceptum sonat, ac ista, confitemini . . . alterutrum, & orate pro invicem*, quæ Apostolus in eodem orationis contextu usurpat : atqui posteriora verba præceptum exprimunt : ergo & verbum, *inducat*; & ita illud interpretati sunt Patres & veteres Theologi. Unde

Probatur 2. auctoritate Veterum,

Theodorus Cantuariensis in laudato Pœnitentiali sic habet : *secundum auctoritatem canonicam, ne illis (infirmis) janua pietatis clausa videatur, orationibus & consolationibus Ecclesiasticis, sacra unctione olei immuncti secundum statuta sanctorum Patrum, communionem Viatici reficiantur.* Hic laudatur auctoritas canonica, laudantur & statuta sanctorum Patrum : atqui auctoritas illa alia intelligi nequit, quam præceptum in ep. canonica S. Jacobi contentum : ergo. Concilium Cabillonense II. c. 48. sic habet : *Secundum B. Apostoli Jacobi documentum, cui etiam documenta Patrium consentiunt, infirmi oleo, quod ab Episcopis benedicitur, à Presbyteris ungi debent.* Atqui si documentum tum Apostoli, tum sanctorum Patrum

trum esset merum consilium, nulla esset infirmos ungendi obligatio, quam tamen vox, *debent*, exprimit.

Concilium Colonienſe primum anno 1536. *sacra unctio impendatur cum expositione mandati Apostolici.*

Rupertus in vita Hereberti sic refert: *Abbatem Eliam accersivit, quo veniente secundum præceptum Apostoli sacro est unctus oleo in nomine Domini.*

Probatur 3. iisdem rationibus, quas adduximus Tom. 5. Tractatu de Confirmatione cap. 9. pro necessitate illius Sacramenti, utpote quæ similiter urgeant pro Extrema Unctione, ut jam observavimus.

Secunda pars, quæ est de necessitate præcepti Ecclesiastici, necessario sequitur ex dictis in confirmationem primæ partis; sic enim præcepit Deus, ut Fideles in sua infirmitate ad sacram unctiorem recurrant, dubium non est, quin Ecclesia, quæ est fidelis custos præceptorum divinarum, eos ad obsequendum compellat: maternam ejus sollicitudinem testantur Canones Theodori Cantuariensis, Concilii Cabillonensis secundi, & Concilii Colonienſis supra laudati.

Q. 3. *Parochus teneturne grassante peste, conferre Extremam unctiorem cum propriæ vitæ periculo?*

R. 1. Si solus sit in Parochia, nec par sit omnibus Sacramentis ministrandis, prudenterque timeatur periculum, ne ipso deficiente, alius Sacerdos præsto non sit, qui illius vices suppleat; charitas & recta ratio postulant, ut Sacramenta magis necessaria præ aliis conferat. Sed hisce casibus exceptis,

R. 2. Parochus tempore pestis sacram unctiorem Parochianis conferre tenetur.

Pro-

Probatur : quia iustitia exigit , ut pactionis leges serventur ; miles v.g. tenetur ex iustitia pugnare in bello cum vitæ discrimine ; quia nomen suum militiæ dedit ea conditione : atqui Parochus hac lege ad Parochiæ regimen accessit , ut animam pro ovibus poneret ; *bonus Pastor* , ait Dominus Joan. 10. *animam suam dat pro ovibus suis : mercenarius autem , & qui non est Pastor . . . diinitit oves , & fugit.* Ergo. Hanc rationem urget S. Thomas 2. 2. qu. 185. art. 5. in quo sic habet : *Obligant autem se Episcopi ad exequendum Pastorale officium propter subditorum salutem. Et ideo ubi subditorum salus exigit personæ Pastoris præsentiam , non debet Pastor personaliter suum gregem deferere , neque propter aliquod commodum temporale , neque etiam propter aliquod personale periculum imminens , cum bonus Pastor animam suam ponere teneatur pro ovibus suis.* Si vero subditorum saluti possit sufficienter in absentia Pastoris per alium provideri , tunc licet Pastori , vel propter aliquod Ecclesiæ commodum , vel propter personæ periculum , corporaliter gregem deferere. Unde Augustinus dicit in Epistola ad Honoratum : *Fugiant de civitate in civitatem servi Christi , quando eorum quisquam specialiter à persecutoribus quæritur , (sicut S. Athanasius ,) ut ab aliis , qui non ita requiruntur , non deferatur Ecclesia.* Cum autem omnium est commune periculum , hi qui aliis indigent , non deferantur ab his , quibus indigent. Et Nicolaus I. cap. Sciscitaris , causa 7. qu. 1. Non dicimus , inquit , quod persecutorem non fugiamus ; sed quodd præcipue nos , qui tanquam arietes præcipue ducatum gregibus præbemus , imo qui & eorum Pastores sumus , Deo auctore , cum eis in periculis pro viribus persistere pro certo conveniat . . . si perniciosum est Navam in tranquillitate navem deferre , quanto magis in fluctibus ?

Dices:

Dices : Laudata Christi sententia locum non habet, nisi cum oves versantur in extremo damnationis periculo : atqui oves ex defectu Extremæ Unctionis non versantur in ejusmodi periculo ; cum ex dictis Extrema Unctio non sit absolutè ad salutem necessaria : ergo.

R. 1. negando majorem propter absurda quæ ex ea sequuntur, scilicet Pastorem nequidem teneri cum vitæ discrimine excipere confessiones subditorum, qui peste corripuntur ; utpote qui salutis suæ consulere possint per contritionem perfectam ; & ita nulla Pastori necessitas ponendi animam suam, nisi cum sacro fonte abluendus est parvulus, quia hæc sola videtur extrema. Quod ne admittatur, aliud obstat absurdum, nempe Parochum non magis teneri animam ponere pro ovibus suis, quam quemvis privatum, etiam Laicum, qui, si desit Sacerdos, parvulum in extremis positum baptizare tenetur cum evidenti mortis periculo ; ut dictum est ubi de ordine charitatis.

R. 2. negando min. 1. quia ex dictis Extrema Unctio per accidens quibusdam ita est necessaria, ut sine ea in æternum perituri sint : 2. quia etiam si supponatur per confessionem satis consultum quorundam salutis : ex absentia Pastoris, magna in grege sequitur perturbatio, ut advertit S. August. ep. 228. ad Honoratum alias 180. *Annon cogitamus, inquit, cum ad istorum periculorum pervenitur extrema, nec est potestas ulla fugiendi, quantus in Ecclesia fieri soleat ab utroque sexu, atque ab omni ætate concursus, aliis Baptismum flagitantibus, aliis reconciliationem, aliis etiam pœnitentiæ ipsius actionem, omnibus consolationem, & Sacramentorum confessionem & erogationem*

tionem . . . . . quantus denique gemitus omnium, & quorundam quanta blasphemia de absentia ministeriorum & Ministrorum? Vide quid faciat malorum temporalium timor, & quanta in eo sit acquisitio malorum æternorum. Si autem Ministri adsint, pro viribus quas eis Dominus subministrat, omnibus subvenitur, alii baptizantur, alii reconciliantur, nulli Dominici corporis communionem fraudantur, omnes consolantur, ædificantur, non solum verbis, sed exemplo Pastoris, qui extrema subit pericula pro eorum salute, sicque animos sumunt ad ferenda, quibus premuntur, mala, & bona temporalia intuitu æternorum contemnenda. Ex quibus patet ex timiditate & absentia Pastoris plures è grege damnandos fore, qui ejus præsentia & exhortationibus recreati, salvati fuissent.

Instabis: Parochiani non tenentur cum propriæ vitæ periculo Sacramenta actu recipere; sed satis est, si illorum votum habeant: ergo nec Pastor cum simili periculo iis administrare; quia ex dictis ubi de ordine charitatis, non tenemur corporalem proximi salutem nostræ præferre.

Distinguo antec. si conscii non sint peccati mortalis, vel moraliter certi se purgatos contritione, quæ sit charitate perfecta, transeat: secus, Nego antec. & conseq. namque 1. Parochus prudenter timere debet, ne perfecta illa contritio desit pluribus è grege, cum in ejusmodi perturbatione & angustiis sit admodum difficilis, inquit Suarez disp. 44. sect. 3. n. 14. tum propter corporis debilitatem, tum propter sollicitudinem salutis corporalis, quæ multum distrabit animam à spiritualibus: tum propter nimium timorem, ex quo potius tunc homo movetur, quam ex amore; tum denique quia si tunc homo à Pastore suo destituatur, exponitur multis periculis tentationum vel  
despe.

*desperationis, vel nimiae tristitiæ, qua facile potest absorberi. 2. quia dux vel miles in temporali pugna vi sui muneris & officii tenetur exponere vitam suam periculo, etiamsi ex illa pugna absolutè non pendeat salus aut subversio Reipublicæ, satisque est ut ex illa secuturum sit aut magnum commodum, aut grave incommodum: atqui eadem est ratio muneris Pastoralis; verus enim Pastor contra mortis timorem, Domino miserante atque adjuvante, fortiter dimicat, ne veniens lupus gregem sibi creditum rapiat ac dispergat. Fit hoc, inquit S. Augustinus citata epist. 228. ubi Dei charitas flarat, non mundi cupiditas fumat. Charitas enim dicit: Quis infirmatur, & ego non infirmor? quis scandalizatur, & ego non uror? sed charitas ex Deo est. Oremus ergo, ut ab illo detur, à quo jubetur: & per banc magis timeamus, ne oves Christi spiritu tranquillitatis gladio, quàm ne ferro in corpore trucidentur.*

F I N I S.













